

গোড়ীয়
বৈষ্ণবধৰ্ম্ম ও শ্ৰীচেতন্যদেব

দ্বিতীয় খণ্ড

শ্ৰীহেমচন্দ্র সরকার এম, এ,
প্রণীত ।

মূল্য এক টাকা মাত্র ।

শ্রীমতী শকুন্তলা দেবী এম, এ,
কর্তৃক প্রকাশিত
২১০।৬ কর্ণওয়ালিস স্ট্রীট, কলিকাতা।

ব্রাহ্ম মিশন প্রেস
২১১ কর্ণওয়ালিস স্ট্রীট, কলিকাতা
শ্রীদেবেশ্বনাথ বাগ কর্তৃক মুদ্রিত

ভূমিকা

দীর্ঘকালের ব্যবধানে গোড়ীয় বৈষ্ণবধর্মের দ্বিতীয় খণ্ড প্রকাশিত হইল। আগের ভগ্ন স্বাস্থ্যই এই বিলম্বের প্রধান কারণ। প্রথম খণ্ড প্রকাশের পর আমার শরীর আরও ভাঙ্গিয়াছে। দৃষ্টিশক্তি সম্পূর্ণ নষ্ট হইয়াছে। মুখের কথা অস্পষ্ট হইয়াছে। অপরের সাহায্যেও লিখান হুঙ্কর হইয়াছে। এইরূপ অবস্থায় অতি কষ্টে ও বিলম্বে লিখাইয়াছি। কোন রূপে যে গ্রন্থখানি সমাপ্ত হইল তাহার জগৎ গবচ্চরণে কৃতজ্ঞতা অর্পণ করিতেছি। এই খণ্ডে গোড়ীয় বৈষ্ণবধর্মের সাধারণ ইতিহাস ব্যতীত শ্রীপাদ নিত্যানন্দ, শ্রীমদদ্বৈতাচার্য, প ও সনাতন, রঘুনাথ দাস, শ্রীনিবাস আচার্য, নরোত্তম দাস প্রভৃতি চক্রগণের জীবন কাহিনী বিবৃত হইল। অনেক দোষত্রুটি থাকিয়া গাইবার সম্ভাবনা। আশা করি সহৃদয় পাঠকগণ আমার শরীরের অবস্থা বিবেচনা করিয়া ক্ষমার চক্ষুতে দেখিবেন। এই গ্রন্থ শেষ করিতে শ্রীমান্ করালীকুমার কুণ্ডু ও আমার ভ্রাতৃপুত্র শ্রীমান্ ব্যোমকেশ সরকার অনেক সাহায্য করিয়াছেন। সর্বোপরি আমার কন্যা শ্রীমতী কুমন্তলার অক্লান্ত যত্ন ও উত্তম ব্যতীত এই পুস্তক এখনও প্রকাশিত হইতে পারিত না। এখন ভক্ত পিপাসুগণের কথঞ্চিৎ তৃপ্তি হইলে কল শ্রম সার্থক জ্ঞান করিব।

কলিকাতা


আষাঢ়, ১৩৩২

শ্রীহেমচন্দ্র সরকার

সূচীপত্র

বিষয়	পৃষ্ঠা
১। শ্রীচৈতন্যদেবের পরে গোড়ীয় বৈষ্ণবধর্ম	১
২। শ্রীপাদ নিত্যানন্দ	১৩
৩। শ্রীমদদ্বৈতাচার্য	৪০
৪। গোড়ীয় বৈষ্ণব মণ্ডলী	৬২
৫। উৎকলের বৈষ্ণব মণ্ডলী	৭৭
৬। রূপ সনাতন ও বৃন্দাবনের বৈষ্ণব মণ্ডলী	৯১
৭। গোড়ীয় বৈষ্ণব ধর্মের প্রসার	১১২
৮। শ্রীনিবাস আচার্য	১২৩
৯। নরোত্তম ঠাকুর মহাশয়	১৪৭
১০। গোড়ীয় বৈষ্ণব ধর্মের অবসাদ	১৭৩

গৌড়ীয় বৈষ্ণবধর্ম ও শ্রীচৈতন্যদেব



শ্রীচৈতন্যদেবের পরে গৌড়ীয় বৈষ্ণবধর্ম

শ্রীচৈতন্যদেবে গৌড়ীয় বৈষ্ণবধর্মের পূর্ণ বিকাশ হইলেও, সেখানে তাহার পরিসমাপ্তি নয়। তাঁহার পরেও অনেকদিন পর্য্যন্ত শ্রীচৈতন্যদেব প্রবর্তিত ভক্তিপ্রবাহ প্রবলবেগে প্রবাহিত হইয়াছিল। শ্রীচৈতন্যদেবের সময়ে এবং তাঁহার পরেও অনেক উচ্চশ্রেণীর সাধক এবং শক্তিশালী ব্যক্তি গৌড়ীয় বৈষ্ণব ধর্মের ইতিহাসকে সমুজ্জল রাখিয়াছিলেন। তাঁহাদের কাহারও কাহারও পরিচয় আমরা ইতিপূর্বে পাইয়াছি। বর্তমান পুস্তকে আরও অনেকের বিবরণ দেওয়া হইবে। ধর্মপ্রবর্তক মহাপুরুষগণের বিশেষত্ব এই যে তাঁহাদের সংস্পর্শে উষর ক্ষেত্র উর্বর হইয়া উঠে। মহাত্মা বুদ্ধদেবের অভ্যুদয়ে দেশে নবজীবন সঞ্চারিত হইয়াছিল। তাঁহার সংস্পর্শে অনেক শিষ্য নবজীবন লাভ করিয়াছিলেন। মহর্ষি ঈশার প্রভাবে পিটার প্রভৃতি নগণ্যালোক অসীম শক্তিসম্পন্ন ধর্মপ্রচারকে পরিণত হইয়াছিলেন।

সেই প্রকার হজরত মহম্মদের স্পর্শে আরব দেশে নবজীবনের সূত্রপাত হইয়াছিল। শ্রীচৈতন্যদেবের অনুপ্রাণনায় সেই প্রকার বঙ্গদেশ জাগিয়া উঠিয়াছিল। তাঁহার অনুপ্রাণনায় অনেক ক্ষমতামালা লোকের অভ্যুদয় হইয়াছিল। ধর্ম, সাহিত্য, শিল্পে বঙ্গদেশে নবযুগ আসিয়াছিল। শ্রীচৈতন্যদেবের শিষ্যগণ তাঁহার নির্দেশ অনুসারে প্রবল উৎসাহে ভক্তিধর্ম প্রচার করিয়াছিলেন। তাঁহারা স্থানে স্থানে কেন্দ্র স্থাপন করিয়া শ্রীচৈতন্য প্রবর্তিত ধারা প্রসারিত করিয়াছিলেন।

তাঁহার তিরোভাবের পরে কতকগুলি শিষ্য পুরীতে থাকিয়া তাঁহার প্রবর্তিত প্রথা অনুসরণ করিয়া বৈষ্ণবধর্ম প্রচার করিয়াছিলেন। অপর কতকগুলি শিষ্য নানা স্থানে কেন্দ্র স্থাপন করিয়া বঙ্গদেশে ভক্তিদ্বারা প্রবর্তিত রাখিয়াছিলেন। উত্তর-পশ্চিমাঞ্চলে বৃন্দাবনে আর একটি কেন্দ্র হইয়াছিল। ইহারা সকলেই চৈতন্যপ্রবর্তিত প্রথা অনুসারে সঙ্কীর্ণনের সাহায্যে ধর্মপ্রচার করিতেন। উত্তরকালে শ্রীচৈতন্য প্রবর্তিত সঙ্কীর্ণনের বহু উন্নতি সাধিত হইয়াছিল। অল্প দিনের মধ্যে বহু কবি জন্মগ্রহণ করিয়াছিলেন। তাঁহাদের দ্বারা বাঙ্গালা গীতি-সাহিত্যে অসাধারণ উৎকর্ষ সাধিত হইয়াছিল। বৈষ্ণব কবিগণ রাধাকৃষ্ণ ও শ্রীচৈতন্যের মহিমাভাষক অসংখ্য পদাবলী রচনা করিয়াছিলেন। বৈষ্ণবগায়কগণ সেগুলিতে তাল মান সংযোগ করিয়া খোল করতালের সাহায্যে সেগুলি গান করিতেন। বৈষ্ণবগণের দ্বারা সঙ্গীতবিদ্যার বহু উন্নতি হইয়াছিল। তাঁহাদের মধ্যে সঙ্গীত বিদ্যায় পারদর্শী বহু লোক জন্মগ্রহণ করিয়াছিলেন। বৈষ্ণব সঙ্গীতাচার্যগণ নূতন নূতন সুর আবিষ্কার করিয়াছিলেন। সঙ্কীর্ণনের প্রবাহে দেশ প্রাবিত হইয়া গিয়াছিল। প্রতি সন্ধ্যায় গ্রামে গ্রামে মধুর সঙ্কীর্ণন ধ্বনি শ্রুত হইত। ভক্তগণ তাহা শুনিয়া

অশ্রদ্ধারায় প্রাবিত হইতেন। সময়ে সময়ে ক্রমান্বয়ে সমস্ত দিন, তিনদিন, সাতদিন ধরিয়া সঙ্কীর্ণন চলিত।

এই সকল উপায়ে দেশের ধর্মভাব গভীর হইয়াছিল। শ্রীচৈতন্যের বৈষ্ণবসম্প্রদায়ে অনেক গভীর ধর্মভাবসম্পন্ন ভক্তের অভ্যুদয় হইয়াছিল। গভীর বিশ্বাস, প্রগাঢ় ভক্তি, সাত্ত্বিক আচার ব্যবহারের জন্য বৈষ্ণব-সম্প্রদায় জনসাধারণের শ্রদ্ধা আকর্ষণ করিয়াছিলেন। শ্রীচৈতন্যের শিক্ষা প্রভাবে দেশ হইতে, তান্ত্রিক পূজা ও আচার বহু পরিমাণে অপসারিত হইয়াছিল। পশুবলি, মাংস ভক্ষণ অনেক পরিমাণে রহিত হইয়াছিল। জাতিভেদের তীব্রতা খর্ব হইয়াছিল। যে সকল জাতি হিন্দু সমাজে ঘৃণিত ছিল তাহারা সমাজ মধ্যে সম্মান লাভ করিয়াছিল। এতদ্ভিন্ন এক সম্প্রদায়ের বৈষ্ণব হইয়াছিলেন, তাহারা জাতিভেদ সমূলে উৎপাটিত করিয়াছিলেন। তাহারা জাতিভেদের কোন চিহ্ন রাখিতেন না। যে কোন জাতির লোক দীক্ষা গ্রহণ করিয়া এই সম্প্রদায়ভুক্ত হইতে পারিতেন এবং তৎপরে তাহাদের মধ্যেই অবাধে আহার এবং বিবাহাদি সামাজিক অনুষ্ঠান চলিত। ইহাদের মধ্যে বিধবা-বিবাহ প্রচলিত হইয়াছিল এবং নারীর অবস্থার উন্নতি হইয়াছিল। প্রথমে এই সম্প্রদায়ের লোক বিশেষ সমাদৃত হইয়াছিলেন বলিয়া মনে হয়। কেহ বর্ণাশ্রমধর্ম পরিত্যাগ করিয়া এই সম্প্রদায়ে যোগদান করিলে মনে করা হইত তিনি স্বীয় জাতি ও কুল পবিত্র করিয়াছেন। কিন্তু উত্তরকালে এই সম্প্রদায় অশ্রদ্ধা ও ঘৃণার পাত্র হইয়াছিল। নৈতিক শিথিলতা তাহার কারণ। চরিত্র দোষে কোন পুরুষ বা রমণী জাতিচ্যুত হইলে এই সম্প্রদায়ভুক্ত হইত। কালক্রমে বৈষ্ণবমণ্ডলীর ধর্মভাব ম্লান হইলে শ্রীচৈতন্যের শিষ্যগণের অবস্থা হীন হইয়াছিল। ভারতীয় সংস্কার

চেষ্টার ইহা সাধারণ লক্ষণ। এই দেশে কোন ধর্মান্দোলনই দীর্ঘকাল অক্ষুণ্ণ থাকিতে পারে নাই। বৌদ্ধধর্ম ত দেশ হইতে একেবারেই বিতাড়িত হইয়াছে। রামানন্দ, কবীর প্রভৃতি প্রবর্তিত ধর্মধারা একেবারে উন্মূলিত না হইলেও, নিস্তেজ হইয়া রহিয়াছে। গুরু নানক প্রতিষ্ঠিত শিখধর্ম কিছুদিন প্রবল উৎসাহে প্রচারিত হইয়াছিল, কিন্তু অল্পদিন মধ্যেই সে শ্রোত বন্ধ হইয়া যায় এবং তাহার অনেক দুর্গতি হয়। শ্রীচৈতন্য প্রবর্তিত গৌড়ীয় বৈষ্ণব-ধর্মেরও এই প্রকার দুর্গতি হয়।

উত্তরকালে অবসাদগ্রস্ত হইলেও অনেক দিন পর্য্যন্ত শ্রীচৈতন্যের ভক্তিধর্ম বঙ্গদেশ ও তৎপার্শ্ববর্তী প্রদেশে প্রবল বেগে প্রবাহিত হইয়া তৎকালীন সমাজকে সরস রাখিয়াছিল। চৈতন্যদেব ধর্মজীবনের যে আদর্শ দেখাইয়া গিয়াছেন তাহার অনুকরণে বহুসংখ্যক সাধক জীবন গঠন করিয়াছিলেন। আধ্যাত্মিক জীবন লাভের জন্য গভীর ব্যাকুলতা, সরস, স্নমধুর উচ্ছ্বসিত ভক্তি, প্রগাঢ় একনিষ্ঠ সাধন, অকপট বিনয়, অসাধারণ ত্যাগ গৌড়ীয় বৈষ্ণবসমাজকে উন্নত করিয়াছিল। শ্রীচৈতন্যের অভ্যুদয় হইতে ঠাকুর নরোত্তম দাসের তিরোভাব পর্য্যন্ত নাতিদীর্ঘ কালের গৌড়ীয় বৈষ্ণব সমাজে যে সমুদয় সাধু জন্মগ্রহণ করিয়াছিলেন জগতের যে কোন ধর্মসমাজে তাঁহাদের জীবন অলঙ্কার-স্বরূপ হইতে পারিত। বঙ্গদেশ তাঁহাদের জন্মে ধন্য, এবং বাঙ্গালী জাতি তাঁহাদের জীবনে চির গৌরবান্বিত হইয়াছে। দুঃখের বিষয় তাঁহাদের অপূর্ব জীবন-কাহিনী ভালরূপে রক্ষিত হয় নাই, এবং বর্তমান সভ্যজগত তাহার কোন সংবাদ জানেন না। রঘুনাথ দাস, রূপসনাতন, ঠাকুর নরোত্তম প্রভৃতি বৈষ্ণব সাধুগণের সম্পূর্ণ জীবন-চরিত যদি লিখিত হইত তাহা হইলে সেন্ট ফ্রান্সিস, সেন্ট জেভিয়ার,

সেন্ট্ লয়লা প্রভৃতি খৃষ্ট সাধুগণের গায় তাঁহারা সভ্য জগতে সম্মানিত হইতেন। ধর্মের জন্য এমন ব্যাকুলতা জগতে কমই দেখা গিয়াছে। বিষয়-বৈরাগ্য, অসাধারণ ত্যাগ, কঠোর আত্ম-শাসন, অপূৰ্ণ সাধননিষ্ঠা গোড়ীয় বৈষ্ণবধর্মের ইতিহাসকে কিছুকালের জন্য সমুন্নত এবং গৌরবমণ্ডিত করিয়াছিল।

শ্রীচৈতন্যদেবই এই উচ্ছ্বসিত ধর্মভাবের উৎস। বঙ্গদেশের ধর্ম-জীবনে তিনি যে নূতন আবেগ আনিলেন তাহা শতধারে প্রবল বেগে প্রবাহিত হইতে লাগিল। কিন্তু তাঁহার অনুবর্তীগণও স্ব স্ব জীবনের স্বাভাবিক ধর্ম ভাব ও সাধনার দ্বারা এই আবেগকে বহু পরিমাণে পুষ্ট ও শক্তিশালী করিয়াছিলেন। তাঁহাদের অসাধারণ ত্যাগ এবং কঠোর সাধনা শ্রীচৈতন্যদেবের অনুবর্তীগণের উপযুক্তই ছিল। তাঁহারা চৈতন্যদেব প্রবর্তিত সাধনপ্রণালীর অনেক উৎকর্ষ সাধন করিয়াছিলেন। গোড়ীয় বৈষ্ণবধর্মের প্রধান সাধন সঙ্কীৰ্ত্তন। এই সঙ্কীৰ্ত্তন প্রণালী কতটুকু শ্রীচৈতন্যের প্রবর্তিত এবং কতটুকু অনুবর্তীগণের কাৰ্য্য তাহা নিশ্চিতরূপে নির্ণয় করিবার উপায় নাই। আমরা পূর্বেই দেখিয়াছি চৈতন্যদেব খোলকরতাল সহকারে সঙ্কীৰ্ত্তন প্রবর্তন করিয়াছিলেন। উত্তরকালে এই সঙ্কীৰ্ত্তনের যে বহু উন্নতি হইয়াছিল তাহাতে সন্দেহ নাই। পরবর্তী বৈষ্ণব-কবিগণ অসংখ্য পদাবলী রচনা করিয়াছিলেন। বৈষ্ণব গায়কগণ বহু নূতন নূতন সুর আবিষ্কার করিয়াছিলেন। কোনও সঙ্গীতাভিজ্ঞ লেখক বৈষ্ণব সঙ্গীতের ইতিহাস লিখিলে ভাল হয়। বৈষ্ণব পদাবলী এবং বৈষ্ণব সঙ্গীত বঙ্গদেশের একটি বিশেষ সম্পদ। সভ্য জগতে ইহার সমধিক সমাদর এখনও হয় নাই। গোড়ীয় বৈষ্ণবমণ্ডলীতে অনেক উচ্চ শ্রেণীর গায়কের অভ্যুদয় হইয়াছিল। চৈতন্যদেবের সঙ্গীগণের

মধ্যে মুকুন্দ সঙ্গীতের জন্ম প্রসিদ্ধ ছিলেন। নিত্যানন্দের পারিষদগণের মধ্যে মাধব, বাসু এবং গোবিন্দ এই তিন ভ্রাতা সঙ্গীতের জন্ম বিখ্যাত। উত্তরকালে নরোত্তম দাস ও তাঁহার সহযোগীগণ বৈষ্ণব সঙ্গীতের বহু উৎকর্ষ সাধন করিয়াছিলেন।

সঙ্গীর্জন ব্যতীত গৌড়ীয় বৈষ্ণবধর্মসাধনের পক্ষে সাধুসঙ্গ ও সাধু সেবার মহত্ব বিশেষভাবে কীর্তিত হইয়াছে। এমন কি, তাঁহারা ভগবৎসেবার উপরে ভক্তসেবার স্থান নির্দেশ করিয়াছেন। আর কোন ধর্মসম্প্রদায়ে সাধুসঙ্গের এত উচ্চস্থান নির্দেশ করা হইয়াছে বলিয়া মনে হয় না। বৈষ্ণব সাধকগণের সাধুভক্তি ও সাধুসেবা দেখিয়া বিস্মিত হইতে হয়। কথিত আছে, জরাগ্রস্ত বার্কিক্য দশায় কঠোর পরিশ্রমে কৃষ্ণদাস কবিরাজ তাঁহার অমর গ্রন্থ চৈতন্যচরিতামৃত রচনা করিয়া বৃন্দাবনের বৈষ্ণব নেতা শ্রীজীবগোস্বামীর অনুমোদনের জন্ম তাঁহার হস্তে অর্পণ করেন। কিন্তু শ্রীজীবগোস্বামী ঈর্ষাবশতঃ গ্রন্থখানি নষ্ট করিয়া দেন। কৃষ্ণদাস কবিরাজ অম্লানবদনে এই মর্ম্মান্তিক নির্ধ্যাতন সহ করেন। রচনা সময়ে একজন শিষ্য কবিরাজ গোস্বামীর অজ্ঞাতসারে গ্রন্থখানির একটি প্রতিলিপি লইয়াছিলেন বলিয়াই 'চৈতন্য চরিতামৃত' রক্ষিত হইয়াছে। এই কথা সত্য না হইলেও ইহাতে বৈষ্ণবভক্তের অসাধারণ সাধুভক্তির নিদর্শন পাওয়া যায়। শ্রীচৈতন্যদেব স্বয়ং কাহাকেও দীক্ষিত করেন নাই। তাঁহার সময়ে বৈষ্ণবমণ্ডলীতে বিশেষ দীক্ষাপ্রণালী প্রবর্তিত হইয়াছিল কিনা বলা যায় না। কিন্তু উত্তরকালে তাঁহার অনুবর্তীগণের মধ্যে দীক্ষার প্রথা বিশেষভাবে প্রচলিত হইয়াছিল। প্রত্যেক বৈষ্ণবই কোন না কোন গুরুর নিকট দীক্ষা গ্রহণ করিতেন। সাধারণ বৈষ্ণব-ভক্তি ব্যতীত এই গুরুভক্তির বিশেষ প্রচলন ছিল। প্রথম প্রথম

যোগ্যতা অনুসারে গুরু নির্বাচিত হইতেন। এমন কি ব্রাহ্মণও শূদ্রকে গুরুরূপে বরণ করিতেন। কিন্তু উত্তরকালে বংশানুক্রমে গুরু হইতেন এবং এ প্রথার বহু অপব্যবহারও হইয়াছে।

সঙ্কীৰ্ত্তন ও সাধু-সঙ্গের সঙ্গে সঙ্গে ধর্মগ্রন্থ পাঠও বৈষ্ণবমণ্ডলীতে বিশেষ সমাদৃত ছিল। এক একটি আশ্রম বা কেন্দ্রে যেমন নিত্য সঙ্কীৰ্ত্তন হইত, তেমনি প্রতিদিন গভীর শ্রদ্ধার সহিত শ্রীমদ্ভাগবত, চৈতন্যজীবনী প্রভৃতি ভক্তিগ্রন্থ পাঠ হইত। বৈষ্ণবগণ সেই পাঠ শ্রবণ করিয়া ভক্তিতে আপ্নত হইতেন।

বৈষ্ণবমণ্ডলীতে কি প্রকার নিষ্ঠা ও শ্রদ্ধার সঙ্গে গ্রন্থপাঠ হইত তাহার একটি দৃষ্টান্ত এখানে দিতেছি।

সকল মহাস্ত শ্রীনিবাস প্রতি কয় ।
 শুনিতে তোমার মুখে বড় সাধ হয় ॥
 শ্রীমদ্ভাগবত পড় বসি এ আসনে ।
 না কর সঙ্কোচ আমা সবার বচনে ॥
 শুনি শ্রীনিবাস ভূমে পড়ি প্রণমিয়া ।
 করয়ে যে দৈন্য ধৈর্য্য ধরে কে শুনিয়া ॥
 পুনঃ পুনঃ অনুমতি পাইয়া সবার ।
 বসিলা আসনে শোভা হৈল চমৎকার ॥
 পুস্তকে অর্পিয়া পুষ্প তুলসীচন্দন ।
 করয়ে আরম্ভ চারু মঙ্গলাচরণ ॥
 কোকিল জিনিয়া অতি সুমধুর স্বরে ।
 উচ্চারয়ে শ্লোক যেন সুধাবৃষ্টি করে ॥
 শ্রীরাস বিলাস কথা রসের পাথার ।
 কহিতে অধৈর্য্য নেত্রে বহে অশ্রুধার ॥

গৌড়ীয় বৈষ্ণবধর্ম ও শ্রীচৈতন্যদেব

বিবিধ প্রকারে প্রতি পদ্য ব্যাখ্যা করে ।
 নানা রাগ প্রভেদ প্রকাশে পদ্য ধারে ॥
 কি অদ্ভুত কথার মাধুর্য্য ধৈর্য্য নাশে ।
 উপমার স্থান নাই সে মধুর ভাষে ॥
 মহাবর্ষাশ্রায় প্রেমবর্ষে সে কথায় ।
 সকলে বিহ্বল হর্ষ উথলে হিয়ায় ॥
 অনিমিষ নেত্রে চাহে শ্রীনিবাস পানে ।
 নিবারিতে নারে অশ্রু বারয়ে নয়নে ॥
 মহাস্তুগণের হয় যে ভাব বিকার ।
 তাহা এক মুখে কি বর্ণিব মুই ছার ॥
 আত্মবিস্মরিত কেহ মনে মনে কয় ।
 শ্রীশুক অর্পিল শক্তি তেঞি ঐছে হয় ॥
 কেহ কহে শক্তি সঞ্চারিল বেদব্যাস ।
 তেঞি এ অদ্ভুত অর্থ করয়ে প্রকাশ ॥
 কেহ কহে গদাধর পণ্ডিত গোসাঞি ।
 বুঝি যথাশক্তি পূর্ণ প্রকাশে এথাই ॥
 কেহ কহে পণ্ডিত শ্রীবাসাদি রূপায় ।
 ঐছে পাঠলালিত্য কি তুলনা ইহায় ॥
 কেহ কহে গৌরপ্রেম স্বরূপ এ হন ।
 এ মুখে সে বক্তা তেঞি ঐছে আকর্ষণ ॥
 ঐছে স্নেহাবেশে মনে যে হয় সবার ।
 তাহা কেহ বর্ণিবেন করিয়া বিস্তার ॥
 প্রভু পরিকরের কি অদ্ভুত চরিত ।
 করয়ে শ্রবণ যৈছে উপমা রহিত ॥

শ্রীমদ্ভাগবত কথামৃত আশ্বাদনে ।

কৈছে দিন যায় তাহা কিছুই না জানে ॥

শ্রীনিবাস দেখে দিবা অবসান হৈল ।

প্রার্থনা পূর্বক কথামৃত সাক্ষ কৈল ॥

গ্রন্থে প্রণমিয়া অতি দীনতা অস্তরে ।

ভূমে পড়ি প্রণমিলা প্রভু পরিকরে ॥

বৈষ্ণবমণ্ডলীতে ধর্মগ্রন্থের এত সমাদর হইয়াছিল যে উত্তরকালে শিখদিগের গ্রন্থসাহেবের স্থায় অনেক অবস্থাপন্ন বৈষ্ণব পরিবারে চৈতন্যচরিতামৃত প্রভৃতি ভক্তিগ্রন্থের নিত্য পূজা হইত । পুরোহিত আসিয়া প্রতিদিন তুলসী পত্র ও গঙ্গাজল দিয়া এই সকল গ্রন্থ পূজা করিতেন ।

তীর্থ ভ্রমণ বৈষ্ণবদিগের মধ্যে আর একটি সাধন বলিয়া গণ্য ছিল । শ্রীচৈতন্যদেবের জীবদ্দশায় বৈষ্ণব ভক্তগণ তাঁহাকে দেখিবার জন্য নীলাচলে গমন করিতেন । তাঁহার পরলোক গমনের পরেও বৈষ্ণবগণ ভক্তির সহিত তথায় জগন্নাথ দর্শন করিতে যাইতেন । বৈষ্ণবদিগের অপর একটি বিশেষ স্পৃহনীয় তীর্থ স্থান ছিল মথুরা বৃন্দাবন । অষ্টোত্তাচার্য্য, নিত্যানন্দ, চৈতন্যদেব সকলেই সেখানে গমন করিয়াছিলেন । চৈতন্যদেবের পূর্বেও শ্রীকৃষ্ণের ব্রজলীলার ক্ষেত্র বলিয়া বৃন্দাবন হিন্দুদিগের প্রিয় তীর্থ ছিল । কিন্তু চৈতন্যদেবের পরে ইহা বৈষ্ণবগণের বিশেষ সমাদরের স্থান হইয়াছে । তাঁহারা বলেন শ্রীচৈতন্যদেব প্রাচীনকালের লুপ্ত তীর্থ উদ্ধার করিয়াছিলেন । একথা আংশিকভাবে সত্য । শ্রীচৈতন্যদেব তাঁহার অনুবর্তী রূপ ও সনাতনকে বৃন্দাবনে যাইয়া অবস্থান করিতে আদেশ দেন । তখন হইতে বহু বৈষ্ণবভক্ত তথায় স্থায়ীভাবে অবস্থান করেন

১০ গৌড়ীয় বৈষ্ণবধর্ম ও শ্রীচৈতন্যদেব

এবং দলে দলে বৈষ্ণবগণ তীর্থ দর্শনের জন্য মথুরা বৃন্দাবন গমন করিতেন।

শ্রীচৈতন্যদেবের জন্মস্থান বলিয়া নবদ্বীপও বৈষ্ণবগণের একটি প্রধান তীর্থ বলিয়া গণ্য হইয়াছে। নানাস্থান হইতে বৈষ্ণবগণ শ্রীচৈতন্যের জন্মস্থান দেখিবার জন্য নবদ্বীপ আসিতেন। অদ্বৈতাচার্যের বাসস্থান বলিয়া ভক্তগণ শ্রদ্ধার সহিত শান্তিপুরে গমন করিতেন। এতদ্ভিন্ন যে যে স্থানের সহিত বৈষ্ণব নেতাগণের সংস্পর্শ ছিল তৎসমুদয়ই বৈষ্ণব-তীর্থে পরিণত হইয়াছে। কাটোয়ায় যে স্থানে চৈতন্যদেব সন্ন্যাস গ্রহণ করিয়াছিলেন বৈষ্ণবগণ বিশেষ ভক্তির সহিত সে স্থানটি দেখিতেন। ঠাকুর নরোত্তমদাসের জন্মস্থান রাজসাহী জেলার খেতরী গ্রাম এখনও বৈষ্ণবদিগের তীর্থস্থান হইয়া রহিয়াছে। এই সকল স্থান দেখিবার জন্য বৈষ্ণবগণ গভীর ব্যাকুলতা ও শ্রদ্ধার সহিত সর্বদা যাতায়াত করিতেন। বিশেষ বিশেষ দিনে স্থানে স্থানে শত শত লোক একত্রে যাইতেন। এই প্রকার দেশ ভ্রমণে ধর্মভাবের উদ্রেক হওয়া ব্যতীত সাধারণ শিক্ষারও সুযোগ হইত।

এই সকল ছিল বৈষ্ণবদিগের সাধারণ সাধন। তাঁহাদের লক্ষ্য বা সাধ্যবস্তু ছিল প্রেমভক্তি লাভ। শ্রীমদ্ভাগবত গ্রন্থে যে ভক্তির বর্ণনা আছে, শ্রীচৈতন্যদেব নিজ জীবনে যাহা লাভ করিয়াছিলেন, বৈষ্ণবগণ স্ব স্ব জীবনে তাহা লাভ করিবার জন্য প্রয়াস পাইতেন। শ্রীচৈতন্যদেবের পরে অনেক বৈষ্ণব উচ্চশ্রেণীর সাধক হইয়াছিলেন। তাঁহারা শাস্ত্র, দাস্ত্র, সখ্য, বাৎসল্য, মধুর প্রভৃতি বিভিন্ন শ্রেণীর ভক্তির সাধনা করিতেন। বিশেষভাবে দাস্য ও মধুর ভক্তি তাঁহাদের লোভনীয় ছিল। বৈষ্ণব সাধকগণ বৃন্দাবনের গোপীভাব লাভের জন্য ব্যাকুল হইতেন। রাধাকৃষ্ণের আখ্যায়িকায় গোপীগণের যে স্থান বৈষ্ণব-

সাধকগণ চৈতন্যলীলায় সেই স্থান আকাজক্ষা করিতেন। তাঁহারা আপনাদিগকে শ্রীরাধিকার সখীকল্পনা করিতেন। দীক্ষাসময়ে তাঁহারা সখীভাবে নামও গ্রহণ করিতেন। এইরূপে সাধকদিগকে মনীমঞ্জরী, রূপমঞ্জরী প্রভৃতি নাম দেওয়া হইত। বৈষ্ণব সাধকগণ আধ্যাত্মিক জীবনের একটি উচ্চ আদর্শ গ্রহণ করিয়াছিলেন। সেটি স্ত্রীভাব। উনবিংশ শতাব্দীর একজন ধর্মগুরু অধ্যাপক নিউম্যান বলিয়াছেন স্ত্রীভাব লাভ ধর্মজীবনের অতি শ্রেষ্ঠ আদর্শ। তাঁহার বহুপূর্বে বৈষ্ণব সাধকগণ এই আদর্শ ধরিয়াছিলেন এবং জীবনে আয়ত্ত করিয়াছিলেন। প্রত্যেক বৈষ্ণব সাধকই স্ত্রীভাব সাধন করিতেন। এই বিষয়ে বৈষ্ণবদিগের মধ্যে একটি সুন্দর গল্প প্রচলিত আছে। কথিত আছে বিখ্যাত ভক্ত মীরাবাই বৃন্দাবন অবস্থানকালে একবার সনাতন গোস্বামীর সহিত সাক্ষাৎ করিতে ইচ্ছুক হইয়াছিলেন। সংবাদ পাইয়া সনাতন গোস্বামী বলিয়া পাঠান যে তিনি প্রকৃতি সন্তাষণ অর্থাৎ স্ত্রীলোকের সহিত সাক্ষাৎ করেন না। ইহা শুনিয়া মীরাবাই বলেন বৃন্দাবনে দ্বিতীয় পুরুষ আছেন ইহা নূতন কথা। আমি জানিতাম ব্রজেন্দ্রনন্দন এখানে একমাত্র পুরুষ। আর সকলেই প্রকৃতি।

স্ত্রীভাবসাধনের সঙ্গে সঙ্গে বৈষ্ণবগণের হৃদয়ের সমুদয় কোমল প্রকৃতি বিশেষভাবে উদ্ভূত হইয়াছিল। খ্রীষ্টীয়ান বলিতে যেমন কতকগুলি গুণ বোঝায়, বৈষ্ণবনামের সঙ্গে সঙ্গেও তেমনি কতকগুলি গুণ মনে পড়ে। বৈষ্ণবচরিত্র বলিতে মনের সম্মুখে একটি জীবন্ত ছবি জাগিয়া উঠে। এই ছবিতে দয়া, ভক্তি, ব্যাকুলতা, প্রেম, বিনয়, প্রভৃতি গুণরাশি দেদীপ্যমান। এখনও বৈষ্ণব চরিত্রে বিনয়ের গাঢ় বিশেষভাবে দেখিতে পাওয়া যায়। বৈষ্ণব সাধকগণের বিনয় দেখিলে মুগ্ধ হইতে হয়। তাঁহাদের কথায় মধু বর্ষিত হয়। গতি বৃহৎ এবং

মন্দ । সকলকে “বাবা” বলিয়া সম্বোধন করেন । বৈষ্ণব সাধকগণ বৈষ্ণব নামকে নিজ চরিত্র দ্বারা গৌরবান্বিত করিয়াছেন । শ্রীচৈতন্যদেবের সময় হইতেই ঠাকুর নরোত্তম পর্য্যন্ত বহু ভক্ত গোড়ীয় বৈষ্ণব-মণ্ডলীতে জন্মগ্রহণ করিয়াছেন । এই গ্রন্থে তাঁহাদের অনেকের অপূর্ব জীবনকাহিনী যথাসাধ্য লিপিবদ্ধ করা হইল ।

শ্রীপাদ নিত্যানন্দ

গৌড়ীয় বৈষ্ণবধর্মবিধানে শ্রীচৈতন্যদেবের নীচেই নিত্যানন্দের স্থান। বৈষ্ণবগণ তাঁহাকে বলরামের অবতার মনে করেন। বৈষ্ণব-মণ্ডলীতে তাঁহার নাম ও প্রতিপত্তি প্রায় শ্রীচৈতন্যের সমতুল্য। নিত্যানন্দের খ্যাতি এত অধিক কেন ঠিক বুঝা যায় না। প্রতিভার মৌলিকতায় এবং চরিত্রের গাঙ্গীর্যে তিনি চৈতন্যদেবের অপেক্ষা হীন। বৈষ্ণবমণ্ডলীতে তাঁহার প্রতিপত্তির একটি কারণ এই বোধ হয় তিনি বঙ্গদেশে ভক্তি-ধর্ম প্রচার করিয়াছেন। বৈষ্ণব গ্রন্থকারগণের মধ্যে তাঁহার অনেক শিষ্য ছিল। তাঁহারাই বৈষ্ণবধর্মের ইতিবৃত্ত লিখিয়াছিলেন। চৈতন্যদেবের জীবনচরিত লেখক বৃন্দাবন দাস তাঁহার একজন অনুরক্ত ভক্ত ছিলেন। চৈতন্য ভাগবতের শেষ অংশে তিনি নিত্যানন্দের কার্যবিবরণ দিয়াছেন। শ্রীচৈতন্যদেব নিত্যানন্দকে বিশেষ সম্মান করিতেন। তাঁহার সঙ্গে অন্তরঙ্গ ভাবে ভক্তিদ্বন্দ্ব বিষয়ে গভীর পরামর্শ করিতেন। তিনি যখন নীলাচলে বাস করিতেছিলেন সেই সময়ে গোপনে দুইজনে পরামর্শ করিতেন। সম্ভবতঃ ভক্তিদ্বন্দ্ব প্রচার বিষয়ে আলোচনা হইত। বৈষ্ণবগণ নিত্যানন্দকে শ্রীচৈতন্যের ভ্রাতার তুল্য মনে করিতেন। সর্বদাই গৌর-নিতাই দুটি নাম একসঙ্গে উল্লিখিত হয়। শচীদেবী নিত্যানন্দকে অতিশয় স্নেহ করিতেন। কিন্তু তাঁহাদের মধ্যে রক্তের কোন সম্বন্ধ ছিল না।

রাঢ়ে একচক্রা বা একচাকা নামক গ্রামে ব্রাহ্মণ বংশে নিত্যানন্দের জন্ম হয়। তাঁহার পিতার নাম হাড়াই ওঝা এবং মাতা পদ্মাবতী। নিত্যানন্দ তাঁহাদের অতি আদরের ছিলেন। তাঁহার আদি নাম কি

জানা যায় না। প্রথম হইতেই তিনি নিত্যানন্দ নামে অভিহিত হইয়াছেন। কিন্তু মনে হয় এই নাম সম্যাসগ্রহণের সময় প্রদত্ত হইয়াছিল। বাল্যকালেই তাঁহার চিন্তাশীলতা এবং ধর্মে অমুরাগের লক্ষণ প্রকাশ পাইয়াছিল। অল্পবয়সেই তিনি ব্যাকরণ, কাব্য প্রভৃতি শাস্ত্রে অধিকার লাভ করিয়াছিলেন। ভাগবতাদি শাস্ত্রের সহিতও তাঁহার পরিচয়ের প্রমাণ পাওয়া যায়। সঙ্গী বালকদের সহিত তিনি কৃষ্ণ, রাম প্রভৃতির জীবনচরিত অভিনয় করিতেন।

নিত্যানন্দের বয়স যখন বার বৎসর, তখন একজন তীর্থপর্যটক সম্যাসী তাঁহার পিতার গৃহে অতিথি হন। হাড়াই ওঝা পরম সমাদরে অতিথি সৎকার করেন। নিষ্ঠুর সম্যাসী গমনকালে এক নিদারুণ প্রস্তাব করেন। তিনি দক্ষিণাস্বরূপ বালক নিত্যানন্দকে ভিক্ষা চাহিলেন। হাড়াই ওঝা প্রতিজ্ঞাবদ্ধ হইয়াছিলেন; প্রাণের নিত্যানন্দকে তদনুসারে সম্যাসীর হস্তে সমর্পণ করিলেন। কিন্তু পদ্মাবতী ও তিনি প্রিয় পুত্রের বিরহে দারুণ মর্ম্মবেদনা পাইয়াছিলেন। নিত্যানন্দ সেই যে গৃহ হইতে বাহির হইলেন, আর ফিরিলেন না। পিতামাতা আশা করিয়াছিলেন কিছুদিন পরে পুত্র আবার তাঁহাদের দেখিতে আসিবেন। কিন্তু পিতামাতার জীবদশায় তাঁহাদের সহিত নিত্যানন্দের আর সাক্ষাৎ হইয়াছিল বলিয়া মনে হয় না। গৃহ হইতে বহির্গত হইয়া তিনি নানা স্থানে তীর্থপর্যটনে যান। জীবনচরিত লেখকগণ লিখিয়াছেন, তিনি বিশ বৎসর তীর্থ পর্যটন করেন। প্রথমে বোধ হয় সম্যাসীর সঙ্গে যাইতেন। কিন্তু, স্থানে স্থানে একাকী যাওয়ারও উল্লেখ দেখিতে পাওয়া যায়। যেমন চৈতন্যভাগবতে লিখিত আছে—

“তবে বৈদ্যনাথ-বনে গেলা একেশ্বর ॥”

আদি খণ্ড, ষষ্ঠ অধ্যায়।

সর্বপ্রথমে তাঁহারা বকেশ্বর যান। তথা হইতে বৈদ্যনাথ, তৎপরে গয়া হইয়া কাশী যান। এই অল্প বয়সে বালক নিত্যানন্দের গভীর ধর্মালুরাগ লক্ষিত হয়। কাশীতে গঙ্গা দেখিয়া তাঁহার হৃদয়ে প্রগাঢ় ধর্মভাব জাগিয়া উঠে।

“গঙ্গা দেখি বড় সুখী নিত্যানন্দ রায়।

স্নান করে পান করে আর্তি নাহি যায় ॥”

চৈঃ ভাঃ, আঃ খঃ, ৬ষ্ঠ অধ্যায়।

কাশী হইতে মাঘ মাসে প্রয়াগে গিয়া মকর স্নান করেন। তৎপরে মথুরা, বৃন্দাবন দর্শন করেন। জীবনচরিত লেখকগণ যে বিবরণ দিয়াছেন, তাহা যদি ঐতিহাসিক হয় তাহা হইলে এই বয়সেই নিত্যানন্দের গভীর কৃষ্ণভক্তি জন্মিয়াছিল।

“যমুনা-বিশ্রাম ঘাটে করি জলকেলি।

গোবর্দ্ধন পর্বত বলেন কুতুহলী ॥

শ্রীবৃন্দাবন-আদি যত দ্বাদশ বন।

একে একে প্রভু সব করেন ভ্রমণ ॥

গোকুলে নন্দের ঘর বসতি দেখিয়া।

বিস্তর রোদন প্রভু করিলা বসিয়া ॥

তবে প্রভু মদনগোপালে নমস্করি।

চলিলা হস্তিনাপুর—পাণ্ডবের পুরী ॥

ভক্ত স্থান দেখি প্রভু করেন ক্রন্দন।

না বুঝে তৈর্থিক ভক্তি শূন্যের কারণ ॥

চৈঃ ভাঃ, আঃ খঃ, ৬ষ্ঠ অধ্যায়।

অতঃপর তিনি দ্বারকা গমন করেন। সেখান হইতে সিদ্ধপুর ও মৎস্য দেশ গমনের উল্লেখ আছে।

ইহার পরে নিত্যানন্দ দাক্ষিণাত্যে কাঞ্চীপুর (বর্তমান কাঞ্চীভরন) গিয়াছিলেন লিখিত আছে। কিন্তু ইহা ঠিক বলিয়া মনে হয় না। দ্বারকা হইতে কাঞ্চী দীর্ঘ পথ; পথে অনেক তীর্থ আছে। সেগুলি না দেখিয়া তাঁহারা দাক্ষিণাত্যে খাইবেন তাহা মনে হয় না। বিশেষতঃ তাহার পরেই উত্তর ভারতবর্ষের নানা তীর্থ ভ্রমণের বর্ণনা রহিয়াছে। কাঞ্চীর পরে কুরুক্ষেত্র গমন করিয়াছিলেন। তৎপরে প্রভাস, নৈমিষ্য-রণ্য, অযোধ্যা প্রভৃতি বহুস্থান ভ্রমণের উল্লেখ আছে। অযোধ্যায় শ্রীরামের জন্মস্থান দেখিয়া বহু ক্রন্দন করিয়াছিলেন। সেখান হইতে গুহক চণ্ডালের রাজ্যে গমন করিলেন। গুহক চণ্ডালের কথা স্মরণ করিয়া তিনি মুচ্ছিত হইয়া পড়িয়াছিলেন। লিখিত আছে তিনি তিন দিন মুচ্ছিত অবস্থায় ছিলেন। শ্রীরামচন্দ্রের প্রতিও এই সময়ে তাঁহার প্রগাঢ় ভক্তির পরিচয় পাওয়া যায়। যে সকল স্থানের সঙ্গে শ্রীরামচন্দ্রের নাম সংশ্লিষ্ট আছে একে একে তৎসমুদয় দর্শন করিয়া ভক্তিরসে আপ্ত হন।

“যে যে বনে আছিল ঠাকুর রামচন্দ্র।

দেখিয়া বিরহে গড়ি যায় নিত্যানন্দ ॥”

চৈঃ ভাঃ, আঃ খঃ, ৬ষ্ঠ অধ্যায়।

রামায়ণোল্লিখিত গোমতী, গণ্ডকী, শোন প্রভৃতি দর্শন করিয়া মহেন্দ্র পর্বতের উল্লেখ আছে। এই মহেন্দ্র পর্বত দাক্ষিণাত্যের পশ্চিম উপকূলে। কিন্তু ইহার পরেই গঙ্গা জন্মভূমি হরিদ্বার গমনের বিবরণ আছে। কিন্তু ইহাও প্রামাণিক বলিয়া মনে হয় না। ইহার কিছু পরে তিনি দ্রাবিড় গিয়াছিলেন। সেই সময়ে কাঞ্চী, মহেন্দ্র পর্বত প্রভৃতি স্থান গমন অধিকতর সম্ভব।

কোন সময়ে কাহার নিকটে নিত্যানন্দ সন্ন্যাস গ্রহণ করেন তাহার

বিবরণও পাওয়া যায় না। সম্ভবতঃ এই সময়ে তিনি সন্ন্যাস গ্রহণ করিয়াছিলেন। কারণ লিখিত আছে তিনি যখন শ্রীপর্বতে গিয়াছিলেন সেই সময়ে তাঁহার অবধূত বেশ।

“কার্ত্তিক দেখিয়া নিত্যানন্দ মহামতি ।
শ্রীপর্বত গেল যথা মহেশ-পার্বতী ॥
ব্রাহ্মণ ব্রাহ্মণীরূপে মহেশ-পার্বতী ।
সেই শ্রীপর্বতে দৌহে করেন বসতি ॥
নিজ-ইষ্টদেব চিনিলেন ছইজনে ।
অবধূতরূপে করে তীর্থ-পর্যটনে ॥”

১৫তম ভাগবত আঃ খঃ, ৬ষ্ঠ অধ্যায়।

শ্রীপর্বতে ব্রাহ্মণ ব্রাহ্মণী তাঁহাকে পরম সমাদরে গ্রহণ করেন। তাঁহারা তাঁহাকে ভিক্ষা প্রদান করিয়াছিলেন। সন্ন্যাসী অতিথি-সংকারেই ভিক্ষা প্রদান বলিয়া বর্ণনা করা হয়। ইহাতেও মনে হয় নিত্যানন্দ হতিপূর্বেই সন্ন্যাস গ্রহণ করিয়াছিলেন। অতঃপর তিনি দ্রাবিড় গমন করেন এবং বেকটনাগ, কামকোষ্ঠীপুরী, কাঞ্চী, কাবেরী, শ্রীরঙ্গনাথ, দক্ষিণ গথুরা (বর্তমান মাছুরা) প্রভৃতি বহু তীর্থ দর্শন করেন। ইহার পরে বদরিকাশ্রমে গমনের উল্লেখ আছে। বদরিকাশ্রমে কিছুদিন তিনি নির্জনে বাস করেন। সেস্থান হইতে ব্যাসের আলয়গমনের উল্লেখ আছে। তৎপরে বৌদ্ধদের বিহারে যাওয়ার বিবরণ আছে। এহা কোন্ স্থানে তাহা জানা যায় না। বৌদ্ধগণ ধ্যানে মগ্ন হইয়া বসিয়াছিলেন। প্রশ্ন জিজ্ঞাসা করিলে কোন উত্তর না দেওয়ার ক্রোধে অন্ধ হইয়া নিত্যানন্দ তাঁহাদিগকে লাধি মারেন। কিন্তু বৌদ্ধগণ ক্রুদ্ধ হন নাই। ইহাতে তাঁহাদেরই মহত্ব প্রকাশ পায়।

অতঃপর নিত্যানন্দের পুনরায় দক্ষিণ-ভারত ভ্রমণের পরিচয় পাওয়া

যায়। চৈতন্যভাগবতে দক্ষিণসাগর ও কেরল গমনের উল্লেখ আছে। এই সময়ে মাধবেন্দ্রপুরীর সহিত তাঁহার সাক্ষাৎ হইয়াছিল। কোথায় এই মিলন হয় তাহা বুঝিতে পারা যায় না। বোধ হয় দাক্ষিণাত্যেরই কোন অরণ্য প্রদেশে হইয়া থাকিবে। উভয়ের মিলনে বহু আনন্দের সঞ্চার হইয়াছিল। মাধবেন্দ্রপুরী মহা প্রেমিক, রাত্রিদিন কৃষ্ণপ্রেমে মগ্ন থাকিতেন। মেঘ দেখিলে তিনি ভাবে অধীর হইয়া পড়িতেন। হরিনাম শ্রবণে তাঁহার স্বেদ, কম্প, পুলক, অশ্রু দেখা দিত। চৈতন্যদেব তাঁহাকে ভক্তিরসের আদি সূত্রধার বলিয়াছেন। তাঁহার শিষ্যগণ বিশ্বাস করিতেন তাঁহার স্পর্শে ভক্তিলাভ হয়। মাধবেন্দ্রপুরীর শিষ্য ঈশ্বব-পুরীর নিকট শ্রীচৈতন্য গয়ায় দীক্ষা গ্রহণ করেন। তখন হইতেই তাঁহাতে মহাভাবের লক্ষণ প্রকাশ পায়। মাধবেন্দ্রপুরী নিত্যানন্দকে পাইয়া পরম সুখী হন। তাঁহাদেব উভয়েই মধ্যে গভীর প্রীতিব যোগ সংস্থাপিত হয়। নিত্যানন্দ তাঁহাকে গুরুর আশ্রয় সম্মান করিতেন। মাধবেন্দ্রও তাঁহাকে বহু সমাদর করিয়াছিলেন। নিত্যানন্দ বলিয়া-ছিলেন তিনি যত তীর্থ করিয়াছেন মাধবেন্দ্রপুরী দর্শনে তাহা সার্থক হইয়াছিল। মাধবেন্দ্রপুরীও বলিয়াছিলেন নিত্যানন্দকে দেখিয়া সকল তীর্থের ফললাভ হইয়াছে।

“মাধবেন্দ্র বোলে ‘প্রেম না দেখিলু’ কোথা।

সেই মোর সর্ব তীর্থ হেন প্রেম যথা ॥

জানিলু কৃষ্ণের কৃপা আছে মোর প্রতি।

নিত্যানন্দ হেন বন্ধু পাইলু সংহতি ॥

যে সে-স্থানে যদি নিত্যানন্দ সঙ্গ হয়।

সেই স্থান সর্ব তীর্থ-বৈকুণ্ঠাদি ময় ॥”

চৈঃ ভাঃ, আঃ খঃ, ৬ষ্ঠ অধ্যায়।

এই সময়ে মাধবেন্দ্রপুরীর শিষ্য ঈশ্বরপুরী, ব্রহ্মানন্দপুরী প্রভৃতি তাঁহার সঙ্গেরই ছিলেন। ইহারাও নিত্যানন্দের প্রতি অনুরক্ত হইয়াছিলেন। ইহার পূর্বেই নিত্যানন্দের হৃদয়ে প্রেম ভক্তির আবির্ভাবের পরিচয় পাওয়া যায়।

“নিরন্তর কৃষ্ণাবেশে শরীর অবশ।

ক্ষণে কান্দে, ক্ষণে হাসে, কে বুঝে সে রস ॥”

চৈঃ ভাঃ, আঃ খঃ, ৬ষ্ঠ অধ্যায়।

মাধবেন্দ্রপুরীর সহিত মিলনে এই ভক্তিভাব আরও বৃদ্ধি হইয়া থাকিবে। কয়েকমাস মাধবেন্দ্রপুরীর সহিত অবস্থান করিয়া নিত্যানন্দ পুনরায় তীর্থভ্রমণে বহির্গত হন। এবার তিনি সেতুবন্ধ রামেশ্বরের দিকে গিয়াছিলেন।

অতঃপর পূর্ব উপকূল দ্বারা তিনি উত্তরাভিমুখে গমন করেন। এই যাত্রায় বিজয়নগর, গোদাবরী, ত্রিওড়, ত্রিমল্ল, কুর্শনাথ হইয়া তিনি নীলাচল আগমন করেন। শ্রীচৈতন্যদেবও দাক্ষিণাত্য ভ্রমণকালে এই পথ দিয়া পুরী প্রত্যাগমন করিয়াছিলেন। কিন্তু নিত্যানন্দের ভ্রমণকাল যেমন দীর্ঘতর তেমনি তিনি অনেক অধিক তীর্থ দর্শন করিয়াছিলেন। নীলাচলে জগন্নাথের মন্দিরের ধ্বজা দেখিবামাত্র মুচ্ছিত হইয়া পড়েন। জগন্নাথ হইতে গঙ্গা-সাগর সঙ্গমে যান, এবং তৎপর পুনর্বার মথুরায় গিয়া সেখানে স্থায়ী হইয়া বাস করেন। এই সময়ে তিনি বহু কৃষ্ণসাধন করিয়াছিলেন। কিছু আহার করিতেন না; কেহ যদি অযাচিত ভাবে দুগ্ধ দিতেন তাহাই মধ্যে মধ্যে পান করিতেন। বৃন্দাবনে নিত্যানন্দ কতদিন বাস করিয়াছিলেন তাহা ঠিক বুঝা যায় না। তাঁহার সমগ্র তীর্থপর্যটন কাল বিংশতি বৎসর বলিয়া উল্লেখ আছে। এই বিংশতি বৎসরের মধ্যে সম্ভবতঃ বৃন্দাবনে

অবস্থিতিও গণনা করা হইয়াছে। নবদ্বীপে শ্রীচৈতন্যদেব প্রকট হইলে নিত্যানন্দ বৃন্দাবন ছাড়িয়া নবদ্বীপে আসেন।

বৈষ্ণব গ্রন্থকারগণ বলেন, নিত্যানন্দ অস্তরে শ্রীচৈতন্যের প্রকাশ জানিয়া বৃন্দাবন হইতে নবদ্বীপে আসেন। কিন্তু ইহাও হইতে পারে তিনি অভ্যন্ত তীর্থভ্রমণ উপলক্ষ্যে নবদ্বীপ আসেন, অথবা লোকমুখে শ্রীচৈতন্যের প্রকটের সংবাদ পাইয়াছিলেন। সম্ভবতঃ এই সময়ে লোকনাথ বৃন্দাবন আগমন করেন। তাঁহার নিকট শ্রীচৈতন্যের সন্ন্যাসের সংবাদ পাওয়া সম্ভব। নবদ্বীপে পৌঁছিয়া প্রথমে তিনি শ্রীচৈতন্যের সহিত সাক্ষাৎ করেন নাই। নন্দন আচার্য্য নামক একজন প্রদীপ বৈষ্ণবের গৃহে অতিথি হন। বৈষ্ণব-জীবনচরিত লেখকগণ লিখিয়াছেন শ্রীচৈতন্যদেব পূর্ব হইতেই তাঁহার আগমন অনুভব করিয়াছিলেন। দু'একদিন পূর্ব হইতেই সঙ্গীগণকে বলিতেন অবিলম্বে কোন মহাপুরুষের আগমন হইবে। পূর্ব রাত্ৰিতে তিনি এক স্বপ্ন দেখেন যেন তালপ্রমাণ একখানি রথ আসিয়া তাঁহার গৃহদ্বারে দাঙ্গিল। তাহা হইতে একজন দীর্ঘাকৃতি পুরুষ অবতরণ করিয়া জিজ্ঞাসা করিলেন শ্রীচৈতন্যদেবের বাড়ী কোথায়? শ্রীচৈতন্যদেব তাঁহাকে জিজ্ঞাসা করিলেন, আপনি কে? আগন্তুক পুরুষ বলিলেন— ভাই হইয়া পরিচয় জিজ্ঞাসা করিতেছ? এই সকল কারণে শ্রীচৈতন্যদেব পূর্ব হইতেই নিত্যানন্দের আগমনের প্রতীক্ষা করিতেছিলেন। তিনি শ্রীবাস আচার্য্য এবং হরিদাস ঠাকুরকে এই আগন্তুকের অন্বেষণে নগরে প্রেরণ করিলেন। তাঁহারা সমুদয় নগর অন্বেষণ করিয়া ফিরিয়া আসিয়া ~~বলেন~~ কাহাকেও দেখিতে পাইলাম না। তখন শ্রীচৈতন্যদেব স্বয়ং সঙ্গীদের লইয়া অন্বেষণে প্রবৃত্ত হইলেন এবং নন্দনাচার্য্যের গৃহে উপস্থিত হইয়া দেখিলেন এক দীর্ঘাকৃতি, বিশালদেহ, প্রশস্ত ললাট,

আজ্ঞানুলম্বিত বাহু, উজ্জ্বল গৌরবর্ণ পুরুষ বসিয়া আছেন। তখন নিত্যানন্দের পূর্ণ যৌবন। বয়স প্রায় ৩২ বৎসর। শ্রীচৈতন্যদেবেরও বয়স ২২ বৎসরের অধিক হইবে না। সুতরাং নিত্যানন্দ শ্রীচৈতন্য অপেক্ষা দশ বৎসরের বড়। নিত্যানন্দকে দেখিয়া বিশ্বস্তর সসম্মমে প্রণাম করিলেন। নিত্যানন্দ প্রতি-নমস্কার করিলেন। চৈতন্যদেব তখন শ্রীবাস পণ্ডিতকে ভাগবত হইতে কৃষ্ণের স্তুতিবিষয়ক একটি শ্লোক পাঠ করিতে বলিলেন। শ্লোক শুনিয়াই নিত্যানন্দ মূচ্ছিত হইয়া পড়িলেন। শ্রীচৈতন্য “পড় পড়” বলিয়া শ্রীবাসকে উৎসাহিত করিতে লাগিলেন। ক্ষণকাল পরে নিত্যানন্দ সংজ্ঞা পাইয়া আনন্দে নৃত্য করিতে লাগিলেন। কখনও হাসেন, কখনও কাঁদেন, আবার ভূমিতে পড়িয়া কখনও বা গড়াগড়ি দেন। বৈষ্ণবগণ এই অদ্ভুত কৃষ্ণোন্মাদ দেখিয়া বিস্মিত ও ভীত হইলেন। অবশেষে শ্রীচৈতন্যদেব নিত্যানন্দকে ধরিয়া কোলে করিলেন। তখন তিনি শান্ত হইলেন। পরস্পরের পরিচয় হইল : উভয়ে উভয়ের বহু স্তুতি করিলেন। শ্রীচৈতন্যদেব নিত্যানন্দকে বলিলেন, “আপনি স্বয়ং ঈশ্বর ; আপনার চরণ দর্শন করিয়া জীবন সার্থক হইল।” নিত্যানন্দ বলিলেন “তুমি স্বয়ং কৃষ্ণ ; অনেক তীর্থ ভ্রমণ করিলাম, কিন্তু সর্বত্র দেখি সিংহাসন শূন্য। লোকে বলে কৃষ্ণ নবদ্বীপ গিয়াছেন।” এ প্রকার স্তুতিবাদ ও অতু্যক্তি বৈষ্ণব-গ্রন্থে বহুল পরিমাণে দৃষ্ট হয়। সম্ভবতঃ ইহা গ্রন্থকারদেরই কল্পনা।

পঞ্চদিন ব্যাস-পূজা। বহুক্ষণ আলাপের পর শ্রীচৈতন্যদেব নিত্যানন্দকে জিজ্ঞাসা করিলেন, কোথায় আপনার ব্যাস-পূজা হইবে ? নিত্যানন্দ শ্রীবাসকে দেখাইয়া বলিলেন এই ব্রাহ্মণের গৃহে। তখন নিত্যানন্দকে লইয়া বৈষ্ণবগণ শ্রীবাসের গৃহে আসিলেন। সেখানে আসিয়াই প্রমত্ত কীর্ত্তন আরম্ভ হইল। শ্রীচৈতন্য ও নিত্যানন্দ প্রেমে

উন্নত হইয়া নাচিতে লাগিলেন এবং বৈষ্ণবগণ তাঁহাদিগকে ঘিরিয়া কীর্তন করিতে লাগিলেন। ইহাই নিত্যানন্দের প্রথম নবদ্বীপের বৈষ্ণবদলের কীর্তন-সভোগ। অনেক রাত্রি পর্যন্ত সংকীর্তন হইল, অবশেষে বৈষ্ণবগণ স্ব স্ব গৃহ গমন করিলেন। নিত্যানন্দ শ্রীবাসের গৃহেই রহিলেন। বৈষ্ণব-গ্রন্থকারগণ লিখিয়াছেন সেই রাত্রিতেই নিত্যানন্দ স্বীয় সন্ন্যাসের চিহ্ন দণ্ড কমণ্ডলু ভাঙ্গিয়া ফেলেন। নবদ্বীপ আগমনের প্রথম দিনেই এই ঘটনা হইয়াছিল কি না বলা যায় না। তবে ইহা নিশ্চিত যে নবদ্বীপ আগমনের পরেই নিত্যানন্দ দণ্ড কমণ্ডলু ভাঙ্গিয়া ফেলিয়াছিলেন। ইহার কারণ কি বোঝা যায় না।

নিত্যানন্দের চরিত্র কিছু রহস্যময়। সম্ভবতঃ পূর্বে হইতেই সন্ন্যাসের প্রতি তিনি বীতশ্রদ্ধ হইয়াছিলেন। নতুবা দীর্ঘকালের সন্ন্যাসব্রত সাময়িক উত্তেজনায় পরিত্যাগ করিয়াছিলেন তাহা মনে হয় না। উত্তরকালে তিনি সন্ন্যাসের উপর শ্রদ্ধা সম্পূর্ণ হারাইয়া-ছিড়েন এবং গৃহস্থ আশ্রমে প্রবেশ করিয়াছিলেন। কিন্তু মনে হয় তখনও তিনি সন্ন্যাসীর পরিচ্ছদ পরিধান করিতেন। শ্রীচৈতন্যের আদেশে যখন তিনি হরিদাসের সঙ্গে নবদ্বীপের গৃহে গৃহে ধর্মপ্রচার করিয়া বেড়াইতেন তখন উভয়েরই সন্ন্যাসীর বেশ বলিয়া উল্লিখিত আছে।

এখন হইতে শ্রীবাসের গৃহেই নিত্যানন্দের স্থায়ী বাসস্থান হইয়াছিল। শ্রীবাস ও তাঁহার পত্নী পরম সমাদরে তাঁহার পরিচর্যা করিতেন। নিত্যানন্দও তাঁহাদিগকে গভীর শ্রদ্ধা ও প্রীতি করিতেন। তিনি শ্রীবাসকে পিতৃসম্বোধন করিয়াছিলেন এবং শ্রীবাসের পত্নী মালিনী দেবীকে ~~ক~~ বলিয়া ডাকিতেন। মালিনী দেবী স্বহস্তে শিশুর মত নিত্যানন্দকে আহার করাইতেন। সময়ে সময়ে নিত্যানন্দ মালিনী দেবীর

স্নান পান করিতেন বলিয়া লিখিত আছে। নিত্যানন্দ অনেক সময়ে বাল্য ব্যবহার করিতেন। আহারের সময়ে চারিদিকে অন্ন ছড়াইতেন ; ইহা বোধ হয় তিনি ইচ্ছা করিয়াই করিতেন। সম্ভবতঃ জাতিভেদ ও লোকাচারের মস্তকে লগুড়াঘাতের উদ্দেশ্যে 'এরূপ করিতেন। সকলের সঙ্গে আহার করিতে বসিয়া উচ্ছিষ্ট ছড়াইয়া তাঁহাদের জাতি-গত সংস্কার ভগ্ন করিতে প্রয়াস পাইতেন। নবদ্বীপের পথে পথে অনেক সময়ে বালকের গায় চঞ্চলতা প্রকাশ করিতেন। গঙ্গার ঘাটে স্নান করিতে গিয়া বৈষ্ণবগণের চোখে জল ছড়াইয়া দিতেন। কুস্তীর দেখিলে সম্ভরণিয়া ধরিতে বাইতেন। এমন কি এক এক সময়ে ভদ্রগৃহে উলঙ্গ হইয়া মাথায় কাপড় বাঁধিয়া নৃত্য করিতেন। একমাত্র চৈতন্যদেবের বাক্যে শাস্ত হইতেন। চৈতন্যদেবকে তিনি বিশেষ ভক্তি করিতেন। চৈতন্যদেবও নিত্যানন্দকে গভীর শ্রদ্ধা করিতেন। অনেক সময় তাঁহারা একত্রেই থাকিতেন। সঙ্কীৰ্ত্তন সময়ে উভয়ে একত্রে নৃত্য করিতেন। চৈতন্যদেব পড়িয়া গেলে নিত্যানন্দ তাঁহাকে কোলে করিয়া ধরিতেন। শচীদেবীও নিত্যানন্দে স্বীয় পুত্রের গায় ভালবাসিতেন। নিত্যানন্দকে দেখিয়া তাঁহার বিশ্বরূপের কথা স্মরণ হইত। মনে করিতেন সন্ন্যাস হইতে বিশ্বরূপ ফিরিয়া আসিয়াছেন।

নবদ্বীপের বৈষ্ণবগণ সকলেই নিত্যানন্দকে গভীর শ্রদ্ধা ও প্রীতি করিতেন। অন্নদিনের মধ্যেই সকলের সঙ্গেই তাঁহার আন্তরিক যোগ হইয়াছিল। এইরূপে আনন্দে শ্রীবাসের গৃহে তাঁহার দিন কাটিতে লাগিল। শ্রীচৈতন্যদেব যখন ভক্তিদ্বন্দ্ব প্রচার আরম্ভ করিলেন তখন নিত্যানন্দকে একজন প্রচারক মনোনীত করিলেন। শ্রীচৈতন্যের আদেশে নিত্যানন্দ ও হরিদাস নবদ্বীপের ঘরে ঘরে

হরিনাম বিলাইতে লাগিলেন। প্রথম ধণ্ডে তাহা বিবৃত হইয়াছে। জগাই মাধাই উদ্ধারের বিস্তৃত বিবরণও সেখানে দেওয়া হইয়াছে। এখানে তাহার পুনরুল্লেখের প্রয়োজন নাই। জগাই মাধাইয়ের উদ্ধারে নিত্যানন্দের মহত্বই অধিক দেখিতে পাওয়া যায়। এই দুই ব্রাহ্মণ তনয়ের দুর্গতি দেখিয়া তাহাদের উদ্ধারের সঙ্কল্প নিত্যানন্দের হৃদয়ে প্রথমে জাগ্রত হয়। মাধাই নিত্যানন্দকে কলসীর কাণা গ্রহণ করে এবং নিত্যানন্দ অপরাধীর প্রতি অশ্রদ্ধা ক্ষমা প্রদর্শন করেন। নিত্যানন্দ মাধাইকে সন্বোধন করিয়া বলিয়াছিলেন “আমি জন্ম জন্মান্তরেও যদি কোন পুণ্য সঞ্চয় করিয়া থাকি তাহা তোমাকে দিলাম।” আমরা পূর্বেই বলিয়াছি এই কথা জগতের ধর্মসাহিত্যে ঈশার “Father forgive them for they know not what they do,” পিতা, ইহাদিগকে ক্ষমা কর—কারণ ইহারা কি করিতেছে জানে না—এই মহাবাক্যের স্মায় স্বর্ণাকরে লিখিয়া রাখিবার যোগ্য। অধম, পতিত, অপরাধীদের প্রতি নিত্যানন্দের প্রথম হইতেই গভীর করুণার পরিচয় পাওয়া যায়।

এইরূপে শ্রীচৈতন্যের নির্দেশ অনুসারে নিত্যানন্দ নবদ্বীপে ভক্তি-ধর্ম প্রচার করিতে লাগিলেন। ইতিমধ্যে শ্রীচৈতন্যদেবের অন্তরে দারুণ অতৃপ্তি জাগিয়া উঠিল। তিনি গৃহ-ধর্ম পরিত্যাগ করিয়া সন্ন্যাস গ্রহণে কৃতসঙ্কল্প হইলেন। নিত্যানন্দের প্রতি তাঁহার শ্রদ্ধা ও প্রীতির আর একটি পরিচয় এইখানে পাওয়া যায় যে শ্রীচৈতন্যদেব সন্ন্যাস গ্রহণের সঙ্কল্প সর্বাগ্রে নিত্যানন্দকে জানান। নিত্যানন্দ দুঃখিত হইলেও কোন প্রতিবাদ করেন নাই। আমাদের মনে হয় ইতিপূর্বেই নিত্যানন্দের সন্ন্যাস আশ্রমের প্রতি শ্রদ্ধা চলিয়া গিয়াছিল। তিনি সন্ন্যাসের চিহ্ন নিজের দণ্ড কমণ্ডলু ভাঙ্গিয়া ফেলিয়া-

ছিলেন। উত্তরকালে নীলাচলের পথে শ্রীচৈতন্যদেবের দণ্ডে ভক্ত করিয়াছিলেন। কিন্তু চৈতন্যদেবের সন্ন্যাসগ্রহণের সময়ে বিশেষ কোন আপত্তি করেন নাই। তাঁহার অপেক্ষা গদাধর পণ্ডিত চৈতন্যদেবের সন্ন্যাস গ্রহণের প্রতিবাদ করিয়াছিলেন। চৈতন্যদেবের সন্ন্যাস গ্রহণের সময় নিত্যানন্দ তাঁহার সঙ্গে ছিলেন ও সন্ন্যাসের পর তিনি চৈতন্যদেবকে ফিরাইয়া শান্তিপুরে লইয়া যান। চৈতন্যচরিতামৃতের মতে শ্রীচৈতন্যদেব বৃন্দাবন যাইবেন বলিয়া পশ্চিমাভিমুখে গমন করিতেছিলেন। কিন্তু নিত্যানন্দ তাঁহাকে পথ ভুলাইয়া শান্তিপুরে লইয়া আসেন। আমরা পূর্বেই দেখিয়াছি চৈতন্য ভাগবতের মতে শ্রীচৈতন্যদেব স্বয়ংই পশ্চিম গমনের সঙ্কল্প পরিত্যাগ করিয়া দক্ষিণাভিমুখে নীলাচল গমন করেন। পথে কয়েকদিন শান্তিপুরে অষ্টমতের গৃহে ষাপন করেন। পথ হইতে নিত্যানন্দকে নবদ্বীপের ভক্তগণ ও শচীমাতাকে আনিবার জন্য প্রেরণ করেন। কয়েকদিন শচীমাতা ও ভক্তগণের সঙ্গে অষ্টমতভবনে ষাপন করিয়া শ্রীচৈতন্যদেব নীলাচল গমন করেন। সঙ্গে মাত্র অল্প কয়েকজন ভক্ত ছিলেন। তাঁহাদের মধ্যে নিত্যানন্দই প্রধান।

দাক্ষিণাত্য গমনকালে নিত্যানন্দ প্রমুখ সঙ্গীগণকে চৈতন্যদেব নীলাচলে অবস্থান করিতে বলেন। তাঁহারা অন্ততঃ দু'একজনকে সঙ্গে লইবার জন্য বিশেষ অনুরোধ করেন। কিন্তু শ্রীচৈতন্যদেব কিছুতেই তাহাতে সন্মত হন নাই। নিত্যানন্দ বলেন যে দাক্ষিণাত্যের পথ তাঁহার জানা আছে, তিনি তাঁহাকে পথ-প্রদর্শন করিয়া লইয়া যাইতে পারিবেন। কিন্তু তাহাতেও শ্রীচৈতন্যদেব সন্মত হইলেন না। অগত্যা ভক্তগণ তাঁহার আগমনের প্রতীক্ষায় নীলাচলে অবস্থান করিতে লাগিলেন। প্রায় দুই বৎসর পরে চৈতন্যদেব

দাক্ষিণাত্য ভ্রমণ করিয়া নীলাচল প্রত্যাবর্তন করেন। ততদিন পর্যন্ত নিত্যানন্দ নীলাচলে অবস্থান করেন। চৈতন্যদেব ফিরিলে নিত্যানন্দ তাঁহার প্রত্যাগমন বার্তা নবদ্বীপের শচীমাতা ও ভক্তগণের নিকট প্রেরণ করিলেন। গৌড়ের বৈষ্ণবগণ তাঁহার সহিত সাক্ষাতে রথযাত্রার পূর্বে নীলাচল আগমন করেন। বর্ষার চারিমাস নীলাচলে অবস্থান করিয়া তাঁহারা যখন গৌড়ে প্রত্যাবর্তন করেন নিত্যানন্দও সেই সঙ্গে যান। শ্রীচৈতন্যদেব বিশেষভাবে তাঁহার উপরে গৌড় দেশে ভক্তিধর্ম প্রচারের ভার অর্পণ করেন। বিদায়ের পূর্বে নিভূতে তাঁহাদের উভয়ের মধ্যে পরামর্শ হয়। কি বিষয়ে আলোচনা করেন তাহা জানিতে পারা যায় নাই। সম্ভবতঃ ধর্ম-প্রচার বিষয়েই পরামর্শ হইয়া থাকিবে।

একদিন মহাপ্রভু নিত্যানন্দ লঞা ।

দুই ভাই যুক্তি কৈল নিভূতে বসিয়া ॥

কিবা যুক্তি কৈল দুঁহে কেহ নাহি জানে ।

ফলে অনুমান পাছে কৈল ভক্তগণে ॥

চৈঃ, চঃ, মধ্যলীলা, পঞ্চদশ পরিচ্ছেদ ।

নিত্যানন্দের সহিত সাক্ষাৎ হইলেই শ্রীচৈতন্যদেব এইরূপ পরামর্শ করিতেন। চৈতন্যদেব নিত্যানন্দকে বলিয়াছিলেন “তুমি বৎসর বৎসর আমার সহিত সাক্ষাৎ করিতে আসিও না; গৌড়ে থাকিয়া দৃঢ়চিত্তে ধর্ম প্রচার কর।”

“প্রভু বোলে ‘শুন নিত্যানন্দ মহামতি !

সব্বরে চলহ তুমি নবদ্বীপ প্রতি ॥

প্রতিজ্ঞা করিয়া আছি আমি নিজ মুখে ।

‘মূর্খ নীচ দরিদ্র ভাসা’ব প্রেমস্থখে ॥

তুমিও থাকিলা যদি মুনিধর্ম করি ।
 আপন-উদ্দাম-ভাব সব পরিহরি ॥
 তবে মূর্খ নীচ যত পতিত সংসার ।
 বোল দেখি আর কেবা করিব উদ্ধার ॥
 ভক্তিরসদাতা তুমি, তুমি সম্বলিলে ।
 তবে অবতার বা কি নিমিত্তে করিলে ॥
 এতেকে আমার বাক্য যদি সত্য চাও ।
 তবে অবিলম্বে তুমি গৌড় দেশে যাও ॥
 মূর্খ নীচ পতিত দুঃখিত যত জন ।
 ভক্তি দিয়া কর' গিয়া সভার মোচন ।”

চৈঃ ভাঃ, অষ্টাধ্যায়, ৫ম অধ্যায় ।

শ্রীচৈতন্যের নির্দেশ অনুসারে শ্রীপাদ নিত্যানন্দ এখন হইতে গৌড় দেশে বৈষ্ণবধর্ম প্রচারে মনোনিবেশ করিলেন । এই কার্যে রামদাস, গদাধর দাস, রঘুনাথ-বেঙ্গ-ওঝা, কৃষ্ণদাস পণ্ডিত, পরমেশ্বর দাস এবং পুরন্দর পণ্ডিত বিশেষভাবে তাঁহার সহযোগী মনোনীত হইয়াছিলেন । ইহাদিগকে সঙ্গে লইয়া নিত্যানন্দ গৌড় যাত্রা করিলেন । পথ-মধ্যেই তিনি তাঁহাদিগকে আপনার ভাবে মাতাইয়া তুলিয়াছিলেন । রামদাস বিশেষভাবে গোপালভাব সাধন করিয়াছিলেন । একদিন তিনি ত্রিভঙ্গ মূর্তি হইয়া তিন প্রহর বাহুজ্ঞান ভুলিয়া একস্থানে গোপালভাবে দাঁড়াইয়াছিলেন । গদাধর দাস রাধিকাভাব সাধন করিয়াছিলেন । ‘কে দধি লইবে’ বলিয়া ডাকিতেন । রঘুনাথ-বেঙ্গ-উপাধ্যায় রেবতীভাব সাধন করিয়াছিলেন । কৃষ্ণদাস এবং পরমেশ্বর দাস গোপালভাবে সর্বদা মত্ত থাকিতেন । পুরন্দর পণ্ডিত অঙ্গদভাবে অনুপ্রাণিত হইয়া—‘আমি অঙ্গদ বলিয়া’ গাছে চড়িতেন । এইরূপে

ভাবে প্রমত্ত হইয়া পথ চলিতে চলিতে অনেক সময়ে তাঁহারা পথ ভুলিয়া বিপথে চলিয়া যাইতেন। ক্রমে তাঁহারা বঙ্গদেশে উপস্থিত হইলেন। সর্বপ্রথমে তাঁহারা পানীহাটা গ্রামে রাঘব পণ্ডিতের গৃহে অতিথি হইলেন।

রাঘব পণ্ডিত বহু সমাদরে তাঁহাদিগকে অভ্যর্থনা করিলেন। এখানে তিনমাসকাল অবস্থিতি করিয়া নিত্য সংকীর্ণনাদি করিতেন। মাধব ঘোষ নামক একজন সুগায়ক আসিয়া তাঁহাদের সহিত মিলিত হইলেন। মাধব, গোবিন্দ, বাসুদেব তিন ভাই; তাঁহারা সকলেই কীর্তনে বিশেষ অভিজ্ঞ। তিন ভাই যখন কীর্তন করিতেন তখন ভক্তিরসে উচ্ছ্বসিত হইয়া পড়িতেন। তাঁহাদের কীর্তনে নিত্যানন্দ প্রমত্তভাবে নৃত্য করিতেন। তাঁহার অঙ্গে অশ্রু, কম্প, পুলক, স্বেদ দেখা দিত। সঙ্গীগণ নিত্যানন্দের সঙ্গে সঙ্গে ভাবে মত্ত হইয়া উঠিতেন। পানীহাটা গ্রামে নবদ্বীপের ঞায় ভাবের তরঙ্গ উঠিয়াছিল। একদিন সঙ্কীর্ণনের সময় নিত্যানন্দ খাটের উপর বসিয়া আদেশ করিলেন “অভিষেক কর”। রাঘব পণ্ডিত প্রভৃতি বৈষ্ণবগণ তদনুসারে তাঁহার মস্তকে কলস কলস করিয়া গঙ্গাজল ঢালিতে লাগিলেন। তৎপরে তাঁহাকে নববস্ত্র পরিধান করাইয়া দেহে চন্দন লেপন করিলেন। গলদেশে তুলসী মালা অর্পণ করিলেন। নিত্যানন্দ বলিলেন—“আমি কদম্বফুল বড় ভালবাসি। কদম্ব মালা আনিয়া দাও।” ভক্তগণ বলিলেন, “এখন কদম্ব ফুলের সময় নয়; তাহা পাওয়া যাইবে না।” নিত্যানন্দ বলিলেন “উদ্যানে গিয়া দেখ যদি কোন বৃক্ষ ফুল ফুটিয়া থাকে।” কথিত আছে রাঘব পণ্ডিত বাগানে গিয়া দেখিলেন একটি গাছে অনেক কদম্ব ফুল ফুটিয়া আছে। রাঘব পণ্ডিত বিস্মিতহৃদয়ে কদম্ব ফুল চয়ন করিয়া, মালা গাঁথিয়া নিত্যানন্দকে আনিয়া দিলেন।

এই সময়ে আর একটি বিস্ময়কর ঘটনার উল্লেখ আছে। ভক্তগণ দোনাফুলের গন্ধ অমুভব করিলেন। কোথা হইতে এ গন্ধ আসিতেছে তাহা কেহ বুঝিতে পারিলেন না। নিত্যানন্দ বলিলেন “শ্রীচৈতন্যদেব দমনক পুষ্পের মালা পরিয়া তোমাদের কীৰ্ত্তন গুণিতে আসিয়াছেন। তাঁহারই শ্রীঅঙ্গের মালোর এই স্বগন্ধ।” এই সকল ব্যাপার সম্ভবতঃ ভক্তগণের কল্পনা। পানীহাটী গ্রামে অবস্থান কালে আর একটি ঘটনার উল্লেখ দেখিতে পাওয়া যায়। এই সময়ে তাঁহার অলঙ্কার পরিবার ইচ্ছা হইয়াছিল। ভক্তগণকে এই ইচ্ছা জ্ঞাপন করিলে তাঁহারা বিবিধ অলঙ্কার আনিয়া দেন। হাতে সোনার বালা, দশ আঙ্গুলে নানাপ্রকারের অংটি, গলে বিবিধ মণি মুক্তার মালা, কানে ছুল, পায়ে রূপার নূপুর, মস্তকে ও পরিধানে পট্টবস্ত্র, প্রভৃতি বহু মূল্যের সামগ্রী ধারণ করিলেন। লিখিত আছে সে গুলির মুণ্ডা লক্ষ লক্ষ টাকা। ইহা নিশ্চয়ই অত্যাতি। তবে তিনি এখন হইতে অলঙ্কার পরিধান করিতেন। বিরক্ত সন্ন্যাসীর পক্ষে ইহা কিছু বিস্ময়কর; কিন্তু ভক্তগণ তাহাতে তাঁহার প্রতি শ্রদ্ধা হারান নাই। অবশ্য কাহারও কাহারও মনে সন্দেহ জাগিয়াছিল। নবদ্বীপে এক ব্রাহ্মণ ছিলেন; তিনি চৈতন্যের পরম ভক্ত। কিন্তু নিত্যানন্দের অলঙ্কার পরিধান, কর্পূর তাষুল ব্যবহার দেখিয়া তাঁহার মনে সন্দেহ জন্মিয়াছিল। তিনি যখন নীলাচলে শ্রীচৈতন্যদেবকে দেখিতে যান, তাঁহার এই সন্দেহ তাঁহাকে জ্ঞাপন করেন। তদুত্তরে উদারমতি চৈতন্যদেব বলেন—“নিত্যানন্দ উচ্চ-অধিকারী। অধিকারী হইলে এরূপ ব্যবহারে কোন দোষ হয় না।” এই বাক্যে ব্রাহ্মণের সন্দেহ দূর হইয়াছিল।

এইরূপে দিনের পর দিন ভক্ত সঙ্গে কীৰ্ত্তনাদি চলিতে লাগিল। তিন মাস পানীহাটীতে অবস্থান করিয়া নিত্যানন্দ সঙ্গীগণকে লইয়া

গঙ্গার তীরে তীরে নবদ্বীপ অভিযুখে অগ্রসর হইলেন। পথে গ্রামে গ্রামে সঙ্কীর্্তন করিতেন, বালক বৃদ্ধ তাঁহার কীর্তনে মুগ্ধ হইতেন। অল্পবয়স্ক শিশুগণ পর্য্যন্ত ভাবে মত্ত হইয়া “আমি গোপাল” বলিয়া চীৎকার করিয়া বেড়াইত। পথিমধ্যে কয়েকদিন অস্তরঙ্গ পারিষদ গদাধর দাস ও পুরন্দর পণ্ডিতের গৃহে অবস্থান করেন। খড়দহে পুরন্দর পণ্ডিতের গৃহে কিছুদিন থাকিয়া নিত্যানন্দ সদলে সপ্তগ্রাম আগমন করেন। এই স্থান 'গঙ্গাতীরে ত্রিবেণী ঘাট' নামে প্রসিদ্ধ। এখানে উদ্ধারণ দত্ত নামক একজন ধনী বণিকের বাস ছিল। নিত্যানন্দ তাঁহার গৃহে অতিথি হন। উদ্ধারণ দত্ত যে জাতিতে জন্ম গ্রহণ করিয়াছিলেন তৎকালীন হিন্দুসমাজে তাহা হেয় ছিল। কিন্তু নিত্যানন্দ জাতিকুল গ্রাহ্য না করিয়া তাঁহার আতিথ্য স্বীকার করেন। নিত্যানন্দ এই বণিক জাতির প্রতি বিশেষ সদয় ছিলেন। তিনি তাঁহাদিগকে বৈষ্ণব-সমাজে সমাদরে গ্রহণ করিয়াছিলেন। নিত্যানন্দের চেষ্টায় হিন্দুসমাজের ঘৃণ্য জাতিগণের অনেক উন্নতি হইয়াছিল। সপ্তগ্রামে উদ্ধারণ দত্তের গৃহে নিত্যানন্দ সদলে অনেকদিন বাস করিয়াছিলেন। এখানেও নিত্য প্রমত্ত সঙ্কীর্্তন হইত। উদ্ধারণ দত্তও অপরায়ণ বণিকের গৃহে গমন করিয়া মহা উৎসাহে প্রতিদিন সঙ্কীর্্তন করিতেন। মুসলমানগণও এই সঙ্কীর্্তন শুনিয়া অশ্রুপাত করিত।

সপ্তগ্রামে কিছুদিন অবস্থিতি করিয়া শান্তিপুর হইয়া নিত্যানন্দ নবদ্বীপে আসেন। শান্তিপুরে কোনও কাজ করেন নাই, এবং বেশীদিন ছিলেন না। সম্ভবতঃ অষ্টেতাচার্য্য সেখানে কাজ করিতেছেন বলিয়া নিত্যানন্দ তথায় আর কিছু করেন নাই। নবদ্বীপে আসিয়া সর্বাগ্রে শচী মাতাকে দর্শন করেন। তিনিও নিত্যানন্দকে পাইয়া পরম আনন্দিত হইয়াছিলেন। নবদ্বীপে দীর্ঘকাল অবস্থিতি করিয়া

সকীর্্তন দ্বারা বৈষ্ণবধর্ম প্রচার করেন। নবদ্বীপ তখনও সমৃদ্ধশালী নগর। বহু লোকের বাস। বৈষ্ণব নেতাগণের মধ্যে কেহ কেহ নবদ্বীপ পরিত্যাগ করিয়া গিয়াছিলেন। অবশিষ্ট বৈষ্ণবগণ তাঁহাকে পাইয়া সুখী ও সবল হইলেন। নিত্যানন্দ অধম, পতিত, দুর্বৃত্ত সকলকে ধর্মভাবে অনুপ্রাণিত করিয়া তুলিয়াছিলেন। কথিত আছে—সেই সময়ে নবদ্বীপে এক দুর্বৃত্ত দস্য ছিল। ব্রাহ্মণ সম্মান হইলেও এমন কোন দুষ্কার্য ছিল না যাঁহা সে করে নাই। তাঁহার একটি দল ছিল। তাহাদিগকে লইয়া চুরি ডাকাতি করিয়া বেড়াইত। নিত্যানন্দের অঙ্গে বহুমূল্য অলঙ্কার দেখিয়া তাহার লোভ জন্মিল। স্থির করিল রাত্ৰিতে নিত্যানন্দের গৃহে পড়িয়া অলঙ্কারগুলি চুরি করিবে। নিত্যানন্দ হিরণ্য পণ্ডিত নামক একজন ব্রাহ্মণের নির্জন গৃহে বাস করিতেছিলেন। ভক্তগণ ভিন্ন আর কেহ সেখানে থাকিতেন না। দস্য সূযোগ বুঝিয়া এক রাত্ৰিতে তাঁহার গৃহ ঘিরিল। কিন্তু তখন নিত্যানন্দ আহার করিতেছিলেন। ভক্তগণও জাগিয়াছিলেন। তাঁহারা নিদ্রিত হইলে আক্রমণ করিবে মনে করিয়া দস্যগণ অপেক্ষা করিতে লাগিল। কিন্তু কিছুক্ষণের মধ্যে তাহারা নিজেই ঘুমাইয়া পড়িল। যখন ঘুম ভাঙিল তখন রাত্ৰি প্রভাত হইয়া গিয়াছে। প্রত্যুষে দস্যগণ পরস্পরের দোষ দিতে দিতে প্রস্থান করিল। আর এক রাত্ৰিতে আসিয়া তাহারা দেখিল বলবান পাইকগণ গৃহ রক্ষা করিতেছে। আর একদিন যখন তাহারা ডাকাতি করিতে আসিল তখন আকাশে ঘন মেঘ ; দস্যগণ অন্ধকারে পথ দেখিতে পায় না। খাদে, জঙ্গলে, কাঁটা গাছের উপরে পড়িয়া যাইতে লাগিল। তদুপরি শিলাবৃষ্টি আরম্ভ হইল ! তখন দস্যগণের ক্রেশের সীমা রহিল না। বৈষ্ণব গ্রন্থকার এই সকল

ব্যাপারের মধ্যে নিত্যানন্দের দৈবী-শক্তি লক্ষ্য করিয়াছেন। দস্যু-দলপতি নিত্যানন্দের প্রভাবে তাহাদের এই দুর্গতি হইয়াছে মনে করিল। পরদিন নিত্যানন্দের নিকটে আসিয়া তাঁহার চরণতলে পড়িয়া, সকল অপরাধ স্বীকার করতঃ কৃপাভিক্ষা চাহিল। পতিত অধমদের চিরবন্ধু নিত্যানন্দ সহজেই তাহাকে ক্ষমা করিলেন। তিনি বলিলেন,

শুন বিপ্র ! যতেক পাতক কৈলা তুমি ।
আর যদি না কর' সে সব নিলুঁ আমি ॥
পরহিংসা ডাকা চুরি সব অনাচার ।
ছাড় গিয়া সব তুমি, না করিহ আর ॥
ধর্মপথে গিয়া তুমি লহ হরি নাম ।
তবে তুমি অন্তরে করিবা পরিভ্রাণ ॥
যত চোর দস্যু সব ডাকিয়া আনিয়া ।
ধর্মপথ সভারে লওয়াও তুমি গিয়া ॥”

চৈঃ, ভাঃ, অন্ত্যখণ্ড, ৬ষ্ঠ অধ্যায়।

এই বালিয়া স্বীয় গলদেশ হইতে মালা লইয়া নিত্যানন্দ দস্যুর গলায় পরাইয়া দিলেন ; দস্যু তাঁহার চরণে পড়িয়া কাতর ক্রন্দন করিতে লাগিল। দস্যুর জীবনে আমূল পরিবর্তন আগিল। এখন হইতে সে ধর্মসাধন ও ধর্মপ্রচারে দিন যাপন করিতে লাগিল। তাহার চেষ্টায় বহু দস্যু দস্যুবৃত্তি পরিত্যাগ করিয়া সাধু জীবন যাপন করিতে লাগিল।

এইরূপে নিত্যানন্দ প্রবল উদ্যমে ভক্তিদ্বন্দ্ব প্রচার করিতে লাগিলেন। নবদ্বীপ ব্যতীত খানাঘোড়া, বড়গাছি, দোগাছিয়া, ফুলিয়া প্রভৃতি অনেক গ্রামে ধর্ম প্রচার করিয়াছিলেন। তাঁহার কার্য

বিশেষ সফল হইয়াছিল বলিয়া মনে হয়। বঙ্গদেশে ভক্তিধর্মের বিস্তারে নিত্যানন্দের প্রভাব বিশেষভাবে লক্ষিত হয়। বহু শিষ্য তাঁহার সঙ্গে যোগ দিয়াছিলেন। রামদাস প্রভৃতি সাত জন সঙ্গী বাতীত আরও অনেক অন্তরঙ্গ ভক্তের উল্লেখ দেখিতে পাওয়া যায়। বৃন্দাবন দাস নিম্নলিখিত শিষ্যগণের কথা বলিয়াছেন। চৈতন্যদাস, সুন্দরানন্দ, পণ্ডিত কমলাকান্ত, গৌরীদাস পণ্ডিত, বড়গাছি নিবাসী কৃষ্ণদাস, পরমেশ্বর দাস, ধনঞ্জয় পণ্ডিত, বলরাম দাস, যদুনাথ কবিচন্দ্র, জগদীশ পণ্ডিত, পণ্ডিত পুরুষোত্তম, রাঢ়নিবাসী বিপ্র কৃষ্ণদাস, কালিয়া কৃষ্ণদাস, সদাশিব কবিরাজ, তাঁহার পুত্র শ্রীপুরুষোত্তম দাস, উদ্ধারণ দত্ত, মহেশ পণ্ডিত, পরমানন্দ উপাধ্যায়, চতুর্ভূজ পণ্ডিত, নন্দন গঙ্গাদাস, আচার্য্য বৈষ্ণবানন্দ, পরমানন্দ গুপ্ত, কৃষ্ণদাস, দেবানন্দ, মহাস্ত আচার্য্য চন্দ্র, গায়ক মাধবানন্দ ঘোষ, বাসুদেব ঘোষ, জীব পণ্ডিত, মনোহর, নারায়ণ। এই তালিকা হইতে নিত্যানন্দের প্রচার কার্য্যে সফলতার আভাস পাওয়া যায়। বৃন্দাবন দাস স্বয়ংও নিত্যানন্দের অনুবর্তী ছিলেন। নিত্যানন্দের আদে-: তিনি চৈতন্য-ভাগবত রচনা করেন এবং তাঁহার নিকটেই শ্রীচৈতন্যের জীবনীৰ উপাদান প্রাপ্ত হন।

এইরূপে বিপুল উৎসাহে বঙ্গদেশে ভক্তিধর্ম প্রচার করিয়া নিত্যানন্দ নীলাচলে শ্রীচৈতন্যদেবের সহিত সাক্ষাতের জন্ত যাইতে ইচ্ছা প্রকাশ করিলেন। ঠিক কতদিন তিনি নবদ্বীপ ও নিকটবর্তী স্থানে ছিলেন তাহা নিশ্চিত বুঝা যায় না। চৈতন্য-চরিতামৃত অনুসারে তিনি তৃতীয়কে অর্থাৎ পরবর্তী বৎসর গোড়ের বৈষ্ণবগণের সঙ্গে রথযাত্রার সময় নীলাচল যান।

“তৃতীয় বৎসরে সব গোড়ের ভক্তগণ।

নীলাচলে চলিতে সবার হৈল মন ॥

সব মিলি গেলা অষ্টৈত আচার্য্যের পাশে ।
 প্রভু দেখিতে আচার্য্য চলিলা পরম উল্লাসে ॥
 যদ্যপি প্রভুর আজ্ঞা গোড়েতে রহিতে ।
 নিত্যানন্দ প্রভুকে, প্রেমভক্তি প্রকাশিতে ॥
 তথাপি চলিলা মহাপ্রভুকে দেখিতে ।
 নিত্যানন্দের প্রেম-চেষ্টা কে পারে বুঝিতে ॥”

চৈঃ চঃ, মধ্যলীলা, ষোড়শ পরিঃ ।

চৈতন্যভাগবত মতে তিনি তাঁহাদের কিছু পূর্বে নিজ সঙ্গীগণকে লইয়া নীলাচলে যান । সেখানে চার্নৈমাস থাকিয়া গোড়ে প্রত্যাবর্তন করেন । এবারও আসিবার সময় শ্রীচৈতন্যদেব তাঁহাকে বৎসর বৎসর নীলাচলে আসিতে নিষেধ করেন । গোড়ে থাকিয়া একচিত্তে ভক্তি-ধর্ম প্রচার করিতে বলেন । তিনিও সেইরূপ করিয়াছিলেন ।

ইহার পর কোন সময়ে নিত্যানন্দ বিবাহ করেন, ঠিক কোন বৎসর তাঁহার বিবাহ হয় তাহা নির্দেশ করা যায় না । আশ্চর্য্যের বিষয় চরিতামৃত ও ভাগবত উভয় গ্রন্থেই নিত্যানন্দের বিবাহের কোন উল্লেখ নাই । এত বড় ঘটনার কোনও প্রসঙ্গ নাই কেন তাহা বুঝিতে পারা যায় না । কিন্তু, নিত্যানন্দের বিবাহ অবিসম্বাদী ঐতিহাসিক ঘটনা । তাঁহার বংশ পর্য্যন্ত রহিয়াছে । নবদ্বীপ হইতে কিঞ্চিৎ দূরে সালিগ্রাম গ্রামে পণ্ডিত সূর্য্যদাস সরমেল নামক এক ব্রাহ্মণের দুই কন্যা বসুধা ও জাহ্নবীর সহিত তাঁহার বিবাহ হয় । তখন নিত্যানন্দের বয়ঃক্রম ন্যূনাধিক চল্লিশ বৎসর হইবে । এই পরিণত বয়সে দীর্ঘকালের ব্রহ্মচর্য্য ভঙ্গ করিয়া বিবাহ করা কিছু বিস্ময়কর মনে হয় । কিন্তু, বোধ হয়, অনেকদিন হইতেই তাঁহার গৃহস্থাশ্রমের প্রতি আকর্ষণ হইয়াছিল । অনেক পূর্বেই সন্ন্যাস ত্যাগ

করিয়াছিলেন। আমবা দেখিযাছি ইতিপূর্বে তিনি অলঙ্কার, পট্টবস্ত্র, কর্পূর, তাম্বুল প্রভৃতি বিলাসসামগ্রী ব্যবহার করিতে আরম্ভ করিয়াছিলেন। নিত্যানন্দ স্বেচ্ছায় বিবাহ করিয়াছিলেন বলিয়া মনে হয়। শ্রীবাস আচার্য্য প্রভৃতি প্রাণীন নেতাগণ এই কাষে তাঁহার সহায় হইয়াছিলেন।

“নিত্যানন্দ চন্দ্রে বিবাহ করাইতে।

হইল সভার ইচ্ছা তাঁর ইচ্ছামতে ॥

* * *

শ্রীবাস পণ্ডিত মহা উল্লাসিত হৈয়া।

জানাইল সভারে অবৈতাচার্য্যে কৈধা ॥

মন্দ মন্দ হাসে নিত্যানন্দ হৃদয়।

অন্তরে দুর্গম নিত্যানন্দের অন্তর ॥

বিবাহ বিষয়ে হৈল সভার উল্লাস।

বড়গাছি গ্রামে শীঘ্র গেল কৃষ্ণদাস ॥”

ভক্তিরত্নাকর, ১২শ তরঙ্গ।

এই কৃষ্ণদাস নিত্যানন্দের একজন অনুরক্ত ভক্ত। বিবাহ বিষয়ে কৃষ্ণদাসের প্রবল উৎসাহ দেখিতে পাওয়া যায়। তাঁহার বাড়ী বড়গাছি হইতে বিবাহের আয়োজন হয়।

নিত্যানন্দ বিবাহ করিলেন ত, দুইটি বিবাহ কেন করিলেন তাহা আর একটি সমস্যা। আমাদের মনে হয় এই বিবাহের মধ্যে কিছু রহস্য আছে। বোধ হয়, কন্যা দুইটি নিতান্ত বালিকা ছিল না। সম্ভবতঃ কোনও কারণে তাহাদের বিবাহ হইতেছিল না। সূর্য্যদাস সরখেল অবস্থাপন্ন লোক ছিলেন। তিনি গোড়ের রাজসরকারে চাকরী করিয়া যথেষ্ট অর্থ সংগ্ৰহ করিয়াছিলেন।

“নবদ্বীপ হৈতে অল্পদূর সালিগ্রাম ।
তথা বৈসে পণ্ডিত শ্রীসূর্য্যদাস নাম ॥
গোড়ে রাজা যবনের কার্যে সু-সমর্থ ।
সরথেল খ্যাতি উপার্জ্জন বহু অর্থ ॥

* * *

শ্রীসূর্য্যদাসের গুণ कहিল না হয় ।
বসুধা জাহ্নবী নামে তাঁর কন্যাধর ॥
রূপে গুণে দৌহার উপমা নাই দিতে ।
দৌহার বিবাহ লাগি সদা চিন্তে চিতে ॥
বিপ্রগণে দেন ভার বিবাহ-বিষয় ।
আইসে সম্বন্ধ কথু স্থির নাহি হয় ॥”

ভক্তিরত্নাকর, ১২শ তরঙ্গ ।

এইরূপ ধনী ও সম্ভ্রান্ত পিতার, এইরূপ রূপবতী ও গুণবতী কন্যার
সেকালে বিবাহের এত উদ্বেগ কেন পাইতে হইবে তাহা কিছু
আশ্চর্য্যের বিষয় । সম্ভ্রবতঃ অন্ততঃ বিবাহ না হওয়ায় অজ্ঞাতকুলশীল,
পরিণতবধস্ক, ভঙ্গ-সন্ন্যাস-ব্রত নিত্যানন্দের সহিত কন্যার বিবাহ
দিতে সূর্য্যদাস পণ্ডিত সন্মত হন । দেখা যায়, তিনি সহজে বিবাহ দিতে
প্রস্তুত হন নাই । একজন প্রাচীন ব্রাহ্মণ এই বিবাহের প্রস্তাব করেন ।
সূর্য্যদাস পণ্ডিত সেই বিষয়ে চিন্তা করিতে লাগিলেন । বিবাহ
বিষয়ে মনস্থির করিতে স্বপ্নের সাহায্যের প্রয়োজন হইয়াছিল ।
যেভাবেই হউক, সূর্য্যদাস পণ্ডিত নিত্যানন্দের সহিত অবশেষে বিবাহ
দিতে সন্মত হইলেন । অজ্ঞাতকুলশীল, জাতিভ্রষ্ট সন্ন্যাসীর সহিত
একটি কন্যার বিবাহ দিলে অপরটির বিবাহ দেওয়া আরও দুষ্কর
হইবে—এই জন্মই বোধ হয় এক পাত্রের সহিত দুই কন্যার বিবাহ

স্থির হয়। বিশেষ সমারোহের সহিত বিবাহকার্য সু-সম্পন্ন হইয়াছিল বলিয়া বর্ণিত আছে।

বিবাহের পর পত্নীদ্বয়কে লইয়া নিত্যানন্দ বড়গাছি আসেন। সেখানে অমুরাগী ভক্ত কৃষ্ণদাসের গৃহে কয়েকদিন যাপন করিয়া তাঁহারা নবদ্বীপে আগমন করেন। শচীমাতা নিত্যানন্দের পত্নীদ্বয়কে দেখিয়া সন্নেহে অভ্যর্থনা করিলেন। নবদ্বীপের ভক্তগণও বিশেষ প্রীত হইয়াছিলেন। নবদ্বীপে কিছুদিন থাকিয়া নিত্যানন্দ শান্তিপুৰ হইয়া সস্ত্রীক সপ্তগ্রামে আসেন। সেখানে কয়েকদিন অবস্থান করিয়া খড়দহে যান। এখন হইতে নিত্যানন্দ এইখানেই স্থায়ীভাবে বাস করেন। অবশ্য সেখান হইতে বঙ্গদেশের নানাস্থানে ধর্মপ্রচারে যাইতেন। বিবাহের পরে নিত্যানন্দ কতদিন জীবিত ছিলেন তাহা ঠিক জানা যায় না। তবে তাঁহার সম্ভানসম্ভতি হইয়াছিল। বৈষ্ণবগ্রন্থে বীরভদ্র নামে তাঁহার এক পুত্র ও গঙ্গাদেবী নামে এক কন্যার বিবরণ পাওয়া যায়। নিত্যানন্দের বিবাহের পর খড়দহের মণ্ডলী জমাট বাঁধিয়াছিল। এখন হইতে খড়দহ বৈষ্ণবধর্মের একটি প্রধান কেন্দ্র হইয়া উঠিল। বহু ভক্ত আসিয়া নিত্যানন্দের সঙ্গে বাস করিতে লাগিলেন। তাঁহার দুই সহধর্মিণীও তাঁহার সাধন ও প্রচারের বিশেষ সহায় হইয়াছিলেন। তাঁহারা নিত্যানন্দের মৃত্যুর পরেও অনেক বৎসর জীবিত থাকিয়া বৈষ্ণবমণ্ডলীর শক্তি বৃদ্ধি করিয়াছিলেন। বিশেষভাবে বৈষ্ণব ইতিহাসে জাহ্নবীদেবীর কাণ্ডের অনেক উল্লেখ পাওয়া যায়। উত্তরকালে তিনি বৈষ্ণব গোস্বামীগণের মধ্যে পরিগণিত হইয়াছিলেন। বহু বৎসর পরে যখন নরোত্তম দাস খেতরিতে চৈতন্যবিগ্রহ স্থাপন করেন তখন জাহ্নবীদেবী সেখানে প্রধান স্থান লাভ করিয়াছিলেন। তাঁহার

অনুমতি অনুসারে বিষ্ণু আচার্য্য শ্রীনিবাস সমুদয় কার্য্য করেন। অবশ্য নিত্যানন্দের পত্নী বলিয়াই তাঁহাকে এই সম্মানের পদ দেওয়া হইয়াছিল। কিন্তু তাঁহার চরিত্রে বিশেষ বিচক্ষণতা ও তেজস্বিতা বর্তমান থাকা সম্ভব। খেতরি উৎসবের পর জাহ্নবীদেবী বৃন্দাবন গমন করেন। সেখানেও গোস্বামী ও ভক্তমণ্ডলী তাঁহার প্রতি বহু সম্মান প্রদর্শন করেন। এই সময়ে তাঁহার বৃন্দাবনের গোপীনাথের জন্ম এক রাধিকা-মূর্ত্তি গঠনের ইচ্ছা হয়। গোড়ে ফিরিয়া এক রাধিকামূর্ত্তি নিষ্কাণ করিয়া বৃন্দাবনে প্রেরণ করেন। ইহার পরে জাহ্নবীদেবী আর একবার বৃন্দাবন গমন করেন। তিনি গোড়ের বৈষ্ণব-কেন্দ্র-গুলিতে অনেকবার যাতায়াত করিয়াছিলেন। একবার তিনি স্বর্গীয় পাত নিত্যানন্দের জন্মস্থান একচক্রাতেও গিয়াছিলেন।

যতদিন জাহ্নবী দেবী জীবিত ছিলেন খড়দহের বৈষ্ণবমণ্ডলী বেশ জমাট ছিল। তাঁহার মৃত্যুর পরে তাঁহার পুত্র বীরচন্দ্র ঐ মণ্ডলীকে সতেজ রাখিয়াছিলেন। বীরচন্দ্রের জীবন সম্বন্ধে বেশী কিছু জানা যায় না। নিত্যানন্দের পুত্র বলিয়া বৈষ্ণবমণ্ডলীতে তাঁহার যথেষ্ট সম্মান ছিল। তন্নিম্ন তিনি নিজের শক্তিতেও বিখ্যাত নেতা হইয়াছিলেন। জনশ্রুতি, বৈষ্ণবমণ্ডলীতে সম্পূর্ণরূপে জাতিভেদ পরিত্যাগ করিয়া যে আনুষ্ঠানিক সম্প্রদায় হইয়াছে বীরচন্দ্র তাহার প্রবর্ত্তক। ইহা যদি সত্য হয় তাহা হইলে তাঁহাকে একজন সাহসী সংস্কারকও বলিতে হইবে। পিতামাতার গ্ৰাম বীরচন্দ্র সর্বদাই নানাস্থানে বৈষ্ণবকেন্দ্র পরিদর্শন করিতেন। কিন্তু খড়দহেই তাঁহার স্থায়ী কার্য্যক্ষেত্র ছিল। নিত্যানন্দের গ্ৰাম বীরচন্দ্রেরও দুইটি বিবাহ হইয়াছিল। রাঢ়ে ঝামটপুর গ্রামে যদুনন্দন আচার্য্য নামে এক ব্রাহ্মণ বাস করিতেন। বীরচন্দ্র তাঁহার দুই কন্যা শ্রীমতী ও নারায়ণীকে

বিবাহ করেন। বৈষ্ণবনেতাগণ কেন যে একাধিক বিবাহ করিয়া অসং দৃষ্টান্ত প্রদর্শন করিতেন তাহার কারণ বুঝিতে পারা যায় না। বীরচন্দ্রের তিন পুত্র, গোপীজন বল্লভ, শ্রীরামকৃষ্ণ ও শ্রীরামচন্দ্র। তাঁহাদেরও অনেক সন্তান সন্ততি হইয়াছিল।

নিত্যানন্দের কন্যা গঙ্গাদেবীও বৈষ্ণব ইতিহাসে সুপরিচিত। মাধবাচার্য্য নামক এক ব্রাহ্মণের সহিত তাঁহার বিবাহ হয়। তাঁহাদেরও অনেকগুলি পুত্র কন্যা হইয়াছিল। নিত্যানন্দের বংশধরগণ এখনও বঙ্গদেশে নানাস্থানে বাস করিতেছেন। চৈতন্যচরিতামৃতকার নিত্যানন্দকে চৈতন্য-বৃক্ষের প্রথম শাখা বলিয়া বর্ণনা করিয়াছেন। বাস্তবিক নিত্যানন্দ ও তাঁহার বংশধরগণ গোড়ীয় বৈষ্ণবমণ্ডলীর একটি প্রধান স্তম্ভ।

শ্রীমদঐত্যাচার্য

গৌড়ীয় বৈষ্ণবধর্মের প্রারম্ভে তিনজন প্রধান পুরুষের প্রভাব লক্ষিত হয়,—শ্রীচৈতন্যদেব, শ্রীশাদ নিত্যানন্দ ও শ্রীমদঐত্যাচার্য। ইহাদিগের মধ্যে ঐত্যাচার্য সর্বজ্যেষ্ঠ। শ্রীচৈতন্যদেবের যখন জন্ম হয় তখন তাঁহার বয়স পঞ্চাশের উর্দ্ধ। চৈতন্যদেবের অভ্যুদয়ের পূর্বে ঐত্যাচার্য নবদ্বীপের বৈষ্ণবগণের নেতা ছিলেন। শ্রীচৈতন্যদেব যখন বৈষ্ণবধর্ম প্রচার আরম্ভ করেন, তখন ঐত্যাচার্য সপ্ততি বর্ষের বৃদ্ধ। ঐত্যাচার্যের মহত্ত্ব আমরা সর্বাপেক্ষা এইখানে দেখি, যে তিনি চৈতন্যদেবের অভ্যুদয়ের পরে অকাতরে নেতৃত্বপদ তাঁহাকে ছাড়িয়া দেন; সপ্ততি বর্ষের বৃদ্ধ হইয়াও তিনি সমগ্র হৃদয়ে বিংশতি বর্ষের যুবকের প্রাধান্য স্বীকার করেন। তাঁহার মনে ঈর্ষ্যার কোন চিহ্নমাত্র স্থান পায় নাই। অল্পবয়স হইতেই ঐত্যাচার্যের হৃদয়ে ধর্মের প্রতি প্রগাঢ় অহুরাগ ছিল। চারিদিকে ধর্মের গ্লানি দেখিয়া তিনি কাতরহৃদয়ে ভগবচ্চরণে প্রার্থনা করিতেছিলেন। বৈষ্ণবগণ বিশ্বাস করেন, ঐত্যাচার্যের প্রার্থনায় শ্রীচৈতন্যের অবতারণা। খৃষ্টীয় ধর্ম-বিধানে ব্যাপটিষ্ট্ জন যেমন খৃষ্টের পূর্বগামী ছিলেন, বৈষ্ণবধর্ম-বিধানে ঐত্যাচার্যের সেই স্থান।

শ্রীচৈতন্যের পূর্বপুরুষদের গ্রাম ঐত্যাচার্যের পূর্বপুরুষগণ শ্রীহট্টের অধিবাসী ছিলেন। শ্রীহট্টের অন্তর্গত লাউর পরগণার নবগ্রামে তাঁহাদের বাসস্থান ছিল। ঐত্যাচার্যের বৃদ্ধ প্রপিতামহ নৃসিংহ মিশ্র গঙ্গা-বাসের জন্ম শান্তিপুরে একখানি গৃহ নির্মাণ করেন। তিনি

অতি বিচক্ষণ, ধীশক্তিসম্পন্ন লোক ছিলেন। তাঁহার বুদ্ধির পরিচয় পাইয়া তদানীন্তন দিনাজপুরের রাজা তাঁহাকে স্বীয় মন্ত্রীপদে নিযুক্ত করেন। রাজকার্যের জগ্ন অনেক সময়ে তাঁহাকে গোড়দেশে বাস করিতে হইত। এইজগ্ন তিনি গঙ্গাতীরে একটি বাসস্থান প্রস্তুত করেন। ঐঐতীয়াচার্যের পিতা কুবের মিশ্র বৃদ্ধবয়সে এই পৈতৃক গঙ্গাতীরস্থ বাটীতে বাস করিতেন। তিনিও একজন বিদ্বান ও বিচক্ষণ লোক ছিলেন এবং নবগ্রামের রাজা দিব্যসিংহের প্রধান মন্ত্রীপদে নিযুক্ত হইয়াছিলেন। উপযুক্তপরি অনেকগুলি পুত্রশোক পাইয়া প্রৌঢ়বয়সে তিনি গঙ্গাতীরে ধর্মচর্চায় অবশিষ্ট জীবন যাপনের উদ্দেশ্যে শান্তিপুর আগমন করেন। কিন্তু কিছুদিন পরে দিব্যসিংহের নির্বন্ধাতিশয়ে নবগ্রামে প্রত্যাবর্তন করিতে বাধ্য হন। এইখানে পিতামাতার পরিণত বয়সে ঐঐতীয়াচার্যের জন্ম হয়। তাঁহার মাতার নাম লাভা দেবী। তিনি অতিশয় ধার্মিকা ও বুদ্ধিমতী নারী ছিলেন। ঐঐতীয়াচার্যের বাল্যকাল নবগ্রামেই অতিবাহিত হয়। এখানে তাঁহার শিক্ষা আরম্ভ হয়। বাল্যকালেই তাঁহার অসামান্য ধীশক্তির পরিচয় পাওয়া যায়। কথিত আছে, অল্প বয়সেই ক্রমে তাঁহার প্রগাঢ় ভক্তি হইয়াছিল। বৈষ্ণবগ্রন্থকারগণ ঐঐতীয়াচার্যের সম্বন্ধে অনেক অলৌকিক ঘটনা লিপিবদ্ধ করিয়াছেন। তাঁহার মধ্যে একটি এই যে, রাজা দিব্যসিংহ বালক ঐঐতীয়াচার্যকে স্বীয় ইষ্টদেবতা কালীবিগ্রহকে প্রণাম করিতে বাধ্য করেন। তাহাতে তৎক্ষণাৎ সেই বিগ্রহ ভাঙ্গিয়া পড়িয়া যায়। রাজা দিব্যসিংহ শক্তি উপাসক ছিলেন। বালক ঐঐতীয়াচার্য প্রগাঢ় কৃষ্ণভক্ত। এইজগ্ন কালীর উপাসক রাজার রাজ্যে বাস করিতে অনিচ্ছুক হইয়া ঐঐতীয়াচার্য পিতাকে শান্তিপুরে বাস করিতে অমুরোধ করেন। কুবের পণ্ডিত এই প্রস্তাবে সম্মত

হইয়া পুনরায় শান্তিপুরগমন স্থির করিলেন। দিব্যসিংহ প্রিয় মন্ত্রীর বিচ্ছেদে কাতর হইয়া কুবের পণ্ডিত ও বালক অষ্টদেবকে নবগ্রামে থাকিবার জন্ত বহু অনুনয় বিনয় করেন। এমন কি, অষ্টদেবের ইচ্ছা অনুসারে শক্তিপূজা ছাড়াইয়া কৃষ্ণপূজা আরম্ভ করিতে প্রতিশ্রুত হন। কিন্তু, বালক অষ্টদেব কিছুতেই তাহাতে সন্মত হইলেন না। যে কারণেই হউক, অল্প বয়সেই অষ্টদেব স্বীয় পিতার সহিত শান্তিপুরে আসিয়া বাস করেন।

তাঁহার শিক্ষা প্রধানতঃ শান্তিপুরেই হইয়াছিল। অল্প বয়সেই ব্যাকরণ, সাহিত্য ও ষড়দর্শন অধ্যয়ন করিয়া তিনি শান্তিপুরের নিকটস্থ ফুলবাড়ী গ্রামে শান্ত ভট্টাচার্য্য নামক একজন বেদজ্ঞ আচার্য্যের নিকট বেদ অধ্যয়ন করিতে যান। তখন তাঁহার বয়স ন্যূনাধিক বারবৎসর হইবে। বেদ অধ্যয়ন সমাপ্ত করিয়া তিনি ভাগবত পাঠ করেন। ঠিক কত দিন তিনি শান্তাচার্য্যের নিকট ছিলেন তাহা জানা যায় না। তবে দুই বৎসরের অধিক হইবে না বলিয়া মনে হয়। কেননা, অষ্টদেবাচার্য্য ফুলবাড়ী হইতে শান্তিপুর প্রত্যাগমন করিলে তাঁহার পিতামাতা পরলোক গমন করেন। তখন তাঁহার বয়স পঞ্চদশ বৎসর মাত্র। এক দিবসেই অষ্টদেবাচার্য্যের পিতামাতা পরলোক গমন করেন বলিয়া উল্লেখ আছে। সম্ভবতঃ লাভাদেবী পতির সহমৃত্যু হন। পিতামাতার মৃত্যুতে অষ্টদেবাচার্য্য পৃথিবীর সকল বন্ধন হইতে মুক্ত হইলেন। তাঁহার পিতা তাঁহাকে গয়ায় পিণ্ড দিবার জন্ত আদেশ করিয়াছিলেন। তদনুসারে কিছুদিন পরে অষ্টদেবাচার্য্য গয়া গমন করেন। তথা হইতে তিনি নানাস্থানে তীর্থ পর্য্যটনের জন্ত বহির্গত হন।

অষ্টদেবাচার্য্য গয়া হইতে বাহির হইয়া দক্ষিণাভিমুখে চলিলেন।

প্রথমে রেমুনা আসিয়া তৎপরে পুরী যান। পুরীতে জগন্নাথ দর্শনে তাঁহার মহাভাবের উদ্রেক হয়। “হা প্রাণনাথ, হা প্রাণনাথ” বলিতে বলিতে তিনি সংজ্ঞাহীন হইয়া ভূমিতলে পতিত হন ; পুনরায় চেতনা প্রাপ্ত হইয়া “আমি কৃষ্ণধন পাইলাম” বলিয়া হুঙ্কার করিয়া উঠিলেন। তথায় কিছুদিন অবস্থান করিয়া সেতুবন্ধ রামেশ্বরে যাইবার ইচ্ছায় ক্রমে দক্ষিণাভিমুখে অগ্রসর হন। পথে গোদাবরী, কাবেরী, শিবকাঞ্চী, পাপনাশন, দক্ষিণমথুরা প্রভৃতি নানা তীর্থ দর্শন করিয়া বহুদিন পর সেতুবন্ধে উপস্থিত হন। রামেশ্বরেও তাঁহার ভাবাবেশের উল্লেখ আছে। এক দিবস সমস্ত রাত্রি তিনি রামায়ণ পাঠে অতিবাহিত করিয়াছিলেন। সেতুবন্ধ হইতে পশ্চিম উপকূলে দীর্ঘপথ অতিক্রম করিয়া উলুপীতে মধ্বাচার্যের আশ্রমে উপনীত হন। তখন মাধবেন্দ্রপুরী মধ্বাচার্য সম্প্রদায়ের অধিনায়ক ছিলেন। ইনি মহাপ্রেমিক ; অনুক্ষণ কৃষ্ণপ্রেমে মগ্ন থাকিতেন। ঐতীয়াচার্য যে সময়ে আশ্রমে উপস্থিত হন তখন শাণ্ডিল্য সূত্র ও নারদসূত্রের ব্যাখ্যান হইতেছিল। তাহা শ্রবণ করিয়া তিনি প্রথমে উচ্ছ্বসিত হইয়া নৃত্য করিতে করিতে মূচ্ছিত হইয়া ভূতলে পতিত হন। আশ্রমবাসীগণ আগন্তকের অসামান্য ভাববিকার দেখিয়া বিস্মিত হইলেন। মূচ্ছিত ঐতীয়াচার্যকে বেষ্টন করিয়া তাঁহার উচ্চৈশ্বরে হারিনাম করিতে লাগিলেন। ক্রমে ঐতীয়ার সংজ্ঞা হইল। তখন তিনি “ভক্তি দাও, ভক্তি দাও” বলিয়া ক্রন্দন করিতে লাগিলেন। কিঞ্চিৎ স্থির হইলে মাধবেন্দ্রপুরীকে প্রণাম করিয়া ঐতীয়াচার্য তাঁহার নিকট ভক্তিধর্ম শিক্ষার প্রার্থনা জানাইলেন। মাধবেন্দ্রপুরী সানন্দে তাঁহাকে আশ্রমে থাকিয়া ভগ্নিশাস্ত্র পাঠের অনুমতি দিলেন। ঐতীয়াচার্য কিছুদিন আশ্রমে থাকিয়া মাধবেন্দ্রপুরীর নিকট ভাগবত ও মাধ্বাচার্যের ভাষ্য অধ্যয়ন

করিলেন। ইতিপূর্বেই অষ্টেতাচার্যের হৃদয়ে চারিদিকে ধর্মের গ্লানি দেখিয়া দারুণ বেদনা জাগিয়াছিল। এ বিষয়ে অনেক সময়ে তিনি মাধবেন্দ্রপুরীর সহিত আলাপ করিতেন। মাধবেন্দ্রপুরী তাঁহার ব্যাকুলতা দেখিয়া ক্রীত হইয়াছিলেন। এই সময় হইতেই উভয়ের মধ্যে যোগ স্থাপিত হইয়াছিল। উত্তরকালে অষ্টেতাচার্য মাধবেন্দ্রপুরীর নিকট দীক্ষা গ্রহণ করেন; মাধবেন্দ্রপুরী তীর্থদর্শন উদ্দেশ্যে কখনও বৃন্দাবন, কখনও নীলাচল প্রভৃতি নানাস্থানে ভ্রমণ করিতেন। একবার শান্তিপুরে অষ্টেতাচার্যের গৃহেও আসিয়াছিলেন। কিছুদিন মধ্বাচার্য আশ্রমে বাসকরিয়া অষ্টেতাচার্য পুনর্বার তীর্থভ্রমণে বাহির হন।

ক্রমে ক্রমে দণ্ডকারণ্য, নাসিক, দ্বারকা, প্রভাস, পুষ্কর, কুরুক্ষেত্র, হরিদ্বার, বদরিকাশ্রম, গোমুখী, গণ্ডকীশালগ্রাম প্রভৃতি বহু তীর্থ দর্শন করিয়া তিনি মিথিলা আগমন করেন। এখানে কবির বিদ্যাপতির সহিত তাঁহার সাক্ষাৎ হয়। একদিন অষ্টেতাচার্য একটি স্থানে বসিয়া আছেন, এমন সময়ে সুমধুর সঙ্গীত ধ্বনি শুনিতে পাইলেন। স্বর লক্ষ্য করিয়া গমন করিয়া দেখিলেন একটি বটবৃক্ষতলে একজন ব্রাহ্মণ গান করিতেছেন। অষ্টেতাচার্য প্রেমে পূর্ণ হইয়া তাঁহাকে আলিঙ্গন করিলেন। ক্রমে উভয়ের মধ্যে পরিচয় হইল। অষ্টেতাচার্য বিদ্যাপতির কবিত্ব ও স্বরলাগিতোর বহু স্তুতিবাদ করিলেন। বিদ্যাপতিও বৈষ্ণবোচিত দীনতা সহকারে নিজের অধমতা প্রকাশ করিলেন। মিথিলা হইতে অষ্টেতাচার্য অষোধ্যা হইয়া বারাণসীতে উপস্থিত হইলেন। এখানে মাধবেন্দ্রপুরীর প্রধান শিষ্য বিজয়পুরীর সহিত তাঁহার সাক্ষাৎ হয়। ইনি অষ্টেতাচার্যের পূর্ব পরিচিত। ইহার জন্মস্থান শ্রীহট্টের নবগ্রাম। ইহার পিতা অষ্টেতের মাতা

লাভাদেবীর পিতৃ-পুরোহিত । সেই সম্পর্কে ঐত্যাচার্য বিজয়পুরীকে মামা বলিতেন । এই আকস্মিক মিলনে উভয়েই অতিশয় হৃষ্ট হইয়াছিলেন । পরম্পরের বিগত ইতিহাস শ্রবণে ও কৃষ্ণ কথায় কয়েকদিন স্থখে অতিবাহিত করিয়া ঐত্যাচার্য বারাণসী হইতে প্রয়াগ গমন করেন । প্রয়াগে কিছুদিন অবস্থান করিয়া ত্রিবেণীতে স্নান, তপস্যাদি করিয়া তিনি মথুরা যান ।

মথুরা ও বৃন্দাবনে অনেকদিন থাকিয়া কৃষ্ণলীলার সমুদয় স্থান দর্শন করেন । বৃন্দাবনে ঐত্যাচার্য মদনগোপালের সেবা প্রতিষ্ঠিত করেন । কথিত আছে, এক রাত্ৰিতে মদনগোপাল স্বপ্নে তাঁহাকে দেখা দিয়া বলেন, যে, আমি যবনের ভয়ে যমুনাতীরে লুক্কায়িত আছি । তুমি গ্রামবাসীগণের সাহায্যে আমাকে বাহির করিয়া আমার সেবা প্রকটিত কর । অল্প মাটির নীচে আমাকে পাইবে । নিদ্রাভঙ্গে ঐত্যাচার্য হৃষ্টচিত্তে গ্রামবাসীগণকে ডাকিয়া নির্দিষ্ট স্থান খুঁড়িতেই মদনগোপালের বিগ্রহ পাইলেন । ভক্তিসহকারে প্রস্তর মূর্তি উত্তোলন করিয়া বৃক্ষতলে তাহা প্রতিষ্ঠিত করেন, এবং পূজার জন্ত একজন পূজারী রাখিয়া দিলেন । কিছুদিন পরে, একদল দুর্বৃত্ত যবন হিন্দুদিগের ধর্মহানির জন্ত প্রতিমা অপহরণ করিতে আসিয়াছিল । কিন্তু আসিয়া দেখিল মদনগোপাল সেখানে নাই । তখন তাহারা নিরাশ চিত্তে ফিরিয়া গেল । নিয়মিত সময়ে পূজার জন্ত পূজারী আসিয়া বিগ্রহ না দেখিয়া দুঃখিত ও চিন্তিত হইলেন । সে সময়ে ঐত্যাচার্য অগ্ৰত গিয়াছিলেন । তিনিও ফিরিয়া মদনগোপালকে না দেখিয়া অতিশয় কাতর হইলেন । মনের দুঃখে বৃক্ষতলে শয়ন করিয়া রহিলেন । ক্রমে নিদ্রিত হইয়া পড়িলেন । পুনরায় স্বপ্নে দর্শন দিয়া মদনগোপাল তাঁহাকে জানাইলেন—যবনেরা তাঁহাকে লইতে পারে নাই । তিনি

নিকটবর্তী পুষ্পবনে লুক্কায়িত আছেন। তখন অষ্টৈতাচার্য্য বিগ্রহ পুনরায় পূর্বস্থানে সংস্থাপিত করিয়া নিয়মিত পূজার ব্যবস্থা করিলেন। এ সকল বিবরণের মূলে কতটুকু সত্য আছে তাহা বলা যায় না। ইহা খুব সম্ভব, যে, মদনগোপালের বিগ্রহ যমুনাতীরে মৃত্তিকা মধ্যে প্রোথিত ছিল; অষ্টৈতাচার্য্য তাহা দেখিতে পাইয়া পূজার ব্যবস্থা করেন। ইহার অল্পদিন পরেই তাঁহার স্বদেশে প্রত্যাগমন করিতে আগ্রহ হয়। তদনুসারে দীর্ঘকাল তীর্থভ্রমণের পর তিনি শান্তিপুর ফিরিয়া আসিলেন। দেখা যাউতেছে অষ্টৈতাচার্য্য, নিত্যানন্দ, চৈতন্যদেব তিনজন বৈষ্ণব নেতাই তীর্থভ্রমণ উপলক্ষ্যে ভারতবর্ষের নানাস্থান দর্শন করিয়াছিলেন। সেকালের পক্ষে ইহা একটি কম শিক্ষা নহে। ইহাদের মধ্যে চৈতন্যদেবই অপেক্ষাকৃত অল্প স্থান গিয়াছিলেন, এবং নিত্যানন্দের অভিজ্ঞতা সর্বাপেক্ষা অধিক। বৃন্দাবন হইতে আসিবার সময় কৃষ্ণদাস নামক একজন অল্পবয়স্ক ব্রাহ্মণযুবক অষ্টৈতাচার্য্যের সঙ্গী হন। অষ্টৈতাচার্য্যের ধর্মভাব দেখিয়া কৃষ্ণদাস তাঁহার নিকট ভক্তিশাস্ত্র অধ্যয়নের আকাঙ্ক্ষা জানান। অষ্টৈতাচার্য্য তাঁহার প্রস্তাবে সম্মত হন। উত্তরকালে এই যুবক অষ্টৈতাচার্য্যের প্রধান শিষ্য হইয়াছিলেন।

শান্তিপুরের অধিবাসিগণ দীর্ঘ তীর্থভ্রমণের পর অষ্টৈতাচার্য্যকে দেখিয়া অতিশয় সুখী হইলেন। তাঁহারা অষ্টৈতাচার্য্যের শান্তিপুর বাসের উপযোগী সমুদয় আয়োজন করিয়া দিলেন। অষ্টৈতাচার্য্য শান্তিপুরে থাকিয়া ধর্মসাধন করিতে লাগিলেন। প্রতিদিন নিয়মিত-রূপে দিবাভাগে পূজা ও রাত্রিতে শাস্ত্রব্যাখ্যা করিতেন। বহুলোক তাঁহার নিকট উপদেশ লইতে ও ব্যাখ্যা শুনিতে আসিতেন। কিছুকাল পরে মাধবেশ্বরপুরী তীর্থভ্রমণ পথে শান্তিপুর আগমন করেন। তাঁহাকে

পাইয়া অঐতীয়াচার্যের মহা আনন্দ হইল। চৈতন্যভাগবতের বিবরণে মনে হয়, মাধবেন্দ্রপুরীর সহিত তাঁহার এই প্রথম সাক্ষাৎ। ভাগবতে মধ্বাচার্য আশ্রমে মিলনের কোন উল্লেখ নাই।

মাধবেন্দ্রপুরী শান্তিপু্রে কিছুদিন অবস্থিতি করেন। এই সময়ে অঐতীয়াচার্য তাঁহার নিকট দীক্ষা গ্রহণ করিলেন। বৈষ্ণবগণ বিশ্বাস করেন, মাধবেন্দ্রপুরী ষাঁহাদিগকে দীক্ষা দিতেন তাঁহারা অদ্ভুত ভক্তিলাভ করিতেন। তাঁহার শিষ্য, অনুশিষ্যগণ মহাভাবের অধিকারী হইয়াছিলেন। ইতিপূর্বে প্রথম সাক্ষাতের সময় মধ্বাচার্য আশ্রমে অঐতীয়াচার্য কেন মাধবেন্দ্রপুরীর নিকট দীক্ষিত হন নাই তাহা কিছু বিস্ময়ের বিষয়। শান্তিপু্রে কিছুদিন থাকিয়া মাধবেন্দ্রপুরী নীলাচলে গমন করেন।

মাধবেন্দ্রপুরীর গমন হইতে শ্রীচৈতন্যদেবের অভ্যুদয়ের পূর্বে পর্যন্ত উল্লেখযোগ্য অধিক ঘটনা অঐতীয়াচার্যের জীবনে আর দেখা যায় না। এই সময়ের মধ্যে আর একবার তিনি নীলাচলে গিয়াছিলেন। এ যাত্রা তিনি দীর্ঘকাল তথায় অবস্থান করিয়াছিলেন। নীলাচলের পথে শ্রীনাথ আচার্য নামে এক ব্রাহ্মণ তাঁহার আশ্চর্য্য ভক্তির পরিচয় পাইয়া তাঁহার নিকটে দীক্ষিত হন। নীলাচলেও বহুলোক অঐতীয়াচার্যের জ্ঞান ও পাণ্ডিত্যে আকৃষ্ট হইয়াছিলেন। পুরুষোত্তম ও কামদেব নামক দুই ব্যক্তি তাঁহার নিকট দীক্ষাগ্রহণ ও ভক্তিশাস্ত্র অধ্যয়নের জন্য বিশেষ আগ্রহ প্রকাশ করেন। অঐতীয়াচার্য তাঁহাদের ব্যাকুলতা দেখিয়া এই প্রস্তাবে সম্মত হন। শুভদিনে তাঁহাদিগকে দীক্ষিত করিয়া গৃহে প্রত্যাগমনের সময়ে তাঁহাদিগকে লইয়া শান্তিপুর্ আসেন। এখন হইতে অঐতীয়াচার্য পূর্কের মত ধর্মসাধন ও শাস্ত্রচর্চায় সময় অতিবাহিত করিতে লাগিলেন। ক্রমে তাঁহার খ্যাতি চারিদিকে বিস্তৃত

হইল। একবার শ্রামদাস নামে একজন দ্রাবিড় দেশীয়, দিগ্বিজয়ী পণ্ডিত অষ্টৈতাচার্যের পাণ্ডিত্যের সংবাদ পাইয়া তাঁহার সহিত বিচার করিবার জন্য আগমন করিয়াছিলেন। কিন্তু বিচারে পরাস্ত হইয়া তাঁহার নিকট দীক্ষা প্রার্থনা করেন। অষ্টৈতাচার্য তাঁহাকে দীক্ষিত করেন। ক্রমে বহুলোক তাঁহার শিষ্য হন। যদুনন্দন তর্কচূড়ামণি নামক একজন জ্ঞানাভিমानी পণ্ডিত এবং শ্রামদাস আচার্য নামক একজন রাঢ় দেশীয় বহু শাস্ত্রজ্ঞ পণ্ডিতও তাঁহার শিষ্যত্ব গ্রহণ করিয়াছিলেন। বৃন্দাবন হইতে আনীত ব্রাহ্মণযুবক কৃষ্ণদাসকেও দশ বৎসর ভক্তিশাস্ত্র শিক্ষা দিবার পর এই সময় দীক্ষিত করেন। এই কালের মধ্যে কোন সময়ে ষবন-কুলোদ্ভব মহাভক্ত হরিদাস ঠাকুর আসিয়া অষ্টৈতাচার্যের সহিত মিলিত হন। হরিদাস ঠাকুরের মিলনের সময় তিনি তরুণবয়স্ক যুবক বলিয়া উল্লিখিত হইয়াছেন। অষ্টৈতাচার্য তাঁহাকে দেখিয়া বলেন,—“আমি পূর্বে হইতেই তোমাকে জানি।” সম্ভবতঃ ইতিপূর্বেই হরিদাসের কঠোর পরীক্ষা ও নির্যাতনের সংবাদ তিনি পাইয়াছিলেন। হরিদাসের আন্তরিক ব্যাকুলতা ও প্রগাঢ় ধর্মভাব দেখিয়া তাঁহাকে শাস্তিপুরে রাখিলেন। নির্জন গঙ্গাতীরে তাঁহার জন্য একটি কুটার নির্মাণ করিয়া তাঁহার শিক্ষার ব্যবস্থা করিলেন। হরিদাস ক্রমে অষ্টৈতাচার্যের নিকট ব্যাকরণ, সাহিত্য, দর্শন ও ভক্তিগ্রন্থ পাঠ করিয়া তাঁহার নিকট ভক্তিধর্মে দীক্ষাগ্রহণ করেন। অষ্টৈতাচার্য ষবন হরিদাসের সংসর্গ করেন বলিয়া শাস্তিপুরবাসিগণ তাঁহাদের উভয়ের উপর নির্যাতন আরম্ভ করেন। কথিত আছে, অষ্টৈতাচার্য হরিদাসের দ্বারা অলৌকিক ঘটনা করাইয়া শাস্তিপুরবাসিদিগের নির্যাতন বন্ধ করেন।

এইরূপে বহু সম্মান ও প্রতিপত্তির মধ্যে অষ্টৈতের জীবন

অতিবাহিত হইতে লাগিল। শান্তিপুরের অধিবাসিগণ তাঁহাকে গভীর শ্রদ্ধার চক্ষে দেখিতেন। তাঁহাদের মধ্যে কেহ কেহ তাঁহাকে বিবাহের জন্ত অস্বরোধ করিতে লাগিলেন।

“শ্রীঐতীয়া আচার্য্য বিবাহ করাইতে ।
বিশিষ্ট লোকের চেষ্টা হৈল ভাল মতে ॥
সকলেই কৈলা বিবাহের আয়োজন ।
তাহা জানিলেন শ্রুত কুবের নন্দন ॥
করিতে বিবাহ ঐতীয়ার ইচ্ছা হৈল ।
মন্দ মন্দ হাসি সবে অস্বমতি দিল ॥”

ভক্তিরত্নাকর, ১২শ তরঙ্গ ।

যে সময়ে মাধবেন্দ্রপুরী শান্তিপুরে আসিয়াছিলেন, তখন তিনিও ঐতীয়াচার্য্যকে বিবাহ করিতে অস্বরোধ করেন। তদন্তরে তিনি বলিয়াছিলেন, আরও কিছুদিন ব্রহ্মচর্য্য ও তপস্যা করিয়া পরে গৃহস্থ আশ্রমে প্রবেশ করিব। ঠিক কোন সময়ে ঐতীয়াচার্য্য বিবাহ করেন তাহা নিশ্চিত করিয়া জানা যায় না। বৈষ্ণব ইতিহাসে সন, তারিখের বড়ই অভাব। তবে মনে হয়, পরিণত বয়সেই তিনি বিবাহ করিয়াছিলেন। কেননা, বৃদ্ধ বয়সে তাঁহার সন্তান হইয়াছিল। তাঁহার জ্যেষ্ঠ সন্তান অচ্যুতানন্দ যখন চারি বৎসরের বালক তখন ঐতীয়াচার্য্যের বয়স ৭৬ বৎসর। শ্রীপাদ নিত্যানন্দের গায় ইনিও একত্রে দুই ভগিনীর পাণিগ্রহণ করেন। নৃসিংহ ভাদুড়ী নামক একজন ব্রাহ্মণের সীতা ও শ্রী নায়ী দুইটি কন্যা ছিল। ঐতীয়াচার্য্য এক সঙ্গে এই দুইটি কন্যাকেই বিবাহ করেন। সেই সময়ে এইরূপ দুই বিবাহ নিন্দনীয় ছিল না। ঐতীয়াচার্য্যের অনেকগুলি সন্তান হইয়াছিল। চৈতন্যচরিতামৃতে অচ্যুতানন্দ, কৃষ্ণমিশ্র, শ্রীগোপাল, বলরাম, জগদীশ এই পাঁচ জনের নাম উল্লেখ আছে।

এই সময় অদ্বৈতাচার্য্য নবদ্বীপে একটি বাড়ী নির্মাণ করান। সম্ভবতঃ অধ্যাপনার জন্তু নবদ্বীপে মধ্যো মধ্যো তাঁহাকে বাস করিতে হইত। তৎকালে নবদ্বীপ জ্ঞানচর্চার কেন্দ্রস্থল ছিল। অদ্বৈতাচার্য্য নবদ্বীপের জ্ঞানধারার সহিত যোগ রাখিবার জন্তু তথায় বাসগৃহ নির্মাণ করেন। শ্রীচৈতন্যের জন্মের পূর্বে ও পরে অনেক সময়ে তিনি নবদ্বীপে বাস করিতেন। শ্রীচৈতন্যের অগ্রজ বিশ্বরূপ তাঁহার ছাত্র ছিলেন। বালক চৈতন্যও বিশ্বরূপের সহিত মধ্যো মধ্যো তাঁহার টোলে আসিতেন। এই সময়ে অদ্বৈতাচার্য্য নবদ্বীপের বৈষ্ণবদলের নেতা হইয়া উঠিয়াছিলেন।

“সেই নবদ্বীপে বৈসে বৈষ্ণবাগ্রগণ্য।
অদ্বৈত আচার্য্য নাম সর্বলোকে ধনু ॥
জ্ঞানভক্তি বৈরাগ্যের গুরু মুখ্যতর।
কৃষ্ণভক্তি বাথানিতে যে হেন শকর ॥
ত্রিভুবনে আছে যত শাস্ত্র পরচার।
সর্বত্র বাথানে কৃষ্ণপদ ভক্তি সার ॥
তুলসী মঞ্জরী সহিত গঙ্গাজলে।
নিরবধি সেবে কৃষ্ণ মহা কুতূহলে ॥”

চৈঃ ভাঃ, আদিখণ্ড, ২য় অধ্যায়।

এই সকল বিবরণ প্রথম খণ্ডে বিস্তৃতরূপে লিখিত হইয়াছে। পুনরুল্লেখদোষসত্ত্বেও আবার অদ্বৈতাচার্য্যের জীবনী সম্পর্কে এই স্থানে কিছু কিছু বলিতে হইল।

এখন হইতে অদ্বৈতাচার্য্য অনেক সময় নবদ্বীপেই বাস করিতেন। ক্রমে নবদ্বীপের বৈষ্ণবগণের সঙ্গে তাঁহার পরিচয় এবং ঘনিষ্ঠতা হইল। তাঁহারা তাঁহাকে পাইয়া সবল হইলেন।

“প্রভুর আবির্ভাব পূর্বে যত বৈষ্ণবগণ ।
 ঐতীয়া আচার্য স্থানে করেন গমন ॥
 গীতা ভাগবত কহে আচার্য গোসাঞি ।
 জ্ঞান কৰ্ম নিন্দা করে ভক্তির বড়াঞি ॥
 সর্ব শাস্ত্রে কহে কৃষ্ণ ভক্তির ব্যাখ্যান ।
 জ্ঞানযোগ তপোধর্ম নাহি মানে আন ॥
 তাঁর সঙ্গে আনন্দ করেন বৈষ্ণবগণ ।
 কৃষ্ণকথা কৃষ্ণপূজা নাম সঙ্কীৰ্তন ॥”

চৈতন্য চরিতামৃত ।

নবদ্বীপের বৈষ্ণবগণের অনেকেই সাধারণ লোক ছিলেন । ঐতীয়াচার্যের মত একজন জ্ঞানী ও শাস্ত্রজ্ঞ লোক পাইয়া তাঁহারা বিশেষ আনন্দিত হইলেন । ঐতীয়াগৃহ তাঁহাদের একটি মিলনের স্থান হইল । ঐতীয়াচার্য সময়ে সময়ে শ্রীবাসের গৃহে বৈষ্ণবগণের সহিত মিলিত হইতেন । এই সময়ে নবদ্বীপের বৈষ্ণবদল “ঐতীয়া-সভা” নামে অভিহিত হইত । জগন্নাথ মিশ্রের সহিত ঐতীয়াচার্যের পরিচয়েরও প্রমাণ পাওয়া যায় । কথিত আছে, জগন্নাথ মিশ্র উপযুক্ত পরি অনেকগুলি সন্তানের মৃত্যু হওয়াতে পরম ভক্ত ঐতীয়াচার্যের শরণাপন্ন হন । তিনি তাঁহাকে আশ্বাস দিয়া, সস্ত্রীক কৃষ্ণমন্ত্রে দীক্ষা দেন ।

একদিকে যেমন ঐতীয়াসভার দলপুষ্টি হইতে লাগিল, অপরদিকে তাঁহাদের বিরোধীদলও তেমনি বৃদ্ধি পাইতে লাগিল । তাহারা সরল, বিনয়ী বৈষ্ণবদিগকে বিদ্রূপ ও নানাপ্রকার উপদ্রব করিত । বিরোধীগণের ব্যবহারে ভক্তদল ক্ষুব্ধ হইতেন । তাঁহারা মনের দুঃখে ঈশ্বরচরণে প্রার্থনা ও একান্তে সঙ্কীৰ্তন করিতে লাগিলেন ।

“বিষ্ণুভক্তি শূন্য দেখি সকল সংসার ।
 অন্তরে দহয়ে বড় চিন্ত সভাকার ॥
 কৃষ্ণকথা শুনিবেক হেন নাহি জন ।
 আপনা আপনি সভে করেন কীর্তন ॥
 দুই চারি দণ্ড থাকি অদ্বৈত-সভায় ।
 কৃষ্ণ-কথা-প্রসঙ্গে সভার দুঃখ যায় ॥
 দক্ষ দেখে সকল সংসার ভক্তগণ ।
 আলাপের স্থান নাহি, করয়ে ক্রন্দন ॥
 দুঃখ ভাব অদ্বৈত করেন উপবাস ।
 সকল বৈষ্ণবগণে চাড়ে দীর্ঘশ্বাস ॥”

চৈঃ ভাঃ ২য় অধ্যায় ।

বিশেষরূপে অদ্বৈতাচার্য্য সঙ্কল্পগ্রহণ করিয়া তুলসী ও গঙ্গাজলে কৃষ্ণপূজা করিতে লাগিলেন । বৈষ্ণবেরা বিশ্বাস করেন অদ্বৈতের হকারে শ্রীচৈতন্যের অবতার ।

“এই মত অদ্বৈত বৈসেন নদীয়ায় ।
 ভক্তিযোগ শূন্য লোক দেখি দুঃখ পায় ॥”

, * * * *

“কৃষ্ণশূন্য মণ্ডলে দেবের নাহি স্থখ ।
 বিশেষে অদ্বৈত বড় পায় মনে দুঃখ ॥
 স্বভাবে অদ্বৈত বড় কারুণ্য হৃদয় ।
 জীবের উদ্ধার চিন্তে হইয়া সদয় ॥
 ‘মোর প্রভু আসি যদি করে অবতার ।
 তদ্রূপ হয় এসকল জীবের উদ্ধার’ ॥

* * *

নিরবধি এই মত সঙ্কল্প করিয়া ।

সেবেন শ্রীকৃষ্ণচন্দ্র এক চিত্ত হইয়া ॥”

চৈঃ ভাঃ ২য় অধ্যায় ।

ঐতীয়াচার্য্য ছর্কগ, নিরাশ ও বৈষ্ণবদিগকে যথাসাধ্য আশ্বাস দিলেন । বৈষ্ণবগ্রন্থকারগণ বলেন, কৃষ্ণ নবদ্বীপে অবতীর্ণ হইবেন, একথা তিনি পূর্বেই জানিতে পারিয়াছিলেন । এমন কি, তিনি জগন্নাথ মিশ্রের শিশু পুত্র নিমাইকে কৃষ্ণের অবতার বলিয়া চিনিতে পারিয়াছিলেন এবং তাহাকে লইয়া নানাবিধ অলৌকিক কার্য্য করিয়াছিলেন । এ সকল স্পষ্টই উত্তরকালের ভক্তগণের কল্পনা । চৈতন্যভাগবতে এ সকলের বিশেষ উল্লেখ নাই । তবে, ঐতীয়াচার্য্য জগন্নাথ মিশ্রের সহিত পরিচিত ছিলেন, স্মৃতির স্মরণ সময় তিনি তাঁহার বাড়ী আসিয়া থাকিতে পারেন । তৎপরে অনেকদিন বালকের আর কোনও সংবাদ রাখিয়াছিলেন বলিয়া মনে হয় না । শ্রীচৈতন্যের অগ্রজ বিশ্বরূপ তাঁহার টোলে পড়িতেন ; বালক তাঁহাকে ডাকিবার জন্য মধ্য মধ্য সেখানে যাইত । ইহার অধিক আর কোন পরিচয় ছিল না ।

শ্রীচৈতন্যদেব গয়া হইতে ফিরিয়া আসিলে তাঁহার আশ্চর্য্য পরি-
বর্তন দেখিয়া নবদ্বীপের বৈষ্ণবগণ বিস্মিত এবং আনন্দিত হইয়া
এ সংবাদ তাঁহাদের নেতা ঐতীয়াচার্য্যকে দিলেন । তিনিও এই
সংবাদে পরম আনন্দ প্রকাশ করিলেন । কিছুদিন পরে, একদিন
বিশ্বস্তর তাঁহার পূর্বপরিচিত, সহাধ্যায়ী গদাধরের সঙ্গে ঐতীয়া-
চার্য্যের সহিত সাক্ষাৎ করিবার জন্য তাঁহার গৃহে গমন করেন ।
তখন ঐতীয়াচার্য্য তুলসীমূলে বসিয়া পূজা অর্চনা করিতেছিলেন ;
ভাবে মত্ত হইয়া, তিনি হরি হরি বলিয়া হকার ও বাছ আক্ষালন

করিতেছিলেন। তাহা দেখিয়াই বিশ্বস্তর মুর্ছিত হইয়া ভূমিতলে পতিত হইলেন। অষ্টৈতাচার্য্য বিশ্বস্তরের মহাভাবের কথা পূর্বেই শুনিয়াছিলেন। এখন স্বচক্ষে তাহা দেখিয়া বৈষ্ণবজনোচিত দীনতা সহকারে ভক্তিভরে তাঁহাকে প্রণাম করিলেন। উত্তরকালে ভক্ত-জীবনচরিত লেখক ইহার মধ্যে অলৌকিক ব্যাপার দেখিয়াছিলেন। তাঁহারা বলেন, অষ্টৈতাচার্য্য ভক্তিযোগ-প্রভাবে জানিতেপারিলেন, বিশ্বস্তর স্বয়ং শ্রীকৃষ্ণ, এবং ত্তদনুসারে তাঁহার পূজা করিলেন। কিন্তু পরবর্তী ঘটনায় একথার কোন সাক্ষ্য পাওয়া যায় না। অল্পক্ষণ পরেই, সংজ্ঞাপ্রাপ্ত হইয়া বিশ্বস্তরও অষ্টৈতাচার্য্যকে যথাযোগ্য অভিবাদন করিলেন; তাঁহার পদধূলি গ্রহণ করিয়া বিনয়সহকারে বলিলেন, “আপনাকে দর্শন করিয়া ধন্য হইলাম। আমি আপনার দাস, আপনি আমাকে কৃপা করুন। আপনার হৃদয়ে কৃষ্ণ নিরন্তর বিরাজ করেন। আপনি ভববন্ধন মোচন করিতে পারেন।”

“নমস্কার করি তাঁর পদধূলি লয়ে ।
 আপনার দেহ প্রভু তাঁরে নিবেদয়ে ॥
 “অনুগ্রহ তুমি মোরে কর’ মহাশয় ।
 তোমার আমি সে হেন জানিহ নিশ্চয় ॥
 ধন্য হইলাম আমি দেখিয়া তোমারে ।
 তুমি কৃপা করিলে সে কৃষ্ণনাম স্মরে ॥
 তুমি সে করিতে পার’ ভব-বন্ধ-নাশ ।
 তোমার হৃদয়ে কৃষ্ণ সর্বথা প্রকাশ ॥”

চৈঃ, ভাঃ, মধ্যখণ্ড, ২য় অধ্যায় ।

অষ্টৈতাচার্য্য বিশ্বস্তরের বৈষ্ণবোচিত দীনতা দেখিয়া সন্তুষ্ট হইয়া বলিলেন, “নবদ্বীপে থাকিয়া কৃষ্ণ-কথা-প্রসঙ্গে দিন যাপন কর। মধ্যে

মধ্যে যেন সাক্ষাৎ পাই। তোমাকে দেখিতে বৈষ্ণবগণের একান্ত ইচ্ছা।” বিশ্বস্তর এই প্রস্তাবে সম্মত হইয়া গৃহে প্রত্যাগত হইলেন।

বিশ্বস্তরের সহিত পরিচয়ের অল্পদিন পরেই ঐতীয়াচার্য্য স্বীয় প্রথানুসারে শান্তিপুর গমন করেন। এদিকে নবদ্বীপে শ্রীচৈতন্যদেব দিন দিন ভক্তিমাৰ্গে অগ্রসর হইতে লাগিলেন। একে একে নানাস্থান হইতে ভক্তগণ নবদ্বীপে আসিয়া বৈষ্ণবদলের পরিপুষ্টি সাধন করিতে ল গিলেন। শ্রীপাদ নিত্যানন্দ বৃন্দাবন হইতে নবদ্বীপ আসিয়া বৈষ্ণব-মণ্ডলীর সহিত মিলিত হইলেন। শ্রীবাসের মন্দিরে সংকীৰ্ত্তন আরম্ভ হইল। স্বভাবতঃই শ্রীচৈতন্যদেব ইচ্ছা করিতে লাগিলেন, প্রবীণ বৈষ্ণবনেতা ঐতীয়াচার্য্য এই সময়ে নবদ্বীপে বাস করেন। তিনি তাঁহাকে আনিবার জন্ত শ্রীবাস পণ্ডিতের ভ্রাতা শ্রীরামকে শান্তিপুর প্রেরণ করেন। শ্রীরাম শ্রীচৈতন্যের আদেশ অনুসারে ঐতীয়াচার্য্যকে নবদ্বীপের নূতন ভক্তি তরঙ্গের বিবরণ ও নিত্যানন্দের আগমন সংবাদ দিলেন। ঐতীয়াচার্য্য এই সুসংবাদে অতিশয় আনন্দিত হইলেন। চৈতন্যদেবের সাগ্রহ আহ্বানে সপরিবারে নবদ্বীপ আগমন করিলেন। বৈষ্ণবলেখকগণ ইহার মধ্যেও এক রহস্যের সৃষ্টি করিয়াছেন। তাঁহারা লিখিয়াছেন, ঐতীয়াচার্য্য চৈতন্যদেবের অন্বেষণে নবদ্বীপে আসিলেন বটে, কিন্তু তাঁহার সহিত সাক্ষাৎ না করিয়া নন্দনাচার্য্যের গৃহে লুকাইয়া থাকিলেন; এবং রামাই পণ্ডিতকে বলিয়া দিলেন, তুমি গিয়া বল, ঐতীয়াচার্য্য আসিলেন না। রামাই পণ্ডিত তাহাই করিলেন। চৈতন্যদেব তখন বলিলেন, “নাড়া আমার সহিত চাতুরী করিতেছে। সে আমার ঠাকুরালি দেখিতে চায়। আমি জানি সে নন্দনাচার্য্যের ঘরে লুকাইয়া আছে। তাহাকে শীঘ্র আসিয়া আমার পূজা করিতে বল।” ঐতীয়াচার্য্য এই সংবাদ শুনিয়া পূজার দ্রব্য

সহিত সঙ্গীক আসিয়া চৈতন্যদেবের চরণপূজা করেন। তিনি পিতা-মহের বয়স্ক, বৃদ্ধ অদ্বৈতাচার্যের মস্তকে আপনার 'পা' উঠাইয়া দিলেন। বিনয়ের অবতার শ্রীচৈতন্যদেবের পক্ষে একরূপ ব্যবহার শোভন বা সম্ভবপর বলিয়া মনে হয় না। এ সময়ে অদ্বৈতাচার্য্য শ্রীচৈতন্যদেবকে কৃষ্ণের অবতার মনে করিতেন কিনা সন্দেহ। তবে হইতে পারে, এখন হইতে তিনি তাঁহাকে বৈষ্ণবগণের নেতারূপে গ্রহণ করিলেন। এই বিবরণের মধ্যে একটি উল্লেখযোগ্য কথা এই দেখিতে পাওয়া যায়, যে, অদ্বৈতাচার্য্য স্ত্রী, শূদ্র প্রভৃতি স্বণিত, অধম, দীনের প্রতি অতিশয় দয়ার্দ্র ছিলেন। এই সকল হয় ব্যক্তিগণকে প্রেমভক্তি বিলাইবার জন্য তিনি প্রথমে শ্রীচৈতন্যদেবকে অনুরোধ করেন। চৈতন্যদেব যখন তাঁহাকে বর লইবার জন্য অনুরোধ করেন, তখন অদ্বৈতাচার্য্য স্ত্রী, শূদ্রের জন্য করুণা ভিক্ষা করেন।

“অদ্বৈত বলেন “যদি ভক্তি বিলাইবা।

স্ত্রী-শূদ্র-আদি যত মূর্খেরে সে দিবা ॥

বিদ্যা-ধন-কুল-আদি তপস্তার মদে।

তোর ভক্ত, তোর ভক্তি যে যে জনে বাধে ॥

সে পাপিষ্ঠ-সব দেখি মরুক পুড়িয়া।

চণ্ডাল নাচুক তোর নাম গান গায়া ॥”

চৈঃ ভাঃ, মধ্যখণ্ড, ৬ষ্ঠ অধ্যায়।

এখন কিছুদিন অদ্বৈতাচার্য্য নবদ্বীপে যাইয়া বাস করিতে লাগিলেন। তিনি চৈতন্যদেবের নেতৃত্ব স্বীকার করিয়া বৈষ্ণবদলের সংকীর্ণনে যোগ দিলেন। চৈতন্যদেবও তাঁহাকে সাতিশয় সম্মান করিতেন। কিন্তু তথাপি উভয়ের মধ্যে পূর্ণ বিশ্বাস স্থাপিত হইয়াছিল বলিয়া মনে হয় না। অদ্বৈতাচার্য্যের প্রকৃতি সংসার-প্রবণ। তাঁহার ব্যবহারে চৈতন্যদেব

মধ্যে মধ্যে বিরক্ত হইতেন। একদিন এইরূপ বিরক্ত হইয়া ভাবপ্রধান চৈতন্যদেব দেহত্যাগ করিবার জ্ঞান গলায় ঝাঁপ দিয়াছিলেন। হরিদাস এবং নিত্যানন্দ নিকটে ছিলেন; তাঁহারা তাঁহাকে ধরিয়া তুলিলেন। তিনি দুঃখিত অন্তরে বৈষ্ণবদল পরিত্যাগ করিয়া একদিন নন্দনাচার্য্যের গৃহে সমস্ত দিন লুক্কায়িত রহিলেন। ঐদৈবত নিজের ব্যবহারে দুঃখিত হইয়া সমস্ত দিন উপবাসী থাকিলেন। পরদিন চৈতন্যদেব এই সংবাদ পাইয়া তাঁহার গৃহে গমন করিলেন, এবং আহার করিতে অনুরোধ করিলেন। ঐদৈবতাচার্য্য বলিলেন “আমার প্রকৃতি এইরূপ; তুমি আমার প্রতি ক্ষুব্ধ হইও না। আমি অহঙ্কারী, আমাতে ভক্তি-ভাব স্ফুর্তি পায় না। তুমি আমাকে ক্ষমা কর।”

“ঐদৈবত বোলয়ে “প্রভু! করাইলা কার্য্য।

যত কিছু বোল মোরে, সব প্রভু, বাহ।

মোরে তুমি নিরস্তর লওয়াও কুমতি।

অহঙ্কার দিয়া মোরে করাও দুর্গতি ॥

সভারে উত্তম দিয়া আছ দাস্যভাব।

মোয়ে দিয়াছহ প্রভু! যত কিছু রাগ ॥

* * *

হেন কর' প্রভু! মোরে দাস্যভাব দিয়া।

চরণে রাখহ দাসীনন্দন করিয়া ॥”

চৈঃ ভাঃ, মধ্যখণ্ড, ১৭৭ অধ্যায়।

সে দিনের মত মেঘ কাটিয়া গেল বটে, কিন্তু ঐদৈবতাচার্য্যের প্রকৃতিগত সংশয় সময়ে সময়ে মাথা তুলিত। সেইজন্ম চৈতন্যদেবের সঙ্গে মধ্যে মধ্যে মনোমালিণ্য জন্মিত। বৈষ্ণবলেখকগণ তাহা স্পষ্ট করিয়া লেখেন নাই, অথবা নিজেরা বুঝিতে পারেন নাই; তথাপি

উাহাদের বিবরণের মধ্যে এই প্রকার বিরোধের ছায়া স্পষ্টই দেখিতে পাওয়া যায়। নিম্নলিখিত ঘটনাটিতে এই কথার প্রমাণ পাওয়া যাইবে।

কিছুদিন নবদ্বীপে থাকার পর অদ্বৈতাচার্য্য কোন কাজের ওজর করিয়া, বৈষ্ণবগণের সংকীৰ্ত্তন ছাড়িয়া, শাস্তিপুর প্রত্যাৰ্ত্তন করেন। সেখানে তিনি ভক্তি ছাড়িয়া জ্ঞানের প্রাধান্য প্রচার করিতে আরম্ভ করিলেন।

“নিরবধি ভাবাবেশে দোলে মত্ত হৈয়া ।
 বাথানে বাশিষ্ঠ-শাস্ত্র ‘জ্ঞান’ প্রকাশিয়া ॥
 “জ্ঞান বিনে কিবা শক্তি ধরে বিষ্ণুভক্তি ।
 অতএব সভার প্রাণ ‘জ্ঞান’ সৰ্বশক্তি ॥
 হেন ‘জ্ঞান’ না বুঝিলা কোন কোন জন ।
 ঘরে ধন হারাইয়া, চাহে গিয়া বন ॥
 ‘বিষ্ণুভক্তি’ দৰ্পণ, লোচন হর ‘জ্ঞান’ ।
 চক্ষুহীন জনের দৰ্পণে কোন্ কাম ?
 আদি বৃদ্ধ আমি পড়িলাও সৰ্বশাস্ত্র ।
 বুঝিলাও সৰ্ব-অভিপ্রায় ‘জ্ঞান’ মাত্র ॥”

চৈঃ ভাঃ, মধ্যখণ্ড, ১৯শ অধ্যায় ।

লোকমুখে চৈতন্যদেব এই সংবাদ পাইয়া প্রকৃত অবস্থা জানিবার জন্ত নিত্যানন্দ সমভিব্যাহারে শাস্তিপুর গমন করিলেন। অদ্বৈত-ভবনে আসিয়া দেখিলেন তিনি সোৎসাহে জ্ঞানযোগ ব্যাখ্যা করিতেছেন। ইহা শুনিয়াই তিনি ক্রোধে অগ্নিপ্রায় হইয়া জিজ্ঞাসা করিলেন “বলত জ্ঞান ও ভক্তির মধ্যে বড় কি ?” অদ্বৈত উত্তর করিলেন “সকল সময়েই জ্ঞান বড়। জ্ঞান না থাকিলে ভক্তিতে লাভ

কি ?” এই উত্তরে ক্রোধে অঙ্ক হইয়া চৈতন্যদেব অঐতহতাচার্ঘ্যকে সবলে অঙ্গে নামাইয়া প্রহার করিতে লাগিলেন ।

“ক্রোধমুখে বোলে প্রভু “আরে আরে নাড়া !

বোল দেখি ‘জ্ঞান’ ‘ভক্তি’ ছইতে কে বাড়া ?”

অঐতহত বোলয়ে “সর্ব-কাল বড় ‘জ্ঞান’ ।

যার ‘জ্ঞান’ নাহি তার ভক্তিতে কি কাম ॥”

“জ্ঞান বড়” অঐতহতের শুনিঞা বচন ।

ক্রোধে বাহু পাসরিলা শ্রীশচীনন্দন ॥

পিড়া হইতে অঐতহতেরে ধরিয়া আনিয়া ।

স্বহস্তে কিলায় প্রভু উঠানে পাড়িয়া ॥”

চৈঃ ভাঃ, মধ্য খণ্ড, ১৯শ অধ্যায় ।

নিত্যানন্দ, হরিদাস ও অঐতহতগৃহিণী সীতাদেবী এই ব্যাপার দেখিয়া ভীত ও চিন্তিত হইলেন । সীতাদেবী বলিতে লাগিলেন “বৃদ্ধ ব্রাহ্মণকে প্রহার করিও না ।” ঋণকাল পরে শান্ত হইয়া চৈতন্যদেব উপনিষ্ট হইলেন । অঐতহতাচার্ঘ্য তাঁহার চরণে পড়িয়া ঋমা প্রার্থনা করিলেন । শ্রীচৈতন্য তাঁহাকে বৃকে লইয়া ক্রন্দন করিতে লাগিলেন । তদর্শনে সকলেই কাঁদিয়া আকুল হইলেন । ঋণকাল মধ্যে অঐতহতগৃহে ভক্তির তরঙ্গ বহিতে লাগিল । চৈতন্যদেব স্বীয় ব্যাপারে লজ্জিত হইয়া অঐতহতাচার্ঘ্যের নিকটে ঋমা প্রার্থনা করিয়া সীতাদেবীকে আহারের আয়োজন করিতে বলিলেন ।

কিছুদিন শান্তিপুর্বে থাকিয়া অঐতহতাচার্ঘ্য ও হরিদাসকে লইয়া শ্রীচৈতন্য এবং নিত্যানন্দ নবদ্বীপ প্রত্যাগমন করিলেন । নবদ্বীপে পুনর্বার প্রেম ভক্তির তরঙ্গ প্রবাহিত হইতে লাগিল । কিছুদিন পরে অঐতহতাচার্ঘ্য পুনরায় শান্তিপুর্বে গমন করিয়া থাকিবেন । কেননা,

চৈতন্যদেবের সন্ন্যাসগ্রহণের সময়ে তিনি নবদ্বীপে ছিলেন না। শ্রীচৈতন্য নিত্যানন্দ, গদাধর প্রভৃতি কয়েকজন অন্তরঙ্গ ভক্তের নিকট সন্ন্যাসগ্রহণের ইচ্ছা ব্যক্ত করিয়াছিলেন। কিন্তু অষ্টেতাচার্য্যকে কোন কথা বলার উল্লেখ নাই। সন্ন্যাসের পরে নীলাচলের পথে চৈতন্যদেব কয়েকদিন শাস্তিপুরে অষ্টেত-গৃহে অবস্থিতি করেন। নবদ্বীপের ভক্তগণ সেখানে চৈতন্যদেবকে দেখিতে আসেন। তিনি যে ভাবে ভক্তগণের আতিথ্য সংকার করেন, তাহাতে মনে হয় তাঁহার আর্থিক অবস্থা বেশ স্বচ্ছল ছিল।

শ্রীচৈতন্যদেবের সঙ্গে যে কয়েকজন অন্তরঙ্গ ভক্ত নীলাচল গিয়া-
ছিলেন তাঁহাদের মধ্যে অষ্টেতাচার্য্য ছিলেন না। দুই বৎসর পরে
দাক্ষিণাত্য পর্যটন করিয়া চৈতন্যদেব নীলাচলে প্রত্যাগমন করিলে
গৌড়ীয় বৈষ্ণবগণ তাঁহাকে দর্শনের জন্ত নীলাচলে যান। অষ্টেতাচার্য্য
এই দলের নেতা ছিলেন। শ্রীচৈতন্য তখন তাঁহার বহু সমাদর
করেন। অষ্টেতাচার্য্য তাঁহার চরণবন্দনা করিলেন, এবং শ্রীচৈতন্য
তাঁহাকে প্রেমালিঙ্গন করেন। চৈতন্যদেব তখন সন্ন্যাসী।
সেইজন্তই বোধহয় অষ্টেতাচার্য্য তাঁহার চরণবন্দনা করিয়াছিলেন।
সন্ন্যাসগ্রহণের পরও শ্রীচৈতন্য তাঁহাকে গভীর শ্রদ্ধা ও সম্মান
করিতেন। এখন হইতে বৎসর বৎসর গৌড়ীয় বৈষ্ণবমণ্ডলী
চৈতন্যদেবের সহিত মিলনের জন্ত নীলাচলে আসিতেন। বার বৎসর
এইরূপ দলবদ্ধ হইয়া বৈষ্ণবগণের আগমনের বিবরণ পাওয়া যায়।
অষ্টেতাচার্য্য এই দলের প্রধান ছিলেন। এখন তাঁহার বয়স আশী
বৎসরের উপর হইয়া থাকিবে। এষ্ট বৃদ্ধবয়সে পদব্রজে দূর ও সঙ্কটজনক
পথ অতিক্রম করিয়া, নীলাচলে আগমন কি গভীর ভক্তির পরিচয়
তাঁহা সহজেই অনুমান করিতে পারা যায়। কয়েক বৎসর পরে

শ্রীচৈতন্যদেব যখন গোড়ে পুনরাগমন করেন তখন তিনি শান্তিপু্রে ঐতীয়াচার্যের গৃহে কয়েকদিন অবস্থান করিয়াছিলেন। ইহার পর ঐতীয়াচার্য অনেক বৎসর জীবিত ছিলেন। ঠিক কোন সময়ে তিনি পরলোকগমন করেন তাহা জানিতে পারা যায় না। আমরা বলিয়াছি বৈষ্ণবইতিহাসে সন তারিখের বড় অভাব। এমন কি প্রধান প্রধান নেতাগণের মৃত্যুসময় জানিতে পারা যায় না। ঐতীয়াচার্যের মৃত্যুর আনুমানিক সময় এইরূপে নির্দেশ করা যাইতে পারে, যে, চৈতন্যদেবের মৃত্যুর পরে শ্রীনিবাস আচার্য যে সময় শান্তিপুর্ যান তাহার পূর্বেই তাঁহার তিরোভাব হয়। ইহাতে মনে হয় চৈতন্যদেবের মৃত্যুর অল্পদিন পরে ঐতীয়াচার্য পরলোকগমন করেন। তখন তাঁহার বয়স নানাধিক একশত বৎসর।

গৌড়ীয় বৈষ্ণবমণ্ডলী ।

শ্রীচৈতন্যদেবপ্রবর্তিত ভক্তিদ্বারার জন্মস্থান নবদ্বীপ এবং বঙ্গদেশেই তাহার সমধিক প্রসার লাভ করিয়াছিল। অল্পকালের মধ্যেই বঙ্গদেশে একটি বৃহৎ এবং বর্ধনশীল মণ্ডলী গঠিত হইয়াছিল। শ্রীচৈতন্যের সন্ন্যাসগ্রহণ পর্য্যন্ত এই মণ্ডলী নবদ্বীপেই আবদ্ধ ছিল। তাঁহার সন্ন্যাসের পর বৈষ্ণবমণ্ডলী দ্রুতবেগে নবদ্বীপের বাহিরে প্রসারিত হয়। শ্রীচৈতন্যদেব স্বয়ং উড়িষ্যা, নীলাচলে বাস করেন, এবং সেখানে একটি মণ্ডলী গঠিত হয়। তিনি নবদ্বীপ ছাড়িয়া যাওয়ায় তথাকার মণ্ডলী কিছু দুর্বল হইয়া পড়ে। আরও কোন কোন ভক্ত এই সময়ে অগ্ৰাণ্ড স্থানে গিয়া অবস্থিতি করেন। সম্ভবতঃ শ্রীচৈতন্যদেবের নির্দেশানুসারেই এই ব্যবস্থা হইয়াছিল। চৈতন্যদেবের প্রচারপ্রথা এই প্রকারের ছিল। বৃদ্ধ অদ্বৈতাচার্য্য এখন হইতে শান্তিপুরেই বাস করিয়া ধর্মপ্রচার করিতে লাগিলেন। নিত্যানন্দ প্রথমে শ্রীচৈতন্যের সঙ্গে নীলাচলে গমন করিয়াছিলেন। দাক্ষিণাত্য হইতে ফিরিয়া আসিয়া চৈতন্যদেব তাঁহার উপর বিশেষভাবে বঙ্গদেশে ভক্তিদ্বার প্রচারের ভার অর্পণ করতঃ তাঁহাকে তথায় পাঠান। এখন হইতে নিত্যানন্দ বিপুল উৎসাহে বঙ্গদেশে বৈষ্ণবধর্ম প্রচার করিতে লাগিলেন। প্রথমে তিনি নবদ্বীপ কেন্দ্র করিয়া কাজ করিয়াছিলেন। কিন্তু কিছুকাল পরে নবদ্বীপ পরিত্যাগ করিয়া খড়দহে তাঁহার প্রচার-কেন্দ্র স্থাপন করেন। কেন যে তিনি নবদ্বীপ পরিত্যাগ করিলেন, তাহার কোন নিশ্চিত সংবাদ জানিতে পারা যায় না। বোধ হয়, নবদ্বীপ অপেক্ষা খড়দহে তাঁহার নিবৃত্তি ধর্মপ্রচারের

সুবিধা-জনক স্থান বলিয়া মনে হইয়াছিল। এইরূপে অন্যান্য নেতাগণও একে একে নবদ্বীপ ছাড়িয়া অন্তর্ভুক্ত বাস করেন। যিনি যখন যেখানে যাইতেন সেইখানেই জ্ঞাতসারে বা অজ্ঞাতসারে প্রচারকেন্দ্র স্থাপিত হইত। তাঁহাদের চারিদিকে এক একটি ভক্তমণ্ডলী গড়িয়া উঠিত। এইরূপে বঙ্গদেশের নানা স্থানে প্রচারকেন্দ্র প্রতিষ্ঠিত হইয়াছিল। এই সকল স্থানে নবদ্বীপ, শান্তিপুত্রের ন্যায় নিত্য সঙ্কীৰ্ত্তন, ধর্মপ্রসঙ্গ, শাস্ত্রব্যাখ্যা হইত। স্থানীয় লোকগণ এই সকল অনুষ্ঠানে যোগদান করিত; অন্যান্য স্থান হইতেও বৈষ্ণবগণ আসিয়া দলপুষ্টি করিতেন। মধ্যে মধ্যে নিত্যানন্দপ্রমুখ নেতাগণ এই সকল কেন্দ্রে গিয়া স্থানীয় লোকদিগকে উৎসাহিত করিতেন।

যদিও অনেকগুলি প্রধান ভক্ত নবদ্বীপ হইতে অন্তর্ভুক্ত গিয়া অবস্থিতি করিয়াছিলেন, তথাপি বহুদিন পর্য্যন্ত নবদ্বীপ বৈষ্ণবমণ্ডলীর প্রধান কেন্দ্র ছিল। চৈতন্যদেব ও নিত্যানন্দ নবদ্বীপ পরিত্যাগ করিয়া গেলেও অনেকে তথায় বাস করিতে লাগিলেন। শ্রীচৈতন্যের ভক্তগণের মধ্যে নিত্যানন্দ, অর্ধশতাব্দীর পরেই শ্রীবাস পণ্ডিতের নাম উল্লেখযোগ্য। চৈতন্যদেবের অভ্যুদয়ের পূর্বে হইতেই তিনি সপরিবারে 'বৈষ্ণবধর্ম' সাধন করিতেছিলেন। তাঁহার গৃহই বৈষ্ণবদিগের মিলনের স্থান ছিল। "শ্রীবাসের অঙ্গন" বৈষ্ণব ইতিহাসে চিরস্মরণীয় স্থান। ইহাকে ভক্তধর্মের উৎস বলা যাইতে পারে। শ্রীবাসের বৃহৎ পরিবার। শ্রীরামপণ্ডিত, শ্রীপতি ও শ্রীনিধি নামে তাঁর তিন সহোদর ছিলেন। তাঁহারা সকলেই শ্রীচৈতন্যের অনুরক্ত। শ্রীবাসের পত্নী মালিনী দেবী শ্রীচৈতন্য ও নিত্যানন্দের পরমামুরাগী। নিত্যানন্দ নবদ্বীপ অবস্থানকালে ইহাদের গৃহই থাকিতেন। তিনি মালিনীদেবীকে মা বলিয়া ডাকিতেন। ইহাদের অবস্থা স্বচ্ছল

ছিল বলিয়া মনে হয়। উত্তরকালে শ্রীবাস কুমারহটে একটি বাসস্থান নির্মাণ করিয়াছিলেন। কিন্তু অনেকদিন পর্যন্ত নবদ্বীপেও তাঁহার অবস্থানের নিদর্শন পাওয়া যায়। সম্ভবতঃ তিনি কখনও নবদ্বীপ, কখনও কুমারহটে বাস করিতেন। কুমারহট্ট বৈষ্ণবধর্মের একটি প্রচারকেন্দ্র হইয়া দাঁড়াইয়াছিল। চৈতন্যদেব ও নিত্যানন্দ নীলাচল হইতে গমনাগমন সময়ে কিছুদিন কুমারহটে অবস্থান করিয়াছিলেন। শ্রীবাসাচার্য্য কেন যে তথায় বাস করিয়াছিলেন তাহা বুঝিতে পারা যায় না। শ্রীচৈতন্য ও অদ্বৈতাচার্য্যের শ্রায় তাঁহারও আদিম নিবাস শ্রীহট্ট বলিয়া লিখিত আছে।

নবদ্বীপের আদিম বৈষ্ণবগণের মধ্যে গদাধরপণ্ডিত একজন প্রধান। ইনি শ্রীচৈতন্যের সহাধ্যায়ী ছিলেন। চৈতন্যদেব যখন বিষ্ণুরসে গর্ভিত ছিলেন, গদাধর পণ্ডিত সেই সময় হইতেই বৈষ্ণবদলে যোগ দিয়াছিলেন। চৈতন্যদেব তখন তাঁহাকে বিদ্রুপ করিতেন। পরে যখন তাঁহার হৃদয় পরিবর্তন হইল এবং তিনি বৈষ্ণবগণের সহিত মিলিত হইলেন, তখন গদাধরের আনন্দের সীমা রহিল না। এখন হইতে গদাধরপণ্ডিত শ্রীচৈতন্যের অন্তরঙ্গ ভক্তগণের মধ্যে পরিগণিত হইলেন। উত্তরকালে চৈতন্যদেব যখন নীলাচলে বাস করিতে লাগিলেন তখন গদাধর পণ্ডিতও তাঁহার নিকটে থাকিবার জন্য তথায় অবস্থান করিলেন। সেখানে তিনি চৈতন্যদেবকে নিত্য ভাগবতপাঠ করিয়া শুনাইতেন। পাঠ করিতে করিতে তিনি এতই ক্রন্দন করিতেন যে, চোখের জলে গ্রন্থ ভিজিয়া যাইত। যতদিন চৈতন্যদেব জীবিত ছিলেন, গদাধর পণ্ডিত নীলাচলেই বাস করিয়াছিলেন। তাঁহার তিরোভাবের কিছুদিন পরে গদাধরপণ্ডিতও পরলোক গমন করেন।

গৌড়ীয় বৈষ্ণবমণ্ডলীর মধ্যে আর একজন প্রধান ভক্ত হরিদাস ঠাকুর। ইহার সংক্ষিপ্ত বিবরণ প্রথমখণ্ডেই প্রদত্ত হইয়াছে। শ্রীচৈতন্যদেব বৈষ্ণবদলে যোগ দিবার পূর্বেই, হরিদাস ঠাকুর অষ্টৈতাচার্যের সহিত মিলিত হন। শাস্তিপুরে থাকিয়া তাঁহার নিকট ভক্তিশাস্ত্র অধ্যয়ন ও দীক্ষাগ্রহণ করিয়াছিলেন। ইনিও উত্তরকালে চৈতন্যদেবের নিকটে অবস্থানের জন্য নীলাচলে বাস করেন। মুসলমান বংশে জন্ম বলিয়া তিনি মন্দিরের সন্নিকটে বাস করিতেন না; শ্রীচৈতন্যদেব তাঁহার বাসস্থানের জন্য রাজা প্রতাপরুদ্রের নিকট হইতে নগরপ্রান্তে একটি নির্জন কুটির চাহিয়া লইয়াছিলেন।

র এখানে থাকিয়া একান্তে ধর্মসাধনা করিতেন। চৈতন্যদেব এখানে গিয়া তাঁহার সহিত সাক্ষাৎ করিতেন এবং স্নেহের হস্তে তাঁহার আহাৰ্য্য গ্রহণ করিতেন। গভীর ভক্ত মুসলমান হইয়াও হরিদাস ঠাকুর বৈষ্ণবমণ্ডলীতে যত্ন লাভ করিয়াছিলেন। অষ্টৈতাচার্য একবার তাঁহার নিকট অস্থান উপলক্ষে তাঁহাকে ব্রাহ্মণের প্রাপ্য ভোজ্য চাহিলেন। ইহাতে আপত্তি উত্থাপিত হইলে অষ্টৈতাচার্য বলেন, 'অপেক্ষা শ্রেষ্ঠ ব্রাহ্মণ তিনি জানেন না। চৈতন্যদেবের সহায়তায় বহু পূর্বেই হরিদাসঠাকুর দেহত্যাগ করেন। তাঁহার দেহ অতিশয় ব্যথিত হইয়াছিলেন, এবং তাঁহার মৃতদেহ কোলে লইয়া অনেক ক্রন্দন করিয়াছিলেন। তৎপরে নীলাচলের বৈষ্ণবমণ্ডলীর সহিত মহা সমারোহে সমুদ্রতীরে তাঁহাকে সমাধিস্থ করেন।

শ্রীচৈতন্যদেবের আর একজন অন্তরঙ্গ ভক্ত মুকুন্দ দাস। ইনি অতি স্ব-গায়ক ছিলেন। ইহার দুই ভ্রাতা; জ্যেষ্ঠের নাম বাসুদেব দাস।

উভয়েই বৈষ্ণবধর্মে পরম অমুরাগী। বাসুদেব দত্তের ধর্মতাবের পরিচয় ইহা হইতেই পাওয়া যাইবে, যে, তিনি বলিতেন অগতের সকল পাপীর পাপভার তাঁহাকে দিয়া যদি তাঁহাদিগকে মুক্ত করা হয়, তাহা হইলে তিনি তাহা লইয়া নরকে যাইতে প্রস্তুত আছেন। মুকুন্দ চৈতন্যদেবের সঙ্গে বিশেষভাবে যুক্ত ছিলেন। শ্রীচৈতন্য যখন সন্ন্যাস গ্রহণের সঙ্কল্প করিয়াছিলেন, নিত্যানন্দ প্রমুখ যে পাঁচজন অন্তরঙ্গ বন্ধুকে তাহা জ্ঞাপন করেন, মুকুন্দ তন্মধ্যে একজন। তৎপরে যে তিনজন তাঁহার পশ্চাতে কাটোয়া যান তাহার মধ্যে মুকুন্দের নাম দেখিতে পাওয়া যায়, এবং নীলাচল গমনকালে যে চারিজন ভক্ত তাঁহার সঙ্গে হইয়াছিলেন, মুকুন্দ তন্মধ্যে অন্যতম। ইহা পারা যায়, যে মুকুন্দ চৈতন্যদেবের কিরূপ অন্তরঙ্গ বন্ধু ছিলেন মধুর কীর্তনে তিনি চৈতন্যকে মুগ্ধ করিতেন।

চৈতন্যদেবের প্রথম বয়সের সঙ্গী, আর একজন ভক্ত ইনি জাতিতে বৈদ্য, আদিম নিবাস চট্টগ্রাম। মুরারী গুপ্তসহায়ী ছিলেন। ফাঁকি জিজ্ঞাসা করিয়া ঠিক উত্তর তিনি তাঁহাকে বিদ্রূপ করিয়া বলিতেন, ব্যাকরণ পড়ানয়, গাছপালা লইয়া ঔষধ প্রস্তুত কর গিয়া। উত্তরকালে চৈতন্যদেবের পরম বিনয়ী ভক্ত হইয়াছিলেন। গোড়ের সঙ্গে তিনি যখন নীলাচলে যান সেই সময়ে চৈতন্যদেব আলিঙ্গন করিতে গেলে তিনি বিনয়ে পশ্চাৎপদ হইয়াছিল। বৈষ্ণব ব্যবসা করিতেন, কিন্তু কাহারও নিকট অর্থ চাহিতেন না। স্বেচ্ছায় যে যাগ দিত তাহার দ্বারা জীবিকানির্বাহ করিতেন।

গোড়ের বৈষ্ণবমণ্ডলীর মধ্যে একজন প্রাচীন নেতা চন্দ্রশেখর আচার্য। সাধারণের মধ্যে তিনি আচার্য্যরূপে বলিয়া বিখ্যাত ছিলেন।

শ্রীচৈতন্যদেব তাঁহাকে বিশেষ শ্রদ্ধা করিতেন। সূর্যাসগ্রহণের সন্ধ্যা হইলে চৈতন্যদেব যে কয়েকজন অন্তরঙ্গ বন্ধুকে তাহা জ্ঞাপন করেন, চন্দ্রশেখর আচার্য্য তাঁহাদের মধ্যে অন্য একজন। তিনি সূর্যাসগ্রহণের সময়ে কাটোয়াতেও গিয়াছিলেন।

আর একজন প্রবীণ ভক্ত বক্রেশ্বর পণ্ডিত। কীর্ত্তন সময়ে তিনি সুন্দর নৃত্য করিতেন। কথিত আছে, একভাবে তিনি চব্বিশ প্রহর নৃত্য করিতে পারিতেন। চৈতন্যদেব তাঁহার নৃত্য বড় ভালবাসিতেন। বক্রেশ্বর বলিতেন দশ সহস্র গন্ধর্ব্ব যদি কীর্ত্তন করে, তাহা হইলে তাঁহার নৃত্য করিয়া সুখ হয়। উত্তরকালে ইনি নীলাচলে অবস্থান করিয়া বং চৈতন্যদেবের পরলোকগমনের পরে তাঁহার আসন

র আর একজন প্রসিদ্ধ বৈষ্ণব শুক্লাক্ষর ব্রহ্মচারী। একবার তাঁহার গৃহে চাহিয়া অন্ন গ্রহণ করিয়াছিলেন। ত দরিদ্র ছিলেন। ভিক্ষালব্ধ তুলে দিনাতিপাত করিতেন। সেই অল্পেই পরম পরিতোষ প্রকাশ করিয়াছিলেন।

স্বাক্ষরকারিগণ আর একজন দরিদ্র বৈষ্ণবকে অন্ন করিয়া তিনি শ্রীধর দাস। খোড়, মোচা ইত্যাদি বিক্রয় করিয়া

র যাত্রা নির্ব্বাহ করিতেন। এই জন্ত তিনি খোলাবেচা বৈষ্ণবমণ্ডলীতে পরিচিত হইয়াছিলেন। হৃদয়-পরিবর্ত্তনের চৈতন্যদেব তাঁহার নিকট জোর জবরদস্তী করিয়া কলা মোচা প্রভৃতি কাড়িয়া লইতেন। উত্তরকালে তিনি শ্রীধরকে স্মরণ করিয়া বৈষ্ণবদলে সম্মানিত স্থান দিয়াছিলেন। শ্রীধর তাঁহার পরম ভক্ত হইয়াছিলেন। যে রাত্রিশেষে চৈতন্যদেব সূর্যাসগ্রহণের জন্ত গৃহ পরিত্যাগ করেন, সেদিন অনেক রাত্রিতে শ্রীধর একটি ভাল লাউ পাইয়া

চৈতন্যদেবকে উপহার দেন। পাছে ভক্ত মনে কষ্ট পান এইজন্য অনেক রাত্রিতেও শ্রীচৈতন্য জননীকে তাহা রন্ধন করিতে বলেন।

এতদ্বির গঙ্গাদাস পণ্ডিত, বুদ্ধিমন্ত খান, পুরন্দর আচার্য্য, শঙ্কর পণ্ডিত, সদাশিব পণ্ডিত, প্রহ্লাদ ব্রহ্মচারী, নারায়ণ পণ্ডিত, শ্রীমান পণ্ডিত, নন্দন আচার্য্য, শ্রীমান্ সেন, নকুল ব্রহ্মচারী প্রভৃতি বহু ভক্ত গৌড়ীয় বৈষ্ণবমণ্ডলীর পুষ্টিসাধন করিয়াছিলেন। যদিও অনেক প্রধান নেতা নবদ্বীপ পরিত্যাগ করিয়া গিয়াছিলেন তথাপি দীর্ঘকাল পর্য্যন্ত নবদ্বীপ বৈষ্ণবমণ্ডলীর প্রধান কেন্দ্র ছিল। শ্রীচৈতন্যের জন্ম ও আদিলীলার স্থান বলিয়া বৈষ্ণবগণের নিকটে নবদ্বীপ হইয়াছে। যতদিন শচীমাতা ও বিষ্ণুপ্রিয়া দেবী জীবিত দুরাস্তর হইতে বৈষ্ণবগণ তাঁহাদিগকে দেখিতে নবদ্বীপে কেবল 'চৈতন্যদেবের' সম্পর্কে নহে, তাঁহাদের নিজ চরিত্রে তাঁহারা সকলের গভীর ভক্তির পাত্র হইয়াছিলেন। তাঁহা নামে একজন ভৃত্য ছিল। সে চৈতন্যদেবের বাল্যক পরিবারের সেবাকার্য্যে নিযুক্ত ছিল। যতদিন শচীমাতা ও দেবী জীবিত ছিলেন ঈশান তাঁহাদের অমুগত দাস ছিল, দীর্ঘজীবী হইয়াছিল। উত্তরকালে বৈষ্ণবগণ তাঁহার নিকট পূর্বকাহিনী শ্রবণ করিতেন।

নবদ্বীপের পরেই শান্তিপুর গৌড়ীয় বৈষ্ণবমণ্ডলীর প্রধ ছিল। এখানেও বহু বৈষ্ণব অষ্টৈত্যাচার্য্যের সন্নিকটে বাস করিয়া কৃষ্ণদাস, কমলাকান্ত বিশ্বাস, যত্নন্দন আচার্য্য, ভাগবত আচার্য্য, দুর্জয় বিশ্বাস, বনমালী দাস, জগন্নাথ কর, ষাদব দাস, শ্রীবৎস পণ্ডিত, বৈদ্যনাথ, হরিচরণ প্রভৃতি বহু বৈষ্ণব অষ্টৈতের অমুগত শিষ্য ছিলেন। অষ্টৈত্যাচার্য্যের পাঁচ পুত্র, অচ্যুতানন্দ, কৃষ্ণমিশ্র, শ্রীগোপাল মিশ্র,

বলরাম ও অগদীশ গৌড়ীয় বৈষ্ণবমণ্ডলীর সুবিখ্যাত। ইহারা বংশপরম্পরা ধরিয়া শান্তিপু্রে ভক্তিধর্ম রক্ষা ও প্রচার করিয়াছিলেন। অষ্টৈতাচার্যের দুই পত্নী, শ্রী ও সীতাদেবী অষ্টৈতাচার্যের পরলোক-গমনের পরেও দীর্ঘকাল জীবিত থাকিয়া বৈষ্ণবমণ্ডলীর পরম শ্রদ্ধাভাজন হইয়াছিলেন। অষ্টৈতাচার্য স্বয়ং যতদিন জীবিত ছিলেন, ততদিন শান্তিপুর্ বৈষ্ণবধর্মের উন্নতিশীল কেন্দ্র ছিল। তাঁহার পরলোকগমনের পরে অচ্যুতানন্দ শান্তিপুর্ের মণ্ডলীর নেতা হন।

গৌড়ীয় বৈষ্ণবমণ্ডলীর তৃতীয় প্রসিদ্ধ কেন্দ্র হইয়া উঠে।

পরে নিত্যানন্দ যখন খড়দহে আসিয়া বাস করিতে লাগিলেন তখন বৈষ্ণব তাঁহার নিকট অবস্থানের জন্য নিকটবর্তী স্থানসমূহে গমন করিলেন। তাঁহার পুত্র বীরভদ্র বা বীরচন্দ্র বৈষ্ণব-ইতিহাসে

নিত্যানন্দের দুই স্ত্রী বসু ও জাহ্নবী গৌড়ীয় বৈষ্ণবমণ্ডলীতে

ইহাদের মধ্যে জাহ্নবী দেবী নিত্যানন্দের পরলোক-গমনের পরে গৌড়ীয় বৈষ্ণবমণ্ডলীর নেতৃস্থানীয় হইয়াছিলেন। তিনি

গৌড়দেশের নানা স্থানে ভ্রমণ করিয়া বৃন্দাবন গিয়াছিলেন এবং গৌড়দেশের নানা স্থানে বৈষ্ণবগণকে উৎসাহিত করিতেন। বঙ্গদেশে বৈষ্ণবধর্ম-প্রচার

নিত্যানন্দের কার্য। এই প্রদেশের নানা স্থানে

শান্তিপুর্ের শিষ্য হইয়াছিল। তাঁহাদের মধ্যে মাধব ঘোষ

তাঁহার দুই ভ্রাতা বাসুদেব ও গোবিন্দ ঘোষ বিশেষভাবে উল্লেখ-যোগ্য। চৈতন্যদেব যখন নিত্যানন্দকে গোড়ৈ ভক্তিধর্ম প্রচারের

জন্য প্রেরণ করেন তখন যে কয়েকজন বৈষ্ণবকে তাঁহার সঙ্গে দিয়াছিলেন মাধব ঘোষ তাঁহাদের মধ্যে প্রধান। তিনি অতি সুগায়ক ছিলেন।

সর্বদা নিত্যানন্দের সঙ্গে সঙ্গে থাকিয়া কীর্তন করিতেন। বাসুদেব

ও গোবিন্দ ঘোষও সুন্দর গান করিতেন। তদুপরি বাসুদেব সুকবিও ছিলেন। তাঁহার রচিত বহু পদাবলী আছে।

নবদ্বীপ, শান্তিপুর ও খড়দহ ব্যতীত বঙ্গদেশের নানা স্থানে শ্রীচৈতন্যদেব প্রবর্তিত ভক্তিধর্মের ক্ষুদ্র ও বৃহৎ অনেক কেন্দ্র হইয়াছিল। এই সকল স্থানে বৈষ্ণবগণ রাধাকৃষ্ণ, শ্রীচৈতন্য, নিত্যানন্দ, গদাধর প্রভৃতির বিগ্রহ গঠন করিয়া ধর্মসাধনেন্দ্রে কেন্দ্র স্থাপন করিয়াছিলেন। কাটোয়ার, যেখানে শ্রীচৈতন্য কেশব ভারতীর নিকট সন্ন্যাসগ্রহণ করিয়াছিলেন, অল্পদিন মধ্যেই সেখানে এইরূপ একটি আশ্রম হয়। এই আশ্রমে চৈতন্যের মূর্তি প্রতিষ্ঠিত হইয়াছিল গদাধর কাটোয়ারমণ্ডলীর প্রথম নেতা ছিলেন। তাঁহার পরে যদুনন্দ স্থান অধিকার করেন। কাটোয়ার আশ্রম বহুদিন পর্য্যন্ত ভবিধারা প্রবাহিত রাখিয়াছিল। এখন পর্য্যন্ত সেই মন্দির আছে।

কাটোয়ার অদূরবর্তী শ্রীখণ্ড গ্রামে আর একটি বৈষ্ণবমণ্ডলী উঠিয়াছিল। শ্রীখণ্ডের মণ্ডলী বৈষ্ণব ইতিহাসে সুবিখ্যাত। অনেকগুলি গভীর ধর্মভাবসম্পন্ন বৈষ্ণব কাব্য করিয়াছিলেন বৎসর গোড়বাসী যে সমুদয় বৈষ্ণব নীলাচল যাইতেন তা খণ্ডবাসী অনেক বৈষ্ণবের নাম দেখা যায়।

“খণ্ডবাসী মুকুন্দদাস শ্রীরঘুনন্দন।

নরহরি দাস চিরঞ্জীব স্থলোচন ॥”

চৈঃ চঃ, আদিলীলা, ১০ম পরিঃ।

ইহাদের মধ্যে নরহরি দাস প্রথম ও প্রধান। চৈতন্যদেব তাঁহাকে বিশেষ সম্মান করিতেন। উত্তরকালে তিনি ‘সরকার ঠাকুর’ নামে অভিহিত হইয়াছিলেন। তিনি অনেকগুলি সুমলিচ্ছ পদাবলী রচনা

করিয়াছিলেন। নরহরি সরকারের পর রঘুনন্দন শ্রীধরের বৈষ্ণবমণ্ডলীর নেতা হন। গভীর ধর্মভাব ও অকৃত্রিম ভাগবত ভক্তির গুণে তিনি সকলের শ্রদ্ধা আকর্ষণ করিয়াছিলেন। তাঁহার মৃত্যুর পরে তদীয় পুত্র কানাই ঠাকুর শ্রীধরের মহাস্ত হন। তিনিও পরম ভক্ত ছিলেন। কানাই ঠাকুরের দুই পুত্র, মদন ও বংশীধর। মদন বালাকাল হইতেই বৈষ্ণবধর্মে অমুরক্ত হইয়াছিলেন এবং সুন্দর কীর্তন করিতে পারিতেন। এইরূপে বংশপরম্পরা ধরিয়া শ্রীধরে ভক্তিদ্বারা সুরক্ষিত হইয়াছিল। এখনও শ্রীধর বৈষ্ণবধর্মের একটি কেন্দ্র। কিন্তু তাহার পূর্বের প্রভাব আর নাট।

বষ্ণব ধর্মের আর একটি প্রসিদ্ধ কেন্দ্র ছিল। শ্রীচৈতন্যের পণ্ডিত গৌরীদাস এই মণ্ডলীর প্রতিষ্ঠাতা। ইনি পণ্ডিত ধনের ভ্রাতা। চৈতন্যদেব তাঁহাকে বিশেষ শ্রীতির চক্ষে তিনি গৌরীদাসকে নিজহস্তে লিখিত শ্রীমদ্ভাবগত গীতা ছিলেন। অল্প এক সময়ে নৌকাযোগে গঙ্গাপার হইয়া নী পার হইয়াছিলেন তাহা গৌরীদাসকে দিয়া বলেন— দেগকে ভবনদী পার কর। শ্রীচৈতন্যের গীতা ও বৈঠা 'অধিকামণ্ডলীতে রক্ষিত হইয়াছিল। গৌরীদাস নবদ্বীপ মকাঠ আনিয়া তদ্বারা শ্রীচৈতন্য নিত্যানন্দের প্রতিমূর্তি ষা অধিকায় স্থাপন করে। এই চৈতন্যমূর্তি অতি প্রাচীন। গৌরীদাস অনেকদিন পর্যন্ত গভীর ভক্তির সহিত এই মূর্তি পূজা করেন। তৎপরে তাঁহার শিষ্য হৃদয়চৈতন্যের উপর বিগ্রহ রক্ষার ভার দেন। হৃদয়চৈতন্যের পূর্ব নাম হৃদয়ানন্দ। পণ্ডিত গদাধর তাঁহাকে বালাকাল হইতে প্রতিপালন ও শিক্ষাদান করেন। গৌরীদাস গদাধর পণ্ডিতের নিকট হইতে তাঁহাকে চাহিয়া লন। এখন হইতে

হৃদয়চৈতন্য অধিকাংশ বাস করিতে লাগিলেন। তিনি গৌরীদাসকে বিগ্রহসেবার কার্যে সাহায্য করিতেন। একবার চৈতন্যজন্মতিথির কিছুদিন পূর্বে গৌরীদাস অগ্ৰজ যান। জন্মতিথি সন্নিহিত হইল। কিন্তু গৌরীদাস ফিরিলেন না। হৃদয়ানন্দ কি করিবেন বুঝিতে পারিলেন না; অনেক ভাবিয়া চিন্তিয়া অবশেষে জন্মতিথি পূজার আয়োজন করিলেন। নানাস্থানের বৈষ্ণবদিগকে নিমন্ত্রণ করিয়া পাঠাইলেন। নির্দিষ্ট দিনের একদিন পূর্বে গৌরীদাস ফিবিয়া আসিয়া নিমন্ত্রণ কথা শুনিলেন। কোন আয়োজন নাই, অথচ বৈষ্ণবদিগকে নিমন্ত্রণ করা হইয়াছে ইহাতে গৌরীদাস অত্যন্ত বিবক্ত হইয়া হৃদয়ানন্দকে আশ্রম হইতে তাড়াইয়া দেন। তিনি গঙ্গা বসিয়া রহিলেন। কথিত আছে, এমন সময়ে একজন মহাধন করিয়া উৎসবের সামগ্রী উপস্থিত করিলেন। হৃদয়ানন্দ এই সংবাদ প্রেরণ করিলেন। তিনি ক্রোধের বশবর্তী হইয় সামগ্রী লইয়া তাহাকেই উৎসব করিতে বল। অগত্যা তাহাঁই করিলেন। যথাসময়ে নিমন্ত্রিত বৈষ্ণবগণ আসি হইলেন। গঙ্গাতীরে উৎসবের আয়োজন হইল। বৈষ্ণব হইয়া মহা সঙ্কীর্্তন আরম্ভ করিলেন। প্রমত্ত সঙ্কীর্্তন ও নৃত্য লাগিল। শ্রীচৈতন্য নিত্যানন্দ সে নৃত্যে যোগ দিলেন। গৌরীদাস ভোগ দিবার জন্য মন্দিরে প্রবেশ করিয়া দেখিলেন বিগ্রহ নাই। ক্রোধে অধীর হইয়া গৌরীদাস ষষ্ঠি হস্তে আসিলেন, তাহার ক্রোধ দেখিয়া শ্রীচৈতন্য ও নিত্যানন্দ পলায়ন করিয়া সিংহাসনে আসিয়া বসিলেন। গৌরীদাস এই অদ্ভুত ব্যাপার দেখিয়া ক্রোধের পরিবর্তে পরম মেহ ও আনন্দভরে হৃদয়ানন্দকে আলিঙ্গন করিলেন এবং তাহাকে হৃদয়চৈতন্য নাম প্রদান করিলেন। এই বিবরণ

উত্তরকালে ভাবুক কবির কল্পনা যাত্রা। তবে গৌরীদাস হৃদয়ানন্দের অসাধারণ চৈতন্যভক্তি ও ভগবৎনির্ভর^১ দেখিয়া—কোন সময়ে তাঁহাকে হৃদয়চৈতন্য নাম দিয়াছিলেন ইহা সম্ভব। গৌরীদাস পণ্ডিতের তিরোভাবের পরে দীর্ঘকাল হৃদয়চৈতন্য অধিকা আশ্রমের মহাস্ত ছিলেন। উত্তরকালে উড়িষ্যার শক্তিশালী বৈষ্ণবনেতা শ্রামানন্দ ইহার নিকট দীক্ষা গ্রহণ করেন।

পানিহাটি গ্রামে আর একটি বৈষ্ণবমণ্ডলী গঠিত হইয়াছিল। পানিহাটি খড়দহের সন্নিকট; নবদ্বীপ হইতে নীলাচল বাইবার পাথর উপর। বৈষ্ণবগণ নীলাচলে যাতায়াতের সময় পানিহাটি হইয়া

চৈতন্যদেব ও নীলাচলে গমনাগমন কালে, এখানে কিছুদিন দাঁড়াইয়াছিলেন। এই মণ্ডলীর নেতা রাঘব পণ্ডিত সপরিবারে, অতিশয় অমুরাগী ভক্ত ছিলেন। প্রতি বৎসর গৌড়ীয় খন নীলাচলে যাইতেন রাঘব পণ্ডিত তাঁহাদের সঙ্গে যাইতেন শ্রীরাম প্রিয় খাণ্ড সমূহ সঙ্গে করিয়া লইয়া যাইতেন। তাঁহার সমস্ত বৎসর ধরিয়া সেই সমুদয় খাদ্য প্রস্তুত করিতেন, এখানে সেগুলি একটি ধলিতে পুরিয়া সঙ্গে লইতেন। বৈষ্ণব এই ধলি রাঘবের ঝুলি নামে প্রসিদ্ধ ছিল। পদত্রে দীর্ঘপথ খাদ্য জব্য লইয়া যাওয়া কত গভীর ও সুমিষ্ট প্রেমের তাহা সহজেই বুঝিতে পারা যায়। চৈতন্যদেবও পরম খাদ্যজব্য গ্রহণ করিতেন এবং সযত্নে রক্ষা করিয়া প্রতিদিন কিছু কিছু ভক্ষণ করিতেন। বৈষ্ণবগণ বিশ্বাস করিতেন চারিখানে শ্রীচৈতন্যের আবির্ভাব হইত। তাহার মধ্যে রাঘবের গৃহ একটি।

শরীর মন্দিরে আর নিত্যানন্দ নর্তনে।

স্বাস কীৰ্তনে আর রাঘব ভবনে।

এই চারি ঠাই প্রভুর সদা আবির্ভাব ।
 প্রেমাকুটে হয় প্রভুর সহজ স্বভাব ॥”

চৈঃ চঃ, অস্ত্যলীলা, ২য় পরিঃ ।

নীলাচল পথের আর একটি কেন্দ্র কুমারহট্ট (বর্তমান কুমার হাটি)
 প্রাচীন বৈষ্ণব শ্রীবাস পণ্ডিত এখানে একটি আশ্রম স্থাপন করিয়া-
 ছিলেন । সময়ে সময়ে তিনি নবদ্বীপ হইতে আসিয়া এখানে বাস
 করিতেন । তাঁহার অবস্থানে কুমারহট্ট একটি প্রসিদ্ধ বৈষ্ণবকেন্দ্র
 হইয়া উঠিয়াছিল ।

কুলীন গ্রামে আর একটি বৃহৎ এবং শক্তিশালী বৈষ্ণবকেন্দ্র ছিল ।
 বৈষ্ণব ইতিহাসে কুলীনগ্রামবাসী বৈষ্ণবগণের পুনঃ পুনঃ উল্লে
 পাওয়া যায় । সতারাঙ্গ খান, বামানন্দ, যহ্ননাথ, পুরুষোত্তম
 বিদ্যানন্দ ও বাণীনাথ বহু প্রভৃতি বহু অনুরাগী বৈষ্ণব এখা
 করিতেন । তাঁহারা প্রতি বৎসর দশবন্ধ হইয়া চৈতন্যদেবকে (
 অল্প নীলাচল যাইতেন । তাঁহাদের উপবে জগন্নাথের রথ া
 পটুদণ্ডি লইয়া যাইবার আদেশ ছিল । চৈতন্যদেব কুলীন
 বৈষ্ণবদিগকে অতিশয় শ্রীতি ও শ্রদ্ধা করিতেন । তিনি বলিঃ
 কুলীন গ্রামবাসী বৈষ্ণবেরা দূরে থাকুক, কুলীন গ্রামের কুকুরও
 প্রিয় ।

“প্রভু কহে কুলীনগ্রামের যে হয় কুকুর
 সেহো মোর প্রিয় অল্প জন বহু দূর ।
 কুলীন গ্রামের ভাগ্য কহনে না যায়
 শূকর চরায় ডোমে সেহো কৃষ্ণ গায় ॥”

চৈঃ চঃ, আদিগীতা ১০ম পরিচ্ছেদ ।

গঙ্গাতীরে সপ্তগ্রামে আর একটি বৃহৎ বৈষ্ণবমণ্ডলী গঠিত

হইয়াছিল। এখানে শ্রীপাদ নিত্যানন্দের প্রভাবই অধিক পরিমাণে কাজ করিয়াছিল। সপ্তগ্রামে অনেক সুবর্ণ বণিকের বাস ছিল। তৎকালীন হিন্দুসমাজে তাঁহারা হেয় ছিলেন। নিত্যানন্দ তাঁহাদিগকে মণ্ডলীতে গ্রহণ করিয়া সমাদর করেন। উদ্ধারণ দত্ত সপ্তগ্রামের প্রধান অধিবাসী।

নবদ্বীপের নিকটবর্তী বড়গাছী গ্রামে আর একটি বৃহৎ বৈষ্ণবমণ্ডলী গঠিত হইয়াছিল। ইহাও নিত্যানন্দের প্রচারের ফল। তিনি অনেক সময়ে নবদ্বীপ হইতে এইখানে আসিয়া ভক্তিদর্শন প্রচার করিতেন। বড়গাছী নিবাসী কৃষ্ণদাস তাঁহার একজন বিশেষ অন্তরঙ্গ ভক্ত ছিলেন।

এ বিবাহের একজন প্রধান উদ্যোগী।

নিকটবর্তী সালিগ্রামেও একটি মণ্ডলী স্থাপিত হইয়াছে। নিত্যানন্দের শ্বশুর সূর্য্যদাস সারথেল ও তাঁহার ভ্রাতাগণ ইহাতে অত্যন্ত আগ্রহ করিতেন। নিত্যানন্দের বিবাহের পরে এখানে বৈষ্ণব ধর্মে বিশেষভাবে বিস্তৃত হইয়াছিল। স্বয়ং সূর্য্যদাস সারথেল ইহা করিয়াছিলেন।

বঙ্গদেশের নানাস্থানে অনেক বৈষ্ণবের উল্লেখ দেখিতে পাওয়া যায়। চট্টগ্রামে পুণ্ডরীক বিদ্যানিধি নামে একজন প্রেমিক ইহা করিতেন। শ্রীচৈতন্যের নবদ্বীপলীলার প্রারম্ভে তিনি নবদ্বীপ আসেন। মনে হয় গঙ্গাতীরে বাসের জন্য তাঁহার একটি বাড়ী ছিল। তিনি অবস্থাপন্ন লোক ছিলেন। তাঁহার গৃহে বহু দাস দাসী ও বিবিধ বিলাস দ্রব্যের উল্লেখ দেখিতে পাওয়া যায়। ধনী হইলেও তিনি একজন অকৃত্রিম ভক্ত ছিলেন। বাহিরে তাঁহার সাজসজ্জা ও বিলাস দেখিয়া লোকেরা তাঁহাকে চিনিতে পারিত না। তিনি যখন প্রথম নবদ্বীপ আসেন

তাঁহার স্বদেশবাসী বৈষ্ণব মুরারী গুপ্তের সহিত পণ্ডিত গদাধর তাঁহাকে দেখিতে আসেন। তিনি শুনিয়াছিলেন পুণ্ডরীক বিদ্যানিধি একজন মহাভক্ত। কিন্তু তাঁহার সাজ সজ্জা দেখিয়া গদাধরের মনে অশ্রদ্ধা জন্মিল। মুরারী গুপ্ত তাঁহার মনের ভাব বুঝিয়া ভাগবত হইতে একটি শ্লোক পড়িলেন। তাহা শুনিয়া বিদ্যানিধি প্রেমে উন্মত্ত হইয়া পণ্ডিত হইলেন। তখন গদাধর পণ্ডিত নিষ্ক্ৰম ভ্রম বুঝিতে পারিলেন এবং প্রথম অশ্রদ্ধাজনিত অপরাধ স্থালন করিবার জন্ত উত্তরকালে তাঁহার নিকট দীক্ষা গ্রহণ করিয়াছিলেন। চৈতন্যদেব বিদ্যানিধির পরিবর্তে পুণ্ডরীককে “প্রেমনিধি” আখ্যা দিয়াছিলেন। পুণ্ডরীক কখনও চৈতন্যদেব কখনও নবদ্বীপ এবং কখনও শ্রীচৈতন্যের নিকটে উৎসর্গ করিতেন।

শিবানন্দ সেন গৌড়ের আর একজন প্রসিদ্ধ বৈষ্ণব। যে বৈষ্ণবদল গৌড় হইতে শ্রীচৈতন্যকে দেখিবার জন্ত নীলা শিবানন্দ সেন তাঁহাদের পথ প্রদর্শক ছিলেন। উড়িষ্যার সুপরিচিত ছিল। তাঁহার নেতৃত্বে যাত্রীদল নিৰ্ব্বিলম্বে উর্ধ্ব পথ অতিক্রম করিতেন। শিবানন্দ সেন চৈতন্যদেবের ভক্ত ছিলেন। বৈষ্ণবমণ্ডলীতেও তাঁহার বহু সম্মান তাঁহার তিন পুত্র, চৈতন্য দাস, রামদাস আর কবি কর্ণপু সকলেই চৈতন্যদেবের অহুরাগী ভক্ত হইয়াছিলেন। উক্ত কর্ণপুর চৈতন্য চন্দ্রোদয় নাটক প্রভৃতি রচনা করিয়াছিলেন

এইরূপে গৌড়ের নানাস্থানে বৈষ্ণবমণ্ডলী ছড়াইয়া পড়িয়াছিল। উত্তরকালে গৌড়ীয় বৈষ্ণব মণ্ডলী আরও প্রসার লাভ করিয়াছিল। পরে তাহার বিবরণ পুণ্ডরীক বাইবে।

উৎকলের বৈষ্ণবমণ্ডলী ।

গৌড়ীয় বৈষ্ণবধর্ম প্রধানতঃ বঙ্গদেশেই আঁবন্ধ ছিল। ইহার বাহির কেবলমাত্র উৎকলে ইহা প্রসার লাভ করিয়াছিল। উড়িষ্যা বঙ্গদেশের পাশে, এবং উভয় প্রদেশের মধ্যে গত্যাত ছিল। উভয় দেশের ভাষার মধ্যেও অনেক সাদৃশ্য আছে। তন্নিম্ন শ্রীচৈতন্যদেব শেষ জীবনে বহু বৎসর উৎকলে বাস করিয়াছিলেন। এই সকল গৌড়ীয় বৈষ্ণবধর্ম উৎকলে বিস্তৃতি প্রাপ্ত হইয়াছিল। তদ্ব্যতীত তাঁহার অনেক সঙ্গী নবদ্বীপ হইতে নীলাচলে আসিয়াছিলেন। তন্নিম্ন প্রতিবৎসর বহু বৈষ্ণব চৈতন্যদেবকে সঙ্গী গোড় হইতে নীলাচলে আসিয়া দীর্ঘকাল অবস্থান ইহাদের জীবনের প্রভাবে অনেক উৎকলবাসীও বৈষ্ণব-প্রিয় হইয়াছিলেন। এই প্রকারে উৎকলে একটি নাতিস্কুদ্র মণ্ডলী হইল।

বর নবদ্বীপের সঙ্গীগণের মধ্যে পণ্ডিত গদাধরের নাম প্রধান। ইনি শ্রীচৈতন্যের উৎকল আগমনের অল্পদিন নিকট থাকিবার জন্ত নবদ্বীপ পরিত্যাগ করিয়া উৎকলে ভদ্রবধি শ্রীচৈতন্যের পরলোক গমন পর্য্যন্ত ইনি তাঁহার নিকটেই ছিলেন। ইনি পরম স্তম্ভ ধার্মিক এবং পণ্ডিত ছিলেন। প্রতিদিন শ্রীচৈতন্যদেবকে ভাগবত পড়িয়া শুনাইতেন। ভাগবত পাঠ করিতে করিতে তাঁহার এত অশ্রুপাত হইত যে, গ্রন্থের পাতা ভিজিয়া যাইত। শ্রীচৈতন্যের পরলোকগমনের কিছুদিন পরে ইনিও ইহলোক পরিত্যাগ করেন।

বঙ্গদেশের আর একজন বৈষ্ণব চৈতন্যদেবের সঙ্গে উৎকল আসিয়া বাস করেন। তিনি যখন কুলতিলক হরিদাস। তাঁহার জীবন-কাহিনী পূর্বেই বিবৃত হইয়াছে। চৈতন্যদেবের দাক্ষিণাত্য হইতে প্রত্যাভর্তনের পরে গৌড়ীয় ভক্তগণ প্রথম বৎসর যখন তাঁহাকে দেখিতে নীলাচলে আগমন করেন, হরিদাসও সেই সঙ্গে আসেন; এবং স্থায়ীভাবে তথায় বাসের ইচ্ছা প্রকাশ করেন। চৈতন্যদেব নগরের বাহিরে একটি পুষ্পাঙানে তাঁহার বাসের জন্য কুটীর নির্দেশ করিয়া দেন। ষতদিন জীবিত ছিলেন হরিদাস এই কুটীরেই বাস করিতেন। শ্রীচৈতন্যের সঙ্গীগণের মধ্যে তিনিই সর্বাগ্রে পরলোক গমন করেন।

নবদ্বীপের সঙ্গী আর একজন বৈষ্ণব নীলাচলে বাস করিতেন। তাঁহার নাম স্বরূপ দামোদর। ইহার পূর্বনাম পুরুষোত্তম। চৈতন্যদেব যখন সন্ন্যাস গ্রহণ করেন, সেই সময়ে সংসারে তিনিও বারাণসী গিয়া সন্ন্যাস গ্রহণ করিয়াছিলেন। তাঁহাকে বেদান্ত অধ্যয়ন ও অধ্যাপনা করিতে বলেন। তিনি আচার্য্য ভক্তিপথাবলম্বী।

“পরম বিরক্ত তিহো পরম পণ্ডিত।

কায়মনে আশ্রিয়াছে শ্রীকৃষ্ণচরিত।”

চৈঃ চঃ, মঃ লীঃ, ১০ঃ

নিশ্চিত মনে কৃষ্ণভজন করিবেন বলিয়া সন্ন্যাস গ্রহণ করিয়া নীলাচলে শ্রীচৈতন্যের নিকটে আসিলেন, এবং তাঁহার সঙ্গে পরিচয় করিয়া গিয়াছিলেন বলিয়া কৃষ্ণা ভক্তি করিলেন। চৈতন্যদেব তাঁহাকে পাইয়া পরম প্রীত হইলেন এবং তাঁহার নিকটে বাসের ব্যবস্থা করিয়া দিলেন। এখন হইতে স্বরূপদামোদর নীলাচলেই বাস করিতে

লাগিলেন। চৈতন্যদেব তাঁহাকে অতিশয় প্রীতি করিতেন। তিনি অতি সুগায়ক ছিলেন।

“সঙ্গীত গঙ্ঘর্ষসম, শাস্ত্রে বৃহস্পতি।

দামোদর সম আর নাহি মহামতি।”

চৈঃ চঃ, মঃ লীঃ, নবম পরিচ্ছেদ।

চৈতন্যদেবকে জয়দেব, ব্রিন্দ্যাপতি, চণ্ডীদাসের পদাবলী গান করিয়া শুনাইতেন। বিরহ উন্মাদকালে স্বরূপের গান তাঁহাকে সাধুনা দিত। চৈতন্যচরিতামৃতে রাধার সহিত তাহার সখী ললিতার ষেরূপ সম্বন্ধ শ্রীচৈতন্য ও স্বরূপদামোদরেরও সেইরূপ সম্বন্ধ এইরূপ বর্ণিত

“পূর্বে যৈছে রাধার সহায় ললিতা প্রধান।

তৈছে স্বরূপ গোসাঞি রাখে প্রভুর প্রাণ ॥”

অস্ত্যলীলা, ৬ষ্ঠ পরিচ্ছেদ।

ন্যদেব তাঁহাকে মনোবেদনা অকপটে বলিতেন।

“রাত্রি হইলে স্বরূপ রামানন্দ লঞা।

আপন মনের কথা কহে উঘারিয়া ॥”

চৈঃ চঃ, অঃ লীঃ, ১৪শ পরিচ্ছেদ।

পর আর একটি কার্য ছিল গ্রন্থপরীক্ষা। কেহ কোন নূতন সঙ্গীত রচনা করিয়া শ্রীচৈতন্যের নিকট আনিলে অগ্রে স্বরূপ পরীক্ষা করিতেন। তিনি অনুমোদন করিলে চৈতন্যদেবের নিকট তাঁহা পাঠ করা হইত। ষতদিন শ্রীচৈতন্য ইহলোকে ছিলেন স্বরূপদামোদর তাঁহার নিকটেই বাস করিয়াছিলেন। বৈষ্ণবগ্রন্থে তিনি স্বরূপদামোদর নামে পরিচিত।

নীলাচলের আর একজন সঙ্গী পরমানন্দ পুরী। তীর্থপর্যটনকালে

দাক্ষিণাত্যে তাঁহার সহিত চৈতন্যদেবের প্রথম সাক্ষাৎ হয়। তখনই উভয়ে উভয়ের প্রকৃতি আকৃষ্ট হইয়াছিলেন এবং নীলাচলে একত্র বাসের প্রস্তাব করেন; চৈতন্যদেব যখন দাক্ষিণাত্য হইতে ফিরিয়া আসেন পরমানন্দপুরী সে সময়ে নবদ্বীপ। তাঁহার প্রত্যাবর্তন সংবাদে পুরী গোঁসাই তাড়াতাড়ি নীলাচলে আসিলেন এবং তদবধি সেখানে চৈতন্যদেবের সহিত বাস করিতে লাগিলেন।

নীলাচলের সন্নী গৌড়ীয়, ভক্তগণের মধ্যে আর একজনের নাম বিশেষভাবে উল্লেখযোগ্য। তিনি জগদানন্দ পণ্ডিত। জগদানন্দ চৈতন্যদেবকে অত্যন্ত ভাল বাসিতেন। শ্রীচৈতন্যও তাঁহাকে বিশেষ শ্রীতি করিতেন। উভয়ের মধ্যে অনেকসময় প্রণয়-ক চৈতন্যদেবের সহিত জগদানন্দের সঙ্ঘর্ষের শ্রীকৃষ্ণ ও সত্যভামা সহিত তুলনা দেওয়া হইয়াছে।

“জগদানন্দে প্রভুর চলে এই মতে।

সত্যভামা কৃষ্ণে যেন শুনি ভাগবতে ॥”

চৈঃ চঃ, অন্ত্যালীলা, ১২শঃ

জগদানন্দ চৈতন্যদেবের প্রতি অনেক আবদার করিতে যাতার সংবাদ লইবার জন্য চৈতন্যদেব জগদানন্দকে মধ্যে ম প্রেরণ করিতেন। একবার গোঁড়ে অবস্থানকালে শিবা-গৃহে সুগন্ধি চন্দন তৈল দেখিয়া শ্রীচৈতন্যের জন্য তাহা ল জগদানন্দের ইচ্ছা হইল। তিনি এক কলস সুগন্ধি তৈল প্রস্তুত নীলাচল আনিলেন, এবং ভৃত্য গোবিন্দের হাতে দিয়া বলিলেন, প্রতি দিন একটু একটু করিয়া মস্তকে দিবে। গোবিন্দের মুখে সুগন্ধি তৈল মর্দনের প্রস্তাব শুনিয়া চৈতন্যদেব অতিশয় ক্রুদ্ধ হইলেন। তিনি বলিলেন আমি বিরক্ত সন্ন্যাসী; তৈলে অধিকার নাই; বিশেষতঃ

স্বগচ্ছি তৈল । অগদানন্দকেও এই কথা বলিয়া জগন্নাথের মন্দিরে
প্রদীপে ব্যবহারের জন্য সেই তৈল পাঠাইতে উপদেশ দিলেন ।

“জগন্নাথে দেহ লঞা দীপ যেন জলে ।

তোমার সকল শ্রম হইবে সফলে ॥”

চৈঃ চৈঃ, অস্ত্রালীলা, ১২শ পরিচ্ছেদ ।

অগদানন্দ এই কথা শুনিয়া, ক্রোধভরে বলিলেন “কে বলিল আমি
তোমার জন্য তৈল আনিয়াছি ।” তদনন্তর গৃহাভ্যন্তর হইতে তৈলপাত্র
আনিয়া ক্রোধভরে তাঁহার সম্মুখে ভাঙ্গিয়া ফেলিলেন এবং গৃহে গিয়া
দ্বার রুদ্ধ করিয়া শয়ন করিলেন । তিন দিন দ্বার খোলা হইল না ।
তখন চৈতন্যদেব গৃহদ্বারে গিয়া বলিলেন, দ্বার খোল, এবং উঠিয়া রুদ্ধনের
বিষয় জ্ঞাপন কর । আজ তোমার গৃহে আমি ভিক্ষা করিব । ইহাতে

অগদানন্দের ক্রোধ দূর হইল । আর একবার ভূমিতে শয়ন করিতে
সময়েই জীর্ণদেহে ব্যথা লাগে দেখিয়া অগদানন্দ শিমূলের তুলা
সেই ক্রম প্রস্তুত করাইয়া তাঁহার ব্যবহারের জন্য গোবিন্দের
দেহে রাখিলেন । কিন্তু চৈতন্যদেব তাহাও গ্রহণ করিলেন না । ইহাতে
অগদানন্দ অতিশয় দুঃখিত হইলেন । অবশেষে নিরুপায় হইয়া, তিনি
স্বপ্নে গৌড়ের শুক খোলা নখে চিরিয়া দুইখানি বহির্বাসে ভরিয়া গদির
পেছনে রাখিলেন । অগদানন্দের একান্ত আগ্রহে চৈতন্যদেব ইহা ব্যবহার
করিতে সম্মত হইলেন । কিন্তু ইহাতেও অগদানন্দের ক্ষোভ গেল না ।
এতদ্বারা দেখিয়া দুঃখে ও ক্রোধে নীলাচল পরিত্যাগ করিয়া বৃন্দাবন
যান । কিন্তু চৈতন্য-বিরহে সেখানেও থাকিতে পারিলেন না । কিছু
দিন পরে পুনরায় নীলাচল প্রত্যাগমন করিলেন ।

এতদ্বিধ বক্রেশ্বর, রঘুনাথ বৈষ্ণব ও রঘুনাথ দাস প্রভৃতি আরও
কয়েকজন গৌড়ের ভক্ত নীলাচলে বাস করিয়াছিলেন ।

উৎকলবাসী যে সমুদয় ব্যক্তি বৈষ্ণবধর্ম গ্রহণ করিয়াছিলেন তাঁহাদের মধ্যে বাসুদেব সার্কভৌম সর্ব প্রথম। নীলাচলে অবস্থিতি করিলেও তাঁহার আদিম নিবাস গোড়। প্রথম বয়সে উৎকলে আসিয়া বাস করেন এবং উড়িষ্যার রাজার সভাপণ্ডিত পদে নিযুক্ত হন। চৈতন্যদেব যেদিন প্রথমে পুরীতে পদার্পণ করেন সেদিনই তাঁহার সহিত সাক্ষাৎ হয়। মন্দিরে জগন্নাথ দেখিয়া শ্রীচৈতন্য মুচ্ছিত হইয়া পড়েন। বাসুদেব সার্কভৌম তাঁহাকে স্বগৃহে আনিয়া সেবা শুশ্রূষা করেন। তখন পর্যন্ত তাঁহার ভক্তিধর্মে আস্থা হয় নাই। তিনি জ্ঞানপথাবলম্বী বৈদান্তিক ছিলেন। শ্রীচৈতন্যকে ভক্তি-পথাবলম্বী জানিয়া প্রথমে তাঁহাকে অবজ্ঞাই করিয়াছিলেন।

পরে তাঁহার সংস্পর্শে ও ধর্মালোচনায় অল্পদিন মধ্যেই বৈষ্ণবধর্ম গ্রহণ করেন। তদবধি তিনি শ্রীচৈতন্যের অনুরক্ত বন্ধু হইয়াছিলেন।

উৎকলবাসী আর এক উচ্চপদস্থ ব্যক্তি শ্রীচৈতন্যের অনুরক্ত হইয়াছিলেন। তিনি রামানন্দ রায়। ইতিপূর্বে প্রসঙ্গক্রমে কথ্য বহবার বলা হইয়াছে। শ্রীচৈতন্যদেবের সহিত সাক্ষাৎের তিনি বৈষ্ণবধর্ম অবলম্বন করিয়াছিলেন। প্রথমে বাসুদেব সার্কভৌম বৈষ্ণব বলিয়া তাঁহাকে অবজ্ঞা করিতেন। পরে যখন শ্রীচৈতন্যের সংস্পর্শে আসিয়া স্বয়ং ভক্তিধর্ম গ্রহণ করেন তখন তিনি রামানন্দ মহত্ব বুঝিতে পারেন। সে সময়ে রামানন্দ রায় অন্ধ্রপ্রদেশের শাসনকর্তারূপে বিদ্যানগরীতে বাস করিতেছিলেন। চৈতন্যদেব যে সময়ে দাক্ষিণাত্য গমন করেন, বাসুদেব সার্কভৌম তাঁহাকে রামানন্দ রায়ের সহিত সাক্ষাৎের জন্য বিশেষভাবে অনুরোধ করিয়াছিলেন। বিদ্যানগরীতে তাঁহাদের মিলনের বিবরণ পূর্বেই প্রদত্ত হইয়াছে। উভয়ের মধ্যে গভীর ধর্মালোচনের বিষয় কৃষ্ণদাস করিয়ার চরিতামৃত

বিবৃত করিয়াছেন। ভক্তজীবনচরিত লোক সেই ঐশ্বর্যতোপম ভক্তিতত্ত্ব চৈতন্যদেবের অল্পপ্রাণনা বলিয়া বর্ণনা করিয়াছেন। কিন্তু সাধারণ পাঠক তাহাতে রায় রামানন্দের গভীর ধর্মজীবন ও ভক্তিতত্ত্বাভিজ্ঞতার পরিচয় পান। শ্রীচৈতন্যদেবও রামানন্দের অদ্ভুত ভক্তিতত্ত্বজ্ঞান দেখিয়া মুগ্ধ হইয়াছিলেন। তাঁহাকে নিকটে পাইবাব জন্য সত্বর বিষয়কর্ম পরিত্যাগপূর্বক নীলাচলে গিয়া বাস করিতে অনুরোধ করেন। তদনুসারে চৈতন্যদেবের নীলাচলে প্রত্যাবর্তনের অল্পদিন পরেই রামানন্দ রায় নীলাচলে আসেন এবং জীবনের শেষ পর্য্যন্ত সেইখানেই বাস করেন। প্রতিদিন শ্রীচৈতন্যদেব নিকট আসিবার পূর্বে রাত্রি পর্য্যন্ত উভয়ে ধর্মপ্রসঙ্গ করিতেন। চৈতন্যদেব যখন *বিরহে অধীর হইতেন তখন রামানন্দের ধর্মপ্রসঙ্গ তাঁহাকে না দিত।

“রামানন্দের কৃষ্ণ কথা স্বরূপের গান ।
বিরহ বেদনায় প্রভুর বাধয়ে পরাণ ॥
দিনে প্রভু নানা সঙ্গ হয় অশ্রমনা ।
রাত্রিকালে বাড়ে প্রভুর বিরহ বেদনা ॥
তাঁর সুখ হেতু সঙ্গ বহে দুইজনা ।
কৃষ্ণ-রস-শ্লোক-গীতে করেন সাধনা ॥
সুখল যৈছে পূর্বে কৃষ্ণসুখের সহায় ।
গৌর সুখদান হেতু তৈছে রামরায় ॥”

চৈঃ চঃ, অঙ্গলীলা, ৬ষ্ঠ অধ্যায় ।

চৈতন্যদেব রামানন্দকে এত প্রছা করিতেন, যে, তিনি বলিয়া-
ছিলেন—

নির্ধিকার দেহমন কাষ্ঠ পাষণ সম ।

আশ্চর্য্য তরুণী স্পর্শে নির্ধিকার মন ॥”

চৈঃ চঃ, অঃ লীঃ, ৫ম পরিচ্ছেদ ।

বৈষ্ণবগ্রন্থে তিনি ইন্দ্রিয় সংযমের আদর্শ বলিয়া বর্ণিত হইয়াছেন । শ্রীলোকের সঙ্গ বৈষ্ণবগণের নিষিদ্ধ ছিল । শ্রীলোকের সহিত বাক্যালাপের জন্য ছোট হরিদাসকে চৈতন্যদেব চিরদিনের জন্য বর্জন করিয়াছিলেন । সেই দুঃখে তিনি প্রয়াগে গঙ্গা-যমুনা সঙ্গমে প্রবেশ করিয়া প্রাণত্যাগ করেন । অথচ দেখা যায়, রায় রামানন্দ স্বহস্তে গায়িকাগণের অঙ্গ মার্জন, পরিচ্ছদ পরিবর্তন প্রভৃতি সম্পন্ন দিয়াছেন ; তথাপি তাঁহার প্রতি বৈষ্ণবগণের কোনও নাই । তাঁহার সঙ্গকে উক্ত হইয়াছে ।

“কাষ্ঠ পাষণ স্পর্শে হয় যৈছে ভাব ।

তরুণী স্পর্শে রায়ের তৈছে স্বভাব ॥”

চৈঃ চঃ, অঃ লীঃ, ৫ম

উৎকলের রাজা প্রতাপরুদ্রকেও শ্রীচৈতন্যের ভক্তি করা যাইতে পারে । চৈতন্যদেবের প্রতি তাঁহার প্রগা প্রথম ধণ্ডে বিবৃত হইয়াছে । তাঁহাকে দেখিবার জন্য ব্যাকুলতা জগতে তাহা বিরল । রাজা প্রতাপরুদ্র শশি নীলাচলে অবস্থানের সমুদয় ব্যবস্থা করিয়া দিয়াছিলেন । গায়িকাগণের প্রতি আদেশ ছিল চৈতন্যদেব যখন যাহা ইচ্ছা করিবেন তখন তাহা পূর্ণ করিয়া দিবে ।

উৎকলবাসী আর একজন বৈষ্ণবকে বৈষ্ণবগ্রন্থে উচ্চস্থান দেওয়া হইয়াছে । তিনি প্লিথি মাইতি । চৈতন্যচরিতামৃতে ‘লিখন অধিকারী’ বলিয়া তাঁহার পরিচয় দেওয়া হইয়াছে । অনেক স্থানে চৈতন্যদেবের

নিকটে থাকিতেন। বৈষ্ণবগণ বলেন, জগতে সাড়ে তিনজন ভক্তির
অধিকারী ছিলেন। রায় রামানন্দ, স্বরূপ দামোদর, শিখি মাইতি
এই তিন পাত্র, এবং শিখি মাইতির ভগ্নী মাধবী দেবী অর্ধ পাত্র।

“প্রভু লেখা করে যারে রাধিকারগণ।
জগতের মধ্যে পাত্র সাড়ে তিন জন ॥
স্বরূপ গোসাঞি আর রায় রামানন্দ।
শিখি মাইতি তিন, তাঁর ভগিনী অর্ধ জন ॥”

চৈঃ চঃ, অস্ত্যালীলা, ২য় পরিচ্ছেদ।

এ অতি উচ্চ সম্মান। রায় রামানন্দ এবং স্বরূপ দামোদরের সহিত
শিখি মাইতিকে এখানে সমান আসন দেওয়া হইয়াছে।

শিখি মাইতির ভগ্নী মাধবী দেবী উৎকলের বৈষ্ণবমণ্ডলীর মধ্যে
সম। অপর কোন নারীকে বৈষ্ণবমণ্ডলীতে এত উচ্চস্থান দেওয়া
হইত। তাঁহাকে অর্ধ পাত্র বলা হইয়াছে। চৈতন্যচরিতামৃত
একে বৃদ্ধা তপস্বিনী ও পরম বৈষ্ণবী বলা হইয়াছে।

“মাইতির ভগিনী সেই নাম মাধবী দেবী।
বৃদ্ধা তপস্বিনী আর পরম বৈষ্ণবী ॥”

চৈঃ চঃ, অস্ত্যালীলা, ২য় পরিচ্ছেদ।

উৎকলের আর একজন অমুরাগী ভক্ত কাশী মিশ্র। ইনি রাজা
প্রতাপ রুদ্রের গুরু। রাজা তাঁহাকে গভীর শ্রদ্ধা করিতেন। রাজার
নিয়ম ছিল, যখন তিনি পুরীতে থাকিতেন প্রতিদিন মধ্যাহ্নে আসিয়া
কাশী মিশ্রের পাদ সর্ষাহন করিতেন।

“প্রতাপ রুদ্রের এক আছয়ে নিয়মে।
যত দিন রহে তিহো শ্রীপুরুষোত্তমে ॥

গৌড়ীয় বৈষ্ণবধর্ম ও শ্রীচৈতন্যদেব

নিত্য আসি করেন মিশ্রের পাদ সর্ষাহন ।
জগন্নাথের সেবার করে ভিমান শ্রবণ ॥”

চৈঃ চঃ, অন্ত্যলীলা, ৯ম পরিচ্ছেদ ।

চৈতন্যদেবের নীলাচল আগমনের সময় হইতেই কান্দী মিশ্র তাঁহার প্রতি আকৃষ্ট হন এবং শেষ দিন পর্য্যন্ত গভীর শ্রদ্ধার সহিত তাঁহার সেবা করেন । শ্রীচৈতন্যের বাসস্থানের জন্ত আপনার একখানি গৃহ প্রদান করেন ।

ভবানন্দ রায় উৎকলের বৈষ্ণবমণ্ডলীর আর একজন প্রধান ব্রাহ্মি । রায় রামানন্দ তাঁহার জ্যেষ্ঠপুত্র । রামানন্দ ভিন্ন তাঁহার অ. পুত্র ছিল । চৈতন্যদেব পাঁচ ভ্রাতাকে পঞ্চপাণ্ডব এবং তাঁহার পত্নীকে পাণ্ডব ও কুন্তী বলিতেন । ভবানন্দের পুত্র সরকারে বড় চাকরী করিতেন । চৈতন্যদেব নীলাচলে আগঃ ভবানন্দ সপরিবারে তাঁহার ভক্ত হন ।

“সাক্ষাৎ পাণ্ডু তুমি তোমার পত্নী কুন্তী ।
পঞ্চ পাণ্ডব তোমার পঞ্চ পুত্র মহামতি ॥
রায় কহে আমি শূদ্র বিষয়ী অধম ।
মোরে স্পর্শ তুমি এই ঈশ্বর লক্ষণ ॥
নিজ গৃহ বিত্ত ভৃত্য পঞ্চপুত্র সনে ।
আত্ম সমপিল আমি তোমার চরণে ॥”

চৈঃ চঃ, মধ্যলীলা, ১০ম পরিচ্ছেদ ।

ভবানন্দ তাঁহার পুত্র বাণীনাথকে শ্রীচৈতন্যের সেবার জন্ত অর্পণ করেন । বাণীনাথ সর্বদা চৈতন্যদেবের নিকটে থাকিয়া তাঁহার পরিচর্যা করিতেন ।

“এই বাণীনাথ রহিবে তোমার চরণে ।
যবে যেই আজ্ঞা সেই করিবে সেবনে ॥
আত্মীয় জ্ঞান করি সঙ্কোচ না করিবে ।
যেই যবে ইচ্ছা তোমার সেই আজ্ঞা দিবে ॥
প্রভু কহে কি সঙ্কোচ নহ তুমি পর ।
ভয়ে ভয়ে তুমি আমার সবংশে কিঙ্কর ॥”

চৈঃ চঃ, মধ্যলীলা ১০ম পরিচ্ছেদ ।

ভবানন্দ পরিবারের সহিত চৈতন্যদেবের গাঢ় প্রেমের সম্বন্ধ হইয়াছিল। শ্রীচৈতন্যদেব ষতদিন জীবিত ছিলেন উৎকলবাসী বহু ব্যক্তি তাঁহার প্রতি আকৃষ্ট হইয়াছিল। তাঁহার তিরো-
গরেও উৎকলে বৈষ্ণবধর্মের প্রভাব বহুদিন পর্য্যন্ত বিদ্যমান

সময়ে শ্রামানন্দ নামে একজন উৎকলবাসী ভক্ত স্বদেশে বৈষ্ণবধর্মের বহুল প্রচার করিয়াছিলেন। ইনি শ্রীনিবাস নরোত্তম ঠাকুরের সমসাময়িক। উড়িষ্যার অন্তর্গত রেন্দা গ্রামে ইহার জন্ম। পিতার নাম শ্রীকৃষ্ণ মণ্ডল, মাতা শ্রামানন্দের পূর্বে তাঁহাদের অনেকগুলি সন্তান শৈশবেই মৃত্যুবরণ করিয়া গিয়াছিল। নবজাত শিশুর জীবন সম্বন্ধে নিরাশ হইয়া গেলের পরামর্শ অনুসারে তাঁহারা তাঁহার নাম রাখিলেন ‘দুখী’।” বাল্যকালে তিনি দুখী নামেই পরিচিত ছিলেন। দুখী বুদ্ধিমান ও মেধাবী ছাত্র ছিলেন। অল্প বয়সেই ব্যাকরণ প্রভৃতি শাস্ত্রে পারদর্শী হন। প্রথম হইতেই তাঁহার মধ্যে অহুরাগ দেখিতে পাওয়া যায়। গ্রামবাসী লোকের নিকটে বৈষ্ণবধর্মের কথা শুনিয়া তিনি শ্রীচৈতন্য, নিত্যানন্দের প্রতি আকৃষ্ট হন। পিতামাতা তাঁহার

মন্ত্রদীক্ষা দেওয়ার উদ্যোগ করিতে তিনি গৌড়ে গিয়া কোনও বৈষ্ণব-ভক্তের নিকটে দীক্ষা গ্রহণ করিবার আগ্রহ প্রকাশ করেন। শ্রীকৃষ্ণমণ্ডল ইহাতে বেশী আপত্তি করিলেন না। তবে দুখীর বয়স অল্প, গৌড়দেশ দূর পথ; তবে উৎকল হইতে অনেক তীর্থযাত্রী গঙ্গাস্নানের জন্য গৌড়ে যাইতেন। তাঁহাদের এক দলের সঙ্গে গৌড়ে গমন করিয়া অধিকা নগরে তদ্রূপ মহাস্ত্র হৃদয়চৈতন্যের নিকটে দুখী বৈষ্ণবধর্মের দীক্ষা গ্রহণ করেন। হৃদয়চৈতন্য তাঁহার ধর্মভাব দেখিয়া দুখী নাম পরিবর্তন করিয়া তাঁহাকে কৃষ্ণদাস নাম প্রদান করেন। এখন হইতে তিনি দুখীকৃষ্ণ নামে অভিহিত হইলেন। হৃদয়চৈতন্য কৃষ্ণদাসকে বিশেষ স্নেহের চক্ষে দেখিয়াছিলেন। অনেকদিন নি কৃষ্ণদাসকে বৈষ্ণবধর্ম শিক্ষা ও ভক্তিগ্রন্থাদি পাঠ করান তাঁহাকে বৃন্দাবন যাইতে উপদেশ দেন। তদনুসারে অনেক তীর্থস্থান দর্শন করিয়া বৃন্দাবন গমন করিলেন। শ্রী নরোত্তমের বৃন্দাবন আগমনের অল্পদিন পরেই কৃষ্ণদাস পৌঁছিয়াছিলেন।

বৃন্দাবনে শ্রীনিবাস ও নরোত্তমের সহিত পরিচয় ও ক্রমে বন্ধুত্ব হয়। শ্রীজীবগোস্বামী এই তিনটি যুগকে বিশেষ সহিত ভক্তিশাস্ত্র অধ্যয়ন করান। অধ্যয়ন সমাপ্ত হইলে কৃষ্ণ শ্রামানন্দ নাম দিয়া স্বদেশে ভক্তিদর্ম প্রচারের জন্য উৎকলে করেন। শ্রীনিবাস, নরোত্তম ও শ্রামানন্দ একত্রেই বৃন্দাবন পরিত্যাগ করিয়াছিলেন। পথে গ্রন্থচুরি হইলে শ্রীনিবাস আচার্য্য গ্রন্থাহরণের জন্য বিষ্ণুপুর যাওয়ার নরোত্তম ও শ্রামানন্দ মেতরী আসেন। তথায় কয়েকদিন অবস্থান করিয়া শ্রামানন্দ উৎকল অভিমুখে যাত্রা করিলেন। পথিমধ্যে তিনি কয়েকদিন অধিকাতে অবস্থান করেন। হৃদয়চৈতন্য

তাঁহাকে দেখিয়া বিশেষ প্রীতিলাভ করিয়াছিলেন। কিছুদিন নিজ সন্নিধানে রাখিয়া গোস্বামীগণের আদেশমত তাঁহাকে স্বগ্রামে পাঠাইয়া দেন। শ্রামানন্দ ধারেন্দ্রা পৌছিয়া বিপুল উৎসাহে বৈষ্ণবধর্ম প্রচার করিতে লাগিলেন। অল্পদিন মধ্যে অনেকে তাঁহার শিষ্য হইলেন। তাঁহাদের মধ্যে মুরারী ও রসিকানন্দ প্রধান। ইহারা দুই ভ্রাতা। ধারেন্দ্রার অনতিদূরে সুবর্ণরেখা নদী-তীরস্থ রঘুনী নামক গ্রামে ইহাদের বাস। পিতার নাম 'অচ্যুত'। শ্রামানন্দের অদ্ভুত চর্চা ও উন্নত জীবন দেখিয়া দুই ভ্রাতা তাঁহার নিকটে বৈষ্ণবধর্মে সাহায্য করেন। অল্পদিনের মধ্যে মুরারী ও রসিকানন্দ বৈষ্ণবধর্মের প্রচারক হইয়া উঠিলেন। আর এক ব্যক্তি এই সময়ে মুরারীর নিকটে বৈষ্ণবধর্মে দীক্ষিত হন। তাঁহার নাম দামোদর। প্রথমে যোগী ছিলেন। শ্রামানন্দের সংস্পর্শে আসিয়া বৈষ্ণবধর্মে অনুরাগ জন্মে। শ্রামানন্দ এই সকল শিষ্যগণের সহিত প্রবল বৈষ্ণবধর্ম প্রচার করিতে লাগিলেন। অল্পদিনের মধ্যে ও নিকটস্থ স্থান সমূহে ভক্তির স্রোত প্রবাহিত হইল। শ্রীনিবাস আচার্য্য ও নরোত্তম ঠাকুর মাজপুর ও খেতরী গণ করিয়াছিলেন শ্রামানন্দ উৎকলে তাহাই করিলেন। ক্রমে তাঁহার শিষ্য হয়। তাঁহার শিষ্যগণের মধ্যে নিম্নলিখিত কয়েকজনের নাম পাওয়া যায়। রাধানন্দ, শ্রীপুরুষোত্তম, মনোহর, চিন্তামণি, বলভদ্র, শ্রীজগদীশ্বর, উদ্ধব, অক্রুর, মধুবন, শ্রীগোবিন্দ, জগন্নাথ, গদাধর, শ্রীআনন্দানন্দ এবং শ্রীরাধামোহন। শ্রামানন্দের সময়ে এবং পরেও অনেকদিন পর্য্যন্ত ধারেন্দ্রা একটি বহুকু বৈষ্ণব-মণ্ডলী ছিল। ঠাকুর নরোত্তম পুরী হইতে প্রত্যাগমনের পথে একবার ধারেন্দ্রা আসিয়া কয়েকদিন অবস্থিতি করেন। শ্রামানন্দ একাধিক-

বার গৌড়ে গমনাগমন করেন। খেতরী মহোৎসবে তিনি সশিষ্যে উপস্থিত ছিলেন। এই সময়ে গৌড় ও উৎকলের বৈষ্ণবমণ্ডলীর মধ্যে ঘনিষ্ঠ যোগ হইয়াছিল। শ্রামানন্দ ও তাঁহার শিষ্যগণের চেষ্টায় উৎকলে বৈষ্ণবধর্ম 'ঘখেটে প্রসার লাভ করে। গৌড়ের বাহিরে একমাত্র উৎকলেই গৌড়ীয় বৈষ্ণবধর্ম মূল গ্রহণ করিয়াছিল। এখনও উৎকল প্রদেশে বৈষ্ণব-ধর্মের প্রভাব লক্ষিত হয়।

রূপ-সনাতন ও বৃন্দাবনের বৈষ্ণবমণ্ডলী ।

মধ্যযুগের ভারতীয় ধর্মামোলনগুলি স্ব স্ব জন্মপ্রদেশেই আবদ্ধ ছিল। শিখধর্ম পাঞ্জাবে, কবীরের ধর্মচেষ্টা মধ্যভারতে, তুকারামের ধর্মভাব পশ্চিম ভারতের সীমা অতিক্রম করে নাই। সেইরূপ শ্রীচৈতন্যদেবের ভক্তিধর্ম বঙ্গদেশ ও তৎপার্শ্ববর্তী উৎকলেই আবদ্ধ ছিল। ভাষার অনৈক্য ও গতায়াতের অন্ববিধা ইহার প্রধান কারণ।

বাহিরে একটি মাত্র স্থানে ঐ ধর্মের কেন্দ্র হইয়াছিল, তাহা কিন্তু এখানেও এই ধর্ম স্থানীয় লোকেদের মধ্যে প্রসার নাই। গোড়ীয় উপনিবেশের মধ্যেই শ্রীচৈতন্যের ধর্ম প্রসারিত হইল। শ্রীচৈতন্যদেবের নির্দেশে বাঙ্গালাদেশ হইতে বংশপরম্পরায় অনেকগুলি গোড়ীয় বৈষ্ণব বৃন্দাবনে আসিয়া বাস করেন। হিন্দু তীর্থস্থানগুলিতে স্থায়ী ধর্মের এক একটি প্রচার কেন্দ্র স্থাপন করিতে চেষ্টা করিয়াছিলেন। এই উদ্দেশ্যে তিনি বৃন্দাবনে আসিয়া বাস করেন। সম্ভবতঃ প্রথমে তাঁহার বৃন্দাবনে বাসের ইচ্ছা ছিল। সন্ন্যাস গ্রহণের পূর্বেই তাঁহার সেখানে বাইবার উদ্দেশ্যে পাওয়া যায়। সন্ন্যাসের পরে তিনি বৃন্দাবন যাইবেন তাহাই বাহির হইয়াছিলেন। কিন্তু কোনও কারণে সে অভিপ্রায় পরিত্যাগ করিয়া নীলাচলে গমন করেন। মনে হয় জননী শচী দেবী ও গোড়ীয় ভক্তমণ্ডলীর অপেক্ষাকৃত নিকটে থাকিবার উদ্দেশ্যে তিনি নীলাচলে বাসই স্থির করেন। তথাপি বৃন্দাবনের প্রতি চিরদিনই তাঁহার প্রবল আকর্ষণ ছিল।

নিজে তথায় অবস্থান করিতে না পারিলেও অনেকগুলি প্রধান ভক্তকে বৃন্দাবনে প্রেরণ করিয়াছিলেন। সর্বপ্রথমে লোকনাথকে তথায় যাইতে আদেশ করেন। যশোহর জেলায় তালগৈড়াগ্রামে ইহার জন্ম। লোকনাথের পিতা পদ্মনাভ চক্রবর্তী বৈষ্ণবধর্মে অমুরাগী ছিলেন, এবং সময়ে সময়ে শান্তিপুরে আসিয়া অষ্টৈতাচার্যের সহিত সাক্ষাৎ করিতেন। লোকনাথও অল্পবয়সে বৈষ্ণবধর্মের প্রতি আকৃষ্ট হন। নবদ্বীপে শ্রীচৈতন্যের সংকীর্্তন-আন্দোলনের সংবাদ পাইয়া তিনি সেখানে আগমন করেন। তখন চৈতন্যদেব সন্ন্যাসগ্রহণের জন্য কাটোয়া যাত্রা করিতে প্রস্তুত হইয়াছিলেন। সন্ন্যাসগ্রহণের পর বৃন্দাবন যাইবেন ভাবিয়া লোকনাথকে অবিলম্বে তথায় যাইতে আদেশ করিলেন। তদনুসারে তিনি অবিলম্বে বৃন্দাবন যাত্রা করিলেন, এবং পথে তীর্থস্থান দর্শন করিয়া যথাসময়ে তথায় উপস্থিত হইলেন। ভূ নামক একজন বৈষ্ণব এই সময়ে তাঁহার সঙ্গী হন। দীর্ঘকাল চৈতন্যদেবের আগমন প্রতীক্ষায় বৃন্দাবনে অবস্থান করিয়া তাঁহার দাক্ষিণাত্যগমনের সংবাদ পাইলেন, এবং তাঁহার সহিত সাক্ষাৎ করিবার জন্য তিনিও দাক্ষিণাত্যে যাত্রা করিলেন। পথে শুনিলেন চৈতন্যদেব বৃন্দাবনে গিয়াছেন। তখন তিনিও তথায় ফিরিলেন। কিন্তু বৃন্দাবন আসিয়া দেখিলেন চৈতন্যদেব বৃন্দাবন হইতে চলিয়া গিয়াছেন। শ্রীচৈতন্যের দর্শন লাভে বার বার বিফলমনোরথ দেখিয়া লোকনাথ ভূগর্ভের সহিত বৃন্দাবনে বাস করিলেন। ক্রমে রূপ, সনাতন প্রভৃতি অনেক ভক্ত বৃন্দাবনে আসিয়া মিলিত হন। সকলের সঙ্গেই লোকনাথের বন্ধুত্ব হইল। বিশেষতঃ ভূগর্ভের সহিত তাঁহার গাঢ় আত্মীয়তা জন্মিয়াছিল। লোকনাথ দীর্ঘকাল বৃন্দাবনে বাস করিয়া ভক্তিধর্ম সাধন করিয়াছিলেন। লিখিত আছে, তিনি তথায় দ্রাঘাবিনোদের

বিগ্রহ প্রতিষ্ঠা করিয়াছিলেন। রূপ সনাতনের পরলোক গমনের পরেও তিনি অনেক দিন জীবিত ছিলেন। বৃদ্ধ বয়সে ব্যাকুলায়। যুবক নরোত্তম তাঁহার অনেক সেবা করেন। তাহাতে শ্রীত হইয়া লোকনাথ নরোত্তমকে মন্ত্র দীক্ষা দেন।

বৃন্দাবনের বৈষ্ণবমণ্ডলীর প্রতিষ্ঠাতা ও প্রধান নেতা রূপ-সনাতন। তাঁহার তিন ভাই; রূপ, সনাতন ও বল্লভ। জ্যেষ্ঠ ছই ভ্রাতা প্রথম বয়সে গোড়ের নবাব সৈয়দুল্লাহসেন সাহের উজীর ছিলেন। তখন তাঁহাদের নাম ছিল, সাকর মল্লিক ও দবীর খাস। ইহাদের জীবনকাহিনী গভীর রহস্যময়। উভয়েই সংস্কৃত ভাষায় সুপণ্ডিত। উত্তরকালে তাঁহারা পরম বৈষ্ণব হইয়াছিলেন এবং গৌসাই

মী, অর্থাৎ বৈষ্ণবধর্মের আচার্য এই আখ্যা পাইয়াছিলেন।

বয়সে তাঁহারা মুসলমান ধর্ম গ্রহণ করিয়া থাকিবেন।

তাঁহারা বার বার আপনাদিগকে নীচ জাতি, অধম বলিয়া অভিমান করিয়াছিলেন। তাঁহারা যখন চৈতন্যদেবের সহিত সাক্ষাৎ

করিতে গিয়াছিলেন, তখন নগরের বাহিরে যখন

সহিত তাঁহাদের বাসস্থান নির্দিষ্ট হইয়াছিল। মনে

হইত যে যখন দোষে দূষিত হইয়াছিলেন। ইহাদের মুসলমানধর্ম

প্রমাণ পাওয়া যায়। প্রথম খণ্ডে তাহা ব্যক্ত হইয়াছে।

উত্তরকালে বৈষ্ণব গ্রন্থকারগণ এই

কথা গোপন করিয়াছেন। তাঁহারা তাঁহাদিগকে কর্ণাটদেশীয় হিন্দু

রাজবংশজাত বলিয়া বর্ণনা করিয়াছেন। ইহা অসম্ভব নয়। মনে

হয় কোন কারণে তাঁহারা মুসলমানধর্ম গ্রহণ করিয়াছিলেন। রূপ-

সনাতনের পিতা পরমসাত্বিক ছিলেন। যখন চৈতন্যদেবের ভয়ে নৈহাটী

ছাড়িয়া চন্দ্রদ্বীপে যান। পুত্রগণ কি করিয়া যখন সেবার জীবন

অর্পণ করেন তাহা বলা যায় না। রাজকার্যে তাঁহাদের দক্ষতা ও সূক্ষ্ম ছিল।

চৈতন্যদেব যখন বৃন্দাবন গমনের উদ্দেশে গৌড়ের নিকটবর্তী রামকেলী গ্রামে আগমন করেন সেই সময়ে তাঁহার সহিত রূপ-সনাতনের সাক্ষাৎ হয়। যেমন বিদ্যানগরে রামানন্দ রায় চৈতন্যদেবের সংস্পর্শ আসিয়া রাজকার্য ত্যাগের সঙ্কল্প করেন, এখানেও তাহাই হইল। লৌহ যেমন চূষকের প্রতি আকৃষ্ট হয়, সেইরূপ প্রথম সাক্ষাতেই সাকর মল্লিক ও দবীর খাস চৈতন্যদেবের প্রতি আকৃষ্ট হইলেন। এই খানেই চৈতন্যদেবের মহত্ব, এবং রূপ সনাতনের বিশেষত্ব। অগুণের ধর্ম ইতিহাসে এ প্রকার হৃদয়-পরিষ্কারের দৃষ্টান্ত কমই আছে। চৈতন্যদেব কয়েকদিন মাত্র রামকেলী ছিলেন। সাকর মল্লিক ও দবীর খাস প্রকাশে তাঁহার সহিত সাকরিতেন না; রাত্রিতে গোপনে তাঁহার সহিত মিলিত হইতেন। ইহারই প্রভাবে গৌড়ের বাদসাহের উজীরী পরিত্যাগ করিয়া ভাই ফকিরী গ্রহণ করিতে সঙ্কল্প করিলেন। মানব ইতিহাসে এই বৈরাগ্যের দৃষ্টান্ত অতি বিরল।

রামকেলী পরিত্যাগকালে চৈতন্যদেব দবীর খাস ও সাকর মল্লিককে বৃন্দাবনে গিয়া তাঁহার সহিত মিলিত হইবার জন্য উপদেশ দেন। সম্ভবতঃ এই সময়ে তিনি তিন ভাইয়ের নাম পরিষ্কার করিয়া রূপ, সনাতন ও বল্লভ নাম রাখেন। তাঁহারাও অচিরে রাজকার্য পরিত্যাগ করিয়া শ্রীচৈতন্যের সহিত মিলিত হইবার জন্য প্রস্তুত হইতে লাগিলেন। রূপ ও বল্লভ আপনাদের অতুল বিষয় সম্পত্তির অধিকাংশ লইয়া ভৌকাযোগে চন্দ্রদ্বীপে গমন করিলেন। তাঁহারা আর গৌড়ে ফিরিলেন না। বিষয় সম্পত্তির ব্যবস্থা করিয়া বৃন্দাবন

অভিযুখে যাত্রা করিলেন। পথে প্রয়াগে চৈতন্যদেবের সহিত তাঁহাদের সাক্ষাৎ হয়। তিনি তখন বৃন্দাবন দর্শন করিয়া নীলাচল প্রত্যাগমন করিতেছিলেন। কয়েকদিন ধর্ম উপদেশ দিয়া উভয়কে বৃন্দাবন যাইতে আদেশ করিলেন। রূপ তাঁহার সঙ্গে নীলাচল যাইতে চাহিয়াছিলেন। কিন্তু তিনি বলিলেন “এখন বৃন্দাবন যাও। পরে আসিয়া নীলাচলে আমার সহিত মিলিত হইবে।” রূপ ও বল্লভ তদনুসারে বৃন্দাবন গমন করিলেন। এখন হইতে বৃন্দাবনই তাঁহাদের স্থায়ী বাসস্থান হইল। সনাতনের আসিতে কিছু বিলম্ব হইয়াছিল। রাজকার্যের শৃঙ্খল হইতে মুক্তিলাভ করিতে তাঁহাকে কিছু বেগ পাইতে হইয়াছিল। নবাব রূপের প্রস্থানে এবং সনাতনের রাজকার্যে অমনোযোগে তাঁহাদের অভিসন্ধি বিষয়ে সন্দেহান্বিত হইয়াছিলেন। বাস্তবিক সনাতন বৃন্দাবনে পলাইবার সুযোগ প্রাপ্ত হইতেছিলেন। অসুস্থতার ভাণ করিয়া তিনি দরবারে যাইতে পারেন না। নবাব তাঁহাকে দেখিবার জন্য রাজ-বৈদ্যকে প্রেরণ করিলেন। তিনি গিয়া বলিলেন, “অস্থখ কিছু দেখিলাম না।” কোন ঔষধ না দিয়া একদিন নবাব স্বয়ং আসিয়া দেখিলেন সনাতন অসুস্থ হইয়া শান্তালাপ করিতেছেন। নবাব তাহাতে বিস্ময় প্রকাশ করিলে সনাতন বলিলেন, “আমার দ্বারা আরও রাজকার্য হইবে না; আপনি অন্য মন্ত্রী দেখুন।” এই সময়ে হুসেন সাহ উৎকলের রাজার সহিত যুদ্ধে যাইতেছিলেন। তিনি সনাতনকে তাঁহার সহিত যাইবার জন্য অসুরোধ করিলেন। সনাতন তাহাতেও সম্মত হইলেন না। নবাব তখন তাঁহাকে কারাগারে বন্দী করিয়া রাখিয়া উৎকলযুদ্ধে গমন করেন। সনাতন কারাধ্যক্ষকে অর্ধ দ্বারা বন্দীকৃত করিয়া পলায়ন করেন। দরবেশের বেশ ধারণ করিয়া পার্শ্বত্যা

পথে দারুণ ক্লেশ সহ করিয়া তিনি বারাণসী উপস্থিত হন। সেখানে শ্রীচৈতন্যদেবের সহিত তাঁহার সাক্ষাৎ হয়। শ্রীচৈতন্যদেব তাঁহাকে দুই মাস নিকটে বাখিয়া ধর্মশিক্ষা দিয়া বৃন্দাবন পাঠাইয়া দেন। তৎপূর্বেই রূপ ও বল্লভ নীলাচল যাত্রা করিয়াছিলেন। তখন সনাতনের সহিত তাঁহাদের সাক্ষাৎ হয় নাই।

রূপ ও বল্লভ গোড় হইয়া নীলাচল উদ্দেশে বাহির হন। গোড়ে গঙ্গাতীরে বল্লভের মৃত্যু হয়। তখন রূপ একাকী নীলাচলে আসেন। গোড়ের বৈষ্ণবগণ তৎপূর্বেই নীলাচল পৌঁছিয়াছিলেন। সেখানে সকলের সহিত রূপের মিলন হইল। বৃন্দাবন হইতে যাত্রা করিবার সময়ে ব্রজলীলা বিষয়ে একখানি নটক লিখিবাব সঙ্কল্প করিয়াছিলেন। পথে আসিতে আসিতে কড়চা করিয়া কিছু কিছু লিখিয়াছিলেন। নীলাচলে শ্রীচৈতন্যদেব তাঁহার নাটকের কোন কোন অংশ দেখিয়া বহু প্রশংসা করেন। দশমাস নীলাচলে অবস্থানের পব রূপ গোড়ে পথে বৃন্দাবন প্রত্যাগমন করিলেন। কিন্তু তৎপূর্বেই সনাতন ঝারিখণ্ডের বনপথে নীলাচল যাত্রা করেন। দুই ভাইরে সাক্ষাৎ হইল না।

সনাতন নীলাচলে রূপের শ্রায় হবিদাসের গৃহে বাস করিয়া লাগিলেন। শ্রীচৈতন্যদেব প্রতিদিন তাঁহার সহিত সেখানে সাক্ষাৎ করিয়া ধর্মোপদেশ করিতেন। রূপ ও সনাতনের নীলাচলে অবস্থানের বিবরণ প্রথমথণ্ডে বিস্তৃত রূপে বর্ণিত হইয়াছে। সুতরাং ঐখণ্ডে তাঁহার পুনরাবৃত্তি করিলাম না। কেবল একটি বিষয়ে এখানে বলা আবশ্যিক মনে হইতেছে, যাহাতে সনাতনের অদ্ভুত বৈরাগ্যের পরিচয় পাওয়া যায়। ঝারিখণ্ডের বনপথ দিয়া আসিবার সময়ে তাঁহাকে 'বস্তু কলমূল খাইয়া জীবনধারণ করিতে হইয়াছিল। তাহাতে তাঁহার

ধর্মরোগ হয়। তিনি যখন নীলাচল পৌছেন তখন তাঁহার সর্বাঙ্গে কত। তাহা হইতে রস ও পূজ বাহির হইত। তাহা সত্ত্বেও শ্রীচৈতন্য জোর করিয়া তাঁহাকে আলিঙ্গন করিতেন। ইহাতে সনাতন দুঃখিত হইয়া রথ-যাত্রার দিন রথচক্রের নিম্নে পড়িয়া প্রাণ ত্যাগ করিবেন মনে করিয়াছিলেন। চৈতন্যদেব তাহা বুঝিতে পারিয়া বলেন, “দেহত্যাগ করিলে ধর্ম হয় না। কিন্তু সুপথে থাকিয়া ধর্মাচরণ ও মানবের সেবা করিলে ভক্তি লাভ হয়।” শ্রীচৈতন্য আরও বলেন যে, “তোমার এই দেহ তুমি আমাকে সমর্পণ করিয়াছ, ইহা নষ্ট করিবার অধিকার তোমার নাই। ইহার দ্বারা আমি অনেক কার্য সম্পাদিত করিব।” তাঁহার বাক্যে সনাতন দেহত্যাগের বাসনা পরিত্যাগ করেন।

প্রায় এক বৎসর কাল সনাতনকে নীলাচলে রাখিয়া চৈতন্যদেব তাঁহাকে ধর্ম শিক্ষা দেন। প্রতিদিন উপলভোগের পরে হরিদাসের সঙ্গে আসিয়া তাঁহার সহিত মিলিত হইতেন, এবং দীর্ঘ সময় গভীর-মত-ধর্ম-চর্চা করিতেন। রূপ ও সনাতনের দ্বারা বৃন্দাবনে যে মহৎ সাধন করিবেন চৈতন্যদেব পূর্ব হইতেই তাহা ভাবিয়া রাখিয়া-ছিলেন। উক্ত ভ্রাতাকে দীর্ঘকাল নিকটে রাখিয়া স্বয়ং তাঁহাদের শিক্ষা দেন; রূপের সহিত অনেক সময়ে বাঙালাপ করিতেন; কিন্তু সনাতনের সঙ্গে বিশেষভাবে ধর্মালাপ হইত।

প্রায় এক বৎসর নীলাচলবাসের পর সনাতন বৃন্দাবন ফিরিয়া আসেন। এখন হইতে বৃন্দাবন দুই ভাইয়ের স্থায়ী কর্মক্ষেত্র হইল। তাঁহাদের অদ্ভুত ত্যাগ, কঠোর বৈরাগ্য, গভীর ধর্মাকাজ্জ্বা ও মতুলনীয় নিষ্ঠায় বৃন্দাবন ব্যাকুলাত্মাগণের পরম আকর্ষণের স্থান হইয়া উঠিয়াছিল। একে একে বহু ভক্ত আসিয়া তাঁহাদের সহিত

মিলিত হইয়াছিলেন। এই সকল বৈষ্ণব-সাম্মলনে দিন দিন বৃন্দাবনের
 বহু উন্নতি হইতে লাগিল। রূপ ও সনাতন বৃন্দাবনের বৈষ্ণবমণ্ডলীর
 পরম ভক্তিভাজন নেতা হইলেন। তাঁহারা কঠোর বৈরাগ্যে এবং
 গভীর ধর্মসাধনে সকলের শ্রদ্ধা আকর্ষণ করিয়াছিলেন। তাঁহাদের
 বিষয়নিষ্পৃহতা ও ভক্তিভাবের জন্য জন-সাধারণ উভয়কে গভীর
 শ্রদ্ধা করিতেন। তাঁহাদিগকে দেখিবার জন্য নানা স্থান হইতে বহু
 ভক্তদল বৃন্দাবন আগমন করিতেন। শুকগণ তাঁহাদিগকে অনেক
 রত্ন উপহার দিতেন। কিন্তু তাহা তাঁহারা স্পর্শও করিতেন না।
 এই অর্থে মন্দিরনির্মাণ, বিগ্রহসেবা প্রভৃতির ব্যবস্থা হইত। ক্রমে
 বৃন্দাবনের জীর্ণ মন্দির সংস্কার ও অনেক নূতন মন্দির স্থাপিত হইল।
 বৃন্দাবনের শ্রীবৃদ্ধির মূলে রূপ ও সনাতন কঠোর বৈরাগ্যে দিন যাপন করিতেন। বৃক্ষতলে শয়ন, ভিক্ষা
 উদরার্নের সংস্থান তাঁহাদের নিয়ম ছিল। বৈষ্ণবদের লইয়া শান্ত পাঠ
 ও আলোচনায় জীবনের শেষ পর্য্যন্ত অতিবাহিত করিয়াছিলেন।
 এইরূপে তাঁহাদের চেষ্টায় বৃন্দাবন ভক্তিশাস্ত্র আলোচনার প্রধান
 কেন্দ্র হইয়াছিল। বৈষ্ণবগণের মধ্যে যাহারা বিশেষভাবে শাস্ত্রালোচনা
 করিতে ভালবাসিতেন তাঁহারা বৃন্দাবনে গমন করিতেন। অধিক
 বৃন্দাবনে আসিয়া রূপ সনাতনের দ্বারা আচার্যগণের সংস্পর্শে নিজেরা
 জ্ঞানার্জনে জীবন অর্পণ করিতেন। বৃন্দাবনের বৈষ্ণবগণ বহু গ্রন্থ
 রচনা করিয়াছিলেন। রূপ ও সনাতন তাহার পথ-প্রদর্শক। তাঁহারা
 উভয়েই অনেক ভক্তিগ্রন্থ রচনা করিয়াছিলেন। ‘ভক্তিরত্নাকারে’
 তাঁহাদের রচিত গ্রন্থের নিম্নলিখিত তালিকা দেওয়া হইয়াছে।

“সনাতন গোখামীর গ্রন্থ চতুষ্টয়।

টীকাসহ ভাগবতামৃত-খণ্ডস্বয়ং ।

হরিভক্তি-বিলাসটীকা দিক্‌প্রদর্শিনী ।
বৈষ্ণবতোষনৌ নাম দশমটিপ্লনী ॥ •
লীলাস্তব দশমচরিত যারে কয় ।
সনাতন গোস্বামির এই চতুষ্টিয় । •

* * *

“শ্রীরূপগোস্বামী গ্রন্থ ষোড়শ করিল ।
লীলা সহ সিদ্ধান্তের সীমা প্রকাশিল ॥
কাব্য হংসদূত আর উদ্ধব সন্দেশ ।
কৃষ্ণ জন্মতিথি বিধি বিধান অশেষ ॥
গণোদ্দেশ দীপিকা বৃহ—লঘুদ্বয় ।
স্তবমালা বিদগ্ধ মাধব রসময় ॥ ,
ললিতমাধব বিপ্রলস্তের অবধি ।
দানলীলাকৌমুদী আনন্দমহোদধি ॥
দানকেলিকৌমুদী বিদিত এই নাম ।
ভক্তিরসামৃতসিন্ধু গ্রন্থ অল্পময় ॥
শ্রীউজ্জ্বলনীলমণি গ্রন্থরসপুর ।
প্রযুক্তাখ্যাতচন্দ্রিকাগ্রন্থ সুমধুর ॥
মথুরামহিমা পদ্যাবলী এ বিদিত ।
নাটকচন্দ্রিকা লঘুভাগবতামৃত ॥”

ভক্তিরসাকর আদিলীলা প্রথমতরঙ্গ ।

অন্যান্য বৈষ্ণবগণের স্তায় রূপ ও সনাতনের পরলোকগমনের সময় এবং সঠিক বিবরণ কিছু পাওয়া যায় না। তবে শ্রীচৈতন্যদেবের পরলোকগমনের পর দীর্ঘকাল তাঁহারা জীবিত ছিলেন না। শ্রীনিবাস

আচার্য্য যখন বৃন্দাবনে আসেন তখন তাঁহারা উভয়েই ইহলোক পরিত্যাগ করিয়াছিলেন।

বৃন্দাবনের বৈষ্ণবমণ্ডলী গঠনে রূপ ও সনাতনের পরে শ্রীজীব গোস্বামীর নাম উল্লেখযোগ্য। ইনি রূপ ও সনাতনের কনিষ্ঠ ভ্রাতা বল্লভের পুত্র। কথিত আছে শ্রীচৈতন্যদেব যখন রামকেলী যান সেই সময়ে শ্রীজীবও তাঁহাকে দেখিয়াছিলেন। একথা কতদূর প্রামাণ্য বলা যায় না। হইতে পারে বাল্যকালে জীব গোস্বামী পিতা ও পিতৃব্যদের সহিত রামকেলী বাস করিতেন। তাঁহাদের রামকেলী পরিত্যাগের পর তিনি চন্দ্রদ্বীপে গিয়া বাস করেন। বৈষ্ণবগ্রন্থে লিখিত আছে বাল্যকাল হইতেই তিনি কৃষ্ণবলরামের প্রতি অতিশয় ভক্তিমান ছিলেন। তাঁহাদের মূর্তি লইয়া, পূজা করিতেন এবং কৃষ্ণধারণ করিয়া নিদ্রা যাইতেন। এই বিবরণ কতদূর সত্য তাহা বলা যায় না। তবে তাঁহার তীক্ষ্ণ বুদ্ধি সম্বন্ধে যাহা বলিয়াছেন তাহা অনাদ্যসেই বিশ্বাস করা যায়। অল্প বয়সেই তিনি ব্যাকরণ ও সাধিত্যে বাৎপত্তি লাভ করিয়াছিলেন। তৎপরে তিনি নিষ্ঠার সহিত শ্রীমদ্ভাগবত পাঠ করিতেন। এই সময়ে তিনি কৃষ্ণবলরামের নামে কন্দন করিতেন। পিতার মৃত্যু সংবাদ পাইয়া শ্রীজীব অতিশয় ব্যথিত হইয়াছিলেন। তখনও তিনি চন্দ্রদ্বীপে বাস করিতেছিলেন। এই সময় হইতেই তাঁহার মনে বৈরাগ্যের উদয় হয়। বিলাসদ্রব্য, সুস্বাদু, সুখাদ্য আহার প্রভৃতি পরিত্যাগ করেন। কিছুদিন পরে পিতা ও জ্যেষ্ঠতাতদিগের পদাঙ্ক অনুসরণ করিয়া ভক্তিধর্ম সাধনে জীবন উৎসর্গ করিতে কৃতসঙ্কল্প হইলেন। তদনুসারে চন্দ্রদ্বীপ পরিত্যাগ করিয়া ফুতেয়াবাদ হইয়া তিনি নবদ্বীপ যাত্রা করেন। সেই সময়ে শ্রীপাদ নিত্যানন্দ খড়দহ হইতে নবদ্বীপে আসিয়াছিলেন।

নিত্যানন্দের দর্শন পাইয়া শ্রীজীব অতিশয় আনন্দ লাভ করিলেন। কিছুদিন নিত্যানন্দের নিকট অবস্থানের পর তাঁহার অনুমতি লইয়া শ্রীজীব বৃন্দাবন যাত্রা করেন। পথে বারাণসীতে কিছুকাল অবস্থান করিয়া মধুসূদন বাচস্পতি নামক একজন ব্রাহ্মণের নিকট বেদ অধ্যয়ন করেন। তৎপরে বৃন্দাবন আসিয়া রূপ ও সনাতনের সহিত মিলিত হইল। সনাতনের বৈরাগ্য এবং রূপের কবিত্বশক্তি তাঁহাতে না থাকিলেও শ্রীজীব গোস্বামী তাঁহাদের উপযুক্ত বংশধর। ছোষ্ঠতাতদ্বয়ের পরলোকগমনের পর তিনি বৃন্দাবনের নেতা হইয়াছিলেন। তাঁহার নেতৃত্বে বৃন্দাবনের অধিকতর শ্রীবৃদ্ধি হইয়াছিল। তিনি দীর্ঘকাল জীবিত থাকিয়া বৈষ্ণবগণের পরিচর্যা করিয়াছিলেন। রূপ ও সনাতনের অপেক্ষা কোন কোন বিষয়ে তিনি অধিকতর শক্তিশালী ছিলেন। তাঁহার স্থায়ী কীর্তি বৈষ্ণবদর্শন রচনা। তাঁহাকে গোড়ীয় বৈষ্ণবসম্প্রদায়ের দার্শনিক বলিতে পারা যায়। তিনি বৈষ্ণবদর্শন বিষয়ে কয়েকটি সুবিস্তৃত সন্দর্ভ প্রণয়ন করিয়াছিলেন। তন্মধ্যে আরও অনেক গ্রন্থ রচনা করিয়াছিলেন। ভক্তিরসাকারে তাঁহার লিখিত পুস্তকের নিম্নলিখিত তালিকা প্রদত্ত হইয়াছে :—

“শ্রীজীবের গ্রন্থ পঞ্চবিংশতি বিদিত ।

হরিনামামৃতব্যাকরণ দিব্য রীত ॥

সূত্রমালিকা ধাতুসংগ্রহ সূত্রচার ।

কৃষ্ণার্চাদীপিকাগ্রন্থ অতি চমৎকার ॥

গোপালবিক্রমাবলী রসামৃত শেষ ।

শ্রীমাধবমহোৎসব সর্বাংশে বিশেষ ॥

শ্রীসকল কল্পবৃক্ষ গ্রন্থ এ প্রচার ।
 ভাবার্থ সূচকচম্পু অতি চমৎকার ॥
 গোপালতাপনী টীকা ব্রহ্মসংহিতার ।
 রসামৃতটীকা শ্রীজ্জলটীকা আর ॥
 যোগনার-স্ববের টীকাতে সুসঙ্গতি ।
 অগ্নিপুরণস্থ শ্রীগায়ত্রী ভাষ্যতথি ॥
 পদ্মপুরাণোক্ত শ্রীকৃষ্ণের পদচিহ্ন ।
 শ্রীরাধিকাকর-পদস্থিত চিহ্ন ভিন্ন ॥
 গোপালচম্পু পূর্ব উত্তর বিভাগেতে ।
 বর্ণিলেন কি অদ্ভুত বিদিত জগতে ॥
 সপ্ত সন্দর্ভ বিখ্যাত ভাগবতরীতি ।
 তত্ত্ব ভগবৎ পরমাত্ম কৃষ্ণভক্তি প্রীতি ॥
 এই ছয় ক্রমসন্দর্ভ সপ্ত হয় ।
 প্রয়োজনাভিধেয় সম্বন্ধ ইথে ত্রয় ॥”

ভক্তিরত্নাকর আদিলীলা প্রথম তরঙ্গ ।

গোড় হইতে সমাগত আর একজন বৃন্দাবনের বৈষ্ণবমণ্ডলীর
 ইতিহাস চির গৌরবান্বিত করিয়াছেন । তিনি রঘুনাথ দাস । ইহার
 পিতা গোখর্দন দাস নবদ্বীপের নিকটবর্তী সপ্তগ্রামের জমিদার ।
 গোড়ের নবাবকে বার লক্ষ মুদ্রা রাজকর প্রদান করিতেন, এবং বিশ
 লক্ষ মুদ্রা রাজস্ব আদায় হইত । রঘুনাথ দাস এই অতুল সম্পত্তির
 উত্তরাধিকারী । কিন্তু বিষয়স্থখ তাঁহার হৃদয়কে স্পর্শ করে নাই ।
 অল্প বয়সেই ধর্মের প্রতি তাঁহার গভীর অমুরাগ জন্মিয়াছিল ।
 তাঁহার পিতা ও পিতৃব্য হিরণ্যদাস নবদ্বীপের ব্রাহ্মণদিগকে অনেক
 ধন সম্পত্তি দান করিতেন ।

“হিরণ্য গোবর্দ্ধনদাস হুই সহোদর ।
 সপ্তগ্রাম বার লক্ষ মুদ্রার ঈশ্বর ॥
 মহেশ্বর্য যুক্ত দৌহে বদান্ত ব্রাহ্মণ্য ।
 সদাচার, সংকুলীন, ধাম্বিক অগ্রগণ্য ॥
 নদীয়াবাসী ব্রাহ্মণের উপজীব্য প্রায় ।
 অর্থ ভূমি গ্রাম দিখা করেন সহায় ॥”

ভক্তিরত্নাকর, মধ্যলীলা, ১৬শ পরিচ্ছেদ ।

শ্রীচৈতন্যের মাতামহ নীলাশ্বর চক্রবর্তীর নিকট তাঁহারা সুপরিচিত ছিলেন । হুই ভ্রাতাই তাঁহাকে গভীর শ্রদ্ধা করিতেন । বালক রঘুনাথ তাঁহাদের নিকট হইতে নবদ্বীপের সংবাদ পাইতেন । শ্রীচৈতন্যদেব সম্যাস গ্রহণান্তর যখন শান্তিপুরে অষ্টৈতাচার্যের গৃহে কয়েকদিন অবস্থান করেন সেই সময়ে রঘুনাথ তাঁহাকে দর্শন করিতে শান্তিপুর আসেন । রঘুনাথের পিতা অষ্টৈতাচার্যের বন্ধু ছিলেন । আচার্য রঘুনাথকে পরমসমাদরে স্বগৃহে রাখেন । চৈতন্যদেবও তাঁহাকে মেহভরে আলিঙ্গন করেন । কয়েকদিন নিকটে রাখিয়া নীলাচল গমনকালে রঘুনাথকে নিজগৃহে প্রেরণ করেন । এখন হইতেই রঘুনাথ দাস হইয়া পরিভ্যাগ করিয়া নীলাচলে শ্রীচৈতন্যের সহিত মিলিত হইবার জন্য ব্যস্ত হন । পিতামাতা তাঁহার অভিসন্ধি জানিতে পারিয়া প্রহরী দ্বারা তাঁহার রক্ষার ব্যবস্থা করেন ।

“পঞ্চ পাইক তাঁরে রাখে রাত্রি দিনে ।

চারি মেবক হুই ব্রাহ্মণ রহে তাঁর সনে ॥

একাদশ জন তাঁরে রাখে নিরস্তর ।

নীলাচলে যাইতে না পায় হুঃখিত অন্তর ।”

ভক্তিরত্নাকর, মধ্যলীলা, ১৬শ পরিচ্ছেদ

প্রহরীদিগের বেষ্টন এড়াইয়া পলাইবার চেষ্টায় অকৃতকার্য হইয়া রঘুনাথ দাস নিরুশ হইয়া পড়েন। অবশেষে চৈতন্যদেব নীলাচল হইতে গোড়ে আগমন করিয়া অষ্টমের গৃহে যখন অবস্থান করিতে-
ছিলেন তখন রঘুনাথ দাস পিতার অনুমতি লইয়া পুনরায় তাঁহার
সহিত সাক্ষাতের সুযোগ পান। এবার তিনি তাঁহাকে আপনার
মনের গোপন আকাঙ্ক্ষা ও পিতামাতার প্রতিবন্ধকতার কথা
জানাইলেন। চৈতন্যদেব তাঁহাকে বাহিরের বৈরাগ্য পরিত্যাগ
করিতে উপদেশ দেন। হৃদয়ের ভাব গোপন রাখিয়া স্বাভাবিক ভাবে
বিষয় কর্ম করিতে বলেন। যথাসময়ে গৃহে আসিয়া রঘুনাথ দাস
তাঁহাই করিতে লাগিলেন। ইহা দেখিয়া পিতামাতা সন্তুষ্ট ও আশঙ্কিত
হইলেন। পাহারার কড়াকড়ি অনেক পরিমাণে হ্রাস হইল। সেই
সুযোগে রঘুনাথ দাস স্নান একবার গৃহ হইতে পলাইবার চেষ্টা করিলেন।
কিন্তু এবারও পথে ধরা পড়িয়া তাঁহাকে ফিরিতে হইল। ইতিপূর্বেই
তাঁহার বিবাহ হইয়াছিল। তাঁহার জননী পুত্রকে ভালরূপে প্রহরী
দ্বারা বেষ্টিত রাখিবার জন্য স্বামীকে পরামর্শ দেন। কিন্তু তিনি বলেন
এত গৃহ সুখ এবং ঐশ্বর্য্য যাহাকে বাধিতে পারিল না, বাহিরের কার্য্যে
তাঁহার কি হইবে ?

“ইন্দ্রসম ঐশ্বর্য্য, স্ত্রী অঙ্গরাসম।

এসব বাধিতে নারিলেক যার মন ॥

দড়ির বন্ধনে তাঁরে রাখিব কেমতে।

জননদাতা পিতা নারে প্রারদ্ধ খণ্ডাইতে ॥”

ভক্তিরত্নাকর, অস্তলীলা, ষষ্ঠ পরিচ্ছেদ।

কিন্তু গোবর্দ্ধন দাস তথাপি পুত্রকে প্রহরীবেষ্টিত করিয়া
রাখিলেন। রঘুনাথ দাসকে আরও কিছু দিন গৃহে বদ্ধ হইয়া থাকিতে

হইল, এই সময়ে রঘুনাথ দাস পিতার অনুমতি লইয়া পানিহাটী গ্রামে নিত্যানন্দের সহিত সাক্ষাৎ করেন। নিত্যানন্দ তাঁহাকে অতিশয় শ্রীতির সহিত গ্রহণ করিলেন, এবং তাঁহার সঙ্গী বৈষ্ণবদলকে মহোৎসব দিবার অনুমতি করিলেন। তদনুসারে রঘুনাথ দাস মহোৎসব করেন। নিত্যানন্দ ও বৈষ্ণবগণকে শতমুদ্রা ও দুই তোলা সোণা উপহার প্রদান করেন। নিত্যানন্দ তাঁহাকে আশ্বাস দেন যে অচিরে তাঁহার মনস্কামনা পূর্ণ হইবে এবং শ্রীচতুরের সহিত তাঁহার মিলন হইবে।

পানিহাটী হইতে গৃহে ফিরিয়া রঘুনাথ দাস পূর্বের গায় জীবন যাপন করিতে লাগিলেন। অন্তরে গভীর ব্যাকুলতা কিন্তু বাহিরে ধীর ভাব। তাঁহার পিতা তথাপি তাঁহার সঙ্গে সর্বদা প্রহরী রাখিতেন। একদিন শেষ রাত্ৰিতে প্রহরীগণ নিদ্রিত হইয়া পড়িলে, অযোগ্য বুদ্ধি রঘুনাথ দাস গৃহ পরিত্যাগ করেন। এবার তিনি দ্রুত হইবার ভয়ে রাজপথ ছাড়িয়া বনপথে উড়িষ্যার দিকে চলিলেন। প্রত্যয়ে উঠিয়া গোবর্দ্ধন দাস পুলকে দেখিতে না পাইয়া তাঁহার অনুসন্ধান লোক প্রেরণ করেন। তাহারা রাজপথে খুঁজিয়া রঘুনাথ দাসকে দেখিতে পাইল না। এই সময়ে গোঁড়ে বৈষ্ণবগণ নিয়মিত প্রথা অনুসারে নীলাচল যাইতেছিলেন। গোবর্দ্ধন দাস তাহাদের মধ্যে অনুসন্ধান করিবার জন্ত লোক পাঠাইলেন। কিন্তু সে দলেও তাঁহাকে পাওয়া গেল না। তিনি বনপথে দ্রুতবেগে নীলাচল অভিমুখে যাইতেছিলেন। প্রথম দিন পনর কোশ পথ অতিক্রম করিয়া সন্ধ্যাকালে গোয়ালাদের একটি বাথানে উপস্থিত হইলেন। তাহারা তাঁহাকে উপবাসী দেখিয়া কিছু দুগ্ধ পান করিতে দেয়। দিনান্তে তাহা পান করিয়া রঘুনাথ দাস এক পার্শ্বে নিদ্রিত হইয়া

পড়িলেন। এইরূপে বার দিনে তিনি নীলাচলে পৌঁছিলেন। তন্মধ্যে তিন দিন মাত্র আহার করিতে পাইয়াছিলেন। বার দিন পরে নীলাচলে পৌঁছিয়া যেখানে শ্রীচৈতন্যদেব, স্বরূপ দামোদর প্রভৃতি ভক্তগণ সঙ্গে বসিয়াছিলেন সেখানে আসিয়া উপস্থিত হইলেন। চৈতন্যদেব তাঁহাকে দেখিয়া পরম প্রীত হইলেন। পথশ্রমে তাঁহাকে ক্লিষ্ট দেখিয়া শীঘ্র তাঁহাকে স্নান কবাইয়া আহারেঃ ব্যবস্থা করিতে ভৃত্য গোবিন্দকে আদেশ দিলেন।

রঘুনাথ দাস এখন হইতে নীলাচলে থাকিয়া ধর্মসাধন করিতে লাগিলেন। চৈতন্যদেব স্বরূপ দামোদরের হস্তে বিশেষভাবে তাঁহাকে সমর্পণ করিয়াছিলেন। অতুল ধনসম্পদের উত্তরাধিকারী রঘুনাথ দাস এখন হইতে যে বৈরাগ্য ব্রত অবলম্বন করিলেন তাহা চিন্তা করিলে শরীর রোমাঞ্চিত হয়। তিনি পাঁচদিন মাত্র গোবিন্দের নিকট হইতে চৈতন্যদেবের প্রসাদ গ্রহণ করিয়াছিলেন। তৎপরে সারাদিনের পর সন্ধ্যাকালে মন্দির দ্বারে ভিক্ষা করিয়া যাহা পাইতেন তাহার দ্বারা জীবন ধারণ করিতেন।

“পরম বৈরাগ্য তাঁর নাহি ভক্ষ্য পরিধান।

যেছে তৈছে আহার করি রাখয়ে পরাণ ॥

দশদণ্ড রাত্রি গেলে পুষ্পাঞ্জলি দেখিয়া।

সিংহদ্বারে খাড়া হয় আহার লাগিয়া ॥

কেহ যদি দেয় তবে করয়ে ভক্ষণ।

কভু উপবাস কভু করয়ে চর্কণ ॥”

ভক্তিরত্নাকর, অষ্ট পর্ব, ষষ্ঠ পরিচ্ছেদ।

কিছুদিন পরে ইহাও পরিত্যাগ করিয়া কঠোরতর বৈরাগ্যের অন্ত ছত্রে ভিক্ষা মাগিয়া জীবন রক্ষা করিতেন। তৎপরে তাহাও

চাড়িয়া অবিক্রীত পরমায় সিংহদ্বারে গাভীগণের আহারের জন্ত যাহা ফেলিয়া দেওয়া হইত তাহাই কুড়াইয়া লইয়া, পচা অংশ বাদ দিয়া অবশিষ্ট জলে ধৌত করিয়া ভক্ষণ করিতেন।

“প্রসাদার পসারীর যত না বিকায়।

দুই তিন দিন হৈলে ভাত মাড়ি গায়।

সিংহদ্বারে সেই ভাত গাভী আগে ভারে।

সড়া গন্ধে তেলেঙ্গা গাভী খাইতে না পারে ॥

সেই ভাত রঘুনাথ রাত্রে ঘরে আনি।

ভাত ধুঞা ফেলে ঘরে দিয়া বহু পাণি ॥

ভিতরের দড় ভাত মাজি যেই পায়।

হুন দিয়া রঘুনাথ সেই অন্ন খায় ॥

ভক্তিরত্নাকর, অষ্ট খণ্ড ষষ্ঠ পরিচ্ছেদ।

এইরূপে রঘুনাথ দাস নীলাচলে থাকিয়া দীর্ঘকাল কঠোর সাধনা করেন। শ্রীচৈতন্যদেব ও স্বরূপ দামোদরের পরলোকগমনের পর তিনি বৃন্দাবন যান। সেখানে রূপ সনাতন, জীব গোস্বামী, গোপাল ভট্ট প্রভৃতির সহিত মিলিত হইয়া ধর্মসাধন ও ভক্তিশাস্ত্রচর্চায় দিন অতিবাহিত করেন। এখানেও তিনি কঠোর বৈরাগ্য অবলম্বন করিয়াছিলেন।

বৃন্দাবনের বৈষ্ণবমণ্ডলীর মধ্যে আর একজন প্রধান ব্যক্তি গোপাল ভট্ট। ইনি ত্রাবিড় (বর্তমান তামিল) দেশবাসী। ইহার পিতার নাম বেকট ভট্ট। শ্রীচৈতন্যদেব যখন দাক্ষিণাত্য পর্যটনে গিয়াছিলেন সেই সময়ে শ্রীরঙ্গপট্টমে ইহাদের গৃহে তিনি চারি মাস অতিথি ছিলেন। বেকট ভট্ট শ্রীসম্প্রদায়ের বৈষ্ণব। শ্রীরঙ্গপট্টমের মন্দিরে চৈতন্যদেবের নর্তন ও সর্কার্তন দর্শনে মুগ্ধ হইয়া পরম ভক্তি

সহকারে তাঁহাকে স্বগৃহে আনয়ন করেন। তিনি সেই চারিমানকাল সপরিবারে তাঁহার অনেক সেবা করেন। গোপাল ভট্টের বয়স তখন অল্প। চৈতন্যদেবের মহত্ত্ব সম্যক উপলব্ধি করিতে না পারিলেও মনে হয় এই অভিনব সন্ন্যাসী তাঁহার হৃদয়ে একটি গভীর ছাপ অঙ্কিত করিয়া দিয়াছিলেন। পিতামাতার পরলোকগমনের পর—সুদীর্ঘ আঠার বৎসর কালের ব্যবধানে—গোপাল ভট্ট শ্রীচৈতন্যের বৈষ্ণব দলে মিলিত হইবার জন্য বৃন্দাবন গমন করেন। কথিত আছে তিনি চৈতন্যদেবের সঙ্গেই যাইতে চাহিয়াছিলেন, কিন্তু তিনি বালক গোপালকে নিষেধ করিয়া আপাততঃ পিতামাতার সেবা করিতে বলেন। পরে বৃন্দাবনে যাইতে উপদেশ দেন। বহু বৎসর পরে গোপাল ভট্টের এই আকাঙ্ক্ষা পূর্ণ হয়। কিন্তু চৈতন্যদেবের সহিত তাঁহার আর সাক্ষাৎ হয় নাই। পথে নীলাচলে চৈতন্যদেবের সহিত সাক্ষাৎ না করার কারণ বুঝিতে পারা যায় না। বৃন্দাবনে অ্যুসিয়া গোপাল ভট্ট, রূপ ও সনাতন এবং তাঁহার পিতৃব্য প্রবোধানন্দ সরস্বতীর সাক্ষাৎ পাইলেন। এখন হইতে বৃন্দাবনেই তিনি স্থায়ীভাবে বাস করিতে লাগিলেন। তথাকার বৈষ্ণবমণ্ডলীতে গভীর জ্ঞান ও অসাধারণ ভক্তির জন্য শীঘ্রই তিনি উচ্চস্থান লাভ করিলেন। চৈতন্যদেব তাঁহার আগমন বার্তা পাইয়া তাঁহাকে নিজ আসন এবং কৌপিন ও বহির্বাস উপহার প্রেরণ করেন। বৃন্দাবনের বৈষ্ণবগণ গোপাল ভট্টের প্রতি শ্রীচৈতন্যের এই অসামান্য কৃপা দেখিয়া তাঁহাকে বিশেষ সম্মান করিতে লাগিলেন। ইহার অল্পদিন পরেই চৈতন্যদেব পরলোক গমন করেন। গোপাল ভট্ট দীর্ঘকাল বৃন্দাবনে বাস করিয়া ধর্মসাধন এবং বৈষ্ণবমণ্ডলীর সেবা করিয়াছিলেন। ‘হরিভক্তি বিলাস’ নামে তিনি একখানি পুস্তক রচনা করেন। গৌড়ীয় যুবক

শ্রীনিবাস আচার্য্য বৃন্দাবনে তাঁহার নিকট দীক্ষা গ্রহণ করিয়াছিলেন।
উত্তরকালে এই শ্রীনিবাস আচার্য্য গোড়ীয় বৈষ্ণবমণ্ডলীর নেতা
হইয়াছিলেন।

বৃন্দাবনের বৈষ্ণবমণ্ডলীর ছয়জন প্রধান নেতা। • তাঁহারা গোসাই
বা গোস্বামী নামে অভিহিত হইতেন।

“রূপ সনাতন আর ভট্ট রঘুনাথ।

শ্রীজীব গোপাল ভট্ট দাস রঘুনাথ ॥”

রঘুনাথ ভট্টের পূর্বনিবাস বারাণসী। চৈতন্যদেব বৃন্দাবন
হইতে নীলাচলে প্রত্যাগমন সময়ে দুই মাস কাশীতে অবস্থান
করিয়াছিলেন। সেই সময়ে তিনি রঘুনাথ ভট্টের পিতা তপন মিশ্রের
সঙ্গে দীক্ষা গ্রহণ করিতেন। রঘুনাথ ভট্ট তখন বালক। গোপাল
ভট্টের মতে বালক রঘুনাথের জীবনেও চৈতন্য চরিত্রের ছাপ
পড়িয়াছিল। তিনি প্রতিদিন তাঁহার উচ্ছিষ্ট মার্জ্জন ও পাদসম্বাহন
করিতেন। বয়ঃপ্রাপ্ত হইলে রঘুনাথ ভট্ট নীলাচলে চৈতন্যদেবের
নিকট গমন করেন। চৈতন্যদেব তাঁহাকে দেখিয়া পরম সন্তোষ
লাভ করিলেন। রঘুনাথ ভট্ট তখন যুবক। চৈতন্যদেব তাঁহাকে
বিবাহ করিতে নিষেধ করেন, এবং আপাততঃ বারাণসীতে ফিরিয়া
বৃদ্ধ পিতামাতার সেবা করিতে আদেশ করিলেন। তদনুসারে
রঘুনাথ বারাণসী ফিরিয়া পিতামাতার সেবায় নিযুক্ত হইলেন।
চারি বৎসর পরে পিতামাতার মৃত্যু হইলে তিনি পুনর্বার নীলাচল
আসেন। এবারেও তিনি আট মাস শ্রীচৈতন্যের নিকটে ছিলেন।
তিনি ভাগবতে সুপণ্ডিত। কণ্ঠস্বরও অতি মধুর।

“পিকস্বর কণ্ঠ তাতে রাগের বিভাগ।

এক শ্লোক পড়িতে ফিরায় তিন চারি রাগ ॥

কৃষ্ণের মাধুর্য্য সৌন্দর্য্য যবে পড়ে শুনে ।
প্রেমে বিহ্বল হয় তবে কিছুই না জানে ॥”

চৈঃ চঃ, অঃ লী, ১৩শ পরিচ্ছেদ ।

চৈতন্যদেব তাঁহাকে আট মাস নিজের নিকট রাখিয়া পরে বৃন্দাবন এবং তথাকার বৈষ্ণবমণ্ডলীতে ভাগবত পাঠ করিতে আদেশ করেন । রঘুনাথ ভট্ট তথাকার মণ্ডলীর সহিত মিলিত হইয়া ধর্মসাধন করিতেন । বিশেষভাবে রূপ গোস্বামীর সহিত তাঁহার যোগ হইয়াছিল । প্রতিদিন তাঁহাকে ভাগবত পাঠ করিয়া শুনাইতেন ।

বৃন্দাবনের মণ্ডলীর আর একজন সুপ্রসিদ্ধ বৈষ্ণব কৃষ্ণদাস কবিরাজ । ইহার জন্মস্থান বঙ্গদেশে বর্ধমান জেলার ঝামটপুর গ্রাম । বাল্যকালেই ইনি পিতৃমাতৃহীন হন । কৃষ্ণদাসের পিতৃ-স্বশ্রী পিতৃ-মাতৃহীন বালককে পালন করেন । ঘোর দারিদ্র্যের মধ্যে তাঁহার প্রথম জীবন কাটে । অল্প বয়সেই তাঁহার বৈষ্ণবধর্মের প্রতি অনুরাগ হয় । প্রথম যৌবনে তিনি বঙ্গদেশ পরিত্যাগ করিয়া বৃন্দাবন আগমন করেন এবং আমরণ সেখানে বাস করেন । এত অল্প বয়সে তিনি বঙ্গদেশ পরিত্যাগ করেন এবং এত দীর্ঘকাল তিনি বৃন্দাবনে অবস্থান করিয়া ছিলেন যে তিনি কিয়ৎ পরিমাণে বাংলা ভাষা ভুলিয়া গিয়াছিলেন । তাঁহার রচিত অমরগ্রন্থ চৈতন্যচরিতামৃতের ভাষা নির্দোষ নয় । তাহাতে অনেক ব্রজবুলি মিশ্রিত আছে । কৃষ্ণদাস কবিরাজ বৃদ্ধ বয়সে এই গ্রন্থ রচনা করেন । তাঁহার সে সময়ের অবস্থা স্বীয় গ্রন্থে একরূপ বর্ণনা করিয়াছেন ।

“বৃদ্ধ জরাতুর আমি অন্ধ বধির ।

হস্ত হালে মন বুদ্ধি নহে মোর স্থির ॥

নানারোগগ্রস্ত চলিতে বাসিতে না পারি ।

পঞ্চরোগে ব্যাকুল রাত্রি দিনে মরি ॥”

চৈঃ চঃ, অন্ত্যালীলা, বিংশ পরিচ্ছেদ ।

চৈতন্যচরিতামৃত গ্রন্থ লিখিয়া কৃষ্ণদাস কবিরাজ অমর এবং
ধর্মপিপাসু ব্যক্তিগণের গভীর কৃতজ্ঞতাভাজন হইয়াছেন ।

এই সকল পুত্ৰরিত্র সাধু ও ভক্ত বৃন্দাবনের বৈষ্ণবমণ্ডলীকে
গৌরবমণ্ডিত করিয়াছিলেন । গোড়ায় বৈষ্ণবসমাজে বৃন্দাবনের
মণ্ডলীর স্থান অতি উচ্চে । গভীর জ্ঞানালোচনা, উচ্চাঙ্গের সাধন,
চরিত্রের গরিমা, আশ্চর্য্য বৈরাগ্যে বৃন্দাবনের মণ্ডলী বৈষ্ণবইতিহাসে
চিরস্মরণীয় হইয়া থাকিবে ।

গৌড়ীয় বৈষ্ণবধর্মের প্রসার।

নিত্যানন্দ, অষ্টৈতাচার্য্য প্রমুখ নেতৃগণের সময়ে বঙ্গদেশে বৈষ্ণব-ধর্মের পূর্ণ জোয়ার প্রবাহিত হইয়াছিল। তাঁহাদের মৃত্যুর পরে অল্প দিনের জন্য বৈষ্ণবধর্মপ্রচারের বেগ মন্দীভূত হইয়া পড়ে। কিন্তু কিছুদিনের মধ্যেই অপর দুইজন শক্তিশালী নেতার অভ্যুদয় হয়। তাঁহাদের নাম শ্রীনিবাস আচার্য্য ও নরোত্তম দাস। তাঁহাদের নেতৃত্বে বঙ্গদেশে বৈষ্ণবধর্ম যথেষ্ট প্রসার লাভ করিয়াছিল। পরে তাঁহাদের বিস্তৃত জীবনী প্রদত্ত হইবে। এখানে তাঁহাদের কার্যের বিবরণ সংক্ষেপে দেওয়া যাইতেছে। শ্রীনিবাস ও নরোত্তম দাসের সময়ে বৈষ্ণবধর্ম উত্তরবঙ্গে প্রসার লাভ করিয়াছিল। তাঁহারা বর্তমান মুর্শিদাবাদ ও রাজসাহী জেলায় বৈষ্ণবধর্ম প্রচার করিয়াছিলেন। নরোত্তমের জন্মস্থান পদ্মাতীরে খেতরি গ্রামে। তিনি ধনীর সন্তান। খেতরির জমীদার রাজা কৃষ্ণানন্দ রায় তাঁহার পিতা। কিন্তু অল্প বয়সে নরোত্তমের জীবনে অসাধারণ বৈরাগ্যভাবের উদয় হয়। তিনি পিতৃসম্পদে আসক্ত না হইয়া চিরদিন কৌমার্য্য অবলম্বন করিতে বৈষ্ণবধর্ম সাধনে জীবন উৎসর্গ করেন। তাঁহার আগ্রহ ও চেতনার খেতরি গ্রামে একটি বৈষ্ণবমণ্ডলী গঠিত হয়। ক্রমে খেতরি বৈষ্ণবধর্মের একটি বিখ্যাত কেন্দ্র হইয়াছিল। একমাত্র সন্তানের সংসার ত্যাগে তাঁহার পিতা ব্যথিত হইলেও রাজা কৃষ্ণানন্দ পুত্রের ধর্মসাধনে বাধা দেন নাই। বরং তাঁহার ভ্রাতৃপুত্র সন্তোষদত্ত নরোত্তমের ধর্মাকাজকার সাহায্য করিয়াছিলেন। তাঁহাদের বিপুল

ধনসম্পত্তি নরোত্তমের ইচ্ছানুসারে বৈষ্ণবধর্মের শ্রীবৃদ্ধির জন্য অকাতরে ব্যয়িত হইয়াছিল। নরোত্তম খেতরি গ্রামে শ্রীচৈতন্যের একটি বিগ্রহ স্থাপন করিয়াছিলেন। বহু ব্যয়ে এই বিগ্রহ প্রতিষ্ঠা হয়; এতদুপলক্ষে খেতরিতে মহামহোৎসব হইয়াছিল। সেই সময়ে গৌড়দেশের বৈষ্ণবগণের যে সম্মিলনী হইয়াছিল বঙ্গদেশের ইতিহাসে তাহা অতুলনীয়। সমস্তাষদত্ত নবপ্রতিষ্ঠিত বিগ্রহের রক্ষা ও পূজার স্থায়ী ব্যবস্থার জন্য বিপুল আয়োজন করিয়াছিলেন। এখনও সে মন্দির ও বিগ্রহ বর্তমান আছে। কিন্তু এখন তাহার আর সে অবস্থা নাই। কালক্রমে খেতরির বৈষ্ণবমণ্ডলী লুপ্তপ্রায় হইয়াছে। তবে এখনও খেতরি গ্রামে প্রতি বৎসর একটি মেলা হয়। তদুপলক্ষে নানাস্থানের বৈষ্ণবগণ তথায় মিলিত হন। নরোত্তমের জীবন ও কার্যের প্রভাবে, খেতরি বৈষ্ণবগণের একটি চিরস্মরণীয় তীর্থ হইয়াছে।

এই সময়েই খেতরির অনতিদূরে যাজগ্রামে আর একটি বৈষ্ণব-মণ্ডলী গড়িয়া উঠে। নরোত্তমের বন্ধু শ্রীনিবাস আচার্য্য ইহার মূলে ছিলেন। এই যুগে শ্রীনিবাস আচার্য্য ও নরোত্তম দাস বিপুল উৎসাহে বৈষ্ণবধর্ম প্রচার করিয়াছিলেন। তাঁহাদের মধ্যে আন্তরিক সৌহৃদ্য থাকিলেও তাঁহাদের চরিত্রে যথেষ্ট পার্থক্য ছিল। নরোত্তম ভক্তি-প্রধান, শ্রীনিবাস আচার্য্য জ্ঞানপ্রধান। নরোত্তম সঙ্কীর্ণ দ্বারা বৈষ্ণবধর্মের প্রচার করিয়াছিলেন, শ্রীনিবাস শাস্ত্রালোচনার দ্বারা বৈষ্ণবধর্মকে শক্তিশালী করিয়াছিলেন। প্রথম বয়সে শ্রীনিবাস বৃন্দাবন গমন করেন। তাহার অল্পদিন পরে নরোত্তমও বৃন্দাবন যান। সেখানে তাঁহাদের মিলন ও জীবনব্যাপী বন্ধুত্বের সূত্রপাত হয়। বৃন্দাবন হইতে তাঁহারা একত্র গোড়ে প্রত্যাগমন করেন। আসিবার সময় বৃন্দাবনের গোষ্ঠামীগণ গোড়ে প্রচারের জন্য তাঁহাদের সঙ্গে

অনেক ভক্তি গ্রন্থ প্রেরণ করেন। পথে সে গুলি চুরি হয়। সৌভাগ্যক্রমে অপহৃত গ্রন্থের পুনরুদ্ধার হয়। সে কোতুহলজনক কাহিনী অন্তর্ভুক্ত বিস্তৃতরূপে বর্ণিত হইবে। শ্রীনিবাসাচার্য্য যথাসময়ে অপহৃত ভক্তিগ্রন্থ লইয়া, যাজগ্রামে প্রত্যাবৃত্ত হন। এবং সেখানে থাকিয়া ভক্তিশাস্ত্র অধ্যাপনায় দীর্ঘ জীবন অতিবাহিত করেন। নানাস্থান হইতে জ্ঞানপিপাসু ব্যাকুলাত্মা বৈষ্ণবগণ তাঁহার নিকটে ভক্তিশাস্ত্র অধ্যয়নের জন্য আগমন করিতেন। এইরূপে যাজগ্রাম বৈষ্ণবধর্মের একটি প্রধান কেন্দ্র হইয়া উঠিয়াছিল। এই যুগে শ্রীনিবাস আচার্য্য গৌড়ীয় বৈষ্ণবমণ্ডলীর নেতা ছিলেন। বহুসংখ্যক বৈষ্ণব তাঁহার নিকটে দীক্ষা গ্রহণ করিয়াছিলেন।

খেতরির অপর পারে পদ্মাতীরে তেলিয়াবুধরি গ্রামে বৈষ্ণবধর্মের আর একটি কেন্দ্র স্থাপিত হইয়াছিল। শ্রীনিবাস আচার্য্যের শিষ্য রামচন্দ্র কবিরাজ ও গোবিন্দ কবিরাজ এখানে আসিয়া বাসস্থান নির্মাণ করেন। তাঁহাদের পূর্ব নিবাস কুমারনগর। পিতার নাম চিরঞ্জীব সেন। চিরঞ্জীব শ্রীখণ্ডের দামোদর সেনের একমাত্র কন্যা সুনন্দাকে বিবাহ করিয়া শ্রীখণ্ডে বাস করেন। দামোদর সেন শক্তি-উপাসক ছিলেন। কিন্তু চিরঞ্জীব সেন বৈষ্ণবধর্মাসুরাগী হইয়াছিলেন। শ্রীখণ্ডনিবাসী যে সকল বৈষ্ণব চৈতন্যদেবকে দর্শন করিবার জন্য বৎসর বৎসর নীলাচল যাইতেন তাঁহাদের মধ্যে চিরঞ্জীব সেনের নাম ঘোষণা পাওয়া যায়। তিনি চৈতন্যদেবের অমুরক্ত ভক্ত হইয়াছিলেন। দামোদর সেনের মৃত্যুর পর চিরঞ্জীব শ্রীখণ্ড পরিত্যাগ করিয়া সপরিবারে পূর্বনিবাস কুমারনগরে প্রত্যাবর্তন করেন। উত্তরকালে তাঁহার পুত্ররামচন্দ্র ও গোবিন্দ কুমারনগর পরিত্যাগ করিয়া বুধরি গ্রামে বাস করেন। রামচন্দ্র ও গোবিন্দ উভয়েই সুকবি ও

শাস্ত্রজ্ঞ ছিলেন। গৌরানুভক্ত চিরঞ্জীব সেনের পুত্র হইলেও প্রথম বয়সে বৈষ্ণবধর্মের প্রতি তাঁহাদের অহুরাগ দেখা যায় না। যৌবনে শ্রীনিবাসাচার্যের সংস্পর্শে আসিয়া রামচন্দ্র বৈষ্ণবধর্মের প্রতি আকৃষ্ট হন, এবং তাঁহার নিকটে মন্ত্রদীক্ষা গ্রহণ করেন। এখন হইতে রামচন্দ্র শ্রীনিবাসের বিশেষ প্রিয় এবং প্রধান শিষ্যরূপে পরিগণিত হন। পূর্বেই রামচন্দ্র সংস্কৃত ভাষায় সুপণ্ডিত ছিলেন। দীক্ষার পরে শ্রীনিবাসাচার্যের নিকটে ভক্তিশাস্ত্র অধ্যয়ন করেন এবং অল্পদিনের মধ্যেই তাহাতে গভীর ব্যুৎপত্তি লাভ করেন। গোবিন্দ আরও অধিক বয়সে বৈষ্ণবধর্মের প্রতি আকৃষ্ট হইয়াছিলেন। সম্ভবতঃ মাতামহের প্রভাবে তিনি অহুরাগী শক্তি-উপাসক ছিলেন। কথিত আছে একবার গ্রহণীরোগে তিনি মৃত্যুমুখে পতিত হইয়াছিলেন। সেই সময়ে দেবী ভগবতী স্বপ্নে তাঁহার নিকটে আবির্ভূত হইয়া তাঁহাকে বৈষ্ণবধর্মে দীক্ষা গ্রহণ করিতে উপদেশ দেন। তদনুসারে গোবিন্দ শ্রীনিবাসাচার্যের নিকটে দীক্ষা গ্রহণ করেন। তাহার পর, হইতেই রোগের উপশম হয়। রামচন্দ্রের গায় গোবিন্দও বৈষ্ণবধর্মে অহুরাগী ভক্ত হইয়াছিলেন। উভয়েই সুপণ্ডিত এবং সুকবি। তাহাদের রচিত অনেক পদাবলী আছে। গোবিন্দের পদাবলী বিশেষ প্রসিদ্ধ। উভয়েই কবিরাজ উপাধি লাভ করিয়াছিলেন। রামচন্দ্র ও গোবিন্দের অবস্থানে বৃধির বৈষ্ণবধর্মের একটি বিখ্যাত কেন্দ্র হইয়া উঠিয়াছিল। খেতরী যাইতে বৈষ্ণবগণ সর্বদাই বৃধিতে কিছু সময় অতিবাহিত করিতেন। মধ্যে মধ্যে শ্রীনিবাসাচার্য এবং নরোত্তম দাস এখানে আসিয়া বাস করিতেন।

এই অঞ্চলের আর একটি বৈষ্ণব-কেন্দ্র কাঞ্চনগড়িয়া। শ্রীচৈতন্যের অন্তরঙ্গ বন্ধু হরিদাস ঞ্চার্যের দুই পুত্র শ্রীদাস ও গোকুলানন্দ এখানে

বাস করিতেন। বোধ হয় হরিদাস আচার্যেরও এখানে বাসস্থান ছিল। চৈতন্যদেবের মৃত্যুর পরে হরিদাস আচার্য বৃন্দাবনে গিয়া বাস করেন। উত্তরকালে সেখানে শ্রীনিবাস আচার্য, নরোত্তম ও শ্রামানন্দের সঙ্গে তাঁহার সাক্ষাৎ হয়। হরিদাস আচার্য শ্রীনিবাসকে স্বীয় পুত্রস্বরূপে বৈষ্ণবধর্মে দীক্ষা দিবার জন্য অনুরোধ করেন। গোড়ে প্রত্যাগমনের পর শ্রীনিবাস আচার্যের বিষ্ণুহরিদাসের পুত্র শ্রীদাস ও গোকুলানন্দের সাক্ষাৎ হয়। তাঁহারা পূর্বেই বৈষ্ণবধর্মে অনুরাগী ছিলেন বলিয়া মনে হয়। কথিত আছে হরিদাস বৃন্দাবন গমনের পূর্বেই স্বীয় পুত্রদ্বয়কে শ্রীনিবাস আচার্যের নিকট দীক্ষা গ্রহণের উপদেশ দেন। বৃন্দাবন হইতে প্রত্যাগমনের কিছুকাল পরে শ্রীনিবাস আচার্য শ্রীদাস ও গোকুলানন্দকে বলিলেন “আগামী মাঘী কৃষ্ণা একাদশী তোমাদের পিতৃদেবের পরলোকগমনের সাত্বৎসরিক। সেই দিন কাঞ্চনগড়িয়ায় মহোৎসবের আয়োজন কর। ঐ সময়ে তোমাদেরও দীক্ষা হইবে।” শ্রীদাস ও গোকুলানন্দ সানন্দে এই প্রস্তাব গ্রহণ করিলেন। ষষ্ঠামসয়ে মহোৎসবের আয়োজন হইল। নানা স্থান হইতে বহু সংখ্যক মহাস্ত্র ও বৈষ্ণব এই উৎসবে বৌদ্ধদান করেন। এতদুপলক্ষে শ্রীদাস ও গোকুলানন্দ শ্রীনিবাস আচার্যের নিকট দীক্ষা গ্রহণ করেন এবং পরে তাঁহার নিকটে গভীর ভাবে ভক্তিশাস্ত্র অধ্যয়ন করেন। এখন হইতে দুই ভ্রাতা কাঞ্চনগড়িয়ায় থাকিয়া বৈষ্ণবধর্ম প্রচার করেন। তাঁহাদের চেষ্টায় কাঞ্চনগড়িয়া এবং নিকটবর্তী অনেক গ্রামের লোক বৈষ্ণবধর্ম গ্রহণ করেন। এইরূপে এই অঞ্চলের নানা স্থানে বৈষ্ণবধর্ম প্রচারিত হয়। এই প্রদেশে এখনও বৈষ্ণবধর্মের বিলক্ষণ প্রভাব দেখিতে পাওয়া যায়।

এই সময়ে অপেক্ষাকৃত দূরবর্তী বনবিষ্ণুপুরেও বৈষ্ণবধর্ম প্রচার

লাভ করে। বিষ্ণুপুরে বৈষ্ণবধর্মের প্রচার অত্যন্ত বিশ্বয়জনক ব্যাপার। সে সময়ে বনবিষ্ণুপুরে বীরহাষির নামে একজন রাজা বা বড় জমিদার বাস করিতেন। রাজা হইলেও তিনি দস্যবৃত্তি করিতেন। তাঁহার অধীনে অনেক দস্য ছিল। তাহাদের দ্বারা বীরহাষির পথিকদের ধনরত্নাদি লুণ্ঠন করিতেন। বৃন্দাবন হইতে গৌড়ে আসিবার সময় শ্রীনিবাস আচার্য্যের ভক্তিগ্রন্থ অপহৃত হয়। এই গ্রন্থাপহরণ রাজা বীরহাষিরের কার্য্য। শ্রীনিবাস, নরোত্তম ও শ্যামানন্দ বহু প্রহরী পরিবেষ্টিত শকটে কাষ্ঠসম্পূট লইয়া যাইতেছেন শুনিয়া বীরহাষির মনে করিলেন কোন বণিক ধন রত্নাদি লইয়া যাইতেছে ; এবং সুযোগ বুঝিয়া দস্যুদিগকে তাহা অপহরণ করিতে আদেশ করিলেন। বনবিষ্ণুপুরের সন্নিকটে শ্রীনিবাসাচার্য্য প্রভৃতি একদিন রাত্রি যাপন করিতেছিলেন। পথশ্রমে ক্লান্ত হইয়া তাঁহারা গভীর নিদ্রাভিভূত হইলেন। দস্যুগণ উপযুক্ত সময় দেখিয়া সম্পূটসহ শকট লইয়া রাজধানীতে উপস্থিত হইল। রাজা বীরহাষীর সম্পূট খুলিয়া দেখিলেন যে তাহাতে ধনরত্ন নাই ; তদপরিবর্তে স্তরে স্তরে পুস্তক শাখান আছে। রাজা নিজের ভ্রম বুঝিতে পারিলেন। দস্যু-নেতা

লেও তিনি নিতান্ত অসৎ ব্যক্তি ছিলেন না বলিয়া মনে হয়। বিশেষতঃ দেখা যায় তাঁহার সভায় নিয়মিতরূপে ভাগবত পাঠ হইত। তিনি বুঝিতে পারিলেন কোনও জানী লোক শকটে করিয়া এই পুস্তকগুলি লইয়া যাইতেছেন। সন্ধান পাইলে তাঁহাকে সেগুলি প্রত্যর্পণ করিবেন স্থির করিলেন। তদনুসারে গ্রন্থগুলি সমস্তে রক্ষার জন্ত আদেশ দিলেন। বৈষ্ণবগণ বলেন গ্রন্থদর্শন ও স্পর্শে রাজার হৃদয় পরিবর্তিত হয়। সেরূপ অসুমান না করিলেও চলিতে পারে।

এদিকে প্রভাতে নিদ্রাভঙ্গে শ্রীনিবাসপ্রমুখ ভক্তগণ শকট না

দেখিয়া বিস্মিত ও চিন্তাকুল হইলেন। অনেক চিন্তার পর শ্রীনিবাস আচার্য্য নরোত্তম ও শ্যামানন্দকে গোড়ের পথে অগ্রসর হইতে বলিয়া স্বয়ং গ্রন্থাশেষণে প্রবৃত্ত হইলেন। ক্রমে তিনি বিষ্ণুপুরে আসিয়া পৌঁছিলেন। সেখানে কৃষ্ণবল্লভ নামক একজন ব্রাহ্মণকুমারের সহিত তাঁহার পরিচয় হয়, এবং তদীয় আগ্রহে তাঁহার আতিথা গ্রহণ করেন। কৃষ্ণবল্লভের নিকটে শ্রীনিবাস রাজার বিবরণ পাইলেন। রাজসভায় প্রতিদিন ভাগবত পাঠ হয়, শুনিয়া শ্রীনিবাস কৃষ্ণবল্লভের সহিত ভাগবত শ্রবণের জন্য তথায় গমন করেন। রাজা বীরহাষির আচার্য্যের গভীর জ্যোতিপূর্ণ মুখমণ্ডল দেখিয়া তাঁহার প্রতি আকৃষ্ট হন, এবং তাঁহার পরিচয় জিজ্ঞাসা করেন। তখন শ্রীনিবাস স্বীয় পরিচয় এবং গ্রন্থচুরির বিবরণ দিলেন। রাজা অমৃতপ্ত হৃদয়ে স্বীয় অপরাধ স্বীকার করিয়া আচার্য্যের নিকট ক্ষমা ভিক্ষা করিলেন। শ্রীনিবাস গ্রন্থরত্ন পুনঃপ্রাপ্ত হইয়া পরম আনন্দিত হইলেন। রাজা তাঁহাকে প্রাসাদে থাকিয়া আতিথা গ্রহণ করিতে ও ভাগবত পাঠ করিতে অমুরোধ করিলেন। আচার্য্যের পাঠ ও ব্যাখ্যা শুনিয়া বীরহাষির ও তাঁহার সভাসদগণ মুগ্ধ ও বিস্মিত হইলেন। এখন হইতে রাজা বীরহাষীর শ্রীনিবাস আচার্য্যের পরম ভক্ত হইলেন। পূর্ব হইতেই তাঁহার ভক্তিবশে অমুরাগ ছিল বলিয়া মনে হয়। নতুবা নিত্য ভাগবত শ্রবণ করিবেন কেন? পরমভক্ত শ্রীনিবাসের সংস্পর্শে তাঁহার ভক্তি বাড়িয়া গেল। তিনি শ্রীনিবাসকে কিছুদিন বিষ্ণুপুরে থাকিয়া ভাগবত পাঠ ও ধর্মোপদেশ করিবার জন্য সনির্বন্ধ অমুরোধ করিলেন। আচার্য্য এই প্রস্তাবে সন্মত হইলেন। শ্রীনিবাস নিত্য ভাগবত পাঠ ও ব্যাখ্যা করেন। নগরবাসী বহু সংখ্যক লোক তাহা শ্রবণ করিয়া উপকৃত হইতেন। বিশেষতঃ রাজা বীরহাষির জীবনে ঘোর পরিবর্তন

হটল। কিছুদিন পরে বীরহাষিরমহিষী ও কুমার খাড়ীহাষিরের সহিত আচার্যের নিকটে বৈষ্ণবধর্মে দীক্ষা গ্রহণ করেন। ব্রাহ্মণ-কুমার কৃষ্ণবল্লভ ও রাজপণ্ডিত ব্যাসাচার্য্য প্রভৃতি অনেকে ক্রমে আচার্যের নিকটে দীক্ষা গ্রহণ করেন। এখন হইতে বিষ্ণুপুর বৈষ্ণব-ধর্মের একটি শক্তিশালী কেন্দ্র হইয়া উঠিল। রাজা বৈষ্ণবধর্ম প্রচারের জন্য রাজ-কোষের অর্থ অকাতরে ব্যয় করিতেন। কিছুকাল বিষ্ণুপুরে অবস্থান করিয়া আচার্য্য শ্রীনিবাস ভক্তিগ্রন্থ লইয়া যাজগ্রামে প্রত্যাগমন করেন। গমনকালে রাজা অনেক দীনতা করিয়া তাঁহাকে পুনরায় বিষ্ণুপুর আসিতে অনুরোধ করেন। উত্তরকালে শ্রীনিবাসাচার্য্য একাধিকবার বিষ্ণুপুরে আসেন। রাজা বীরহাষির তাঁহার বাসের জন্য একখানি পৃথক বাটী নির্মাণ করাইয়া দেন, এবং অনেক ভূ-সম্পত্তি দান করেন। একবার তিনি স্বয়ং যাজগ্রামে গিয়াছিলেন। এইরূপে শ্রীনিবাস আচার্যের সহিত তাঁহার গভীর যোগ স্থাপিত হয় এবং বিষ্ণুপুরের রাজপরিবারে বৈষ্ণবধর্ম সুপ্রতিষ্ঠিত হয়। ক্রমে এই ধর্মের বৈষ্ণবধর্ম বহু প্রসার লাভ করিয়াছিল।

একসময়ে গৌড়ীয় বৈষ্ণবধর্ম ক্রমে যেমন দেশে ব্যাপ্ত হইতেছিল তখনই হাতে অনেক আভ্যন্তরীণ পরিবর্তনও আসিয়াছিল। তন্মধ্যে একটি বিশেষ ভাবে উল্লেখযোগ্য। তাহা জাতিভেদ প্রভৃতি অনিষ্টকর প্রথা বর্জন। শ্রীচৈতন্যদেবের মূল শিক্ষার মধ্যেই এই সংস্কারের বীজ নিহিত ছিল। মানবাত্মার মহত্ত্ব তিনি ঘোষিত করিয়া জাতিভেদের সর্জনতার মূলোচ্ছেদ করিয়াছিলেন।

চণ্ডালোপি দ্বিজশ্রেষ্ঠঃ হরিভক্তি পরায়ণঃ ।

হরিভক্তিবিহীনশ্চ দ্বিজোপি খপচাম্বলমঃ ॥

এই শিক্ষায় জাতিভেদের মস্তকে কুঠারাঘাত করা হইল। চৈতন্যদেব

অষ্টৈতাচার্য্য, নিত্যানন্দ গৌড়ীয় বৈষ্ণবধর্মের তিনজন নেতাই হিন্দু-সমাজের জাতিভেদ প্রথার মূলতঃ বিরোধী ছিলেন। নিম্নশ্রেণীর লোকদের প্রতি তাঁহাদের সকলেরই গভীর সহানুভূতি দেখিতে পাওয়া যায়। চৈতন্যদেব অষ্টৈতাচার্য্যকে যখন বর দিতে চান তখন অশীতিপর বৃদ্ধ অষ্টৈতাচার্য্য এই বর চাহিয়াছিলেন যেন আচণ্ডালে প্রেম দান করা হয়।

নিত্যানন্দের সকল কার্য্যে জাতিভেদের বিরুদ্ধে বিদ্রোহ দেখিতে পাওয়া যায়। আহারে বসিয়া চারিদিকে উচ্ছিষ্ট ছড়াইয়া দিতেন। তথাপি শ্রীচৈতন্যের জীবদ্দশায় জাতিভেদ প্রথা বৈষ্ণবমণ্ডলী হইতে দূরীভূত হয় নাই। তবে তিনি নিম্নশ্রেণীর লোকদিগকে স্বীয় আধ্যাত্মিক মণ্ডলীতে অসঙ্কোচে গ্রহণ করিয়াছিলেন। যবন হরিদাসকে বৈষ্ণবমণ্ডলীতে সম্মানিত স্থান দিয়াছিলেন। দবীরখাস ও সাকর মল্লিককে গোস্বামী পদ প্রদান করিয়াছিলেন। কিন্তু সামাজিক ভাবে তাঁহাদিগকে গ্রহণ করিতে পারেন নাই। পৃথক স্থানে তাঁহাদের আহার ও বাসস্থানের ব্যবস্থা হইত। বৈষ্ণবমণ্ডলী কখনও এই দুর্বলতার হস্ত হইতে একেবারে মুক্ত হইতে পারে নাই। তথাপি স্বীকার করিতে হইবে চৈতন্যদেব ও তাঁহার সহচরগণের জাতিভেদ সঙ্কীর্ণতা অনেক পরিমাণে খর্ব হইয়াছিল।

এতদ্ভিন্ন গৌড়ীয় বৈষ্ণবমণ্ডলীতে এমন একটি সম্প্রদায় সৃষ্টি হইয়াছিল যাহা হইতে জাতিভেদ সম্পূর্ণরূপে উন্মূলিত হইয়াছিল, এই সম্প্রদায়ে জাতি নির্কিংশেষে সকল শ্রেণীর লোককে গ্রহণ করা হইত। তাহাদের মধ্যে অবাধে আহার বিহার বিবাহাদি সামাজিক অনুষ্ঠান সম্পন্ন হইত। এই সংস্কার কোন সময়ে কাহার দ্বারা প্রবর্তিত হইয়াছিল তাহা নিশ্চিতরূপে জানা যায় না। কেহ কেহ মনে করেন

শ্রীপাদ নিত্যানন্দই এই সম্প্রদায়ের প্রতিষ্ঠাতা। তিনি হিন্দুসমাজের নিম্ন শ্রেণীর লোকদিগের অনেক সামাজিক অবস্থার বহু উন্নতি করিয়া ছিলেন। বৈষ্ণবমণ্ডলীতে জাতিভেদের সঙ্কীর্ণতা দূরীকরণের মূলে নিত্যানন্দের শিক্ষা ও সদ্গুণাবলি বিশেষভাবে কাৰ্য্য করিয়াছিল। কিন্তু ভেদধারী বৈষ্ণব সম্প্রদায়ের প্রবর্তন তাঁহার দ্বারা হইয়াছিল বলিয়া মনে হয় না। আর একটি প্রবাদ এই যে তাঁহার পুত্র বীরচন্দ্র বৈষ্ণব-মণ্ডলীতে এই সংস্কার আনয়ন করিয়াছিলেন। ইহা অধিকতর সম্ভব বলিয়া মনে হয়। কিন্তু ইহারও কোন ঐতিহাসিক প্রমাণ পাওয়া যায় না। কোন সময়ে আরম্ভ হইয়াছিল জানিতে না পারিলেও জাতিভেদ প্রথা যে একদল বৈষ্ণবের মধ্য হইতে সম্পূর্ণরূপে অন্তর্হিত হইয়াছিল তাহা নিশ্চিত। এই সম্প্রদায় এখনও বর্তমান আছে এবং বঙ্গদেশের নানাস্থানে বহুসংখ্যক ভেদধারী বৈষ্ণব দেখিতে পাওয়া যায়। তাঁহারা জাতিভেদ মানেন না। সকল জাতির লোককে অবাধে নিজ সম্প্রদায়ে গ্রহণ করেন। এখন তাঁহাদের অবস্থা হীন হইলেও এক সময়ে তাঁহারা সকলের শ্রদ্ধা আকর্ষণ করিতে পারিয়াছিলেন। অনিতে পাওয়া যায় কোন ব্যক্তি এই সম্প্রদায়ে যোগদান করিলে জিজ্ঞাসা করা হইত আপনি কোন কুল পবিত্র করিয়াছেন অর্থাৎ যে জাতিতে তিনি জন্মগ্রহণ করিয়াছিলেন বৈষ্ণব হওয়াতে সেই জাতি পবিত্র হইয়াছে। কিন্তু সাধারণ বৈষ্ণবগণের অবসাদের সঙ্গে সঙ্গে তাঁহাদের অবস্থাও যান হইয়াছে। ভেদধারী বৈষ্ণবগণ এখন জনসাধারণের অবজ্ঞার পাত্র হইয়াছে। নৈতিক দুর্নীতি ইহা প্রধান কারণ। আধ্যাত্মিক কল্যাণের জন্য বৈষ্ণবধর্ম গ্রহণ না করিয়া সামাজিক সুবিধা লাভের জন্য পরবর্তীকালে লোক ভেদধারী বৈষ্ণব হইত। এখন অনেকে কোন কারণে সমাজচ্যুত হইলে ভেদধারী

বৈষ্ণবদলে যোগদান করে। স্থলিতপদ নরনারীকে আশ্রয় দিয়া এই সম্প্রদায় উদারতার পরিচয় দেয় ; কিন্তু তাহাদের যথোপযুক্ত শিক্ষা ও সাধনের ব্যবস্থা নাই, নানা শ্রেণীর লোক আসিয়া একত্র মিলিত হয় ; কিন্তু তাহারা কোন উচ্চ আধ্যাত্মিক আদর্শ ও আকাজক্ষা দ্বারা পরিচালিত হয় না। তথাপি ভেকধারী বৈষ্ণবসম্প্রদায় অনেক সামাজিক সংস্কার করিয়াছিলেন। ইহাদের মধ্যে হিন্দুসমাজের সামাজিক জটিলতা নাই। জাতিভেদের সঙ্গে সঙ্গে এই শ্রেণীর বৈষ্ণবগণ সামাজিক ক্রিয়াকাণ্ডের অনেক সরলতা সম্পাদন করিয়াছিলেন। শ্রদ্ধা বিবাহাদি সামাজিক অনুষ্ঠানে অযথা ক্রিয়া ও ব্যয় বাহুল্য নাই। ব্রাহ্মণেরও অত্যাচার নাই। অল্প বায়ে এই সকল সামাজিক অনুষ্ঠান সম্পন্ন হইয়া থাকে। এই সম্প্রদায়ে বিধবাবিবাহও প্রচলিত আছে।

গৌড়ীয় বৈষ্ণব সমাজ এই প্রকারে দিনে দিনে বহু প্রসার ও উন্নতি লাভ করিতে লাগিল। কেন যে সেই স্রোত বন্ধ হইয়া গেল তাহা গভীর চিন্তা ও ফোড়ের বিষয়। গৌড়ীয় বৈষ্ণবমণ্ডলীর অবসাদে সমগ্র বঙ্গদেশের অধোগতি হইয়াছে।

শ্রীনিবাস আচার্য্য ।

শ্রীচৈতন্যদেব ও তাঁহার সমসাময়িক ভক্তগণের পরে যে সকল সাধু ব্যক্তি গোড়ীয় বৈষ্ণবধর্ম প্রচার করিয়াছিলেন তাঁহাদিগের মধ্যে শ্রীনিবাস আচার্য্য প্রধান । খ্রীষ্টীয় ষোড়শ, শতাব্দীর প্রারম্ভে ভাগীরথী তীরবর্তী চামন্দি গ্রামে তাঁহার জন্ম হয় । তাঁহার পিতার নাম গঙ্গাধর ভট্টাচার্য্য । তিনি শ্রীচৈতন্যদেবের সমসাময়িক । সম্ভবতঃ বয়সে কিঞ্চিৎ ক্ষেত্র হইবেন । কাটোয়া নগরীতে যেদিন শ্রীচৈতন্যদেব কেশব ভারতীর নিকটে সন্ন্যাস গ্রহণ করেন সেদিন গঙ্গাধর ভট্টাচার্য্য তথায় উপস্থিত ছিলেন । এই ঘটনা, তাঁহার জীবনে গভীর পরিবর্তন আনিয়া দেয় । গৌরবর্ণ সুন্দর যুবক অল্প বয়সে সন্ন্যাস গ্রহণ করিলেন দেখিয়া গঙ্গাধর গভীর দুঃখে অভিভূত হইয়া পড়িয়াছিলেন । লিখিত আছে যে শ্রীচৈতন্যের চাঁচরচূলে নাপিত ক্ষুর দিলে গঙ্গাধর মুচ্ছিত হইয়া পড়িয়াছিলেন । সম্ভবতঃ ইতিপূর্বেই গঙ্গাধর লোকমুখে শ্রীচৈতন্যের কথা শুনিয়াছিলেন । তাঁহাকে দর্শনের জন্য তিনি নবদ্বীপ যাইতেছিলেন পথিমধ্যে কাটোয়ায় তাঁহার সঙ্গে সাক্ষাৎ হইল । মুচ্ছাভঙ্গ হইলে গঙ্গাধর পাগলের স্থায় “চৈতন্য” “চৈতন্য” বলিয়া ক্রন্দন করিতে করিতে স্বগ্রাম চাখন্দিতে ফিরিয়া আসিলেন । লোকে প্রথমে মনে করিল গঙ্গাধর পাগল হইয়াছেন । পরে সমুদয় বিবরণ জ্ঞাত হইয়া তাঁহাকে শ্রীচৈতন্যের ভক্ত জানিয়া বিক্রম করিয়া চৈতন্যদাস নাম দিল । গঙ্গাধর আপনাকে এই নামে গৌরবাধিত মনে করিলেন এবং নিজেও আপনাকে চৈতন্যদাস নামে

পরিচয় দিতেন। পরবর্তীকালে তিনি বৈষ্ণবগ্রন্থাদিতে চৈতন্যদাস নামেই পরিচিত হইয়াছেন। এই সময় হইতে তিনি একজন চৈতন্যের পরম ভক্ত হইলেন। কয়েক বৎসর পরে শ্রীচৈতন্যদেবকে পুনর্বার দর্শন করিবার জন্য তাঁহার সহধর্মিণী লক্ষ্মীপ্রিয়ার সহিত পুরী গমন করেন। সেখানে কিছুদিন শ্রীচৈতন্য ও তাঁহার ভক্তগণের সঙ্গে বাস করিয়া চাখন্দি প্রত্যাবর্তন করেন। এতদিন পর্যন্ত তাঁহাদের কোন সন্তান হয় নাই। ইহার কিছুকাল পরে তাঁহাদের একটি পুত্র সন্তান হয়। অপেক্ষাকৃত অধিক বয়সে এই সন্তানের জন্ম হওয়ায় তাঁহারা মনে করিলেন যে শ্রীচৈতন্যদেবের আশীর্বাদেই তাঁহাদের এই সন্তান লাভ হইল। অথবা উত্তরকালে এই সন্তানের চৈতন্য ভক্তি ও বৈষ্ণবধর্মে অনুরাগ দেখিয়া তাহার চরিতাখ্যায়কেরা এইরূপ কল্পনা করিয়াছেন। যাহা হউক চৈতন্যদাস ও লক্ষ্মীপ্রিয়া মহা আনন্দে সন্তানের জাতকর্মাদি সম্পন্ন করিলেন এবং যথাসময়ে তাহাকে শ্রীনিবাস নাম দিলেন। বৈশাখী পূর্ণিমার দিনে রোহিণী নক্ষত্রে শ্রীনিবাসের জন্ম হয় কিন্তু কোন সালে, চরিতাখ্যায়কেরা তাহা নির্দেশ করেন নাই। অনুমান করা যাইতে পারে যে ১৫১২ হইতে ১৫১৩ খৃষ্টাব্দের মধ্যে কোন সালে তাঁহার জন্ম হয়। কেননা, ১৫০২ খৃষ্টাব্দে চৈতন্যদেব সন্ন্যাস গ্রহণ করেন। তাহার পর কয়েক বৎসর বেশ ভ্রমণ করিয়া তিনি নীলাচলে অবস্থান করেন। সেই সময়ে চৈতন্যদাস সঙ্গীক তাঁহাকে দর্শন করিতে চান।

অল্প বয়সেই শ্রীনিবাসের জ্ঞান ও ধর্মাত্মরূপ পরিষ্কৃত হয়। চাখন্দি-গ্রামে সে সময়ে অনেক বিদ্বান অধ্যাপক বাস করিতেন। শ্রীনিবাস ধনঞ্জয় বিদ্যাচাম্পতি নামক তাঁহাদেরই একজনের নিকটে ব্যাকরণ কোষ, অলঙ্কার প্রভৃতি তৎকালপ্রচলিত শাস্ত্র অধ্যয়ন করিয়াছিলেন

এবং স্বীয় পিতার নিকটে শ্রীচৈতন্যদেবের জীবন ও ধর্ম বিষয়ে উপদেশ লাভ করেন। শ্রীনিবাসের যৌবনের পূর্বেই তাঁহার পিতার মৃত্যু হয়। তখন তিনি জননী সমভিব্যাহারে চাখন্দি পরিত্যাগ করিয়া তাঁহার মাতামহের বাসস্থান ষাঙ্গগ্রামে গমন করেন। তখন তাহার বয়স কত ছিল নিশ্চয় করিয়া জানা যায় না কিন্তু অষ্টাদশ বৎসর বয়সের পূর্বেই তাঁহার মনে গভীর ধর্মাহুঁরাগ জন্মিয়াছিল তাহা নিশ্চিত। কেন না যে বৎসরে শ্রীচৈতন্যদেব পরলোকগমন করেন (অর্থাৎ ১৫৩৪ খৃঃ) সেই বৎসর শ্রীনিবাস তাঁহাকে দর্শনের জন্য পুরী যাত্রা করিয়াছিলেন। কিন্তু পথিমধ্যেই সংবাদ পান যে শ্রীচৈতন্যদেবের তিরোভাব হইয়াছে। তখন শ্রীনিবাসের বয়ঃক্রম আঠারো হইতে বিশ বৎসরের মধ্যে হইবে। প্রেমবিলাসরচয়িতা এ সময়ে তাঁহাকে বালক বলিয়াই বর্ণনা করিয়াছেন।

“বালক দেখিয়া হৈল আনন্দ অনুর।” প্রেঃ বিঃ ৪।

এই সংবাদে শ্রীনিবাস অতিশয় মর্মান্বিত হইলেন। শ্রীচৈতন্যদেবের দর্শন আকাঙ্ক্ষা পূর্ণ হইল না। শোকাবেগ প্রশমিত হইলে তিনি পুরী গমন করিয়া শ্রীগদাধর পণ্ডিত, গোস্বামী পণ্ডিত, বক্রেশ্বর, শ্রীপরমানন্দ প্রভৃতি গৌরভক্তগণের সঙ্গে সাক্ষাৎ করিলেন। কিছুকাল তাঁহাদের সঙ্গে বাস করিয়া তাঁহাদের অনুমতিক্রমে শ্রীনিবাস গোড়ে ফিরিয়া আসিলেন। লিখিত আছে, অল্পদিন পরেই তিনি আবার নীলাচলে যাত্রা করেন। কিন্তু পথিমধ্যে পণ্ডিত গদাধরের মৃত্যু সংবাদ পাইয়া পুরীগমনের সংকল্প পরিত্যাগ করিলেন। এবং তৎপরিবর্তে নবদ্বীপ, শান্তিপুর প্রভৃতি স্থান দর্শন করিতে চলিলেন। বোধ হয় যৌবনের উচ্ছসিত ধর্মাহুঁরাগে এই সময়ে তিনি সাধু ও তীর্থদর্শনের জন্য বিশেষ ব্যগ্র হইয়াছিলেন। কিন্তু দুর্ভাগ্যক্রমে

বৈষ্ণবধর্মের প্রধান পুরুষগণের কাহারও সঙ্গেই তাঁহার সাক্ষাৎ হয় নাই, তিনি পুরী পৌছবার পূর্বে যেমন শ্রীচৈতন্যদেবের তিরোভাব হইয়াছিল—সেইরূপ নবদ্বীপের পথেই শ্রীঅদ্বৈতাচার্য্য ও নিত্যানন্দের মৃত্যু সংবাদ পান ।

সে সময়ে নবদ্বীপে বৈষ্ণবধর্মের পূর্ণ জোয়ার ।

“ভুবন মঙ্গল সংকীর্ণন ঘরে ঘরে ।

আনন্দের নদী বহে নদীয়া নগরে ॥”

শ্রীনিবাস এই দৃশ্য দেখিয়া পরমানন্দিত হইলেন ।

“দেখিয়া আত্মবিস্মরিত হইল শ্রীনিবাস ।

কে কহিতে পারে যৈছে বাড়িল উল্লাস ॥”

● নবদ্বীপ গিয়া বিষ্ণুপ্রিয়া, এবং শ্রীমুরারী, শ্রীবাস পণ্ডিত, দামোদর, সঞ্জয় বিজয়, দাসগদাধর প্রভৃতির সাক্ষাৎ লাভ করিলেন । কয়েক দিবস নবদ্বীপে বাস করিয়া অদ্বৈত আচার্য্যের বাসস্থান দেখিবার জন্ত শান্তিপুর গমন করেন । প্রেমবিলাসের মতে তাহার চৌদ্দ বৎসর পূর্বে অদ্বৈতাচার্য্যের পরলোকগমন হয় । “ত্রয়োদশ বৎসর গোসাঁঞের যাত্রাস ।
প্রে-বি-৪ । তথা হইতে শ্রীনিত্যানন্দের বাসস্থান খড়দহ গমন করেন । সেখানে নিত্যানন্দপত্নী জাহ্নবী দেবী ও তাঁহার পুত্র বীরচন্দ্রের সঙ্গে সাক্ষাৎ হয় । এ সকল স্থানে ইতিপূর্বেই তাঁহার নাম ও বৈষ্ণবধর্মের অনুরাগের কথা প্রচারিত হইয়াছিল বলিয়া মনে হয় । সকলেই তাঁহাকে অতি সমাদরে গ্রহণ করিয়াছিলেন । খড়দহের বৈষ্ণবগণ তাঁহাকে কৃষ্ণদাস, ঋনাকুলনিবাসী নিত্যানন্দভক্ত অভিরাম গোস্বামীর সহিত সাক্ষাৎ করিতে বলিলেন । তিনিও সানন্দে সেখানে গেলেন । সেখানে অভিরাম গোস্বামী ও তাঁহার পত্নী মালিনী দেবীর সহিত সাক্ষাৎ করিয়া শ্রীনিবাস শ্রীখণ্ডে প্রত্যাগমন করিলেন । কিন্তু ইহাতেও

তাঁহার দেশভ্রমণ ও ভক্তদর্শনের আকাঙ্ক্ষা পরিত্যক্ত হইল না। এখন তাঁহার বৃন্দাবনবাসী ভক্তগণের চরণদর্শনের আকাঙ্ক্ষা প্রবল হইল। অল্পদিন পরে যাজ্ঞগ্রামে গমন করিয়া মাতার অনুমতি লইয়া তিনি বৃন্দাবন যাত্রা করিলেন। পথে রাঢ়দেশে নিত্যানন্দের জন্ম স্থান একচক্রা গ্রাম দর্শন করেন। তথা হইতে গয়া এবং তৎপরে কাশী গমন করেন। কাশীতে চন্দ্রশেখরের বাসস্থান দর্শন করিলেন। তখনও সেখানে চন্দ্রশেখরের শিষ্য ও কোন কোন বৈষ্ণব বাস করিতেন। কয়েকদিন তাঁহাদের সহবাস করিয়া তিনি প্রয়াগ ও অযোধ্যা হইয়া বৃন্দাবন অভিমুখে অগ্রসর হইলেন। পুরী ও শান্তিপুুরের পথে যেমন হইয়াছিল এখানেও তাহাই হইল। মথুরা পৌছিয়া সনাতন, রূপ, রঘুনাথ ও কাশীশ্বর গোস্বামীর পরলোকগমন সংবাদ পাইলেন। এই নিদারুণ সংবাদে শ্রীনিবাস অতিমাত্র দুঃখিত হইলেন। এমন কি ভক্তিরত্নাকর গ্রন্থপ্রণেতা নরহরি চক্রবর্তী লিখিয়াছেন যে মনের দুঃখে শ্রীনিবাস বৃন্দাবন গমনের সংকল্প পরিত্যাগ করিয়া তিনি পূর্বমুখে প্রত্যাবৃত্ত হইলেন। রাত্রিতে রূপ ও সনাতন স্বপ্নে দর্শন দিয়া তাঁহাকে সাহুনা দিলেন এবং বৃন্দাবন যাইতে আদেশ করিলেন। ভক্তিরত্নাকর গ্রন্থে এইরূপ স্বপ্নদর্শনের বিবরণ অনেক আছে। গ্রন্থকর্তা কথায় কথায় স্বপ্নে মৃত ব্যক্তিগণকে আনিয়াছেন। ইতিপূরে পুরী ও শান্তিপুুরের পথে শ্রীচৈতন্যদেব, অষ্টোতাচার্য্য ও নিত্যানন্দ, তিনজনেই স্বপ্নে শ্রীনিবাসের নিকটে প্রকাশিত হইয়াছিলেন। যাহাহউক, শোকের প্রথম আবেগে শ্রীনিবাসের বৃন্দাবন গমন সংকল্প পরিত্যাগ অসম্ভব নহে। কিন্তু রাত্রির বিশ্রামের পর মন শান্ত হইলে বুঝিলেন এত নিকটে আসিয়া বৃন্দাবন এবং অবশিষ্ট মহাস্তগণকে দর্শন না করিয়া যাওয়া বাতুলতা

যাত্রা। পরদিন প্রভাতে তিনি পুনরায় বৃন্দাবন অভিমুখে যাত্রা করিলেন এবং যথাসময়ে বৈশাখ মাসের পূর্ণিমা তিথিতে সন্ধ্যাকালে তথায় পৌঁছিলেন। অগ্রহায়ণ মাসে তিনি যাজ্ঞগ্রাম হইতে যাত্রা করিয়াছিলেন। সুতরাং দেখা যাইতেছে যে বৃন্দাবন পৌঁছিতে তাঁহার পাঁচ মাস লাগিয়াছিল। বৃন্দাবনে শ্রীজীব গোস্বামী, গোপাল ভট্ট, রঘুনাথ দাস প্রভৃতি সাধু পুরুষের সঙ্গে তাঁহার সাক্ষাৎ হয়। গোপাল ভট্টের নিকট তিনি দীক্ষা গ্রহণ করেন। অমুরাগবল্লী গ্রন্থে দীক্ষার নিম্নলিখিত বিবরণ দেওয়া হইয়াছে। :—

“প্রথমে করিল শ্রীহরি নাম ।
 তবে রাধাকৃষ্ণ দুই মন্ত্র অমুপাম ॥
 পঞ্চনাম শুনাইয়া সিদ্ধ নাম দিল ।
 শ্রীমণিমঞ্জরী গুরুমুখেতে শুনিল ॥
 আপনার নাম কহে শ্রীগুণমঞ্জরী ।
 শ্রীরূপস্বাক্ষর গণোদ্দেশ মধ্যে ধরি ॥
 সেবা পরায়ণা সমী পরিচর্যা প্রধান ।
 অতএব দাসী বলি কহয়ে আখ্যান ॥
 এই ব্রজ বৃন্দাবনে পরকীয়া লীলা ।
 সমরণ মঙ্গলে শ্রীরূপদিশা দেখাইলা ॥
 শ্রীরূপমঞ্জরী যুখে সভার অমুগতি ।
 যেমত ভাবনা তেনমত হয়ে প্রাপ্তি ॥
 শ্রীরাধারমণ হয় ব্রজেন্দ্র কুমার ।
 বাসুদেবাদি স্পর্শ নাহিক রাধার ॥
 সে রাধার মন হয় শচীর নন্দন ।
 অভেদ করিয়া সদা করিহ ভাবন ॥”

দীক্ষাকালে গোপাল ভট্ট তাঁহাকে যে উপদেশ দিয়াছিলেন প্রেম-
বিলাস গ্রন্থে তার নিম্নলিখিত বিবরণ দেওয়া হইয়াছে ।

“এই সব মন্ত্র তুমি করিবে স্মরণ ।

যেই কালে তদাশ্রয়ে করিবে মনন ॥

শুণমঞ্জরিকাশ্রয়ে মণিমঞ্জরিকা তুমি ।

তোমার যুথের বিবরণ কহি সব আমি ॥

রূপ গুণ রতি রস মঞ্জুলা মঞ্জুল ।

এই সব সঙ্গ সঙ্গী এই অনুকূল ॥

সেবা রাগাঙ্কিকা রাগ ভজনের মত ।

শ্রীরূপ গোসাঁইর বাক্য আছয়ে সম্মত ॥

সেবা নাম সাধকের যত বড় আৰ্ত্তি ।

তাহা সিদ্ধ হৈলে হয় এই সব প্রাপ্তি ॥

সাধন করয়ে দেহ সাধক নাম হয় ।

সখীর আশ্রয়ে সিদ্ধি জানিহ নিশ্চয় ॥

চতুষষ্টি আদি সাধন কহিল অনেক ।

আনুকূল্য প্রাতিকূল্য বুঝিবে পরতেক ॥

প্রাতিকূল্য যে হয় তারে করিব বর্জন ।

আনুকূল্য যেনা হয় প্রাপ্তির কারণ ॥

সেবা নামাপরাধ যত রক্ষার কারণ ।

অস্তরে প্রবেশি হানি করয়ে ভাজন ॥

কৃষ্ণ ভক্তির অঙ্গ হয় সাধনের প্রাপ্তি ।

অগ্রমত করিলে সাধন উড়ি যায় কতি ॥

কৃষ্ণ মন কৃষ্ণ প্রাপ্তি হবার কারণ ।

সেই অঙ্গ করে তাহে প্রাপ্তি নিরূপণ ॥

কিসে অপরাধ হয় শুন শ্রীনিবাস ।
 বিস্তারিয়া কহি আমি করিয়া প্রকাশ ॥
 না করে ভক্তির অঙ্গ নিন্দয়ে আপনে ।
 প্রাপ্তি নাহি হয় তার যায় অন্ম স্থানে ॥
 বটবীজ ক্ষুদ্র অতি বৃক্ষ অতি হয় ।
 অপরাধ দিনে দিনে বাড়িয়া পড়য় ॥
 দেবতা নিন্দন জীবে দুঃখ আদি যত ।
 ইথে নীলুরু চিত্ত যার ভক্তি হয় তত ॥
 যখন দেখিবা শাস্ত্র তখন জানিবা ।
 সেই ক্ষণে মোর বাক্য সত্য করি লবা ॥
 এই পথে পথি হইলে হও সাবধান ।
 কৃষ্ণ ভাজন সাধু মাত্র ইহার প্রমাণ ॥”

তৎপরে তিনি শ্রীজীব গোস্বামীর নিকট ভাগবত এবং সনাতনরূপ
 প্রণীত ভক্তি গ্রন্থাদি অধ্যয়ন করেন। ঠিক কতদিন তিনি বৃন্দাবনে
 ছিলেন তাহা বঝিতে পারা যায় না। তবে সাধারণ ভক্তগণের মত
 কেবল বৃন্দাবনদর্শন করিয়াই তিনি প্রত্যাভূত হন নাই। মনে হয়,
 শ্রীজীব, গোপাল ভট্ট প্রভৃতি পণ্ডিতগণের সঙ্গে তিনি ধর্মীর ভাে
 ভক্তিধর্মবিষয়ক শাস্ত্র সকল পাঠ ও আলোচনা করিয়াছিলেন, এবং
 পরিশেষে বৃন্দাবনবাসী গোস্বামীগণের রচিত গ্রন্থ সকল গোড় দেশে
 আনয়ন ও প্রচার করিয়াছিলেন। ইহাই শ্রীনিবাস আচার্যের প্রধান
 কার্য্য। বৃন্দাবনে বসিয়া সনাতনরূপ, শ্রীজীব, গোপাল ভট্ট প্রভৃতি,
 বৈষ্ণব আচার্য্যগণ বহু গ্রন্থ রচনা করিয়াছিলেন। কিন্তু এপর্য্যন্ত
 বঙ্গদেশে তাহার প্রচার হয় নাই। শ্রীনিবাস বৃন্দাবনে আসিয়া তাহার
 সংবাদ পাইলেন। জানানুরাগী শ্রীনিবাস বিশেষ মনোযোগের সহিত সেই

সকল গ্রন্থ অধ্যয়ন আরম্ভ করিলেন। শ্রীজীব গোস্বামীও আনন্দের সঙ্গে তাঁহাকে শিক্ষা দিতে আরম্ভ করিলেন ; শিক্ষা সমাপ্ত হইলে ব্রজবাসী মহাস্তম্ভগণের সম্মতিক্রমে শ্রীনিবাসকে আচার্য উপাধি প্রদান করিলেন।

শ্রীনিবাস আচার্যের বৃন্দাবনে অবস্থিতি কালে, নরোত্তম দাসও বৃন্দাবনে আগমন করেন। পরস্পরের সঙ্গে পরিচয় হওয়ায় উভয়েই পরমানন্দ লাভ করেন এবং তাঁহাদের মধ্যে জীবনব্যাপী ঘনিষ্ঠ যোগ স্থাপিত হয়। তাঁহারা একত্র বৃন্দাবনে নানা স্থানে ভ্রমণ করেন। শ্রীজীব গোস্বামী বৃন্দাবনের অন্তর্গত নানা তীর্থস্থান দেখাইবার জন্য রাঘব পণ্ডিত নামক একজন মহাস্তম্ভকে নিয়োজিত করেন। এই রাঘব পণ্ডিত দাক্ষিণাত্য দেশবাসী একজন ব্রাহ্মণ ছিলেন।

“দাক্ষিণাত্য বিপ্র মহাকুলীন প্রচার।
পরম বৈষ্ণব ক্রিয়া কে বর্ণিবে তার” ॥
“দীনহীনে অমুগ্রহ সীমা দেখাইলা।
ভক্তরত্ন প্রকাশাদি গ্রন্থ যে বর্ণিলা ॥”

ইনি গোবর্দ্ধন পর্বতে বাস করিতেন কিন্তু অনেক সময়েই বৃন্দাবনের নানাস্থানে ভ্রমণ করিয়া বেড়াইতেন।

“মধ্যে মধ্যে ব্রজেতে ভ্রমণ করে রঙ্গে।
মধ্যে মধ্যে রহে দাস গোস্বামীর সঙ্গে।”
কভু কভু একযোগে আসি বৃন্দাবনে।
মহানন্দ পায় প্রভুগণের দর্শনে।
রাধাকৃষ্ণ চৈতন্য চরিত্র সদা গায়।
না ধরে ধৈর্য নেত্রজলে ভাসি যায়।”

এই অমুরাগী অভিজ্ঞ ব্রজবাসী বিপ্র শ্রীনিবাস ও নরোত্তমকে ব্রজের অন্তর্গত সকল তীর্থ দর্শন করান।

শ্রীনিবাসের বৃন্দাবন অবস্থানকালে বৈষ্ণব ইতিহাস প্রসিদ্ধ আর একজন যুবকের সঙ্গে মিলন হয়। তিনি উত্তরকালে উৎকল প্রদেশে বৈষ্ণবধর্মের বহুল প্রচার করিয়াছিলেন। তিনি শ্যামানন্দ নামে পরিচিত। শ্যামানন্দ নরোত্তমের পরে বৃন্দাবনে আসিয়াছিলেন। কিন্তু শ্রীনিবাস, নরোত্তম ও শ্যামানন্দ একত্রে বৃন্দাবন হইতে প্রত্যাগমন করেন। বৃন্দাবনবাসী বৈষ্ণবগণ মহাসমারোহে তাঁহাদিগকে বিদায় দেন। তাঁহারা একে একে সকল মহাস্তম্ভের নিকট হইতে বিদায় গ্রহণ করিলেন। উভয় পক্ষই চক্ষুজলে ভাসিয়া পরস্পরকে আলিঙ্গন করিলেন। তাঁহাদের ভক্তি ও প্রীতির বর্ণনা পাঠ করিয়াও মুগ্ধ হইতে হয়। বৈষ্ণবগণ কেবল ভগবদ্ভক্তি সাধন করেন নাই কিন্তু তাঁহাদের পরস্পরের মধ্যে যে গভীর প্রীতির সম্বন্ধ হইয়াছিল তাহাও অপূর্ব।

শ্রীনিবাস ও নরোত্তম আসন্ন বিচ্ছেদের দুঃখে অতিশয় কাতর হইলেন। এমন কি লিখিত আছে যে শ্রীনিবাস বৃন্দাবন পরিত্যাগ করিয়া স্বদেশে প্রত্যাগমন করিতে অনিচ্ছুক ছিলেন।

“প্রভুর সঙ্গে রহি সদা মোর মনে ছিলা।

বৃন্দাবনে বাস আর প্রভুর সেবন।

ইহা ছাড়ি কেমনে গোড়ে করিব গমন ॥” (কর্ণানন্দ)

প্রেমবিলাস রচয়িতাও এইরূপ লিখিয়াছেন।

“যদি আজ্ঞা হয় প্রভু রহি বৃন্দাবনে।

প্রভুর চরণ সেবা করি রাত্রি দিনে ॥”

“সবার দর্শন করি অন্তমন নয়।

সর্বধর্ম রক্ষা পায় যদি আজ্ঞা পায় ॥” (প্রেমবিলাস)

কিন্তু শ্রীজীবপ্রমুখ গোস্বামিগণ বলিলেন, “না, তোমরা গোড়দেশে

যাও, সেখানে প্রভু তোমাদের দ্বারা অনেক কাৰ্য্য করাইবেন। গোড়ে গিয়া ভক্তিগ্রন্থ প্রচার কর।”

“এই গ্রন্থ লইয়া তুমি গোড় দেশে যাহ।

মহা প্রভুর আজ্ঞা যাহে গ্রন্থরাশি লহ।” (কর্ণানন্দ)

গোড়দেশে ভক্তিগ্রন্থ আনয়নের প্রস্তাব জীব গোস্বামীর অথবা শ্রীনিবাসের হৃদয় হইতে উঠিয়াছিল ঠিক বুঝিতে পারা যায় না। বৈষ্ণবগ্রন্থে জীব গোস্বামীকেই ইহার প্রধান উদ্যোক্তা বলিয়া বর্ণনা করা হইয়াছে। কিন্তু এই ইচ্ছা প্রথমতঃ শ্রীনিবাসের হৃদয়ে উত্থিত হওয়া অসম্ভব নহে। যাহা হউক এই কার্যের ভার শ্রীনিবাসের হস্তেই সমর্পিত হইয়াছিল। কথিত আছে শ্রীচৈতন্যদেব আকাশবাণীতে ভট্টগণের নিকট তাঁহার এই ইচ্ছা জ্ঞাপন করেন। কর্ণানন্দ রচয়িতা বলেন শ্রীগোবিন্দদেবের মন্দিরে সমবেত ভক্ত-মণ্ডলীর নিকটে এই আদেশবাণী হয়।

“রসাস্বাদন হেতু গোড়ে অবতার।

আস্বাদন করিলা রস বিবিধ প্রকার ॥

যে লাগিয়া অবতার জানহ কারণ।

ভাসাইলাম সব জনে দিয়া প্রেমধন ॥

মোর শক্তিতে জন্ম ইহার করিল প্রকাশ।

প্রেমরূপে হইল জন্ম নাম শ্রীনিবাস ॥

ইহার সম্বন্ধচিত্তে ধরিব যেই জন।

সেই সে পাইব রাধাকৃষ্ণের চরণ।

শীঘ্র গোড়দেশে সবে দেহ পাঠাইয়া।

গমন করুন ইথে গ্রন্থরাশি লইয়া ॥”

ইহা হইতে মনে হয় গোড়ে ভক্তিগ্রন্থ প্রেরণ ইচ্ছা প্রথমে বাহার

হৃদয়েই উখিত হউক। কেন সকলেই এই প্রস্তাব পরম উৎসাহে সমর্থন করিয়াছিলেন। অগ্রহায়ণ মাসের শুক্লা পঞ্চমীতে যাত্রার দিন স্থির হইল। জীব গোস্বামীর আদেশে মথুরাবাসী একজন মহাজন একখানি শকট ও চারিটা বলিষ্ঠ বলীবর্দ্ধ আনয়ন করিলেন। গ্রন্থ সকল একটি কাষ্ঠসম্পূটে বন্ধ করিয়া শকটে রাখা হইল, সঙ্গে দশজন প্রহরী। শ্রীনিবাস নরোত্তম ও শ্যামানন্দের সঙ্গে গ্রন্থ লইয়া যাত্রা করিলেন। বৃন্দাবনবাসী ভক্তগণ কতকদূর পর্য্যন্ত তাঁহাদের সঙ্গে চলিলেন। প্রথম দিন তাঁহারা মথুরা গিয়া বিশ্রাম করিলেন। শ্রীজীব রঘুনাথ দাস, কৃষ্ণদাস কবিরাজ প্রভৃতি কয়েকজন মথুরা পর্য্যন্ত তাঁহাদের সঙ্গে আসিয়াছিলেন। পরদিন প্রভাতে তাঁহারা বৃন্দাবন প্রত্যগমন করিলেন এবং শ্রীনিবাস প্রভৃতি গোড় অভিমুখে অগ্রসর হইলেন। কতকদূর আসিয়া নীলাচলযাত্রী একদল লোকের সহিত তাঁহাদের সাক্ষাৎ হইল। তাঁহারা সকলে মিলিয়া ঝারিখণ্ডের বনপথে যাইতে মনস্থ করিলেন।

এই পথ দুর্গম ও বিপদসঙ্কুল, কিন্তু অপেক্ষাকৃত কম দূর। এই পথের বিশেষ আকর্ষণ যে শ্রীচৈতন্যদেব, শ্রীকৃপ এবং সনাতন গোস্বামী এই পথ দিয়া যাতায়াত করিয়াছিলেন। এই সকল কারণে এবং সঙ্গে বহুসংখ্যক লোক থাকায় শ্রীনিবাস এই পথেই চলিলেন। নিব্বিঙ্গে বহুপথ অতিক্রম করিয়া তাঁহারা বনবিষ্ণুপুরের নিকটবর্তী হইলেন। এখন গোড়দেশের সীমায় উপস্থিত হইয়াছেন, আর বেশী পথ বাকী নাই ভাবিয়া তাঁহারা অনেক পরিমাণে নিশ্চিন্ত হইলেন। কিন্তু এখানে এক অতর্কিত বিপদ ঘটিল যাহা হইতে পরিণামে প্রভূত মঙ্গল ঘটিয়াছিল। এই সময়ে বীরহাষির নামে এক ব্যক্তি বিষ্ণুপুরের রাজা ছিলেন। তাঁহার অধীনে বহু দস্যু ছিল। তাহারা তাঁহার ইচ্ছিত

অনুসারে পথযাত্রীদিগের সর্বস্ব লুণ্ঠন করিত। শ্রীনিবাস বহু লোক সমভিব্যাহারে শকটবাহন কাষ্ঠসম্পূট লইয়া যাইতেছেন শুনিয়া তাহারা মনে করিল কোনও বণিক ধনরত্ন লইয়া যাইতেছে। রাজাকে এই সংবাদ দিলে তিনি শকট অপহরণ করিতে আদেশ দিলেন। এক রাত্রিতে শ্রীনিবাসপ্রমুখ যাত্রীদল আহালাদির পর বৃক্ষতলে বহুক্ষণ পর্যন্ত ধর্মালোচনা করিয়া নিদ্রিত হইয়া পড়িয়াছিলেন, এমন সময় দস্যুগণ স্বেযোগ দেখিয়া গাড়ী লইয়া প্রস্থান করিল। প্রভাতে নিদ্রাভঙ্গের পর গাড়ী না দেখিয়া শ্রীনিবাস, নরোত্তম ও শ্যামানন্দ বজ্রাহতের গায় হইলেন। তাহাদের মনের অবস্থা সহজেই অনুভব করা যাইতে পারে। গোস্বামীগণের আজীবনের তপস্কার ধন অমূল্য গ্রন্থসকল কত শ্রমে এবং কত যত্নে যাহা তাঁহারা লইয়া যাইতেছিলেন হঠাৎ তাহা নষ্ট হইয়া গেল ভাবিয়া তাঁহারা শোকে ও দুঃখে অভিভূত হইয়া পড়িলেন। তাঁহারা কি করিবেন স্থির করিতে পারিলেন না। শোকের প্রথম বেগ উপশম হইলে শ্রীনিবাস নরোত্তম দাসকে বলিলেন তুমি শ্যামানন্দকে লইয়া দেশে গমন কর এবং গোস্বামীদের আদেশমত তাঁহাকে উৎকলে পাঠাইয়া দাও। আমি গ্রন্থ না লইয়া দেশে ফিরিব না। তাঁহারা বুঝিতে পারিলেন যে ধনরত্ন মনে করিয়া কোন দস্যুদল গ্রন্থ অপহরণ করিয়াছে। যখন দেখিবে যে সম্পূটে ধনরত্ন নাই কেবল পুস্তক আছে তখন তাহারা সহজেই ফিরাইয়া দিবে। শ্রীনিবাসের পরামর্শানুসারে অনিচ্ছা সত্ত্বেও নরোত্তম ও শ্যামানন্দ গন্তব্য পথে অগ্রসর হইলেন। শ্রীনিবাসাচার্য্য গ্রন্থের সন্ধানে ইতঃস্তুত ঘুরিতে লাগিলেন।

এদিকে দস্যুদল গ্রন্থসহ গাড়ী লইয়া রাজা বীরহাষিরের সম্মুখে উপস্থিত করিল। রাজা সম্পূট খুলিয়া বিস্মিত হইলেন; দেখিলেন তাহার মধ্যে ধনরত্নের পরিবর্তে স্তরে স্তরে পুস্তক সজ্জিত রহিয়াছে।

বৈষ্ণবগ্রন্থে লিখিত আছে যে গ্রন্থ দেখিয়া বীরহাঙ্গীরের মন পরিবর্তিত হইয়া গেল।

“গ্রন্থ দৃষ্টি মাতেতে হইল শুদ্ধ মন।

পুনঃ পুনঃ গ্রন্থ রত্নে করে সন্দর্শন ॥”

তাঁহার। অবশ্য ইহাতে অলৌকিক ব্যাপারই কল্পনা করিয়াছিলেন, কিন্তু রাজা বীরহাঙ্গীরের মনের অদৃশ্য স্বাভাবিক কারণেও বুঝা যাইতে পারে। ধনরত্নের, পরিবর্তে গ্রন্থ দেখিয়া তিনি সহজেই বুঝিতে পারিলেন কোন ধান্মিক লোক বহু যত্নে এই গ্রন্থসকল লইয়া যাইতেছেন। রাজা হাঙ্গীর দস্যাদলের নায়ক হইলেও একেবারে মন্দ লোক ছিলেন না। বিশেষতঃ, দেখা যায় যে তাঁহার সভায় প্রতিদিন ভাগবত পাঠ হইত। রাজা বীরহাঙ্গীর শ্রদ্ধার সহিত তাহা শ্রবণ করিতেন।

তিনি মনে করিলেন যে যাঁহার গ্রন্থ তাঁহার সন্ধান পাইলে তাঁহাকে প্রত্যর্পণ করিবেন। এই ভাবিয়া প্রহরীগণকে সযত্নে গ্রন্থ রাখিয়া দিতে বলিলেন। ইতিমধ্যে শ্রীনিবাস আচার্য্য গ্রন্থের অন্বেষণ করিতে করিতে বিষ্ণুপুর আসিয়া পৌঁছিলেন। সেখানে শ্রীকৃষ্ণবল্লভ নামে এক ব্রাহ্মণতনয়ের সঙ্গে পরিচয় হয়। এবং তাঁহার সঙ্গে রাজ্য সভায় ভাগবত পাঠ শ্রবণ করিতে যান। লিখিত আছে যে তাঁহাকে দেখিয়াই রাজা মনে করিলেন যে ইনিই গ্রন্থের অধিকারী হইবেন।”

“আচার্য্যের তেজ দেখি রাজা সাবধানে।

ভূমে পড়ি প্রণমি আপনা ধন্যমনে ॥

* * *
বসিতে দিলেন আনি অপূর্ব আসন।

ইহ গ্রন্থরত্নের অধ্যক্ষ সুনিশ্চয়।

মোর ভাগ্যে অকস্মাৎ দিলা দর্শন ।

করিমু ইহার পদে আত্ম সমর্পণ ॥”

তদন্তর রাজা বীরহাষীর তাঁহাকে কিছু ভাগবত ব্যাখ্যা করিতে অনুরোধ করিলেন । তদনুসারে শ্রীনিবাস আচার্য্য ভাগবত ব্যাখ্যা করিলেন । তাহা শুনিয়া রাজা এবং সভাস্থ সকলে বিস্মিত হইলেন । পাঠান্তে রাজা প্রাসাদে তাঁহার বাসস্থান নির্দেশ করিয়াছিলেন এবং শ্রদ্ধার সহিত তাঁহার আতিথ্য সংকর করিলেন । আহার ও বিশ্রামান্তে তাঁহার পরিচয় জিজ্ঞাসা করিলে শ্রীনিবাস শ্রীচৈতন্যদেবের আবির্ভাব হইতে বর্তমান সময় পর্য্যন্ত সংক্ষেপেই সকল বিবরণ দিলেন । বৃন্দাবন হইতে গোস্বামীগণের রচিত গ্রন্থ লইয়া গোড়ে যাইতেছিলেন, পথিমধ্যে গ্রন্থচুরি হয় এবং তাহার সন্ধানে এখানে আসিয়াছেন তাহাও বলিলেন । রাজা এই কথা শুনিয়া অন্তঃস্থ হৃদয়ে শ্রীনিবাসের চরণে পড়িয়া তিনিই যে গ্রন্থ অপহরণ করিয়াছেন তাহা বলিলেন, এবং বলিলেন সমুদয় গ্রন্থই তিনি সযত্নে রক্ষা করিয়াছেন । শ্রীনিবাস আচার্য্য এই সংবাদে পরমানন্দিত হইলেন । রাজা বীরহাষীর তদবধি শ্রীনিবাস আচার্য্যের পরম ভক্ত হইলেন । এবং শ্রীনিবাস আচার্য্যকে কিছুদিন বিষ্ণুপুর থাকিয়া তাঁহাদিগকে ধর্ম উপদেশ দিবার জন্ত অনুরোধ করিলেন ।

শ্রীনিবাস তাহাতে সন্মত হইলেন । বৃন্দাবন হইতে তাঁহার সঙ্গে যে সকল লোক আসিয়াছিল, এখান হইতে তাহাদিগকে ফিরাইয়া পাঠাইলেন । এবং শ্রীজীব গোস্বামীর নিকট পত্রদ্বারা সকল সংবাদ দিলেন । যে গাড়ীতে গ্রন্থ আসিয়াছিল রাজা বীরহাষীর তাহা পূর্ণ করিয়া গোস্বামীগণের নিকট বহু মূল্য উপঢৌকন পাঠাইলেন । রাজার দূত দ্বারা নরোত্তম ঠাকুরের নিকটেও সকল সংবাদ জানাইলেন ।

বিষ্ণুপুরে নিত্য ভাগবত গ্রন্থাদি পাঠ হইতে লাগিল ; রাজা ও রাজ-মহিষী দিনে দিনে, শ্রীনিবাসের পরম অনুরাগী হইলেন এবং বহু-সংখ্যক লোক বৈষ্ণব ধর্ম গ্রহণ করিল। শ্রীনিবাস গৃহে প্রত্যাগমনের জন্ম ব্যগ্র হইয়াছিলেন সুতরাং এ যাত্রা আর বেশী বিলম্ব করিলেন না। পরে পুনরায় বিষ্ণুপুর আসিবেন বলিয়া রাজাকে সান্ত্বনা দিয়া যাত্রার জন্ম প্রস্তুত হইলেন। রাজা কীরহাষির তাঁহার সঙ্গে শকটপূর্ণ করিয়া গ্রন্থ ও বহু উপঢৌকন পাঠাইলেন। যথাসময়ে শ্রীনিবাসাচার্য্য যাজগ্রামে পৌঁছিলেন। গোড়বাসী বৈষ্ণবগণ এ সংবাদে পরমানন্দিত হইলেন। নানা স্থান হইতে তাঁহারা তাঁহার সঙ্গে সাক্ষাৎ করিতে আসিলেন এবং তিনিও স্থানে স্থানে গিয়া প্রাচীন মহাস্তম্ভগণের সঙ্গে সাক্ষাৎ করিলেন। তৎপরে তিনি যাজগ্রামে বসিয়া ভক্তিগ্রন্থ অধ্যাপনা করিতে লাগিলেন। তাঁহার নিকট ভক্তিধর্ম শিক্ষা করিবার জন্ম নানা স্থান হইতে বিদ্যার্থীগণ আসিতে লাগিল। ক্রমে বহুলোক তাঁহার শিষ্য হইল। যাজগ্রাম গোড়দেশে বৈষ্ণব ধর্মের একটি প্রধান কেন্দ্র হইয়া উঠিল। তাঁহার শিষ্যগণের মধ্যে রামচন্দ্র কবিরাজের নাম বিশেষ ভাবে উল্লেখ যোগ্য। শ্রীনিবাসের সহিত তাঁহার পরিচয় ও মিলনের বিবরণ ইতিপূর্বেই প্রদত্ত হইয়াছে।

বৃন্দাবন হইতে প্রত্যাগমনের কিছুদিন পরে শ্রীনিবাসের মাতা লক্ষ্মীপ্রিয়া পরলোক গমন করেন। তাঁহার মৃত্যুতে শ্রীনিবাস ব্যথিত ও বিপন্ন হইলেন। গৃহে অল্প স্ত্রীলোক নাই ; এখন শ্রীনিবাসের বহু শিষ্য ও পোষ্য। গৃহকর্ম কে দেখে ! রঘুনন্দন প্রভৃতি হিতৈষীগণের অনুরোধে শ্রীনিবাস আচার্য্য দারপরিগ্রহ করিতে সম্মত হইলেন। তখন রঘুনন্দন শ্রীনিবাসের উপযুক্ত কন্যা অনুসন্ধান করিতে আরম্ভ করেন। যাজগ্রামেই গোপালদাস চক্রবর্তী নামক

এক ব্রাহ্মণ বাস করিতেন। তাঁহার দ্রৌপদী নামে একটি স্ত্রীপা ও সঙ্গুণসম্পন্ন কন্যা ছিল। তাঁহার সহিত শ্রীনিবাসের বিবাহ হইল। এখন তিনি নিশ্চিন্তমনে শাস্ত্র চর্চা ও অধ্যাপনা করিতে লাগিলেন। কিন্তু অল্পদিনের মধ্যেই গুরুদেব আচার্য্য, মরহরি সরকার, গদাধর দাস প্রভৃতি ভক্তগণের পরলোকগমনে শ্রীনিবাস অতিশয় ব্যথিত হইলেন। তাঁহাদের শোকে অধীর হইয়া তিনি দ্বিতীয়বার বৃন্দাবন যাত্রা করেন। অগ্রহায়ণ মাসের শেষভাগে যাজ্ঞগ্রাম পরিত্যাগ করিয়া বসন্ত পঞ্চমীর দিন বৃন্দাবন পৌঁছিলেন। এত অল্পদিনের মধ্যে বৃন্দাবনে পুনরাগমনে তথাকার মহাস্তগণ একদিকে যেমন সুখী হইলেন অপরদিকে সেইরূপ বিষ্মিতও হইলেন। শ্রীনিবাসের নিকটে গোড়ের ভক্তগণের পরলোকগমনের সংবাদে তাঁহারাও দুঃখিত হইলেন। এদিকে শ্রীনিবাসের শিষ্যগণ তাঁহার অভাবে বিমর্ষ ও দুর্বল হইয়া পড়িলেন। তাঁহারা যুক্তি করিয়া তাঁহাকে ফিরাইয়া আনিবার জন্ত রামচন্দ্রকে বৃন্দাবন প্রেরণ করিলেন। শ্রীনিবাসের যাত্রার একমাস পরে পৌষ মাসে রামচন্দ্র বৃন্দাবন যান। শ্রীনিবাস রামচন্দ্রকে পাইয়া প্রীত হইলেন, এবং তথাকার বৈষ্ণবগণের সহিত তাঁহার পরিচয় করাইয়া দিলেন। গোস্বামীগণ রামচন্দ্রের শাস্ত্রজ্ঞান ও কবিত্ব শক্তির পরিচয় পাইয়া তাঁহাকে কবিরাজ উপাধি প্রদান করেন। রামচন্দ্র কয়েকমাস বৃন্দাবনে থাকিয়া তত্রত্য বৈষ্ণবগণ ও তীর্থ স্থানগুলি দর্শন করতঃ বৈশাখী পূর্ণিমার পরদিবস শ্রীনিবাস আচার্য্যকে লইয়া গোড় যাত্রা করেন। তাঁহাদের সঙ্গে শ্রামানন্দও আসেন। তিনি পূর্বেই বৃন্দাবনে আসিয়াছিলেন। পথে বনবিষ্ণুপুরে তাঁহারা দুই মাস অবস্থিতি করেন। রাজা বীরহাঙ্গীর তাঁহাদিগকে পাইয়া পরম প্রীত হইলেন। রামচন্দ্র কবিরাজও শ্রামানন্দের পরিচয় পাইয়া তিনি

তাঁহাদিগকে বহু সম্মান করিলেন। শ্রামানন্দ বহুদিন পূর্বে উৎকল ত্যাগ করিয়াছিলেন; সেইজন্ত দশদিন মাত্র তথায় থাকিয়া গৃহে প্রত্যাগমন করেন। শ্রীনিবাস আচার্য্য ও রামচন্দ্র কবিরাজ তাঁহার পরও অনেকদিন বিষ্ণুপুরে থাকিয়া রাজা বীরহাষীরকে গভীরতর ধর্মসাধনে প্রবর্তিত করেন। এ যাত্রায়ও রাজধানী ও নিকটবর্তী স্থানে অনেকে বৈষ্ণবধর্মে দীক্ষিত হন। যাজগ্রামের শিষ্যগণ তাঁহার বিষ্ণুপুর আগমনের সংবাদ পাইয়া শীঘ্র গৃহে ফিরিবার জন্ত পত্র লেখেন। তদনুসারে বিষ্ণুপুরে আর অধিক দিন না থাকিয়া শ্রীনিবাস আচার্য্য যাজগ্রামে আগমন করেন।

কয়েকদিন বিশ্রামের পর শ্রীনিবাস আচার্য্য কাটোয়া ও শ্রীখণ্ডে গমন করেন। সেখানে গিয়া শুনিলেন তথায় গদাধর দাস ও নরহরি ঠাকুরের মৃত্যুদিন উপলক্ষে মহোৎসবের আয়োজন হইতেছে। পূর্ব বৎসর কার্তিক মাসে গদাধর পরলোক গমন করিয়াছেন। তাঁহার শিষ্য যদুনন্দন চক্রবর্তী পূর্ব হইতেই উৎসবের আয়োজন করিতে ছিলেন। নানাস্থানের ভক্ত ও মহাস্তমগণকে নিমন্ত্রণ করা হইয়াছে। খড়দহ হইতে নিত্যানন্দতনয় বীরভদ্র এবং শান্তিপুর হইতে অষ্টৈতাচার্য্যের পুত্র গোপাল মিশ্র ও কৃষ্ণ মিশ্র আসিবেন। যদুনন্দন মহোৎসবে যোগ দিবার জন্ত শ্রীনিবাস আচার্য্যকে বিশেষভাবে নিমন্ত্রণ করেন। শ্রীনিবাস সানন্দে এই নিমন্ত্রণ গ্রহণ করেন। কাটোয়া হইতে শ্রীখণ্ডে গিয়া দেখিলেন সেখানেও নরহরি ঠাকুরের মৃত্যুদিন উপলক্ষে মহোৎসবের আয়োজন হইতেছে। গদাধর দাসের তিরোভাবের অল্পদিন পরেই পূর্ব বৎসর অগ্রহায়ণের কৃষ্ণাএকাদশী দিবসে নরহরি ঠাকুর মহাশয় পরলোক গমন করেন। তাঁহার শিষ্য যদুনন্দন উক্ত দিনে উৎসবের ব্যবস্থা করিতেছিলেন। কাটোয়ার

বীরভদ্রপ্রমুখ মহাস্তম্ভগণের আগমনের সঙ্ঘাবনা শুনিয়া তিনি অধিকতর উৎসাহিত হইলেন। স্থির হইল, সমাগত বৈষ্ণবগণ কাটাওয়ার উৎসবের পরে শ্রীখণ্ডে আসিয়া মহোৎসবে যোগ দিবেন। শ্রীনিবাসও অবশ্য আসিবেন। যথাসময়ে কাটাওয়া ও শ্রীখণ্ডে মহাসমারোহে মহোৎসব নিম্পন্ন হইল। উভয় স্থানেই শ্রীনিবাসকে মহোৎসবের তত্ত্বাবধানের প্রধান ভার গ্রহণ করিতে হইয়াছিল। কয়েকমাস পরে কাঞ্চনগড়িয়াতেও আর একটি মহোৎসব হয়। তথাকার প্রাচীন বৈষ্ণব চৈতন্যদেবের সঙ্গী হরিদাস আচার্য্য পূর্ব বৎসর মাঘ মাসের কৃষ্ণা একাদশীতে বৃন্দাবনে দেহত্যাগ করেন। তাঁহার দুই পুত্র শ্রীদাস ও গোকুলানন্দ পূর্ব হইতেই শ্রীনিবাস আচার্য্যের নিকট ভক্তি শাস্ত্র অধ্যয়ন করিতেছিলেন। শ্রীনিবাস পিতার মৃত্যুদিনে তাঁহাদিগকে কাঞ্চনগড়িয়ায় উৎসবের আয়োজন করিতে বলিলেন। তাঁহার আদেশে ভ্রাতৃদ্বয় গৃহে আসিয়া সোৎসাহে সকল ব্যবস্থা করিতে লাগিলেন। যথাসময়ে শ্রীনিবাসাচার্য্য রামচন্দ্র প্রভৃতি শিষ্যগণকে লইয়া, কাঞ্চনগড়িয়ায় মহোৎসব সমাধা করেন। এই উপলক্ষে শ্রীদাস ও গোকুলানন্দকে বৈষ্ণবধর্মে দীক্ষাও দেন। এই সকল উৎসব উপলক্ষে ভক্তির তরঙ্গ বহিত এবং বৈষ্ণবধর্ম প্রচার হইত। এই সময়ে কাঞ্চনগড়িয়া ও নিকটবর্তী স্থান সমূহের অনেকে বৈষ্ণবধর্ম গ্রহণ করেন।

কাঞ্চনগড়িয়ার মহোৎসবের পরে শ্রীনিবাস সশিষ্যে বুদ্ধির গমন করেন। এই যাত্রায় তিনি রামচন্দ্রের ভ্রাতা গোবিন্দকে বৈষ্ণবধর্মে দীক্ষা দেন। গোবিন্দ গ্রহণীরোগে পীড়িত হইয়া মৃত প্রায় হইয়াছিলেন। তিনি ভ্রাতাকে শ্রীনিবাস আচার্য্যের সহিত তথায় আসিবার জন্য সান্ন্যয়ন জন্মরোধ করেন। তদনুসারে রামচন্দ্র কবিরাজ

শ্রীনিবাসকে লইয়া বুধরী আসেন এবং সেখানে গোবিন্দের দীক্ষা হয়। স্থানান্তরে তাহার বিবরণ প্রদত্ত হইয়াছে।

ইহার অল্পদিনপরেই খেতরীর মহোৎসব হয়। নরোত্তম ঠাকুর খেতরীতে চৈতন্য ও রাধাকৃষ্ণের বিগ্রহ স্থাপনের আয়োজন করিতে ছিলেন। শ্রীনিবাস আচার্য্য বুধরী আসিয়াছেন শুনিয়া তাঁহার সহিত পরামর্শের জন্য ঠাকুর মহাশয় তথায় আগমন করিলেন। সেখানে সকল যুক্তি স্থির হয়। শ্রীচৈতন্যের জন্মদিন ফাল্গুনী পূর্ণিমায় মহোৎসবের দিন স্থির হইল। নরোত্তম শ্রীনিবাস আচার্য্যের উপর বিগ্রহ প্রতিষ্ঠার ভার অর্পণ করিলেন। নির্দিষ্ট দিনে মহা সমারোহে খেতরীতে মহোৎসব সম্পন্ন হয়। অগ্ৰত্ব তাহার বিবরণ লিপিবদ্ধ হইল।

ইহার কিছুদিন পরে শ্রীনিবাস আচার্য্য ও নরোত্তম ঠাকুর রামচন্দ্র সহ নবদ্বীপ ভ্রমণে বহির্গত হন। শ্রীনিবাস ও নরোত্তম উতিপূর্বে একবার নবদ্বীপ গিয়াছিলেন। তখন তাঁহারা বেশীদিন সেখানে ছিলেন না। এবার বিশেষরূপে শ্রীচৈতন্যদেবের লীলাক্ষেত্র পরিদর্শন করিবার ইচ্ছা। এখন নবদ্বীপের প্রাচীন ভক্তগণ প্রায় সকলেই পরলোকগমন করিয়াছেন। তথায় পৌঁছিয়া দেখিলেন চৈতন্যদেবের বাস-গৃহে একমাত্র প্রাচীন ভৃত্য বৃদ্ধ ঈশান শোক দুঃখে মুহমান হইয়া দিন যাপন করিতেছিলেন। ঈশান তাঁহাদের পরিচয় পাইয়া পরমানন্দিত হইলেন এবং ক্রমে চৈতন্যদেবের লীলাস্থান সকল একে একে দেখাইলেন। নবদ্বীপ হইতে তাঁহারা যাজগ্রাম প্রত্যাগমন করিলেন। ইহার অল্পদিন পরে ঈশানও পরলোকগমন করেন।

তাঁহাদের যাজগ্রাম প্রত্যাগমনের অল্পদিন পরেই রাজা বীর-হাঘীর সেখানে আসেন। শ্রীনিবাস আচার্য্য পূর্বেই তাঁহাকে

আসিবার জ্ঞ লিখিয়াছিলেন । তদনুসারে তিনি সঙ্গীক এই সময়ে যাজগ্রামে পৌঁছেন । এখানে নরোত্তমের সহিত তাঁহার প্রথম সাক্ষাৎ হয় । ভক্তদ্বয় তাঁহাকে লইয়া শাস্ত্রচর্চা ও সঙ্কীৰ্ত্তন প্রভৃতিতে মনের আনন্দে দিন কাটাইতে লাগিলেন । রাজা বীরহাঙ্গীরও তাঁহাদের সহবাসে প্রভূত আনন্দ ও উপকার পাইলেন । এমন কি তিনি বলিয়াছিলেন যে আর গৃহে ফিরিবেন না । রাজকার্য্য হইতে অবসর গ্রহণ করিয়া তাঁহাদের সঙ্গ ধর্ম্মচর্চায় জীবনের অবশিষ্টাংশ অতি-বাহিত করিবেন । কিন্তু আচার্য্য ও ঠাকুর মহাশয় তাঁহাকে কিছুদিন তীর্থধর্ম্ম করিয়া গৃহে প্রত্যাগমনকরতঃ কর্তব্যপালনে উপদেশ দিলেন । এই সময়ে পরমেশ্বরী দাস জাহ্নবী দেবী নিম্নিত শ্রীরাধা মূর্ত্তি লইয়া নৌকাযোগে বৃন্দাবন যাইতেছিলেন । তাঁহাদের কাটোয়া গমনের সংবাদ পাইয়া শ্রীনিবাস আচার্য্যগণ সহ সেখানে গেলেন । বীরহাঙ্গীর সেই মূর্ত্তি প্রতিষ্ঠার ব্যয় নির্বাহের জ্ঞ রামচন্দ্রের হাতে এক সহস্র মুদ্রা প্রদান করেন । তিনি গুরুদেবের জ্ঞ এবং তাঁহার মহিষী দ্রৌপদীর জ্ঞও অনেক উপঢৌকন প্রদান করেন । অতঃপর কাটোয়া প্রভৃতি নানা স্থান দর্শন করিয়া রাজা বীরহাঙ্গীর বিষ্ণুপুর প্রত্যাগমন করেন ।

বীরহাঙ্গীরকে বিদায় দিয়া শ্রীনিবাস নরোত্তম ও রামচন্দ্র কবিরাজের সহিত কাঞ্চনগড়িয়া ও বৃধরী হইয়া খেতরী গমন করিলেন । এ যাত্রায় তিনি ১৫ দিন তথায় ছিলেন । সেই সময়ে সেখানে একটি ক্ষুদ্র উৎসব হয় । তথা হইতে আচার্য্য যাজগ্রামে ফিরিয়া আসিলেন । ইহার অল্পদিন পরে শ্রাবণের শুক্লাচতুর্থাতে কাটোয়ার প্রাচীন ভক্ত রঘুনন্দন পরলোকগমন করেন । তাঁহার পারলৌকিক অস্থান উপলক্ষে কাটোয়ায় মহোৎসব হয় । শ্রীনিবাস আচার্য্য তাহার তদ্ব্যবধান করেন ।

রাজা বীরহাষীরের গৃহপ্রত্যাগমনকালে আচার্য্য মহাশয় শীঘ্র বিষ্ণুপুর যাইতে প্রতিশ্রুত হইয়াছিলেন। কাটোয়ার মহোৎসবের পর তিনি বিষ্ণুপুর যাত্রা করেন। সেখানে তাঁহার জন্ম পৃথক বাটী নির্মিত হইয়াছিল। এখন হইতে অনেক সময়ে তিনি সেখানে আসিয়া বাস করিতেন।

এই সময়ে পূর্ববর্তী কয়েকজন বৈষ্ণবনেতার শ্রায় শ্রীনিবাস আচার্য্য দ্বিতীয়বার দারপরিগ্রহরূপ কলঙ্কে কলঙ্কিত হইলেন। এ বিষয়ে নরোত্তম ঠাকুরের চরিত্র সম্পূর্ণ নিদোষ। বৈষ্ণব জীবনচরিত লেখকেরা এই নিন্দনীয় কার্যের হীনতা উপলব্ধি করিয়া থাকিবেন। কেন না দেখা যায়, বিবাহের সমর্থনের জন্ম তাঁহারা নানাপ্রকার স্বপ্নের আশ্রয় গ্রহণ করিয়াছেন। এমন কি, তাঁহারা শ্রীচৈতন্যের নামও এই কুৎসিত ব্যবহারের সহিত সংযুক্ত করিতে কুণ্ঠিত হন নাই। তাঁহারা লিখিয়াছেন চৈতন্যদেব স্বপ্নে আবির্ভূত হইয়া শ্রীনিবাসকে বিবাহ করিতে অনুমতি দেন। কুটচরিত্র নীতিপ্রধান চৈতন্যদেব দ্বিতীয়বার বিবাহে অনুমতি দিবেন একথা একেবারেই বিশ্বাসযোগ্য নহে। শ্রীনিবাসকে বাঁচাইতে গিয়া গ্রন্থকার চৈতন্যদেবকে হীন করিয়াছেন। বিষ্ণুপুর অবস্থান কালে এই বিবাহ হয়।' নিকটবর্তী গোপালপুর গ্রামে রঘুনাথ চক্রবর্তী নামে এক ব্রাহ্মণ ছিলেন। তাঁহার পদ্মাবতী নামী স্ত্রী ও গুণবতী কন্যার সহিত শ্রীনিবাসের দ্বিতীয় বিবাহ হয়। বিবাহের পর পদ্মাবতীর নাম গৌরান্দ্রিয়া রাখা হইয়াছিল। রাজা বীরহাষীর এই বিবাহে বহু অর্থ ব্যয় করেন। কন্যার বয়স বেশী ছিল বলিয়া মনে হয় না। কেন না দেখা যায়, ২৫ বৎসর বয়সে গৌরান্দ্রিয়ার গর্ভে গতিগোবিন্দ নামে এক পুত্রের জন্ম হয়। বিবাহের অনেক দিন পরে এই সন্তানের জন্ম হইয়াছিল

বলিয়া উল্লিখিত আছে। প্রথমা পত্নী জ্যোত্স্নী গর্ভে শ্রীনিবাসের আর দুইটি পুত্র হইয়াছিল। তাঁহাদের নাম বৃন্দাবনচন্দ্র ও রাধাকৃষ্ণ। পুত্রগণের মধ্যে গতিগোবিন্দই সর্বাধিক শক্তিশালী ও যশস্বী হইয়াছিলেন। এতদ্ভিন্ন শ্রীনিবাসের তিনটি কন্যাও হইয়াছিল। তাঁহাদের নাম হেমলতা, কৃষ্ণপ্রিয়া ও কাঞ্চনলতিকা রাখা হইয়াছিল।

এখন হইতে কখনও বিষ্ণুপুর, কখনও যাজগ্রামে আচার্য মহাশয় বৈষ্ণবধর্ম প্রচার করিতে লাগিলেন। প্রয়োজনমত খেতরী, বুধরী, কাঞ্চনগড়িয়া, কাটোয়া, শ্রীখণ্ড প্রভৃতি বৈষ্ণবকেন্দ্রগুলিতে গতায়াত করিতেন। তদ্রূপে বৈষ্ণবগণও অবসরমত যাজগ্রামে আগমন করিতেন। গভীর শাস্ত্রজ্ঞানে ও উন্নত ধর্মভাবে তিনি এযুগে গোষ্ঠীয় বৈষ্ণবধর্মের পরিচালক হইয়াছিলেন। খেতরীতে যেমন নরোত্তম ঠাকুর সুললিত সঙ্কীর্ণন সাহায্যে ভক্তিদ্বারা প্রবাহিত করিতেছিলেন, যাজগ্রামে সেই প্রকার শ্রীনিবাস আচার্য শাস্ত্রচর্চা ও গ্রন্থপ্রচারের দ্বারা বৈষ্ণবধর্মকে শক্তিশালী করিয়াছিলেন। এই দুই ভক্তের মিলন মণিকাঞ্চনের যোগের ন্যায় হইয়াছিল। উভয়েই বৃদ্ধকাল পর্য্যন্ত জীবিত ছিলেন। ঠিক কোন সময়ে তাঁহাদের তিরোভাব হয় তাহা জানা যায় না। কথিত আছে বৃন্দাবনে বৃদ্ধ বয়সে তিনি দেহত্যাগ করেন। ইহার পূর্বে তিনি আর একবার খেতরী গমন করেন। সে সময়ে ফাল্গুনী পূর্ণিমাতে শ্রীচৈতন্যের জন্মদিন উপলক্ষে উৎসব হইয়াছিল। নিত্যানন্দ প্রভুর পুত্র বীরচন্দ্র প্রভৃতি অনেক মহাস্তু তাঁহাদের মধ্যে ছিলেন। উৎসবান্তে শ্রীনিবাস আচার্য যাজগ্রাম আসেন এবং তাহার কিছুদিন পরে বৃন্দাবন গমন করেন। বৃদ্ধ হইয়াছেন, একাকী দীর্ঘ পথ ঘাইতে ভীত হইয়া রামচন্দ্রকে তাঁহার

সঙ্গে যাইতে অনুরোধ করেন। তদনুসারে রামচন্দ্র তাঁহার সঙ্গে বৃন্দাবন যান। তাঁহারা আর গোড়ে ফেরেন নাই। উভয়েই তথায় দেহত্যাগ করেন। কার্তিকী শুক্লাষ্টমী তিথিতে বৃন্দাবন ও চাকন্দীতে শ্রীনিবাস 'আচার্যের পরলোক গমন উপলক্ষে মহোৎসব হইয়া থাকে।

নরোত্তম ঠাকুর মহাশয় ।

গৌড়ীয় বৈষ্ণব মহাস্তমগণের মধ্যে নরোত্তম দাসের স্থান অতি উচ্চে । বৈষ্ণবগণ তাঁহাকে নিত্যানন্দের আবেশ অবতার বলিয়া বর্ণনা করিয়াছেন । শ্রীচৈতন্যদেব, নিত্যানন্দ, অদ্বৈতাচার্য্য এবং তাঁহাদের সমসাময়িকগণের তিরোভাবের পরে তিনজন ভক্ত তাঁহাদের প্রবর্তিত কার্য্য অক্ষুণ্ণ রাখিয়াছিলেন বলিয়া মনে হয় । এই তিন জনের নাম শ্রীনিবাসাচার্য্য, নরোত্তমদাস ঠাকুর মহাশয় ও শ্যামানন্দ । বৈষ্ণবেণ্ডা এই তিনজনকে যথাক্রমে শ্রীচৈতন্য, নিত্যানন্দ ও অদ্বৈতের আবেশ অবতার বলিয়া মনে করেন । নরোত্তম দাসের জন্ম স্থান বর্তমান রাজসাহী জেলার অন্তর্গত গড়ের হাট খেতরী গ্রাম । তাঁহার পিতা কৃষ্ণানন্দ দত্তকে গড়ের হাটের রাজা বলিয়া বর্ণনা করা হইয়াছে । তিনি মুসলমান বাদশাহের অধীনস্থ একজন বড় জমিদার ছিলেন বলিয়া মনে হয় । এক মাঘী পূর্ণিমার দিবস তাঁহার জন্ম হয় । কিন্তু কোন সালে তাহা জানিতে পারা যায় না । বৈষ্ণব গ্রন্থে বর্ণিত আছে যে শ্রীচৈতন্যদেব তাঁহার সন্ন্যাসের পর যখন বৃন্দাবন যাত্রা করিয়া , রামকেলি হইতে ফিরিয়া যান সেই সময়ে তিনি রামকেলি অবস্থান কালে খেতরির দিকে দৃষ্টিপাত করিয়া “নরোত্তম” “নরোত্তম” বলিয়া চীৎকার করিয়াছিলেন । বৈষ্ণবেণ্ডা মনে করেন শ্রীচৈতন্যদেবের আকর্ষণে নরোত্তম দাসের জন্ম হয় ।

এ সমুদয়ই পরবর্তীকালের বৈষ্ণবগণের কল্পনা । তবে ইহাতে নরোত্তমের মাছাওয়ার পরিচয় পাওয়া যায় । বাস্তবিকও নরোত্তম

উচ্চশ্রেণীর সাধক ও ভক্ত ছিলেন। রাজ ঐশ্বর্যের মধ্যে লালিত-পালিত হইলেও বাল্যকাল হইতে তাঁহার বিষয়ে বিরাগ দৃষ্ট হয়। বৈষ্ণবগ্রন্থে লিখিত হইয়াছে যে অন্নপ্রাশনের সময় তাঁহার মুখে অন্নপ্রদান করিতে গেলে তিনি তাহা গ্রহণ করিলেন না। তৎপরে দৈবজ্ঞের পরামর্শমত বিষ্ণুর ভোগ দিয়া তাঁহার মুখে অন্ন দেওয়া হইল তখন তিনি গ্রহণ করিলেন। এসব কথা কবিকল্পনা হইলেও অতি অল্প বয়সেই ধর্মে তাঁহার যে অনুরাগ হইয়াছিল তাহাতে সন্দেহ নাই। সেই সময়ে খেতরি গ্রামে কৃষ্ণদাস নামে একজন কৃষ্ণভক্ত ব্রাহ্মণ বাস করিতেন। সকলেই তাঁহাকে অতিশয় শ্রদ্ধা করিতেন। বালক তাঁহার প্রতি আকৃষ্ট হইয়া থাকিবেন। তিনি তাঁহার নিকটে শ্রীচৈতন্য ও তাঁহার সঙ্গীগণের অপূর্ব কাহিনী শ্রবণ করিয়া বৈষ্ণবধর্মের দিকে আকৃষ্ট হইলেন। ক্রমে তিনি বৈষ্ণব ভক্তগণের সঙ্গে সাক্ষাতের জন্য ব্যাকুল হইলেন; তাঁহার পিতা মাতা পুত্রের বৈরাগ্য দেখিয়া চিন্তিত হইলেন। তাঁহারা তাঁহাকে সংসারে আবদ্ধ রাখিবার জন্য বিবিধ উপায় অবলম্বন করিলেন। এমন কি তাঁহার জন্য প্রহরী নিযুক্ত হইল।

“এথা নরোত্তম প্রেমাবেশে সঙ্গোপনে ।

কৃষ্ণ আরাধয়ে অশ্রুধারা ছনয়নে ॥

নিরস্তুর পরম বৈরাগ্য ভাব চিতে ।

রাজভোগাদিক বার্তা না পারে সহিতে ॥

পুত্রের বৈরাগ্য ক্রিয়া দেখি ক্ষণে ক্ষণে ।

কৃষ্ণানন্দরায় মহা চিন্তা যুক্ত মনে ।

নরোত্তম বিনা কিছু নাহি ভয় আন ।

তৈছে মাতা নারায়ণী পুত্রগত প্রাণ ॥

সতত রক্ষক রাখিলেন পুত্র পাশে ।
তথাপি হ নিরন্তর চিন্তে শঙ্কাবেসে ॥”

নরোত্তম বিলাস, প্রথম বিলাস ।

নরোত্তম পিতৃগৃহ হইতে পলায়ন করিয়া বৈষ্ণবভক্তগণের সঙ্গে মিলিত হইবার সুযোগ খুঁজিতে লাগিলেন । যাহার হৃদয়ের গ্রাহি ছিন্ন হইয়াছে তাহাকে বাহিরের কোন্ বন্ধনে বাঁধিয়া রাখিবে ? কিছুদিন পরে নরোত্তমের পিতাকে রাজকার্য্যে একবার গোড়ে যাইতে হইল । সেই সুযোগে নরোত্তম প্রহরীদিগের চক্ষুতে ধূলি দিয়া গৃহ হইতে বহির্গত হইলেন । ছদ্মবেশ ধারণ করিয়া তিনি বৃন্দাবন অভিমুখে যাত্রা করিলেন । ধরা পড়িবার ভয়ে অথবা সন্ধান পাইয়া পিতামাতা ফিরাইয়া আনিবেন এই চিন্তা করিয়া তিনি নন্দীপ বা নিকটবর্তী অন্য কোনও স্থানে গেলেন না । এই সময়ে তাঁহার বয়স ঠিক কত তাহা জানিতে পারা যায় না । বোধ হয় ১৭।১৮ বৎসরের বেশী হইবে না । ইতিপূর্বেই তিনি গৃহে থাকিয়া দেশপ্রচলিত প্রথামত ব্যাকরণাদি পাঠ করিয়াছিলেন । তাঁহার পিতা বিবাহের জন্ত কন্যার সন্ধান করিতেছিলেন । সুতরাং অনুমান করা যাইতে পারে তখন তাঁহার বয়ঃক্রম ১৬ বৎসরের কম ছিল না । ধরা পড়িবার ভয়ে নরোত্তম বনপথে চলিতে লাগিলেন । ১৫ দিনের পথ অতিক্রম করিলে তাঁহার উদ্বিগ্ন কিছু কমিল ; তখন তিনি রাজপথ দিয়া চলিতে লাগিলেন, যে সকল স্থান দিয়া তিনি গমন করিয়াছিলেন সেখানকার লোকেরা তাঁহার অদ্ভুত ধর্ম্মভাব দেখিয়া বিস্মিত হইয়াছিল ।

“নরোত্তম নির্বিঘ্নে চলয়ে রাজপথে ।

জেছে প্রেম চেষ্টা তাহা কে পারে কহিতে ॥

নিরন্তর গাহেন প্রভুর গুণ গান ।
 নদীর প্রবাহ প্রায় ঝরে ছনমন ॥
 যে জন বারেক নরোত্তম পানে চায় ।
 সে হেন সংসার দুঃখ হইতে এড়ায় ॥
 যে গ্রামেতে নরোত্তম করয়ে রাত্রি বাস ।
 সে গ্রামে লোকের মনে বাঢ়য়ে উল্লাস ॥”

.. নরোত্তম বিলাস, প্রথম বিলাস ।

এইরূপে নরোত্তম অনেক তীর্থ ভ্রমণ করিয়া বৃন্দাবনে উপস্থিত হইলেন । তখন শ্রীজীব গোস্বামী বৃন্দাবনে বৈষ্ণবমণ্ডলীর নেতা ছিলেন । শ্রীনিবাসাচার্য্য ইতিপূর্বেই বৃন্দাবনে আসিয়াছিলেন । বৈষ্ণবমণ্ডলী নরোত্তমকে পাইয়া বিশেষ আনন্দিত হইলেন (এবং তাঁহার শিক্ষার ব্যবস্থা করিয়া দিলেন ।) তরুণ বয়সে তাঁহার এই বৈরাগ্য এবং ব্যাকুলতা দেখিয়া তাঁহারা যে মুগ্ধ হইবেন তাহা আর আশ্চর্য্য কি ?

“শ্রীজীব গোস্বামী তাঁরে ধরি করি কোলে ।

সিঞ্চিলা তাঁহার অঙ্গ নিজ নেত্র জলে ॥”

তিনি ক্রমে ক্রমে তাঁহাকে সকল বৈষ্ণবগণের সঙ্গে পরিচয় করাইয়া দিলেন । শ্রীনিবাসাচার্য্য যখন শুনিলেন যে গোড় হইতে অল্প বয়স্ক এক রাজকুমার আসিয়াছেন তখন স্বভাবতঃই তাঁহার অতিশয় আনন্দ হইল । অল্পদিনে উভয়ের মধ্যে গভীর বন্ধুত্ব জন্মিল । উভয়ের বয়স প্রায় সমানই হইবে সম্ভবতঃ শ্রীনিবাস কিছু জ্যেষ্ঠ ছিলেন । তাঁহাদের এই বন্ধুত্ব চিরস্থায়ী হইয়াছিল এবং উত্তরকালে উভয়েই একহৃদয় হইয়া গোড় দেশে ভক্তিদর্শন প্রচার করিয়াছিলেন ।

অতঃপর নরোত্তম বৃন্দাবনে থাকিয়া বৈষ্ণবধর্ম সাধন করিতে

আরম্ভ করিলেন। তিনি কতদিন বৃন্দাবনে অবস্থিতি করিয়াছিলেন তাহা ঠিক জানিতে পারা যায় না; সম্ভবতঃ বৎসরাধিক কাল হইবে। সে সময়ে বৃন্দাবন বৈষ্ণবদিগের প্রধান শিক্ষার স্থান হইয়া উঠিয়াছিল। নানা স্থান হইতে ব্যাকুল আত্মাগণ আসিয়া এখানে ভক্তিশাস্ত্র অধ্যয়ন করিতেন। শিক্ষা সমাপ্ত হইলে গোস্বামীগণ তাঁহাদিগকে যথাযোগ্য উপাধি প্রদান করিয়া স্ব স্ব কার্যক্ষেত্রে প্রেরণ করিতেন। শ্রীনিবাসাচার্য্য ইতিপূর্বেই আসিয়া ভক্তিশাস্ত্র অধ্যয়ন করিতে আরম্ভ করিয়াছিলেন। নরোত্তমেরও সেই প্রকার ভক্তিগ্রন্থ অধ্যয়নের ব্যবস্থা করা হইল। সম্ভবতঃ শ্রীনিবাসাচার্য্য ও নরোত্তম একত্র বাস ও অধ্যয়ন করিতেন। কিন্তু উভয়ের প্রকৃতিগত কিছু পার্থক্য ছিল। শ্রীনিবাসাচার্য্যের প্রকৃতি জ্ঞান-প্রধান, নরোত্তম ভক্তি-প্রধান। নরোত্তমের শিক্ষা শাস্ত্রাধ্যয়ন অপেক্ষা ভক্ত সঙ্গেই অধিক হইয়াছে। তখনও বৃন্দাবনে লোকনাথ, ভূগর্ভ, গোপাল ভট্ট, রঘুনাথ দাস প্রভৃতি ভক্তগণ জীবিত ছিলেন। নরোত্তম ইহাদের চরণতলে বসিয়া ভক্তিধর্ম সাধনে মনোনিবেশ করিয়াছিলেন। যথাসময়ে তিনি লোকনাথের নিকটে দীক্ষা গ্রহণ করেন। সম্ভবতঃ ভক্তগণের মধ্যে লোকনাথের জীবন ও চরিত্রেই তিনি সমধিক আকৃষ্ট হইয়াছিলেন। লোকনাথও নরোত্তমকে বিশেষ স্নেহের চক্ষে দেখিয়াছিলেন। সাধারণতঃ তিনি কাহাকেও দীক্ষা দিতেন না। কিন্তু নরোত্তমের সেবায় মুগ্ধ হইয়া তাঁহাকে শিষ্যত্বে গ্রহণ করিয়াছিলেন। নরোত্তম জীবনের শেষদিন পর্যন্ত তাঁহাকে গভীর ভক্তি করিতেন।

কিছুদিন পরে উড়িষ্যা হইতে শ্যামানন্দ বৃন্দাবনে সমাগত হন। শ্রীনিবাস ও নরোত্তমের সঙ্গে তাঁহার শিক্ষা ও সাধনের ব্যবস্থা হয় এবং ক্রমে তাঁহাদের সঙ্গে তাঁহার গাঢ় যোগ সংস্থাপিত হয়। শিক্ষা

সমাপনাস্তে বৃন্দাবনের গোস্বামিগণ নরোত্তমকে ঠাকুর মহাশয় উপাধি প্রদান করেন এবং শ্রীনিবাস ও শ্যামানন্দের সহিত তাঁহাকে স্বদেশে প্রেরণ করেন। তাঁহাদের প্রত্যাগমনবৃত্তান্ত শ্রীনিবাসাচার্যের জীবনীগ্রন্থে লিখিত হইয়াছে। পথে বনবিষ্ণুপুরের নিকটে গ্রন্থ চুরি হইলে শ্রীনিবাস অপহৃত গ্রন্থের সন্ধানে সেখানে রহিয়া গেলেন এবং নরোত্তম ও শ্যামানন্দকে স্ব স্ব গৃহে যাইতে বলিলেন। নিতান্ত অনিচ্ছা সত্ত্বেও তাঁহার আদেশ অনুসারে নরোত্তম শ্যামানন্দকে সঙ্গে লইয়া খেতরিতে আসিলেন। তাঁহার প্রত্যাবর্তনে সেখানে মহানন্দের স্রোত বহিল। তাঁহার পিতা মাতা তাঁহাকে হারাইয়া গভীর শোকে মুহমান ছিলেন। এ পর্য্যন্ত তাঁহারা নরোত্তমের কোন সন্ধান পাইয়াছিলেন বলিয়া মনে হয় না। নরোত্তম তাঁহাদের একমাত্র পুত্র। দীর্ঘকাল পরে নিক্দেশপুত্রের প্রত্যাবর্তনে পিতামাতা আত্মীয়স্বজনের মনের অবস্থা কিরূপ হইয়াছিল তাহা সহজেই অনুমান করিতে পারা যায়। খেতরিতে মহা আনন্দের তরঙ্গ উঠিল, কিন্তু একটি কারণে তাঁহাদের সেই আনন্দ নিরানন্দে পরিণত হইল। পুত্রের প্রত্যাগমনে পিতামাতার আশা হইয়াছিল যে তিনি তাঁহাদের অতুল ঐশ্বর্যের উত্তরাধিকারী হইবেন; কিন্তু নরোত্তম সবিনয়ে অথচ দৃঢ়তার সহিত জানাইলেন যে তিনি আর বিষয়ে লিপ্ত হইবেন না। যদি তাঁহারা ইচ্ছা করেন তাহা হইলে তিনি খেতরিতেই অবস্থিতি করিবেন। কিন্তু তিনি চিরকৌমার্যব্রত অবলম্বন করিয়াছেন। দারপরিগ্রহ করিবেন না, এবং রাজপ্রাসাদে ভোগবিলাসের মধ্যে থাকিবেন না। তাঁহার জন্ম পৃথক একখানি কুটির নির্মাণ করিয়া দিতে হইবে, সেখানে থাকিয়া একাগ্রে তিনি ধর্ম সাধন করিবেন। পিতামাতা অগত্যা তাহাতেই সম্মত হইলেন। তাঁহার বৈরাগ্য ও ভক্তি দেখিয়া

দেশবাসী সকলেই মন গভীর শ্রদ্ধায় পূর্ণ হইল। সম্ভবতঃ ইতি-পূর্বেই তাঁহার পিতা ভ্রাতৃপুত্র সন্তোষ দত্তের উপরে বিষয় কার্যের ভার অর্পণ করিয়াছিলেন। অস্ততঃ এখন হইতে তিনি বিষয়কার্যের ভার পাইয়াছিলেন। নরোত্তম বিষয় হইতে সম্পূর্ণ নির্লিপ্ত হইলেও সন্তোষ দত্ত এবং অপর সকলেই চিরদিনই তাঁহার সকল ইচ্ছা পূর্ণ করিতে ব্যগ্র থাকিতেন।

নরোত্তম কিছুদিন পিতামাতার নিকটে খেতরিতে বাস করিয়া শ্রীচৈতন্যের জন্মস্থান নবদ্বীপ দর্শনে যাত্রা করিলেন। ইতিপূর্বে গোড়ীয় বৈষ্ণবমণ্ডলীর সঙ্গে তাঁহার কোন পরিচয়ই হয় নাই; অস্তরে ধর্মভাব উদ্দীপ্ত হইবার পরেই তিনি বৃন্দাবনে গমন করিয়াছিলেন। বঙ্গদেশে প্রত্যাগমন করিয়া স্বভাবতঃই গোড়ীয় ভক্তগণ ও বৈষ্ণব-ধর্মের কেন্দ্রগুলি দর্শন করিতে ব্যগ্র হইলেন। পিতা মাতার অনুমতি লইয়া সর্বপ্রথমে তিনি নবদ্বীপ গমন করিলেন। শ্রীচৈতন্যদেবের সমসাময়িক ভক্তগণের মধ্যে অনেকেই ইতিপূর্বে পরলোকগমন করিয়াছিলেন। ব্রহ্মচারী শুক্লাচর ও দামোদর পণ্ডিত তখনও জীবিত ছিলেন। তাঁহারা তাঁহাকে বহু সমাদরে গ্রহণ করেন। সম্ভবতঃ ইতিপূর্বেই তাঁহারা নরোত্তমের বৈরাগ্য ও ভক্তির কথা শুনিয়াছিলেন। নরোত্তমকে দেখিয়া তাঁহারা অতিশয় সুখী হইলেন। নরোত্তম ও তাঁহাদের দর্শনে পরমানন্দিত হইলেন। শ্রীচৈতন্যদেবও তাঁহার অগ্ণাণ সঙ্গীগণের দর্শনের সৌভাগ্য হয় নাই। বলিয়া তিনি অনেক আক্ষেপ করিতে লাগিলেন। ভক্ত নরোত্তমের জীবনের এই এক মহা-খেদ ছিল।

কিছুদিন নবদ্বীপে ভক্তগণের সঙ্গে বাস করিয়া ঠাকুর মহাশয় অষ্টৈতাচার্যের বাসস্থান শান্তিপুর গমন করিলেন। সেখানে আচার্যের

পুত্র অচ্যুতানন্দের সঙ্গে সাক্ষাৎ হয়। তথা হইতে নীলাচলাভিমুখে অগ্রসর হইলেন। পথে অধিকানগরীতে কয়েকদিন অবস্থান করিয়াছিলেন। সেই সময়ে অধিকা বৈষ্ণবধর্মের অন্যতম কেন্দ্র হইয়া উঠিয়াছিল।

এখানে পণ্ডিত গৌরীদাস, শ্রীচৈতন্যদেব ও নিত্যানন্দের প্রতিমূর্তি নির্মাণ করিয়া একটি মন্দির প্রতিষ্ঠা ও নিত্য পূজাদির ব্যবস্থা করিয়াছিলেন। এই সময়ে শ্রীহৃদয়চৈতন্য এই মন্দিরের মহাস্ত ছিলেন। হরিনদী গ্রামের নিকট গঙ্গা পার হইয়া নরোত্তম পথের লোকদিগকে অধিকা কতদূর এবং শ্রীচৈতন্য ঠাকুর কোথায় থাকেন জিজ্ঞাসা করিলেন। পথের লোকেরা বলিল আর অল্পদূরেই অধিকা। তাহাদের মধ্যে একজন অগ্রে আসিয়া হৃদয়চৈতন্য ঠাকুরকে সংবাদ দিল যে এক অপূর্ব ভক্তস্বরূপক তাঁহার নিকটে আসিতেছেন।

“দেখিল আশ্চর্য্য এক পুরুষ সুন্দর।

গৌর নিত্যানন্দ প্রেমে পূর্ণ কলেবর ॥”

আসিবেন এথা পথ জিজ্ঞাসা করিতে।

কত ধারা বহে নেত্রে না পারে চলিতে ॥”

শ্রীহৃদয়চৈতন্য ঠাকুর আগ্রহে বহির্দ্বারে আসিতেই নরোত্তমকে দেখিতে পাইলেন এবং দুই বাছ প্রসারণ করিয়া তাঁহাকে আলিঙ্গন করিলেন। শ্যামানন্দের নিকটে তিনি ইতিপূর্বেই নরোত্তমের কথা শুনিয়া থাকিবেন। শ্রীহৃদয়চৈতন্য শ্যামানন্দের গুরু ছিলেন, বৃন্দাবন হইতে উৎকল প্রত্যাবর্তনের পথে শ্যামানন্দ কয়েকদিন অধিকায় অবস্থিতি করিয়াছিলেন। নরোত্তমের অদ্ভুত ভক্তি দেখিয়া অধিকায় ভাগবতগণ মুগ্ধ হইলেন। হৃদয়চৈতন্য পরম যত্নে নরোত্তমকে অধিকায় রাখিয়া শীঘ্র নীলাচল যাইতে উপদেশ দিয়া বিদায় করিলেন। নরোত্তম

অধিকা হইতে খড়দহে গমন করলেন। খড়দহে মহেশ পণ্ডিত প্রভৃতি বহু ভাগবতের সহিত সাক্ষাৎ হইল। নিত্যানন্দের বিধবাস্থয় শ্রীবসু ও জাহ্নবী তাঁহার আগমন সংবাদ পাইয়া তাঁহাকে 'অস্তঃপুরে ডাকিয়া পাঠাইলেন। নরোত্তম তাঁহাদিগকে দর্শন করিয়া আপনাকে কৃতার্থ মনে করিলেন। সেখানে নিত্যানন্দের পুত্র বীরচন্দ্রের সহিতও তাঁহার সাক্ষাৎ হয়। চারিদিন খড়দহে অবস্থান করিয়া নরোত্তম নীলাচলাভিমুখে অগ্রসর হইলেন। পথে যে সমুদয় ভক্তের সন্ধান পাইলেন তাঁহাদের সঙ্গে সাক্ষাৎ করিলেন। এখান হইতে শ্রীচৈতন্যদেব যে পথ দিয়া নীলাচলে গিয়াছিলেন সেই পথ ধরিয়া নরোত্তম নীলাচলের দিকে অগ্রসর হইলেন। পথে যে যে স্থানে চৈতন্যদেব বিশ্রাম করিতেন নরোত্তমও সেই সেই স্থানে বিশ্রাম করিলেন। যাহারা শ্রীচৈতন্যকে দেখিয়াছেন অনুসন্ধান করিয়া তাঁহাদের শিকটে তাঁহার বিবরণ শুনিলেন। যথাসময়ে নরোত্তম নীলাচলে পৌঁছিয়া চৈতন্যদেব ও তাঁহার ভক্তগণের লীলাস্থল দেখিয়া পরম প্রীত হইলেন। তখন নীলাচলে চৈতন্যদেবের সঙ্গী অধিকাংশই পবলোকগমন করিয়াছেন। কেবলমাত্র গোপীনাথ আচার্য্য, শিখি মাইতি, কানাই খুঁটিয়া প্রভৃতি কয়েকজন জীবিত ছিলেন। তাঁহারা নরোত্তমকে পরম সমাদরে অভ্যর্থনা করিলেন। গোপীনাথমন্দিরে বৃদ্ধ বৈষ্ণব মাথু গৌসাইর সহিতও তাঁহার সাক্ষাৎ হয়। কিছুদিন নীলাচলে থাকিয়া জগন্নাথ প্রভৃতি দর্শনকরতঃ নরোত্তম গোড়ে ফিরেন। পথে বৃন্দাবনের সঙ্গী শ্যামানন্দকে দেখিবার জন্ত নৃসিংহপুরে গমন করিলেন। শ্যামানন্দ ও তাঁহার শিষ্যগণ নরোত্তমকে পাইয়া পরম আনন্দিত হন। দুই একদিন নৃসিংহপুরে অবস্থান করিয়া নরোত্তম গোড়ে যাত্রা করিলেন।

গোড়ে পৌছিয়া নরোত্তমদাস সর্বপ্রথমে শীখণ্ডে যান। সেখানে প্রবীন বৈষ্ণব নরহরি সরকারের সহিত তাঁহার সাক্ষাৎ হইল। নরহরি দাস তখন অতিশয় বৃদ্ধ হইয়াছেন; তিনিও তাঁহার সঙ্গী রঘুনন্দন নরোত্তমকে পাইয়া অতিশয় প্রীত হইলেন। নরোত্তমও তাঁহাদিগকে দেখিয়া আপনাকে ধন্য মনে করিলেন। নরহরি দাস শীখণ্ডে শ্রীচৈতন্যের বিগ্রহ স্থাপন করিয়া তাহার সেবা করিতেন। সেখানে এক রাত্রি বাস করিয়া নরোত্তম দাস যাজগ্রামে গমন করেন। তথায় বহুদিন পরে শ্রীনিবাস সহ মিলনে উভয়ের পরম আনন্দ হইল। বৃন্দাবন হইতে ফিরিবার পথে বিষ্ণুপুরের সন্নিকটে গ্রন্থচুরির পর তাঁহারা পরস্পরের নিকট বিদায় গ্রহণ করিয়াছিলেন। তাহার পরে এই প্রথম সাক্ষাৎ। শ্রীনিবাস আচার্য্য যাজগ্রামে ফিরিয়া ভক্তিশাস্ত্র অধ্যাপনা করিতেছিলেন। বহু শিষ্য তাঁহার নিকট ভক্তিগন্থ অধ্যয়নের জন্ত আসিতেন নরোত্তম তাহা দেখিয়া পরম প্রীত হইলেন। যাজগ্রামে দুই একদিন অবস্থান করিয়া নরোত্তম কাটোয়া যান। সেখানে শ্রীচৈতন্যের সন্ন্যাস গ্রহণের স্থানে দাস গদাধর একটি গৌরান্দ বিগ্রহ স্থাপন করিয়াছিলেন। গদাধর তখনও জীবিত ছিলেন। কিন্তু শরীর অতিশয় জীর্ণ। তাঁহার সহযোগী যদুনন্দন চক্রবর্তী নরোত্তমকে পরম সমাদরে অভ্যর্থনা করেন। ঠাকুর মহাশয় অবসরমতে গদাধর দাসের সহিত সাক্ষাৎ করেন। কাটোয়ায় শ্রীচৈতন্যের কেশদুগুনের স্থান, কেশব ভারতীর সমাধি প্রভৃতি দর্শন করিয়া নরোত্তম পরদিন প্রভাতে শ্রীপাদ নিত্যানন্দের জন্মস্থান একচক্রার অভিমুখে অগ্রসর হন। একচক্রার সে সময়ে দৈন্যদশা হইয়াছিল। তথায় পৌছিয়া একজন বৃদ্ধ ব্রাহ্মণের সহিত নরোত্তমের সাক্ষাৎ হয়। তিনি সযত্নে নরোত্তমকে নিত্যানন্দের জন্মস্থান, ক্রীড়াভূমি প্রভৃতি দেখাইলেন।

ভক্ত গ্রন্থকার লিখিয়াছেন স্বয়ং নিত্যানন্দ বৃদ্ধ ব্রাহ্মণবেশে নরোত্তমের নিকট উপস্থিত হইয়াছিলেন।

একচক্রা হইতে নরোত্তম, খেতরি ফিরিয়া আসিলেন। আত্মীয় স্বজন গ্রামবাসীগণ তাঁহাকে পাইয়া পরম অনিন্দিত হইল। এখন হইতে নরোত্তম খেতরি থাকিয়া ভক্তিধর্ম সাধনে মনোনিবেশ করিলেন। এই সময়ে সঙ্কীর্্তনকে লইয়া তিনি সঙ্কীর্্তনের দল গঠন করেন। নরোত্তম অতি সুগায়ক ছিলেন। সঙ্কীর্্তনবিদ্যা তিনি যথেষ্ট দাৎপত্রিলাভ করিয়াছিলেন। ভক্তিতে পূর্ণ হইয়া তিনি যখন সঙ্কীর্্তন করিতেন তখন মধু ক্ষরিত হইত। তাঁহার সঙ্কীর্্তনে লোক মুগ্ধ হইয়া যাইত। তিনি একটি নূতন সুর আবিষ্কার করিয়াছিলেন। তাহা গরানহাটা নামে বিখ্যাত। এখন হইতে বহু ভক্তিপিপাসু লোক নরোত্তমের নিকট মন্ত্রদীক্ষা গ্রহণ করিতে লাগিলেন। নরোত্তমের খুল্লতাত পুত্র সন্তোষ দত্ত তাঁহাদের মধ্যে একজন প্রথম ও প্রধান। নরোত্তম দারপরিগ্রহ না করিয়া সন্ন্যাস ব্রত গ্রহণের সকল জানাইলে, তাঁহার পিতা কৃষ্ণানন্দ দত্ত স্বীয় ভ্রাতৃপুত্র সন্তোষকে যৌবরাজ্যে অভিষিক্ত করেন। সন্তোষ ক্রমে নরোত্তমের পরম অমুরাগী ভক্ত হন। নরোত্তমের আকাজক্ষা পূর্ণ করিবার জন্ত তিনি অকাতরে অর্থ ব্যয় করিতেন। এই সময়ে বলরাম মিশ্র নামক একজন ব্রাহ্মণ যুবক নরোত্তমের নিকটে দীক্ষা গ্রহণ করেন। নরোত্তম শূদ্র। ব্রাহ্মণকে দীক্ষা দিবার জন্ত বলরাম মিশ্র ও নরোত্তমের উপর নানাপ্রকার সামাজিক উৎপীড়ন হইয়াছিল, কিন্তু তাহাতে তাঁহারা বিচলিত হন নাই।

অধিকা শ্রীখণ্ড কাটোয়া প্রভৃতি স্থানে শ্রীচৈতন্যের বিগ্রহ দেখিয়া খেতরিতে সে প্রকার বিগ্রহ স্থাপনের জন্ত নরোত্তমের ইচ্ছা হয়।

নরোত্তমের জীবন-চরিত প্রণেতা নরহরি চক্রবর্তী লিখিয়াছেন যে এক রাত্রিতে শ্রীচৈতন্য খপ্পে প্রকাশিত হইয়া বলেন তাঁহাদের এক ধনী প্রজার ধানের গোলায় তাঁহার মূর্তি আছে। সর্পের ভয়ে সেখানে কেহ যাইতে সাহস করেন না। সেখানে গিয়া মূর্তি আনয়ন করিয়া তাহা স্থাপন করিতে নরোত্তমের প্রতি আদেশ হয়। নরোত্তম তাহাই করিলেন। কিন্তু প্রেমবিলাস রচয়িতা বলরাম দাস বা নিত্যানন্দ দাস লিখিয়াছেন “নরোত্তম কর্ণরকর আনাইয়া ‘প্রিয়াসহ’ চৈতন্যদেবের মূর্তি নির্মাণ করেন। বলরাম দাস প্রাচীন গ্রন্থকার; নরোত্তমের সমসাময়িক। সম্ভবতঃ চৈতন্যবিগ্রহস্থাপন মহোৎসবের সময়ে তিনি খেতরিতে উপস্থিত ছিলেন। নিত্যানন্দপত্নী জাহ্নবী দেবী তাঁহাকে বৈষ্ণবধর্মে দীক্ষিত করেন এবং নিত্যানন্দের পুত্র বীরচন্দ্র তাঁহার শিক্ষাগুরু। খেতরীর মহোৎসব অন্তে বলরাম দাস জাহ্নবী দেবীর সঙ্গে বৃন্দাবন গমন করেন। সুতরাং তাঁহার বিবরণই অধিক বিশ্বাসযোগ্য।

মূর্তি প্রস্তুত হইলে নরোত্তম তাহার প্রতিষ্ঠার আয়োজন করিতে লাগিলেন। খেতরির ইতিহাসে ইহা এক বৃহৎ ব্যাপার। নরোত্তমের পিতার অগাধ সম্পত্তি। সম্ভবতঃ ইতিপূর্বে তিনি পরলোক গমন করিয়াছিলেন। নরোত্তম বিলাসে এ সময়ে রাজা কৃষ্ণানন্দ দত্তের নাম উল্লেখ আর দেখা যায় না। তৎপরিবর্তে সন্তোষ দত্ত সমুদয় আয়োজন করিয়াছিলেন বলিয়া উল্লিখিত আছে। যিনি হউন এই মহোৎসবে খেতরি রাজকোষের অর্থ অকাতরে ব্যয় করিয়াছিলেন। নরোত্তমের ইচ্ছানুসারে সমুদয় কার্য নির্বাহিত হইয়াছিল। তাঁহার বন্ধু শ্রীনিবাস আচার্য্য প্রধান মন্ত্রী। নরোত্তম প্রতিষ্ঠাকার্যের ভার তাঁহার উপর দিয়াছিলেন। শ্রীনিবাস আচার্য্য কিছুদিন পূর্বে হইতেই

খেতরিতে আসিয়া সমুদয় কার্যের তত্ত্বাবধানের ভার লন। নরোত্তমের বৃন্দাবনের বন্ধু শ্রামানন্দ ও এতদুপলক্ষে সশিষ্য উৎকল হইতে আসিয়া উৎসবের কার্যে সাহায্য করেন। গোড়দেশের সকল প্রধান প্রধান বৈষ্ণব এই মহোৎসবে নিমন্ত্রিত হইয়া আগমন করিয়াছিলেন। খড়দহ হইতে নিত্যানন্দপত্নী জাহ্নবী দেবী, শান্তিপুর হইতে অষ্টমত আচার্যের পুত্র অচ্যুতানন্দ ও গোপাল মিশ্র, শ্রীবাস আচার্যের ভ্রাতা শ্রীপতি ও শ্রীনিধি, অম্বিকা হইতে হৃদয়চৈতন্যপ্রমুখ প্রাচীন মহাস্তগণ এই উৎসব উপলক্ষে খেতরি আসিয়াছিলেন। অপেক্ষাকৃত নিকটবর্তী কাটোয়া, ষাজপুর, শ্রীখণ্ড, বুধরি, কাঞ্চনগড়িয়া প্রভৃতি স্থান হইতে বহু বৈষ্ণবের সমাগম হইয়াছিল। এই সকল বৈষ্ণবসমাগমে কয়েকদিন খেতরিতে প্রেম ও আনন্দের লহরী উঠিয়াছিল। খেতরি ও নিকটবর্তী গ্রাম সমূহের লোকেরা এই আনন্দ তরঙ্গে মাতিয়া ছিল। বোধ হয় বৈষ্ণব ইতিহাসে এত বড় মহোৎসব আর হয় নাই।

ফাল্গুন মাসের শুক্লাপূর্ণিমাঘ শ্রীচৈতন্যদেবের জন্মতিথিতে খেতুরির বিগ্রহ প্রতিষ্ঠা হয়। শুক্লা পঞ্চমী হইতে মঙ্গলবাদ্য সহকারে উৎসবের সূচনা হয়। রামচন্দ্র কবিরাজ, শ্রীদাস গোকুলানন্দ, গোবিন্দ কবিরাজ প্রমুখ শ্রীনিবাস আচার্যের শিষ্যগণ ইতিপূর্বেই ষাজগ্রাম, বুধরি কাঞ্চনগড়িয়া হইতে তথায় আগমন করেন। বলরাম মিশ্র প্রভৃতি নরোত্তমের শিষ্যগণের সহিত তাঁহাদের উপরে নিমন্ত্রিত মহাআগণের তত্ত্বাবধান ও পরিচর্যার ভার অর্পিত হয়। অতিথিগণের বাসস্থানের জন্ত অনেক নূতন গৃহ নিম্মিত হইয়াছিল। নানাস্থান হইতে বৈষ্ণবগণ যেমন আসিতে লাগিলেন, তাহাদের নির্দিষ্ট বাসগৃহে স্থান দিয়া এক এক জন লোকের উপরে তাঁহাদের পরিচর্যার ভার দেওয়া হইল। এইরূপে বৈষ্ণবগণসহ জাহ্নবীদেবীর তত্ত্বাবধানের ভার রামচন্দ্র কবিরাজের উপর,

শ্রীপতি ও শ্রীনিধির ভার, শ্রীবাসি আচার্যের উপর, অম্বিকার মহাস্ত-
 হৃদয়চৈতন্যের ভার শ্যামানন্দের উপর, শ্রীখণ্ডের রঘুনন্দনের ভার গোবিন্দ
 কবিরাজের উপর, কাটোয়ার রঘুনন্দনের ভার ভগবান কবিরাজের উপর,
 আকাই হাটের কৃষ্ণদাস প্রভৃতির ভার বল্লভীকান্তের উপর, শ্রীচৈতন্য দাস
 প্রভৃতির ভার শ্রীনৃসিংহ কবিরাজের উপর, রঘুনাথ আচার্যাদির ভার কবি
 কণ্ঠপুরের উপর অর্পিত হইল। স্বয়ং শ্রীনিবাস আচার্য প্রত্যেক বাসায়
 গমন করিয়া বৈষ্ণবগণের তত্ত্বাবধান করিতে লাগিলেন। জাহ্নবীদেবীর
 আসিতে বিলম্ব হইয়াছিল। তিনি পথে সপ্তগ্রাম, শাস্তিপুর, অম্বিকা,
 নবদ্বীপ, আকাইহাটা প্রভৃতি স্থান হইয়া আসিয়াছিলেন। তাঁহার নিকট
 খেতরির মহোৎসবের সংবাদ পাওয়া ঐ সকল স্থান হইতে বহুসংখ্যক
 বৈষ্ণব মহোৎসবে যোগ দিতে খেতরি গমন করেন। নরোত্তম দাস ও
 তাঁহার ভ্রাতা সন্তোষ দত্ত বহু সম্মানে সকলকে গ্রহণ করেন। তাঁহারা
 সমাগত মহাস্তগণকে নববস্ত্রাদি উপহার প্রদান করিলেন। ফাল্গুনী
 পূর্ণিমার দিন সকলে অতি প্রত্যাষে স্নানাদি সমাপন করিয়া নববস্ত্র
 পরিধান করিলেন। শ্রীনিবাস আচার্য সর্বাগ্রে জাহ্নবী দেবী ও তৎপরে
 অন্যান্য মহাস্তগণকে উৎসব প্রাঙ্গণে আগমনের জন্ত নিমন্ত্রণ করিলেন।
 সুবিস্তৃত উৎসব প্রাঙ্গণ বহুমূল্য চন্দ্রাতপ, নারিকেল, কদলীবৃক্ষ বিবিধ
 লতা ও পুষ্প পূর্বেই সুসজ্জিত হইয়াছিল। মন্দির সম্মুখে মহাস্তগণের
 জন্ত আসন ছিল। তাঁহারা যথাসময়ে আসিয়া নির্দিষ্ট আসনে বসিলেন।
 জাহ্নবী দেবীর জন্ত এক পার্শ্বে নিভূতে স্থান করা হইয়াছিল। তাঁহার
 ও অন্যান্য মহাস্তগণের অনুমতি লইয়া শ্রীনিবাস আচার্য গভীর শ্রদ্ধা ও
 ভক্তিসহকারে বিগ্রহ প্রতিষ্ঠিত করিতে অগ্রসর হন। পৃথক পৃথক
 সিংহাসনে ছয়টি মূর্তি স্থাপিত হইয়াছিল। বিগ্রহগুলির নাম রাখা
 হইল শ্রীগৌরানন্দ, বল্লভীকান্ত, শ্রীব্রজমোহন, শ্রীকৃষ্ণ, শ্রীরাধাকান্ত, শ্রীরাধা-

রমণ। ইহাদের মধ্যে শ্রীগোবিন্দই প্রধান। গৌরাক্ষের সঙ্গে লক্ষী বিষ্ণুপ্রিয়ার মূর্তিও ছিল। শ্রীনিবাস আচার্য্য ত্রিগ্রহগণের অভিষেকান্তে সে গুলিকে রত্নাবরণে সজ্জিত করেন। রূপ গোস্বামী প্রণীত প্রণালী অনুসারে অভিষেক ক্রিয়া সম্পন্ন হয়। অভিষেকান্তে শ্রীনিবাস আচার্য্য ত্রিগ্রহগণের আরতি করেন। তৎপরে বিবিধ ভোজ্য দ্রব্যের দ্বারা ভোগ দেওয়া হয়। এই সকল সমাপ্ত হইলে মহাস্তম্ভগণের আদেশ অনুসারে সঙ্কীৰ্ত্তন আরম্ভ হয়। নরোত্তম তাঁহার সঙ্গীগণের সহিত মিলিত হইয়া সঙ্কীৰ্ত্তন করেন। সেদিনকার সঙ্কীৰ্ত্তন প্রাণস্পর্শী হইয়া ছিল। নরোত্তম ও তাঁহার সঙ্গীগণের অপূৰ্ণ স্থলমিত কণ্ঠস্বর, দেবী দাসের খোলবাদ্য, নানা স্থানের ভক্তগণের সমাবেশ এই সব মিলিয়া সেদিন নব মন্দির প্রাঙ্গণে অপূৰ্ণ ভাবের তরঙ্গ উঠিয়াছিল। ভক্তগণ ভাবে মত্ত হইয়া নৃত্য করিতে লাগিলেন, যেন নুবদীপের শ্রীবাসপ্রাঙ্গণে শ্রীচৈতন্যের সঙ্কীৰ্ত্তন। ভাবুক ভক্তগণ কল্পনায় মনে করিলেন শ্রীচৈতন্য নিত্যানন্দ অষ্টৈতাচার্য্য গদাধর প্রভৃতি ভক্তগণের সঙ্গে সেখানে নৃত্য করিতেছেন। এইরূপে বহুক্ষণ পর্য্যন্ত সঙ্কীৰ্ত্তন ও নৃত্য চলিল। তৎপরে কাণ্ডখেলা আরম্ভ হইল। মহাস্তম্ভগণ আবির লইয়া বিগ্রহ ও পরম্পরের অঙ্গে জড়াইয়া দিলেন। সে আর এক আনন্দের তরঙ্গ। সন্ধ্যাকালে পুনরায় আরতি ও তৎপরে শ্রীচৈতন্যের জন্মলীলার উৎসব হইল। এই প্রকারে সারাদিন উৎসব চলিল। অনেক রাত্রিতে সকলে শয়ন করিয়া বিশ্রাম করিলেন। পরদিন জাহ্নবী দেবী স্বহস্তে রন্ধন করিয়া মহাস্তম্ভগণকে ভোজন করাইতে ইচ্ছা করিলেন। যথা সময়ে বিবিধ অন্ন ব্যঞ্জন প্রস্তুত হইল। মধ্যাহ্নে মহাস্তম্ভগণকে গৌরাক্ষপ্রাঙ্গণে সারি সারি বসান হইল। জাহ্নবী দেবী স্বহস্তে পরিবেশন করিলেন। সকলের আহাৰান্তে তিনি আহাৰ করিলেন। ভক্তগণ আরও একদিন

খেতরিতে অবস্থান করিয়াছিলেন। সেদিন তাঁহাদের স্ব স্ব বাসায় আহারাদির আয়োজন হইয়াছিল। সন্তোষ দত্ত তাঁহাদের প্রত্যেককে নব বস্ত্র মুদ্রাদি উপঢৌকন দিয়া সর্ষদ্বনা করিলেন। সন্ধ্যাকালে গৌরান্ধ্র-প্রাঙ্গণে পুনরায় সঙ্কীৰ্ত্তন হইল। পরদিন প্রাতঃকালে বৈষ্ণবগণের খেতরি পরিত্যাগের সময় স্থির হইয়াছিল। আসন্ন বিচ্ছেদের জ্ঞান ভক্তগণের হৃদয় বিষাদে ভারাক্রান্ত। সঙ্কীৰ্ত্তনান্তে বৈষ্ণবগণ স্ব স্ব বাসায় প্রত্যাগমন করিয়া বিশ্রাম করিলেন। পরদিন প্রত্যুষে তাঁহারা যাইবার জ্ঞান প্রস্তুত হইলেন। ভক্তমণ্ডলীতে ক্রন্দনের রোল উঠিল। বৈষ্ণবগণ অবশেষে ব্যক্তিগত অন্তরে পরম্পরের নিকট হইতে বিদায় গ্রহণ করিলেন। সন্তোষ দত্তের আজ্ঞানুসারে পূর্বেই পদ্মা পার হইবার জ্ঞান নৌকা প্রস্তুত ছিল। পদ্মা পার হইয়া বৈষ্ণবগণ অপরপারে স্থান করিলেন। তাঁহাদের জলযোগের জ্ঞান পূর্বেই সেখানে মিষ্টান্নাদি প্রেরিত হইয়াছিল। জলযোগান্তে বৈষ্ণবগণ যাত্রা করিলেন। বুধরি গ্রামে সেদিনও মধ্যাহ্ন ভোজনের আয়োজন হইয়াছিল। বুধরি হইতে বৈষ্ণবগণ স্ব স্ব গন্তব্যপথে অগ্রসর হইলেন। এইরূপে খেতরির বিগ্রহ প্রতিষ্ঠা উৎসব সম্পন্ন হয়। জাহ্নবীদেবী আর দুইদিন খেতরি থাকিয়া তথা হইতে বৃন্দাবন যাত্রা করিলেন। শ্রীনিবাস আচাৰ্য্য শ্রামানন্দপ্রমুখ নরোত্তম ঠানুরের অন্তরঙ্গ সঙ্গীগণ আরও কয়েকদিন তথায় অবস্থান করিয়া স্ব স্ব স্থানে প্রস্থান করিলেন। কেবলমাত্র রামচন্দ্র কবিরাজ নরোত্তমের সঙ্গে খেতরি রহিলেন।

এখন হইতে রামচন্দ্র কবিরাজ খেতরিতেই বাস করিতে লাগিলেন। তিনি বিবাহিত ছিলেন। কিন্তু রামচন্দ্র স্ত্রীকে দেখিতে চাহিতেন না। নরোত্তম দাসের সহিত খেতরিতে সাধন ভজনে জীবনের অবশিষ্টাংশ^১ অতিবাহিত করিয়াছিলেন। ইহাতে তাঁহার

গোয়াস নামক গ্রামে এক সম্ভ্রান্ত ব্রাহ্মণবংশে তাঁহাদের জন্ম। তাঁহাদের পিতার নাম শিবাই আচার্য্য। তিনি শাক্তধর্মাবলম্বী সঙ্গতিপন্ন গৃহস্থ ছিলেন। প্রতি বৎসর মহা ধুমধামে তাঁহার গৃহে দুর্গাপূজা হইত। এ যাত্রা পূজায় বলিদানের জন্ত দুই ভাই ছাগ মহিষাদি ক্রয় করিতে পদ্মাপার আসিয়াছিলেন। খেতরিব ঘাটে নরোত্তম ও রামচন্দ্রের সহিত তাঁহাদের সাক্ষাৎ হয়। ভক্তদ্বয় ধর্মপ্রসঙ্গ করিতে করিতে স্নানে যাইতেছিলেন। হরিরাম ও রামকৃষ্ণ তাঁহাদের প্রসঙ্গ শ্রবণে মুগ্ধ হন এবং ছাগমহিষাদি ছাড়িয়া দিয়া নরোত্তমের নিকট ভক্তিধর্মের উপদেশ গ্রহণ করেন। নরোত্তম সাদরে তাঁহাদিগকে গৃহে আনিয়া উপদেশ দেন। ক্রমে দুই ভ্রাতা ভক্তিধর্মে দীক্ষার জন্ত ব্যগ্র হইলেন। তাঁহাদের নির্বন্ধাতিশয়ে নরোত্তম রামকৃষ্ণকে এবং রামচন্দ্র হরিরামকে ভক্তিধর্মে দীক্ষা দেন। কয়েকদিন খেতরিতে অবস্থান করিয়া হরিরাম ও রামকৃষ্ণ গৃহে প্রত্যাগমন করেন। তাঁহাদের পিতা বৈষ্ণবধর্মে দীক্ষার কথা শ্রবণকরতঃ ক্রোধাক্ত হইয়া পুত্রদ্বয়কে বহু তিরস্কার করিলেন, ব্রাহ্মণসম্ভান হইয়া শূত্রের নিকটে দীক্ষা গ্রহণের জন্ত শিবাই আচার্য্য এবং স্থানীয় পণ্ডিতগণ বিশেষ ক্রুদ্ধ হইয়াছিলেন। হরিরাম ও রামকৃষ্ণ যুক্তি ও শাস্ত্রীয় প্রমাণ দ্বারা উপস্থিত ব্রাহ্মণগণকে পরাস্ত করিলেন। শিবাই আচার্য্য তখন মুরারি নামক জনৈক মিথিলা নিবাসী দিগ্বিজয়ী পণ্ডিতকে আনয়ন করিলেন। কিন্তু হরিরাম ও রামকৃষ্ণ তাঁহাকেও পরাস্ত করিলেন। এই ব্যাপারে ব্রাহ্মণসমাজে মহা আন্দোলন উঠিল। শূত্র হইয়া ব্রাহ্মণকে দীক্ষার অপরাধে নরোত্তমকে বহু আক্রমণ করা হইয়াছিল। একান্ত নরোত্তম, হরিরাম ও রামকৃষ্ণকে অনেক নির্ধ্যাতন সহ করিতে হইয়াছিল। কিন্তু তাঁহারা অবিচলিতচিত্তে স্মীয় কর্তব্য সাধন করিতে লাগিলেন। হরিরাম,

রামকৃষ্ণ স্বগ্রাম ও নিকটবর্তী স্থানসমূহে বৈষ্ণবধর্ম প্রচার করিতে লাগিলেন।

কিছুদিনের মধ্যে হবিরাম ও রামকৃষ্ণের দৃষ্টান্তে নিকটবর্তী গঙ্গালা গ্রাম নিবাসী গঙ্গানারায়ণ চক্রবর্তী নামক একজন সচ্চরিত্র ও শাস্ত্রজ্ঞ ব্রাহ্মণ নরোত্তমের নিকট বৈষ্ণবধর্মে দীক্ষিত হন। এই সময়ে নরোত্তম গঙ্গানারায়ণের জন্ম গঙ্গালা আগমন করেন। সুযোগ পাইয়া গঙ্গানারায়ণ নরোত্তমেব নিকট দীক্ষাপ্রার্থী হইলেন। নরোত্তম ব্রাহ্মণগণের বিরোধের ভয় দেখাইয়া তাঁহাকে নিরস্ত করিতে চেষ্টা করেন। তদুত্তরে গঙ্গানারায়ণ যাহা বলিয়াছিলেন তাহা প্রশংসনীয় সংসাহসেব পরিচয়।

“চক্রবর্তী কহে তুমি কৃপা কর যারে।

সে কি হেন ভক্তিহীন বিপ্রে ভয় করে ॥”

(নঃ, বিঃ, ১৫৪ পৃঃ।)

নরোত্তম বলিলেন এখন এই প্রসঙ্গ থাক, আমাকে আজই খেতরি যাত্রা করিতে হইবে। যদি তুমি প্রকৃতই দীক্ষার জন্ম ব্যাকুল হইয়া থাক তাহা হইলে খেতরি আইস, সেখানে তোমাব দীক্ষাকার্য্য সম্পন্ন হইবে। গঙ্গানারায়ণ চক্রবর্তী পরদিনই খেতরি যাত্রা করিলেন এবং সেখানে নিষ্ঠার সহিত নরোত্তমের নিকট বৈষ্ণবধর্মে দীক্ষা গ্রহণ করেন।

এই সময়ে জগন্নাথ আচার্য্য নামক আর একজন সচ্চরিত্র ব্রাহ্মণ নরোত্তমের নিকট দীক্ষা গ্রহণ করেন। তিনি নিষ্ঠাবান শক্তি উপাসক ছিলেন। লিখিত আছে ভগবতীর আদেশে তিনি নরোত্তমের নিকট দীক্ষা প্রার্থী হন। তাঁহার ব্যগ্রতা দেখিয়া ঠাকুর মহাশয় তাঁহাকেও দীক্ষা দেন।

এই সকল শাস্ত্রজ্ঞ ও সচরিত্র ব্রাহ্মণের শূদ্রের নিকট দীক্ষা গ্রহণ করাতে হিন্দুসমাজে মহা ছলছুল হয়। ব্রাহ্মণগণ দলবদ্ধ হইয়া প্রতাপশালী রাজা নরসিংহের নিকট গিয়া বলিলেন, নরোত্তম শূদ্র হইয়া ব্রাহ্মণদিগকে দীক্ষা দিতেছে। আমাদের জাতিধর্ম বিনষ্ট হয়। আপনি আমাদের নেতা হইয়া চলুন; আপনার সম্মুখে আমরা তাহাকে বিচারে পরাস্ত করিয়া হিন্দুসমাজ রক্ষা করিব। নরসিংহ তাঁহাদের প্রস্তাবে সম্মত হইলেন। কিন্তু ব্রাহ্মণগণ খেতরির সন্নিকট আসার পর ভীত হইয়া প্রত্যাবর্তন করেন।

রাজা নরসিংহ অধ্যাপকদিগের নেতা রূপনারায়ণকে লইয়া পরদিন প্রাতে খেতরি গমন করিলেন। সেখানে নরোত্তমকে দর্শন করিয়া উভয়েই বিশেষ আকৃষ্ট হইলেন এবং আপনাদের অপরাধ স্বীকার করিয়া দীক্ষাপ্রার্থী হইলেন। নরোত্তম তাঁহাদিগকে কিছুদিন তথায় রাখিয়া ভক্তিধর্মে উপদেশ এবং অবশেষে দীক্ষা দেন। এখন হইতে রাজা নরসিংহ নরোত্তমের অন্তরঙ্গ ভক্ত হইলেন। তাঁহার মহিষী রূপমালাও নরোত্তমের নিকটে বৈষ্ণবধর্মে দীক্ষা গ্রহণ করেন। তিনি প্রতিদিন নিয়ম করিয়া লক্ষনাম জপ করিতেন।

রাজা নরসিংহ ব্যতীত আরও কয়েকজন প্রতাপশালী জমিদার এই সময়ে নরোত্তমের শিষ্য হন। এই সকল জমিদাররা অতিশয় দুর্বৃত্ত ছিলেন। কিন্তু নরোত্তমের শিষ্য হইয়া তাঁহাদের জীবনে পরিবর্তন আসে। এই সময়ে চাঁদরায় নামক একজন মহা প্রতাপশালী জমিদার এই অঞ্চলে রাজত্ব করিতেন। তাঁহার অধীনে বহু দস্য ছিল।

“মহাবলবান চাঁদরায় জমিদার।

দস্যুর প্রধান অতিশয় দুষ্টাচার।”

(নঃ বিঃ ১০ম বিলাস ।)

তাঁহার ভয়ে লোকে কাঁপিত । সম্ভবতঃ তিনি শক্তি উপাসক ছিলেন । কিরূপে বৈষ্ণবধর্মে তাঁহার অনুরাগ হয় তাহা বোঝা যায় না । নরোত্তম বিলাসে লিখিত আছে "তাঁহার দুর্বৃত্ততার জ্ঞান দেবী তাঁহাকে ব্রহ্মদৈত্যে দ্বারা ক্লেশ দেন ।

"অতি ক্রোধযুক্তা দেবী দেখিয়া দুর্গীত ।
ব্রহ্মদৈত্যে দ্বারে দুঃখ দিলা যথোচিত ॥
পুনঃ সেই দেবী দেখি জীবন সংশয় ।
আজ্ঞা কৈলা কর নরোত্তম পদাশ্রয় ॥
নরোত্তম মহাশয় অতি দয়াবান ।
নরক হইতে তোরে করিবেন ত্রাণ ॥
এঁছে স্বপ্নাদেশে চান্দরায় সেইক্ষণে ।
লইলা শরণ মহাশয়ের চরণে ॥
ত্রীঠাকুর মহাশয় দেখি মহা ক্লেশ ।
নিজগুণে করিলা শ্রীমন্ত উপদেশ ॥"

দশম বিলাস ।

এই বিবরণে মনে হয় দুর্বৃত্ত চাঁদরায় বায়ুরোগগ্রস্থ হইয়াছিলেন । তৎকালীন বিশ্বাস অনুসারে লোকে মনে করিল তাঁহাকে ব্রহ্মদৈত্যে আশ্রয় করিয়াছে । সম্ভবতঃ নরোত্তমের কৃপায় রোগমুক্তি হইয়ায় তাঁহার বৈষ্ণবধর্মে অনুরাগ জন্মে । নরোত্তমের উপদেশে তাঁহার জীবনে পরিবর্তন আসে । এখন হইতে তিনি দস্যবৃত্তি পরিত্যাগ করিয়া সৎপথ চলিতে লাগিলেন । কোন কারণে প্রদেশের মুসলমান শাসনকর্ত্তা তাঁহাকে বন্দী করিয়া লইয়া যান । সেখানে তাঁহার প্রতি নানা অত্যাচার হইয়াছিল । চাঁদরায় সহিষ্ণুতার সহিত সে সকল সহ করেন । কথিত আছে মুসলমান শাসনকর্ত্তা চাঁদরায়কে হস্তীপদতলে

নিষ্কেপ করিতে আদেশ করেন। কিন্তু হস্তী তাঁহাকে বধ না করিয়া পলায়ন করে। অবশেষে শাসনকর্তা তাঁহার সুহৃৎতা ও ধর্ম্যভাব দেখিয়া চাঁদরায়কে মুক্তি দেন। কারামুক্ত হইয়া চাঁদরায় একেবারে খেতরি গমন করেন। সেখানে গৌরাজ প্রাচ্যনে নরোত্তমের পদতলে পড়িয়া অনেক ক্রন্দন করেন। তাঁহার এই পরিবর্তন দেখিয়া লোকে বিস্মিত হইল। চাঁদরায়ের পূর্ব অমুচরগণের মধ্যেও অনেকে তাঁহার দৃষ্টান্তে ভক্তিধর্ম গ্রহণ করে।

হরিচন্দ্র রায় নামে আর একজন দস্যু জমীদারও এই প্রকারে নরোত্তমের শিষ্য হইয়াছিলেন।

“হরিচন্দ্র রায় নামে দস্যু একজন।

গুণ গুনি লৈলা মহাশয়ের চরণ ॥

দীক্ষামন্ত্র দিয়া তাঁরে করিলা উদ্ধার।

শেষে হরিদাস নাম হইল তাঁহার ॥

হইলেন ছলভ ভক্তির অধিকারী।

ত্যাগ কৈলা সে জলা পঙ্কের জমিদারী ॥”

দশম বিলাস।

এইরূপে নরোত্তম ঠাকুর উত্তরবঙ্গে ভক্তিধর্মের শ্রোত প্রবাহিত করিতে লাগিলেন। মধ্যে মধ্যে শ্রীনিবাস আচার্য্য যাজগ্রাম হইতে খেতরী আগমন করিতেন। তিনি শেষবার যখন খেতরী আসিয়াছিলেন তাঁহার সঙ্গে নিত্যানন্দ পুত্র বীরভদ্রও আগমন করিয়াছিলেন। বুধরী প্রভৃতি নিকটবর্তী স্থান হইতে অনেক ভক্ত আসিয়াছিলেন। এতদুপলক্ষে খেতরীতে একটা ক্ষুদ্র উৎসব হইয়াছিল। এই শ্রীনিবাসের শেষ খেতরী আগমন। ইহার পর তিনি বৃন্দাবন যান। এই সময়ে রামচন্দ্র কবিরাজও বৃন্দাবন গিয়াছিলেন। তাঁহারা আর বঙ্গদেশে

কিরেন নাই। অল্পদিনের মধ্যে উভয়েই উথার দেহত্যাগ করেন।

ইহার পরে নরোত্তম, দীর্ঘকাল জীবিত ছিলেন না। রামচন্দ্র ও ত্রীনিবাসের বিরহে তিনি অতিশয় বেদনা পাইয়াছিলেন। নরোত্তমের মৃত্যু সম্বন্ধে বৈষ্ণবগ্রন্থে কিছু অলৌকিক ব্যাপার বর্ণিত আছে। নরোত্তমের জীবনচরিত লেখক নরহরি চক্রবর্তী নরোত্তমবিলাসে লিখিয়াছেন ত্রীনিবাস ও রামচন্দ্রের মৃত্যু সংবাদ পাওয়ার কিছুদিন পরে ঠাকুর মহাশয় গঙ্গা স্নানের জন্য গাঙ্গুলী আগমন করেন। সেখানে গঙ্গাতীরে অকস্মাৎ তাঁহার জ্বর হইল। তিন দিন বাকুরোধের পরে তাঁহার দেহ প্রাণশূন্য হইল। শিষ্যগণ তাঁহাকে চিতায় উঠাইলেন। ব্রাহ্মণগণ বলিতে লাগিল যেমন শূদ্র হইয়া ব্রাহ্মণকে শিষ্য করিয়াছিল তাহার উপযুক্ত শাস্তি হইল; মৃত্যু সময়ে গঙ্গানারায়ণ ব্রহ্মনামও লইতে পারিল না। এই প্রকার বিক্রম বাক্য শুনিয়া গঙ্গানারায়ণ চিতার নিকট গিয়া করযোড়ে বলিতে লাগিলেন, এই পাষণ্ডীগণ তোমার নিন্দা করিতেছে। নিজ-গুণে ইহাদিগের প্রতি রূপাদৃষ্টি কর। গঙ্গানারায়ণের ব্যাকুল প্রার্থনায় ঠাকুর মহাশয় পুনরায় জীবিত হইলেন। এই বিবরণ প্রামাণিক বলিয়া মনে হয় না। তবে এই পর্যন্ত হইতে পারে যে ঠাকুর মহাশয় কিছুকাল মৃতবৎ থাকিয়া পুনরায় চেতনালভ করিয়াছিলেন। নিম্নক ব্রাহ্মণগণ তাঁহাকে পুনর্জীবিত দেখিয়া ভীত হইয়া তাঁহার শরণ গ্রহণ করিল। তাহারা তাঁহার নিকট দীক্ষা গ্রহণ করিবার জন্য ব্যাকুল হইল। ঠাকুর মহাশয় তাহাদিগকে খেতরী আশিতে বলিয়া সেইদিনই খেতরী যাত্রা করেন।

ইহার পরেও তিনি আর কিছুদিন জীবিত ছিলেন। নিম্নক

ব্রাহ্মণগণ খেতরী আসিলে তাহাদিগকে বৈষ্ণবধর্মে দীক্ষিত করেন। তৎপরে তিনি বৃধি হইয়া পুনরায় গাঙ্গীলা গমন করেন। সেখানে গঙ্গাস্নান করিয়া গঙ্গাজলে বসিলেন এবং রামকৃষ্ণ ও গঙ্গানারায়ণকে স্বীয় গাত্র মার্জন করিতে বলিলেন। কিন্তু তাঁহারা গাত্রমার্জন করিতে আরম্ভ করিতেই তাঁহার দেহ ছুঙ্কের শ্রায় গঙ্গাজলে মিশিয়া গেল।

“দৌহে কিবা মার্জন করিব পরশিতে।

হৃৎ প্রায় মিশাইলা গঙ্গার জলেতে ॥”

নঃ বিঃ, একাদশ বিলাস।

এই ব্যাপারও অলৌকিক। পরবর্তী সময়ে ভক্তগণের কল্পনা। কিন্তু ইহাতে নরোত্তমের মহত্ত্ব বর্দ্ধিত হয় নাই। তাঁহার মহত্ত্ব অসাধারণ ত্যাগ, অদ্ভুত বৈরাগ্য, অকপট ভক্তি, মধুমাধা সঙ্কীর্ণন ও বৈষ্ণবধর্ম প্রচারে ব্যাকুল উৎসাহে।

নরোত্তম একজন স্বভাব কবিও ছিলেন। তাঁহার সরল স্থূলম্বিত পদাবলীর জন্য তিনি বঙ্গীয় কবিগণের মধ্যেও উচ্চস্থান পাইবার যোগ্য। অনেকগুলি ক্ষুদ্র ক্ষুদ্র কবিতাপুস্তক নরোত্তমের লিখিত বলিয়া বৈষ্ণবমণ্ডলীতে সমাদৃত হয়। • তন্মধ্যে নরোত্তম ~~নাসের~~ প্রার্থনা জনসাধারণের সু-পরিচিত। তাঁহার রচিত ৪৮টি প্রার্থনা দেখিতে পাওয়া যায়। এগুলির ভাষা যেমন স্থূলম্বিত ভাবও তেমনি উন্নত। পংক্তিতে পংক্তিতে গভীর ব্যাকুলতা উচ্ছ্বসিত হইয়া পড়িতেছে। একটি প্রার্থনা উদ্ধৃত করিয়া আমরা এই প্রসঙ্গ সমাপ্ত করিব।

গৌরাক বলিতে হবে পুলক শরীর।

হরি হরি বলিতে নয়নে বহে নীর ॥

আর কবে নিতাইটাদ করুণা করিবে ।
 সংসার বাসনা মোর কবে তুচ্ছ হবে ॥
 বিষয় ছাড়িয়ে কবে শুদ্ধ হবে মন ।
 কখে আমি হোরিব সেই শ্রীবন্দাবন ॥
 রূপ রঘুনাথ পদে হইব কাকুতি ।
 কবে আমি বুঝিব সে ষ্ণুগল পিরীতি ॥
 রূপ রঘুনাথ পদে রহুক মোর আশ ।
 প্রার্থনা করয়ে সদা নরোত্তম দাস ॥

এখানে দেখা যাইতেছে আজীবন সংসারত্যাগী কঠোর সাধক
 নরোত্তম দাস পুনরায় প্রার্থনা করিতেছেন “সংসার বাসনা মোর কবে
 তুচ্ছ হবে ।” বৈরাগ্যের কি উচ্চ আদর্শ! মতে ঐক্য না হইলেও
 নরোত্তমের এই উচ্ছ্বসিত ব্যাকুলতা পীপাসু হৃদয়কে স্পর্শ না করিয়া
 যায় না ।

গৌড়ীয় বৈষ্ণবধর্মের অবসাদ

গৌড়ীয় বৈষ্ণবধর্ম যেমন শীতকালের ফুলের মত অল্পদিনের মধ্যেই ফুটিয়া উঠিয়াছিল, তেমনি শীঘ্রই ইহা ম্লান হইয়া গিয়াছিল। ইহার সৌন্দর্য্য ও স্নগন্ধ দীর্ঘকাল স্থায়ী হয় নাই। ভারতের অন্যান্য ধর্মসংস্কারের ন্যায় গৌড়ীয় বৈষ্ণবধর্ম কিছুদিন প্রবলবেগে বর্দ্ধিত হইয়া অল্পদিনের মধ্যে হীনবল হইয়া পড়িয়াছিল। গৌড়ীয় বৈষ্ণবধর্মের অবসাদ জগতের ধর্মইতিহাসে একটি গভীর আক্ষেপজনক ঘটনা। ইহা জগতের জগৎ আধ্যাত্মিক জীবনের একটি উচ্চ আদর্শের সংবাদ লইয়া আসিয়াছিল। তাহা প্রেমভক্তি। ভগবান মানবাত্মাকে ভালবাসেন। মানব ভগবানকে ভালবাসে। শুধু তাহাই নহে, ভগবান মানবকে ভালবাসেন। এই ভালবাসা প্রকাশের জগৎ রাধাকৃষ্ণের রূপক কল্পনা। কৃষ্ণ অর্থাৎ পরমাত্মা, রাধা অর্থাৎ জীবাত্মার জগৎ ব্যাকুল। ভগবানের অদ্ভুত ভালবাসা অসুভব করিয়া মানব তাঁহার প্রেমে মগ্ন হইবে ইহাই গৌড়ীয় বৈষ্ণবধর্মের প্রধান শিক্ষা। গভীর পরিতাপের বিষয় এই শিক্ষা জগৎকে দেওয়া দূরে থাকুক, বৈষ্ণব মণ্ডলীতেও দীর্ঘকাল স্থায়ী হইতে পারে নাই। অল্পদিনের মধ্যেই গৌড়ীয় বৈষ্ণবধর্ম ম্লান ও বিকৃত হইয়া পড়িল।

গৌড়ীয় বৈষ্ণবধর্মের অবসাদের বীজ ইহার শিক্ষা ও সাধনার মূলেই নিহিত ছিল। গৌড়ীয় বৈষ্ণবধর্ম ধর্মসাধনে ভাবকে উচ্চ স্থান দিয়াছিলেন। শ্রীচৈতন্যদেব স্বয়ং গভীর জানী হইলেও উত্তরকালে জানীকে অবহেলা করিয়াছিলেন। বৈষ্ণবধর্মে ইহা একটি প্রধান ভুল। ভক্তি

ধর্মরাজ্যে বহু মূল্যবান পদার্থ, তাহাতে সন্দেহ নাই। কিন্তু ইহা অতি সহজেই বিকৃত হইয়া যাইতে পারে। সুকোমল পুষ্পের গায় সতর্ক রক্ষা না করিলে ভক্তি ম্লান হইয়া যায়। গৌড়ীয় বৈষ্ণবধর্মে তাহাই হইয়াছিল। শ্রীচৈতন্যের মধুরভক্তি পরবর্তী সময়ে ভাবুকতাতে পরিণত হইয়াছিল। ভক্তি ভাবপ্রধান। কিন্তু ভাবই ইহার জীবন নয়, বাহ্য প্রকাশ মাত্র। পরবর্তীকালে বৈষ্ণবমণ্ডলীতে ভক্তি প্রাণশূন্য হইয়া কৃত্রিম ভাবুকতাতে পর্যাবসিত হইয়াছিল। ভক্তি অতি সুদুর্লভ; বহু ভাগ্যে, বহু সাধনায় তাহা লাভ হয়। উত্তরকালে সাধারণ বৈষ্ণবগণ সে সাধনা না করিয়াই ভক্তির বাহ্য প্রকাশ অনুকরণ করিতেন। শ্রীচৈতন্যদেব ও তাঁহার সঙ্গীগণ ভক্তিতে অজ্ঞান হইয়া পড়িতেন। তাঁহাদের অনুকরণ করিতে গিয়া পরবর্তী সময়ে অনেক বৈষ্ণব কৃত্রিম 'দশায়' সেইরূপ ভাব দেখাইত।

গৌড়ীয় বৈষ্ণবধর্মের প্রধান সাধন সঙ্কীর্ণন। ধর্মভাব উদ্ভেকের পক্ষে সুললিত সঙ্কীর্ণন একটি প্রধান সহায়। বৈষ্ণবগণ খোল করতাল বাদ্য সহকারে সঙ্কীর্ণনের সৃষ্টি করিয়া ধর্মভাব জাগরণের একটি উৎকৃষ্ট উপায় আবিষ্কার করিয়াছেন। কিন্তু ইহা যদি হৃদয়কে স্পর্শ না করিয়া কেবলমাত্র কর্ণের তৃপ্তি সাধন করে তাহা হইলে তাহার সদ্ব্যবহার হয় না। উত্তরকালে বৈষ্ণবগণের সঙ্কীর্ণন তাল, লয়, মানে অধিক হইতে অধিকতর সুললিত হইয়াছিল। খোল করতালের বাদ্যে শরীর রোমাঞ্চিত হইতে পারে। কিন্তু তাহা হৃদয়কে স্পর্শ নাও করিতে পারে। সঙ্কীর্ণনের প্রাণ ভক্তি। উত্তরকালে সঙ্কীর্ণন কেবলমাত্র ভক্তিবিক্ত সুললিত সঙ্গীতে পরিণত হইয়াছিল। উৎকৃষ্ট জিনিস সহজেই নষ্ট হইয়া যায়। ভাব ও ভক্তি অর্গের জিনিস। কিন্তু ইহা সহজেই ম্লান হইয়া যাইতে পারে। গৌড়ীয় বৈষ্ণবমণ্ডলীর লক্ষ্য অতি

উচ্চ ছিল। কিন্তু এই লক্ষ্য সাধনের জন্য যে সংগ্রাম চাই তাহা সহজ-সাধ্য নহে। শ্রীচৈতন্যের ব্যাকুলতা, নিত্যধর্মের বালসুলভ সরলতা, রামানন্দের পবিত্রতা, রূপসনাতনের নিষ্ঠা, নরোত্তমের বৈরাগ্য সাধারণের মধ্যে আশা করা যায় না। বৈষ্ণবধর্মের প্রথমদিকে যেকোন বহুসংখ্যক উচ্চ শ্রেণীর ভক্ত ও সাধক জন্মগ্রহণ করিয়াছিলেন পরবর্তী কালে সেরূপ দেখা যায় না। যোগ্য নেতার অভাবে গৌড়ীয় বৈষ্ণব-মণ্ডলী ক্রমেই দুর্বল হইয়া পড়িতে লাগিল।

ভক্তির সঙ্গে সঙ্গে জ্ঞানচর্চার অভাব বৈষ্ণবধর্মের অবসাদের একটি প্রধান কারণ। গৌড়ীয় বৈষ্ণবমণ্ডলী জ্ঞানকে অবজ্ঞা করিয়া মহাত্ম্য করিয়াছিলেন। ধর্মরাজ্যে ভক্তির স্থান উচ্চ হইলেও জ্ঞানকে অবজ্ঞা করা যায় না। জ্ঞান ব্যতীত ভক্তি অন্ধবিশ্বাস ও কুসংস্কারে পরিণত হইয়া যায়। গৌড়ীয় বৈষ্ণবমণ্ডলীতে জ্ঞানকে উপেক্ষা করার কুফল অল্পসময়ের মধ্যেই দেখিতে পাওয়া গিয়াছিল। গৌড়ীয় বৈষ্ণব মণ্ডলীতে জ্ঞানকে শুধু অবহেলা করা হয় নাই, কিন্তু নিন্দা করা হইয়াছিল। ভক্তির মাহাত্ম্য কীর্তন করিতে গিয়া বৈষ্ণব আচার্যগণ জ্ঞানকে হীন করিয়াছিলেন। ইহার ফল হইয়াছিল যে অল্পদিনের মধ্যেই বৈষ্ণবধর্ম অবতার বাদ, নরপূজা, গুরুবাদ প্রভৃতি অনর্থে জড়িত হইয়া পড়িল। অন্ধ ভক্তি হইতে বিবিধ কুসংস্কারের জন্ম হইয়াছিল। শ্রীচৈতন্য নিত্যানন্দ প্রভৃতিকে ঈশ্বরের অবতার বলিয়া গ্রহণ ও প্রচার করা হইয়াছিল। তাঁহাদের মৃত্যু হইতে না হইতেই তাঁহাদের মূর্তি-পূজা আরম্ভ হইয়াছিল। এইখানেই শেষ নয়। বৈষ্ণব গুরুদিগকেও ঈশ্বরোচিত পূজা দেওয়া হইত। গুরুগণকে ঈশ্বর বা শ্রীচৈতন্যের অবতার বলিয়া মনে করা হইত। তাঁহাদের চরিত্রের প্রতি দৃষ্টি দেওয়া হইত না। অন্ধভক্তিতে তাঁহাদিগকে ঈশ্বরের স্থায় পূজা করা হইত।

গৌড়ীয় বৈষ্ণবমণ্ডলীতে গুরুবাদের বিষময় ফল পূর্ণমাত্রায় লক্ষিত হয়। জ্ঞানের অবজ্ঞার সঙ্গে সঙ্গে গৌড়ীয় বৈষ্ণবমণ্ডলীতে শিক্ষার প্রতি অমনোযোগ আসিয়াছিল। অবশ্য সে যুগই অন্ধকারের যুগ। সে সময়ে ভারতবর্ষের সর্বত্রই শিক্ষার অভাব। কিন্তু বৈষ্ণবমণ্ডলীতে ইহা অধিক পরিমাণে লক্ষিত হয়। শিক্ষার অভাব গৌড়ীয় বৈষ্ণব মণ্ডলীর অধঃপতনের একটি প্রধান কারণ। বিশেষতঃ শিক্ষার অভাবে ভেদধারী বৈষ্ণব সম্প্রদায়ের বিশেষ দুর্গতি হইয়াছে। নানা শ্রেণীর নানা অবস্থার লোককে গ্রহণ করা হয়, কিন্তু তাহাদের শিক্ষার কোন ব্যবস্থা নাই। শিক্ষার উপযুক্ত ব্যবস্থা হইলে গৌড়ীয় বৈষ্ণবমণ্ডলী এখনও উন্নত হইতে পারে।

জ্ঞানের অভাব অপেক্ষা নৈতিক শিথিলতা গৌড়ীয় বৈষ্ণবমণ্ডলীর অধিক অনিষ্ট করিয়াছিল। বৈষ্ণবগণ ভাবুকতাকে প্রশ্রয় দিতে গিয়া একদিকে যেমন জ্ঞানকে অবহেলা করিয়াছিলেন সেইরূপ নৈতিক বিশুদ্ধতার দিকেও মনোযোগ দেন নাই। স্বয়ং চৈতন্যদেবের নৈতিক অনাবিলতার প্রতি তীক্ষ্ণ দৃষ্টি ছিল। কিন্তু তাহার অনুবর্তীগণ সে দিকে তেমন মনোযোগ দেন নাই। আমরা দেখিয়াছি জীলোকের সাংস্কৃতিক বাক্যালাপের জন্য শ্রীচৈতন্য ছোট হরিদাসকে চিরদিনের জন্য বর্জন করিয়াছিলেন। তিনি তাহার ভক্তগণের জীবনে উচ্চ নৈতিক আদর্শ দেখিতে চাহিতেন। কিন্তু উত্তরকালে সে আদর্শ রক্ষিত হয় নাই। শ্রীচৈতন্যদেবের কঠোর বৈরাগ্য পরবর্তী সময়ে গৌড়ীয় বৈষ্ণব মণ্ডলীতে স্থান পায় নাই। বৈষ্ণবধর্ম বৈরাগ্যের ধর্ম না হইয়া ভোগের ধর্ম হইয়াছিল। বৈষ্ণবগণ গৃহ পরিবারে থাকিয়া ধর্মসাধনে প্রবৃত্ত হইয়াছিলেন। কিন্তু এ পথ বড় কঠিন। শীঘ্রই বৈরাগ্যের আদর্শ তুলিয়া তাহারা গৃহস্থে মগ্ন হইয়াছিলেন। বৈষ্ণব নেতাগণ নৈতিক

আদর্শ অক্ষুণ্ণ রাখিতে উপযুক্ত সাবধানতা অবলম্বন করেন নাই। স্বয়ং নিত্যানন্দ দুইটি বিবাহ করিলেন এবং ঝলকারাদি বহুমূল্য বিলাস সামগ্রী ব্যবহার করিতে আরম্ভ করিয়াছিলেন। তাঁহার দৃষ্টান্তে সাধারণ বৈষ্ণবেরাও ভোগের শ্রোতে গা ঢালিয়া দিয়াছিল। গুরুগণ অসঙ্কোচে শিষ্যদিগের নিকট হইতে উপঢৌকনাদি গ্রহণ করিতেন। উত্তরকালে এই প্রথার অতিশয় অপব্যবহার হইয়াছিল। ক্রমে দুর্নীতি অসদাচার, বিলাসিতা, সাংসারিকতা প্রভৃতিতে গৌড়ীয় বৈষ্ণবমণ্ডলী কলুষিত হইয়াছিল।

গৌড়ীয় বৈষ্ণবমণ্ডলীর নৈতিক অধঃপতনের একটি কারণ বৈষ্ণব সাহিত্য। প্রেমভক্তির ব্যাখ্যা করিতে গিয়া বৈষ্ণব কবিগণ অতিমাত্রায় শারীরিক উপমার সাহায্য গ্রহণ করিয়াছিলেন। রাধা-কৃষ্ণের প্রেম বর্ণনা করিতে গিয়া তাঁহারা অবাধে রক্তমাংসের ভাষা ব্যবহার করিয়াছেন। ভক্তগণ যেভাবেই তাহা গ্রহণ করুন, সাধারণ লোকের নিকট তাহা বিষময় ফল উৎপাদন করিয়াছে। বৈষ্ণব সাহিত্যে কাম ও প্রেমের ব্যবধান রক্ষিত হয় নাই। এইজন্য বৈষ্ণব সাহিত্য অশ্লীলতায় দূষিত। অসচ্চরিত্র যুবকগণের মুখে বৈষ্ণবকবিতা অতি কদর্যভাবে ব্যবহৃত হয়। বৈষ্ণব সাহিত্যে রক্তমাংসের ভাষা অবলম্বন করিয়া নৈতিক আদর্শের বিশেষ খর্ব করিয়াছে। তাহা দ্বারা বৈষ্ণবমণ্ডলীর অধঃপতন সহজ হইয়াছে। ধর্মের পথ অতি তীক্ষ্ণ, শাণিত ক্ষুরধারের ন্যায়। দৈহিক ভোগ মানব চরিত্রে স্বভাবতই অতি প্রবল। ধর্মের কার্য তাহাকে সংযত করা। তৎপরিবর্তে যদি তাহার প্রশ্রয় দেওয়া হয় তাহার ফল ত বিষময় হইবেই। নীতিই সমাজের প্রাণ। অতি সন্তর্পণে নৈতিক আদর্শ সমাজ মধ্যে অক্ষুণ্ণ রাখা আবশ্যিক। কার্যো, ভাষায়, ভাবে,

ইঙ্গিতে নৈতিক পবিত্রতা ক্ষুণ্ণ হইতে দিলে সমাজের ঘোর অনিষ্ট অবশ্যস্তাবী। গৌড়ীয় বৈষ্ণবমণ্ডলী এই সহজ সত্যের প্রতি যথেষ্ট মনোযোগ দেন নাই। তাহার ফলে অল্পদিনের মধ্যেই বৈষ্ণব-মণ্ডলীতে নৈতিক আবিলতা আসিয়াছিল। চবিত্রহীন পুরুষ ও নারীবাদিগকে অবাধে বৈষ্ণবমণ্ডলীতে স্থান দেওয়া হইয়াছিল। উপযুক্ত সামাজিক শাসনের ব্যবস্থা হয় নাই। অশিক্ষিত রিপু-পরতন্ত্র লোকদিগকে অযথা স্বাধীনতা দেওয়া নিবাপদ নহে। এই শ্রেণীর লোককে দৈহিক উত্তেজনাপূর্ণ সঙ্গীতাদি, অসঙ্কোচে গান ও শ্রবণ করিতে দিবার সুবিধা দিয়া গৌড়ীয় বৈষ্ণবসমাজের অপবিত্রতার দ্বাব উদ্ঘাটন করিয়া দেওয়া হইয়াছিল। ইহার ফলে গৌড়ীয় বৈষ্ণবমণ্ডলীর সামাজিক আবহাওয়া কলুষিত হইয়া পড়িল।

একদিকে যেমন সকল শ্রেণীর লোকদিগকে অবাধে বৈষ্ণব-মণ্ডলীতে গ্রহণ করা হইয়াছিল, অপরদিকে তেমনি অযোগ্য লোকদিগকে শাসন ও সংস্কারের উপযুক্ত ব্যবস্থা হয় নাই। শ্রীচৈতন্যপ্রমুখ বৈষ্ণবনেতাগণ নীল, পতিত, অধম মূর্খদিগের উদ্ধারের সঙ্কল্প গ্রহণ করিয়াছিলেন। ইহা অতীব প্রশংসনীয় সে বিষয়ে সন্দেহ নাই। কিন্তু ইহঁদের সঙ্গে সঙ্গে সমাজ মধ্যে অধম পতিত পাপীগণের সংশোধন ব্যবস্থা থাকা আবশ্যিক। মানবচরিত্র অতি জটিল। শুভকণে মানব হৃদয়ে সাধু সঙ্কল্প আসিতে পারে, কিন্তু তাহা রক্ষা করা সহজসাধ্য নহে। জগাই মাধাইয়ের পরিবর্তন এক মুহূর্তে হইয়াছিল। কিন্তু তাহার পরে কঠোর শাসন ও সাধনে তাঁহারা পরম সাধু হইতে পারিয়াছিলেন। দৃঢ় সঙ্কল্প ও সাবধিত সাধনার অভাবে পুরাতন অভ্যাস সহজেই পুনরাগমন করে। বৈষ্ণব-মণ্ডলীতে ইহার যথোপযুক্ত ব্যবস্থা হয় নাই। তাঁহারা অধম পতিতের

অন্য দ্বার উন্মুক্ত করিয়াছিলেন, কিন্তু তাহার সঙ্গে সঙ্গে প্রথম যুগের ভক্তগণ তাহাদের আধ্যাত্মিক ও নৈতিক উন্নতির জন্য যথেষ্ট ব্যবস্থা করিয়াছিলেন। অগাই মাধাইয়ের উন্নতির জন্য উপযুক্ত শাসন দেওয়া হইয়াছিল। তাহাদের মনে গভীর অনুতাপ আসিয়াছিল। প্রথম জীবনে যে সকল অন্যায়ে কাজ করিয়াছিলেন তাহা স্থালনের অন্তরে অস্তুরে ব্যাকুল আকাজক্ষা জাগিয়াছিল। তাহা সম্ভব না হওয়াতে চৈতন্যদেব ব্যবস্থা করিয়াছিলেন গঙ্গাতীরে বসিয়া ষাঁহারা স্নান করিতে আসিবেন সকলের সেবা করিবে। নিত্যানন্দ দম্ভাদিগকে গ্রহণ করিয়াছিলেন, কিন্তু সঙ্গে সঙ্গে বলিয়াছিলেন—

শুন বিপ্র ! যতেক পাতক কৈলা তুমি ।

আর যদি না কর সে সব নিলুঁ আমি ॥

পরহিংসা ডাকা চুরি সব অনাচার ।

ছাড় গিয়া সব তুমি, না করিহ আর ॥

ধর্ম পথে গিয়া তুমি লহ হরিনাম ।

তবে তুমি অন্তরে করিবা পরিত্রাণ ।

যত চোর দম্ভ্য সব ডাকিয়া আনিয়া ।

ধর্মপথ সভারে লওয়াও তুমি গিয়া ॥

চৈঃ ভাঃ, অস্ত্যখণ্ড, ৬ষ্ঠ অধ্যায় ।

উত্তরকালে এই প্রকার শাসনের ব্যবস্থা হয় নাই। উন্মুক্ত দ্বার-পথে হিন্দু সমাজের পরিত্যক্ত আবর্জনা অবাধে বৈষ্ণবমণ্ডলীতে প্রবেশলাভ করিয়াছিল। কিন্তু অনুতাপানলে দক্ষ করিয়া তাহাদিগকে বিস্কৃত করিয়া লইবার ব্যবস্থা ছিল না। পরবর্তী সময়ে বৈষ্ণব-মণ্ডলী সে অনুপ্রাণনাশক্তি হারাইয়াছিল। প্রথম যুগে যেমন দলে দলে পুত্চরিত্র অনুপ্রাণনাময় ভক্তের আবির্ভাব হইয়াছিল উত্তরকালে

সে শ্রোত বন্ধ হইয়া গিয়াছিল। নরোত্তমদাসের পরে গৌড়ীয় বৈষ্ণব-মণ্ডলীতে আর অধিক প্রাণপণালী আচার্যা ও ব্যাকুলহৃদয় ভক্ত দেখিতে পাওয়া যায় না। এই কাবণে বৈষ্ণবমণ্ডলী হীনবল হইয়া পড়িয়াছিল। বৈষ্ণবসমাজে আধ্যাত্মিক অগ্নি স্তান হইয়াছিল। প্রাচীন সমাজের পরিত্যক্ত আবর্জনাবাশি আসিয়া বৈষ্ণবমণ্ডলীর আধ্যাত্মিক প্রভাব আরও খাবাপ করিয়াছিল। ইহারা কোন আধ্যাত্মিক আকাঙ্ক্ষা লইয়া বৈষ্ণবমণ্ডলীতে যোগদান কবে নাই। ব্যক্তিগত স্বার্থ বা সামাজিক স্থান পাইবার জন্য নূতন সমাজে যোগ দিয়াছিল। ইহাতে বৈষ্ণবমণ্ডলীর নৈতিক আবির্ভাব আরও বৃদ্ধি পাইয়াছিল।

জ্ঞান ও নীতির অভাব ব্যতীত ভাবের সাধনায় বৈষ্ণবমণ্ডলী চরিত্রের দৃঢ়তায় হীন হইয়াছিল। বৈষ্ণবগণ যে পরিমাণে হৃদয়ের কোমল গুণগুলি ফুটাইয়া তুলিতে চেষ্টা করিয়াছিলেন, চরিত্রের দৃঢ়তা অর্জনে সেই পরিমাণ মনোযোগ দেন নাই। চরিত্রের পূর্ণতাব পক্ষে একদিকে যেমন কোমলভাবের প্রয়োজন অপরদিকে দৃঢ়তারও সেই ভাবে আবশ্যিক। এতদ্বিন্ন ভারতেব জাতীয় দুর্বলতা ত ছিলই, এই সমুদ্র মিলিত হইয়া গৌড়ীয় বৈষ্ণবধর্মের শীঘ্রই অবনতি আনিয়াছিল। শ্রীনিবাস আচার্যা ও নরোত্তমদাসের পরে গৌড়ীয় বৈষ্ণবধর্ম ক্রম-ক্রমে অবনতির দিকে চলিয়াছিল। তবে অন্ধকারের মধ্যে আলোকরশ্মি বিরল নহে। বৈষ্ণবমণ্ডলীতে সময়ে সময়ে অনেক স্যধুর জন্ম হইয়াছিল। এখনও বৈষ্ণবমণ্ডলী নিতান্ত অবহেলা পাত্র নহে। বিশেষতঃ সম্প্রতি বৈষ্ণবমণ্ডলীর উন্নতির চেষ্টা হইতেছে। শ্রীচৈতন্যদেব প্রবর্তিত এই ধর্মের উন্নতি সর্বতোভাবে প্রার্থনীয়।

